

Nunatsiavut kavamanga

PINGAJUANI KATIMANITSUAT

Nunatsiavummi.

**UKIATSÂMI ITSIVANNINGINNI KATIMANNET 1ST AMMA 2ND
ITSIVAKATIGENNET NOVEMBERA 18-19, 2014**

kAVAMALIGIJET

KAUJITITSIUTINGA

PARLIAMENTARY REPORT

Ilaujut:

UKÂLATTI Nunatsiavut katimajitsuanginni, kiggatuttik Nainimiunik, Nittunattuk Sean Lyall

AngajukKânga Nunatsiavut, Nittunattuk Sarah Leo

AngajukKâp Tullianejuk Minister Nunatsiavut Suliagigialinginni, kiggatuttik Makkovimmiunik Kate Mitchell

Minister Nunaliginnimut amma Piviannatugijanginnik, kiggatuttik Rigolettimiunik, Nittunattuk Darryl Shiwak

Minister kenaujaliginnimut, Inuliginnimut amma Kagitaujaliginimut, kiggatuttik Canadami Angnigususonik, Nittunattuk Daniel Pottle

Minister IlikKusiliginnimut, Pingguatuliginnimut amma Niuggutitsinimmut, kiggatuttik Nainimiunik, Nittunattuk Richard Pamak

Minister Inositsiagittotitsinimmut amma Inugusiujunut Pivalliagutinnut, kiggatuttik Hopedale, Nittunattuk Gregory Flowers

Minister Ilinnianiimmut amma kenaujaliugutinnut Pivalliagutaujuni, kiggatuttik Upper Lake Melville, Nittunattuk Patricia Kemuksigak

kiggatuttik KipukKamiunik , Tyler Edmunds

kiggatuttik Upper Lake Melville, Roy Blake

AngajukKâk Nainimi, Julius Dicker

AngajukKâk KipukKami, Diane Gear

AngajukKâk Makkovimmi, Herb Jacque

AngajukKâk Hopedale, James Tuttau

Itsivautalik NunaKâtiget Inuit Nunalet kuaparesangani, Gary Mitchell

Itsivautalik Sivunivut Inuit Nunalet kuaparesangani, Trudy Mesher-Barkman

Ministeriup Tullianejuk Nunatsiavut Secretariat -Nenitsijik AngajukKaunet katimajinginni, Isabella Pain

Ministeriup Tullianejuk Nunaliginnimut amma Piviannatugijanginni, Carl McLean

Aulatsijik Maligatsaligijinni, Loretta Michelin

Tullianejuk Ministeriup Nunatsiavut Suliagigialinginni, Toby Andersen

Tullianejuk Ministeriup Ilinniammut amma kenaujatigut Pivalliagutaugunnatunut Tim McNeill

UKaudjigijik katimajitsuani, Mary Sillett

Tamânengitut:

Tullianejuk Ministeriup kenaujaliginnimut, Inuliginnimut amma Kagitaujaliginnimut, Rexanne Crawford

Aulatsijik Tusagatsaliginnimut, Bert Pomeroy

Tullianejuk Ministeriup Inositsiagittotitsigasuannimut Inogusiujuillu Pivalliagutinginnut, Michelle Kinney

Tullianejuk UKâljaiup Nunatsiavut katimajitsuanginni, kiggatuttik Canadami Angnigusugunnatunik, Nittunattuk Patricia Ford

Tullianejuk Ministeriup IlikKusiliginnimut, Pingguanimmut amma Niuggutitsinimmut, Dave Lough

AngajukKâk Rigolettimi, Jack Shiwak

Nunatsiavut katimatsuaningit pigiasilauttut piusiliuttaulutik Inuktitut Kallunâtutillu.

November 18- 19, 2014

katimannik pigialauttut 9:00 a.m. November 18, 2014

Ullunga: November 18, 2014 Ulluk 1

UKÂLATTI: Nunatsiavut katimajitsuangit, amma apigillugu Wilson Jararuse ammaigajammangât tutsianikkut.

MR. JARARUSE: (Tutsiujjuk piusiliuttaugani)

UKÂLATTI: Nakummek, Wilson. Sivungagut *Tilitjigutet Ullukut*, ailikKâgata
katimautitsamut two, pikKujivunga katimajitsuanik, uKâgalâgunnaguma
naittumik sulijugillugit Labradorimi Inuit ilauKatausimajut Canadami
Unatattuligijinginnik. Kanuigijaungituk katimajitsuanot?

KATIMAJITSUAT: Aye.

UKÂLATTI: AukâttuKavâ? Nakummek. Kaujimagatsi, ilangit uKasot anginitsaKangilak
KaikKujaugiamik suliaKagiamut suliaKapvimi. KaikKujauKattajuillitauk
kiggatutgiamut nunagijamminik amma ilaulluni unatanimut? Piggovunga
UKâlajiullunga Nunatsiavut katimajitsuanginni ilitatsigiamut Labradorimi
Inuit unatattunesimajut. Tâna jâriujuk hontagilikKuak ullusiugutaujuk
Sivullipâmi unatanniusimajumut, amma November takKiuvuk
nukKavigisovut ikKaumallugit unataKatausimajut. Winston Churchill
uKasimajuk, “Angijumik aittuijuKagiaKalautsimangilak unuttunut
ikittumaginnulu.” Mâna taisigumavunga atinginnik inuit, Labradorimi Inuit,
ikajuKatausimajut Kanutuinnak nunatsuata unatatinginni.
Kinuitsâgutaullanga. Sulli katitsuivugut atinginnik Labradorimi Inuit,
Kaujimagajagutsi, tunitsilusi Ministeriup Tullianejumut Lough. Ukua ilangit
Labradorimi Inuit ilauKataumajut ilitagigumajavullu. Reginald Willard Blake,
Northwest River, Happy Valley-Goose Bay. Atâtanga, Reginald, ilausimajuk
United States Air Force nunalituKaulluni. Rosie Lyall, Nainimit, Maria Lyall,
Nainimut, David Harris Jnr. Nainimit, Victor Peter Lyall, Happy Valley-Goose

Bay, Amos Winters, Hopedale, Tama Jararuse, Makkovik, Sabina Flowers,
Nain, Sarah Leo, Nain, Unatattumesimajut: Joseph Michelin, Hamilton Inlet,
John Shiwak, Rigolet, Thomas Flowers, Hopedale, Jonathan Ningajak, Saimat
Flagg, Nain, Abia(Millie) Millik, Nutak, Frederick Freida, Hopedale, Douglas
White, Nain, Levi Pottle, Rigolet, Barry Pottle, Rigolet, Greg Pottle, Rigolet,
William J. Winters, Manuel Pardy, Cartwright, Jordan Goudie, Oscar
Michelin, Henry Groves Grove's Point, Dan Groves, Grove's Point, Lee
Stockton White, Northwest River, Sheshatshui, Mary White, Nain, Philip
Igloliorte, Nain, Henry Gear, Postville, amma ilangit unataKatausimajut.
Cyril Lane, Postville, Lyla Sheppard, Postville, Richard Gear, Postville, Amos
Maggo, Nain, Elias Jerry Tuglavinga, Nain, Mark Allan Hancock. Amma
mânnaujuk ilauKataujut, Cheryl Hope, Leon Sam Metcalfe.
IkKaumajaugutiup Ullunga ullusiugutauKattajuk nâninganit sivullipâmi
unatatsujukalaummanit ikKaumagumallugit ilausimajut Armed Forces
tuKusimajut unatattumellutik. NipaKagasuangilagut Katsini minotini
sulijugillugit namminigisimajavut amma unatattumesimajut, uvagut
inosiKatsiagasuamut. Nikuvilluta nipaKakalaungisâtta. Nakummek.

KATIMAJITSUAT:{Pattatujut}

UKÂLATTI: katimautitsak two, "Ammailuni uKâlanninga AngajukKâK" KaikKujilikKunga
AngajukKânganik Nunatsiavut AmmaiKullugu UKâlannimik.

ANGAJUKKÂK LEO: Nakummek, UKâlajek. Amma nakummelugit

nakummegutigikKaujannut ilitagillugillu unataKatausimajuvut.
IppiniannasiakKaujuk , amma piggusialunga ilauKatausimannimik
kiggatugasualluta nunatsuagijattinik. Tujummigasi, utimmigatta
katimatsuanimmut, amma piggogutiKalluni maggoniattoni ulloni.
PigiasiutiKagasuavunga tuttulittânimmik. Tuttuit pimmagittojut
mânnautillugu. Mânnaujuk Nainimi ilitsinut Kaujimangitunut, unuttugalaujut
George River tuttuKutingit Nainimi. Kagitaujakkut aullatitsilaukKunga
katimajitsuanut apigillugit uKâlaKataukKulugit ikajuttaugutilinnut pillugit
tuttuit, Kaujimausinginnik tuttunik isumagijanginnilu, uvagut, Labradorimi
Inolluta, asikKitailigasuvugut asinginillu tuttulittâjunik. Kanuttolungalu
uKâlaKatautsialaunnisinnik inunnut taikkununga ikKanatumagiummat.
Mânnaulauttuk, , wogingani October 20th, pivitsaKalaukKunga ilaugiamik
Ungava Peninsula Caribou Round Table, taijaujuk UPCART. Tallimangani
katimanniKalilaukKugut. IniKalauttuk katikannik Sheshatshui-mi,
piujolaummijuk katiKataugiak asinginnut nunaKakKâsimajunni
sivukatattinik taimâtsainak Kanuttogutilet tuttunik asikKitailigasuallugillu.
Ajunnamat, katimannivut nukKasagaigiaKalauttuk sujuKalaummat
Sheshatshui-mi. Pigasuannik tamânenginnatuk akungani uvagut
NunalituKaulluta sivukatattet taikua tuttuit sâkKijânginnanianginnik
ilingalluni kinguvâtsatinnut. Suli suliaKausiKavugut aulatsigiamut
pannaigutinnik, Kanuttoluta pijagelânnititik aitillugillu prâvinsinut

mânaunitsak upalomagani. Kaujimajuinnaugatsi, UKâlajek,
Kaujimajuinnaugatsi piggagasualluta nalunaitsigiamut Kanuk
ikKanattigimmangât piulimatsigasugiak adjungittumik ikKanattumillu
piusitivalligasuallugu Labradorimi Inuit IlikKusingit, amma
KaujimajautsiaKullugu IlikKusiligipvisak, malilluni ullusiugutaulattumik
Nainimi, sivullipângani wogimi Septemberami asianik piusiKalaugivuk
pivalliatillugu Illusuak St. John-imi, 16th Octoberami. PiggogutiKalaugivugut
ilaugunnalaummat Atanigusik, Frank Fagan, annangalu Patricia Fagan,
amma ikajuttaugutilet St. John's-imi nunaKalittut, adjigengitut
KaikKujausimajut, federal amma prâvinsiup sivukkatattingit, AngajukKaunet
katimajingit, amma ilaujut sananguatinut amma ilikKusitigut nunalet St.
John's-imi kenaujaliugutilet amma kuaparesani sivulittet.
Piujuullagiulattuk. Piulualammijuk nakummelugit katatjatet amma
Kilaudjatet St. John;s-imit, Solomon Semigak, Sophie Angnatok, Inosuttuk
Clarence Andersen amma Tama, namminivut suliaKapvitinnit St. John'simi.
Aliasutitsisialattut Kaisimajunik, piluattumik ikKanattumik katatjanimmik
Kilaudjanimmilu pigunnasiiallutik. Asingit uKausiKalautut
IlukKusiligipvisamik, Mr. Johannes Lampe, Caitlyn Baikie,
ikajutsisialammijuk unnusakkut, unnusaulattuk piugijautsialattuk.
Nalunalungituk, piusititsigasuatuinnangittuk Labradorimi Inuit
ilikKusinginnik amma sivuppiatigasuallugu Illusuak, ilangat pigiasiutaulattuk
St. John's-imi kenaujatsasiugiiallagasuannik aulatsigutitsamik Illusuamik,

amma Inuit Kanuttoguti Kavalliajut Kaujimalaugamik sak Kilânninganik amma
Kanuttogutigijangit sak Kisialauttut. Ammalugiallak, illusuak
ik Kanammagittuk ikajuniagami uvattinik piulimatsigiamut amma
pivalliatitsigiamut ilik Kusittinik. Illusuak Nainimelâgaluattillugu,
uKâlautaunginnatuk illutuinnaulâgaluattillugu Nainimi; illutuinnaulângituk
Nainimi. Takujautitsilâttuk uvattinik, kinakkomangâtta Labradorimi inuit,
amma pivitsa Kalâk Kugut ilautitsigiamik takugatsaujunut Illusuammit
ikajuttaugutilittinut nanituinnaugaluappat, amma tamanna
aliasunnamagittuk. Mânnakammiulauttuk wogiulauttumi, Creative Arts
Festival Committee ilaujut uKaudjigijajimmut kamagiamik sivunitsanganik
Creative Arts Festival. Ilitsinut sungiusimangitunut, Creative Arts Festival
ilingajuk puttunitsamejunut ilinniatunut, pivitsa Katigunnaugillu
piongugiamik pingguaguti Kasongugiamillu allataumajunik amma
ilinniagutigigiallugit, Adjigengitunik pingguatinnik tamaungatitsi Kattajut.
Taimaimmat ilangat uKâlautaulauttuk Creative Arts Festival amma
Kanulingalimmangât mânnautillugu. Amma UKâlajek, pinguvitsa Kalâttillugu
Illuasuami, uKâlautaukattajuk tikitillugit Creative Arts Festival
Nunatsiavummut, nallianutuinnak anginitsanut nunagijaujunut sollu Nain
ubvalu Hopedale amma nunalinni pingguatet ilitagijautillugit, ilangautillugu
Creative Arts Festival, alianattosiattuk. Mânnaulauttuk, imaKâ kingullipâmi
itsiva Katigeniagatta uKausi Kalauk Kugut mooset pijaugunnaninginnik
ikajuttaugutilinnut pijauullutik Gros Morne. Nalunanalungituk Minister

Nunaliginnimut Piviannatuliginnimullu tamatsumunga uKausiKaniattuk, salutigumajakka pinasuattet taunungalauttut. Pigunnalauttut 47 moosinik, 47 angijuit mooset. NiKitsaluviniKalaukKuk. Mânnaujuk niKet –sulli tikititausimammangâta Kaujimangitunga. UKuasiginiattanga Ministeriup, nunagijattinut tikititaulâtut amma nakummelugit sitamait omajunniagiattulautut niKitsasiugiattulutik. TutuviniKanningimmik piuluangugaluaq. November 6th, pivitsaKalaukKunga katiKataugiamut Premier Davis. Nutâmik PremieriKalittilugu, pingajugilittanga tamânesimanniganit pivitsaKasimallungalu katiKatigegianga. pidjutiKalualauttut uKâlaKatigegianga isumâlotaujunik Nunatsiavummi amma ilanginnik suliajisimajattinik. Premier ilaKalauttut Minsiterimik Labradorimi amma NunaKakKâsimajunik kamajimmik Keith Russell, amma Keith Hutchings, Minister Nunaliginnimut amma kavamauKatigengitunik kamajimmik. Sitontimi uKâlaKatigetsialaukKugut sunanik uKâlautiKalluta. Illusuak ilangaulauttut. Siagu PremieriuKattalauttut kenaujatigut ikajutsilangalauttut Illusuammik. Taijaulauttut Taggami Pimmagittumik Pannaigutimmik. Prâvinsiup kavamanga pinialauttaminik pigalangit, taimaimmat tamanna tailauttuga Premierimut. UKâlautiKalaukKugut Kanuk kenaujanik sakKitisigajammangât Kanuttolutalu kenaujaligiligutik, upingasâmi, takugajakKugut Premierimit ubvalu kavamanganit Newfoundland ilikKusiligijinni prâvinsigijammini, piluattumik Labradorimi Inuit IlikKusiligipvisanganik. UKâlautiKalaukKugut Nunamik Atugiamik

Pannaigutimmik. Prâvinsiujuk tamatsuminga kamagunnalaungimijuk,
UKâlautaulaummiut ingigautiliginnit. RFP's prâvinsimottausimajut nutânik
umiattâtâgumannimik. Sulli utakKivugut tusagiamik tamatsumunga, Prâvinsik
uKalauttuk tusagajannitinnik Septemberimi. Nalunalungituk
nukKangattitaujuk. Ilangat RFP umiattâtâgiamut âkKisimausiugialik
nunagijaujuni, Nutânik umiattâtâgiaKavugut atjatugialinnik niuviatsanik,
motâkanik, amma inuttaKattalutik, sungiusimalikKugut itsavittinik.
Nâmmangiluatlatut. Mikijummaget, nâmmagatillonet angijunut umianut,
Taimaimmat, tamanna uvattinut pimmagittuk. Taigumalauttavut
prâvinsimut. UKâlautiKalaukKugut illunik. Piluattumik, suligilitavut tapvani
jârimi ikajuttiKalluta prâvinsimik tunitsinialaummata 350,000 amma
Nunatsiavut kavamanga tunisitillugu 350,000 âkKigiatsigiamut
Nunatsiavummi. Piluattumik Nainimi amma Hopedale-imi.
UKâlaKatigegattigu prâvinsiujuk, kenaujaKattisiniannimik
âkKigiagutitsanik, uKalauttuk kenaujait, atuttaulualânninginnik Nainimi
amma Hopedale-imi, sollu uvattitut, ikajuttigelluta Illuit Pigumajauninginnik
kamajuKammat tamâneluagiaKaninginnik. kenaujait tamatsumunga
atugialet. Seven hundred thousand dollars atutsiagajattuk âkKigiatsigiamut,
avittuliaKippata, sunaKattojângilak. Tamanna uKâlautigillugu, tapvani jârimi
âkKigiatsiniuniattuk, uKausiummat jâri tamât piusiunialauttuk.
UKautilauttaga Premier tamanna nigiugigajattavut ingigainakKulugulu.
UKausiKalaugivunga George River tuttungit pinniataugiaKanginginnik

Premierimut. UKâlajek, ilangit katimajitsuat Kaujimalugajangimata, siagu katimajitsuangulauttut uKausiKaKattalauttut nukKangatitsinimmik, amma apigisimalluta prâvinsimik nukKangakKujillagikKunagu kisiani NunaKakKâsimajut pigunnatillugit. Ajunnamat taimailaungitut kajusiutjituinnalutik nukKangatitsinimmik tamanna inogusigilittavut. Premier uKalauttogaluak nukKangatitsinianniminik, amma Kanuttoluta taimainianninginnik. Piulimatsisiagasuannik George River tuttunginnik ilonnatinnut ikKanammagittuk.. katimannimik pijagelaukKugut , ubvalu nâjititsilaukKunga katimannimik katimajitsuanut uKâlautaujutsautillugu. Nunatsiavut kavamanga, Prâvinsiup kavamanga magguitulutik katimasimalittut. UKalaukKunga Prâvinsiup kavamanga aigunnaninginnik Nunatsiavummut. katimaKattalaukKugut St. John'simi amma ammagajalluta katimatitsigaimik ikKanammagimmat maggok kavamavut itsivaKatigellutik Ministeriullutik uKâlautigilugu nanelimangâtta namunganiammangâttalu. UKagunnalaungituk Premier katimagumannimik, katimagegatta Mr. Hutchings uKalauttuk piujogajanninganik ilangit Ministeret tamaungagajappata. PivitsaKalaugivunga katiKataugiamut Chief Anastasia Qupee, AngajukKâmagik Innu Nation. katimanitsaungulauttuk, NunalituKaulluta sivukkatattet iluani North Labrador, itsivaKatigegajakKugut uKâlaKatigelluta, KaujimaKatigetsialutalu pillugu UPCART, amma suliaKaKatautsiagumallunga Chief Qupee AngajukKâmagiutillugu Innu

Nationnimi. Nakummegiallalui tamânegunnagatsi, amma nakummek
uKâlajek.

UKÂLATTI: Nakummek, Madam AngajukKâk. katimautitsak three, “Ilitagijauningit
Tusâgiasimajut.” KaujimakKujivunga katimajitsuanik Tullianettuk UKâlajup
Patricia Ford amma AngajukKâk Jack Shiwak mâneniangituk
itsivaKatigennimi, Kaujimagitsi katimajitsuak pijivut Tabea Onalik amma
Colin Hunter. UKattet/Tusâjet Rita Andersen, Augusta Irving amma Wilson
Jararuse. Ches Evans IT ikajuttuk katimajitsuanik. Amma ilitagillugit
OKâlaKatiget suliaKattingit Sarah Abel amma Johansi Tuglavina.
ApitsotitsaKattuKappat ingautitsanik Kaujitsigitsi Hilda Hunter.
KaujimakKujivunga tusâgiasimajunik amma nakumelugit
KanuttogutiKammata Nunatsiavut katimajitsuani. kinatuinnak
ilitatsigumajuk tusâgiasimajunek? katimautitsak four, “Ministeret
UKausitsangit.” Ministerinik uKattuKagumavâ? Ilitagijaga Nittunattuk Kate
Mitchell, First Minister.

MS MITCHELL: Nakummek, UKâlajek. Okay, sivullimik, Kaujitsigiagasuavunga
katimajitsuanik katiKataulaunnitunik Keith Russell, Minister Labrador amma
Aboriginal Affairs. katiKatigelauttavut Keith Russell 28th, October,
piujolaullunilu katimannik. Ilangit Keith uKausigilauttangit âtitsigiamik
Prâvinsiup katimajitsuanginnut uvattinik kiggatulluni kenaujatsanginnik

Illusuak, amma ikajugajakKomijuk illuliginimut. UKâlautiKalaugivugut
Kijunnik, taitsumanilu Minister Russell uKalauttuk Kijuttâgasuannimik Upper
Lake Melville-mit, tâvatuak apumautauluttuk kijuit itsaviliagiangit
inigijanginnit. Sulli pijagelungitavut tusagialalaunginatta. Okay, pillugu
âkKigiatsinik atuttauliaKititsinimmut, AtuliaKititsinimmut katimajet
katilauttut magguitullutik fonnitigut uKâlautillutik angajukKauKatiget 2015-
16 suliaKanitsanginnik amma kenaujatsaKutinnik amma
Kaujisagiallagumajut, Nigiuvugut kenaujaliginnet pijagelânninginnik
kingullimi katimaligutta Fevruarami. AtuliaKaititsinimut angiKatigegasuattet
katimatsualauttut November 13th. Nunatsiavut kavamanga atuinngutjijuk
Kinugautimmik senanut jârinut ilinganiattunik atuliaKititsinimmut
pannaigutimik nutângutitsigiamut angiKatigegasuannimik. Tamanna
Kinugautik âkKisuttaujuk uKâlaKataunnikut suliaKapvinganik Nunaligijet
Piviannatuligijellu amma AngajukKauKatiget Itsivautalinginnut.
Kanuttovugut tâna pannaigutik pijagegianga tunijaulunilu Canada amma
Newfoundland December 1st. SâmokKânagu pannaigutik,
tugâgutittâgiaKavugut Nunatsiavut AngajukKaunet katimajinginnit
angiKatigegasuagiamik Kinugautimik pannaigutimmik. Sivullipâmi
angiKatigegasuaniujajut Fevruar 11th. 2015. Ilaliutigummanimut
katimajuKalaukkuk Goose Bay-mi October 20 wogingani. katimannik
aulatauluttuk Veryan Haysom amma Loretta Michelin-imut. katimannik
ilautitsilauttut Ilalliutigumajunik kamajiullutik katimajinik amma Inuit

Ilaliutijuit nâmmasingilippata AngajukKauKatigennik. IkKatuijuKataujuk
Mark Gillette, ilauKataulaummijuk. katimannik ingiganiKatsialauttuk amma
pivitsaKatillugit katimajet uKagiamik isumâlotimminik. Unuttuit
uKumaigijaujut katimajinnut uKâlautauluttut amma pikKujuset sakKilutik.
PikKujuset tunijaulâttut suliaKapviganut. Illuliginnik. UKaudjigiajet taijanut
Attic Retrofit Housing Repair Program ukuangujut FGMDA. AngajukKaunet
katimajingit kajusiutjilauttut kamagillugu pigumajauningit kamanniulauttuk
piluattumilu illuit pigumajauluattut Nainimi amma Hopedale-imi, amma
kenaujatsaKutet pigiasittitaumajut Minister O'Brien Nainimi Hopedale-
imilu. kamajuKalaukKuk 22-nik illunik. Ilangit illuit kamagijaumajut tâvatuak
silatânesimajut tugâgutiujunut. Kanuilingausingagut illop, tungavet
âkKigiattaugiaKalauttut, ubvalu illuit asitâttaulutik. Kimmigulugit akitsangit
âkKigiasiniup amma sunait atuttaugialet, kajusiutjaulauttuk Attic Retrofit
Program tukiKagajattuk ilupiagutittângiangit ilonnatik 22 iluit amma iluagut
âkKigiattautilutik pingasut illuit Hopedale-imi maggolu Nainimi.
Pijagettusimalittut amma atugatsait tikisattaumalillutik amma
itsavinottaumallutik umiakkojutsaulutik November 13th. FGMDA Kinijalittut
sanajutsanik, kantrakket tunijaulâttut Decemberimi amma suliaKannik
pijagejutsauluni Mertz 31st, 2015. PigasualâkKugut NLAC kenaujattâgiamik
asianut suliaKanniujsamut aggâni amma Kanuttoluta angiligialânninganik
asinginni nunagijaujuni, Nunatsiavut Illuliginimut Piusiugumajut.
Asiangutitausok tungavitsak illuliginimut sakKititaumajuk Illuliginimut

katutjiKatigenninut amma tunijaumalutik NAC Kimmigutaujutsaulutik
kingullimi katimajuKalippat, December 9th amma 10th. Illusuak. Phase 1
pijagetsimalittuk, amma atuagatsait Nainiliattaullittut pigiasigillajutsaulutik
Phase 11 upingasâmi 2015. Phase 1 initsami suliaKannik, akKusiuginmik
amma tulligettitâjuKalluni tungavitsamik. Pigasuavugut kenaujatsasiugiamik
pijagegutitsanik suliaKannimik amma Kanuttoluta prâvinsiujuj
ikajulâninganik kenaujatigut. Ingigautet. katimajuKalaukKuk October 28th
ilonnailu pujuliligijet uKâlautiKallutik umiatuvitsanik amma pijagepvisannik
usigatsanik tikiutjigiamut. UKalauttut taimaita prâvinsiujuj amma
Nunatsiavut Marine kamagillugu sikuitsanik Astron amma Northern Ranger
aulatsilâttok ilonnatik usigatsait tikititautillugit Nunatsiavummut,
UKâlaKataunginnavugut prâvinsimut nutâmik umiattâgumannimut
Nunatsiavummi amma kajusiutjaulutik nutâtsait umiat 2016-nami.
UKausiulauttuk Minister Russell-imut amma tamammik Northern Ranger,
Astronilu âkKisugiattaullâttok ukiumi atuinnaujutsaulutik 2016-nami,
Kângegaluappata ullusait. Nakummek, UKâlajek.

UKÂLATTI: Nakummek, Nittunattok Kate Mitchell, First Minister. Ilitagijaga Nittunattuk

Darryl Shiwak, Minister Nunalignimmut Piviannatugijanginnulu.

MR. SHIWAK: Nakummek, uKâlajek. UKâlajek, sivullimi Kaujitsigasuvunga

ogannianimmik. kangidlumi SFA 4 amma 5 kingupvaniannik

pijagetsimalittuk. Piujotsimajuk nunâttaugunnatillugit ilonnatik SFA 4

kingupvait, 300 metric tonnes amma 93 percent ukunangat 1,043 metric tonnes pijaugunnatunit iluani SFA 5. Natannavannianik pijagetsimalimmijuk sitamait ilausimatillugit tamaiginnut amma kenaujaliugutiullutik natannavannianimmi. Ajunnamat apviatunut suliaKapvimmi amma silamut apviataunimmut katillugit pijaugialet 69,000 pounds nunâttausimajut, amma 278,000 atunit 66.9 percent pijaugunnatut nunâttausimajut. NG suliaKaKataujuk namminilinnut kamagiamik uKumailutausimajunik kingullimi ogannianiKalimmipat. kingulliani nalunaikkusinnik kavisilinnik Rigolettimi. katillugit 65 kavisilet amma 19 anâdlet nalunaikkusittaumajut aullatitauniammilutik. Sitamait nalunaikkutait tigujausimajut allataullutillu Upper Lake Melville nunangani. UKâlajek, English Riverimi kititsivik pijagelauttuk October 9th, tapvani jârimi. One hundred ninety angijut, 839 mikijut allataumajut, kavisilellu, allataumajut, 1029 kavisilet katillugit. IKaluit anâdlet ununningit taimâtsainagalak jâriusimajummi 1670. 2014-imi nalunaigutet English Riverimit piujummaget kavisilet ununningit ikilliumisimajut. KaujilaukKugut imait itiningit niguminningillu piujunninginnik utigiallatâjunut kavisiliagannut tapvani jârimi. Omajuliginnik. UKâlajek, moosinnianik Nunatsiavummi ingiganiKatsiajuk. Kaujimagatsi, katillugit pigunnaKugut 35-inik moosinik, NG tunitsisimajuk sitamanik laisinsinik ilonnainut tallimanut nunagijaujunut amma pingasunik Upper Lake Melville-imut. Amiakkuit laisinet atuinnaujut nunalinnut sivulliutitaugialinni, sollu Nunalinni Kuatsevet. 35-init moosinniagamut

laisinsinit sitamait pijaumalittut; 2 Hopedale-imi, 1 Nainimi amma 1 Rigolettimi. Wogingani October 27th, 2014, ikajuttilugit Parks Canada, suliaKattingillu Asitâttausonik Piviannatunik SuliaKapvingani, ilaKallutik nunalinnik omajunniatinik, AngajukKâk Leo uKakKaumat siagugiak, pigunnaluttut 47-inik moosinik Gros Morne-imit ilingajutsanik Nunalet Kuateveinginnut Nunatsiavummi amma Upper Lake Melville-imi. katillugit uKumainnilet 19, 500 pounds. Moosinniagiak sivullipâmi pigiasilauttuk aggâni asinginnik niKijattugiamut ikajuttaugutilet malilluni nukKangattitauliaKininginnut tuttuut pijaugiangit Labradorimi. Moosiujut mânnautillugu âttutaulittut pokKataullutillu Hawkes Bay-mi amma nigijugijaujut atuinnaugiangit aullatigiangit Goose Bay-mut sivungani November 21st tapvani takKimi. Mooset tikititausimatualippata akKutikkut Goose Bay-mut, NG tuniukKailiaKilâttuk nunaliujunnut kingungagugalâk. UKâlajek, AngajukKâk Leo uKakKaumimmat, isumâlutiKatsainavugut ikillivallianinginnik George River TuttuKutingit amma ikiluatillugit Tongait KakKasuangita Tuttungit. ImaKâ katimajitsuat uKâlaKatausimajut kiggatuttaminut wogini Kângisimajuni, amma uKâlautigigiallaniattavut ullumigiak. Asitâttaugunnangittunik Piviannatunik SuliaKapvik. UKâlajek, ukiuk tikimmat, amma ujuganniagatsanik Kinijattet matutsimalittut anggasimalillutillu. Ununningit ujuganniagatsanik Kinijattet ikinnisaulaugaluatilugit jâriusimajunit uKausingit ujuganniatet suliagisimajangit piujosimajut amma anginitsamik pigalaniujallutik

aujaulâttumi. Aurora Energy Michelinnimi SuliaKanningit
anginippauKataujut Kinijannimi. katiKataukKâluta Aurora wogiulauttumi
uKalauttut uvattinut Michelin sivulliutitaugumatillugu Kinjagiamik
akililliumisimajut akitsait Kâjotsatalinut ukiunguniattumi. kampaniujut
ammaigumajut aullâviuKattajumik aujami 2015, amma akingit
Kâjotsajattalet akittulâttut maggoni jâriuniattoni pigumajauflagimmata
Kâjotsajattalet Asia-mi. UKallunga UKâlajek, uKumainnipaugajattuk
Auroramut, tâvatuak ajunnanippângit KângisimalikKotut. kavamagijavut
tugâgutiKajuk tukisiumigiamik plusitivalligasuallugilu ujuganniagatsait.
TakKiup pigianningalangani pivitsaKalaukKunga uKâlagiamik taijani Canadian
Institute of Mining Resources Review St. John's-imi. UKâlanniujunut
tapvani jârimi sakKititsigiamik ujuganniagatsanik Kinipviusongugiamut sollu
ottutigillugu Tasiujatsoami ujugannianik, amma avittusimajuni
attuinnigigajattanga kenaujaliugutiKagiamut suliaKagiamullu.
Taitsumanitsainak suliaKapvik uKâlaKatauliaKilauttuk prâvinsimut pillugit
ujaganniagatsatalet nunait Kanullu kamagijaulâmmangâta
pijagettausimalippat Nunamik Atugiamik Pannaigutik. EMLs ubvalu
Ujuganniagatsatalet Nunait pitalet nunami anginippânik
ujaganiagatsaujunik, amma ununningit iluanettut Labradorimi Inuit
Nunangita. Asitâttaugunnangittunik-piviannatunik SuliaKapvinga
kamalauttuk pejattauninginni salummasattauninginnilu Kâjotsajattalinnik
Kinijapviulutik inigijausimajok Mustang Lake amma Lake Michael.

Salummasattauningit nalunaitsisiattut piujosimanninginik Kinijannimut malittaugialet tamakkua kampaniujuit kamatsiagialet iniuKattasimajunik Kinijannik pijagetsimalippat. Pijagennik Ujagannianimmut Malittaugialet. UKâlajek, Kuviasuvunga Kaujitsigiamik ujuganniagatsasiunnimut malittaugialet atuinnaulittut uKâlautigigiangit Inuit Nunalet kavamanginnut amma ujugannianimmut ministerinut Nunatsiavummi. 2010-nimit angikategegasuasimavugut prâvinsillu tamakkuninga malittaugialinnik, adjigettigalattut Kinijannimut malittaugialinnik pillugu kamagiamik avatet sukutauttailitillugit, pimmagittunik malittaugialinnik iniuKattajut aulatautsialutik kamagijautsialutillu. Ilagiallugu, sakKititsijut adjiungittumik sakKijânginnaniattunik pivallianinnik atullutik ujugannianimmik amma ilutsinginnik, amma kamagitsialugit pujugauKattajut. Asingit suliaKausiujut, UKâlajek, Asitâtaugunnangittunik Piviannatunik SuliaKapvik Kaujitsigiagumajuk maggonik aseginnik suliangujonnik. Tasiujatsoami Inogusiujunik kenaujaliugutaujuniullu Kaujisannik pijagekasâlittuk katitsuinnimmik Kaujitsiutinnik suliangujumit. Ullumimut, ungatâni 80 apitsutaumalittut tallimani nunagijaujuni amma Upper Lake Melville mânnamunut, siagu suliaKattiuKattasimajut ilagijaujullu. Kaujisattet University of Trent angisimajut kamagiamik Kaujisautiusimajunik atâgut aulataunniup kamagijaunniulu Asitâtaugunnangittuk Piviannatunik SuliaKapvinga. PannaigutiKajut Kaujitsiutik atuinnaugianganik Mertz 2015-nami. SuliaKapviujuk ikajuttiKammijuk Environment Canada amma Inuit

Pathways imamiutanik amma timmiat killigiudjaunitsanginnut
ilinnianimmut, iniKalauluni Goose Bay November 13th tikillugu 14th.
katillugit sepait ilinniaKataulauttut Nunatsiavummit nakummelugit
kenaujaKattisilauttok Environment Canada amma Inuit Pathways.
Tugâgutiulauttuk ilinniatitsianik sakKititsigajattuk suliaKanitsamik
imappisuami. Nunaligijet SuliaKapvinga. UKâlajek, GIS-imik suliaKattivut
ilauKataujuk unuttunut ikKanattunut tugâgutiugumajunut. Ikajutsisimajuk
NG suliaKapvinginnik amma kamalluni GIS suliaigigialinginnik. GIS-imi
suliaKattik mânnautillugu ilinniajuk sâksini wogini taijamik : Going Places
with Spatial Anlalysis.” Asingit ilautitsijut ikajutsigiamik piusituKaujunik
amma asianguvallianinginni akungani Labradorimi Inuit Kaujisannigijangit.
IkajutigettuKavuk akungani Memorial Ilinniavitsuanga amma Nunatsiavut
kavamanga Kaujisagiamik akunimut piusigijanginnik Labradorimi Inuit amma
sunait asianguvallianinginni. GIS-imik suliaKattik ikajuKattajuk Google Map
puttunitsani ilinniaviujuni. Tâna nunanguak ikajuttigennikut Google
atugiamik Kagitaujakkut nunangualigigiamik nunalinni Rigolettimi.
Kinugautik tunijaumajuk Google-imut aikKulugit Google Streetview
ilonnainut Nunatsiavut nunagijanginnut. UKâlajek, âtanik nunamik
atugiamut KinugautiKavuk kingullipâminit, ilonnatik iluliugumajut.
Pigianninganik 2014 pitâttuKasimavuk 37-et nutât Kinugautet, illuliugiamut
piluattumik, ilangit ujuganniagatsanik Kinijagiamut amma
itsasuanitaligigiamut. Unuttut Kinugautet kamagijaujut sâkset

angittausimalittilugit. Taimangasuanit senani-jârini nalunaikkutait kamagijaujut, two thirds ullumimut. Amiakkungit kamagijaugialet GIS-suliaKattimut, UKâlajek, nunamik atugiamut pannaigutet nukKangattitaujut, UtakKivugut prâvinsiujuk takugumagajattanginnik nunamik atugiamut pannaigutinnik. Kaujisimavugut Kaujitsiutet tikikasâlinninginnik. Nakummek, UKâlajek.

UKÂLATTI: Nakummek, Nittunattok Darryl Shiwak. Ilitagillugu Nittunattuk Dan Pottle, Minister kenaujaliginnimut, Inuliginnimut Kagitaujaliginimullu.

MR. POTTLE: Nakummek UKattek. UKâlajek, kinakkutuinnait Kaujimalimmata, Nunatsiavut kavamanga pigiasisimalittuk kenaujalittânimmik. Ilonnatik suliaKapvet iluagut uKâlautiliaKilittut suliaKapvingani sivulliutitaugialinik, kenaujaKagiamillu sakKititsigiamik tugâgutinnik. Atâgut Labradorimi Inuit Satusaisimanikkut AngiKatigegutingagut, UKâlajek, Nunatsiavut kavamangata namminik kenaujaliugutingit attuiniKasot kenaujanik pitâgijaujunik iluagut Jâritigut kenaujaliginnimut AngiKatigegutikkut . Federalliup OSR ilijausimaninga ungatâni 20-et jâret amma namminik kenaujaliugutivut. UKâlajek, sivullipâk akilegutik 2010-2012 anginiKalauttuk \$58,000 amma pigusimalilluni \$600,000, 2015-16 jâringani. UKâlajek, nakutsavugut uKagiamik inuttâsimalittuk Aulatsijitsanga Inoligijet. Jim Lyall pigiasilauttuk October 14th amma uKâlaviugunnaluni suliaKapvingani Nainimi. TujummiKungitavut Jim Lyall utimmimat Nunatsiavut kavamanganut, Nakummek, UKattek.

UKÂLATTI: Nakummek, Nittunattok Dan Pottle. Ilitagijaga Nittunatuk Patricia
Kemuksigak, Minister Ilinnianimmuk amma kenaujatigut
Pivalliagutaugunnatunut.

MS. KEMUKSIGAK: Nakummek, UKâlajek. Christine Nochasak suliatatâsimajuk
Kallunâtitut ilinniavet angajukKauKatigenginnut Inolluni
Ilinniagutaugunnatunuk kamajillagiulluni, suliaKajuk Jens Haven
Ilinniavingani. Ilinniagutaugunnatunuk suliaKapvik notsimalittuk Jens Haven
Ilinniavinganut , amma âkKigiattauninga pijagekasâlittuk amma piKutitsait
Goose Bay-mit tikiniujalillutik. October 21st, pivitsaKalaukKunga ilaugiamut
Pan Labrador Newfoundland Choir pingguaninginni iniKallutik Lawrence
O'Brien Centre Happy Valley-Goose Baymi. Ilinniatunuk ilaujuKalaukKuk
unuttunit Nunatsiavut nunanginnit amma ingitunik Happy Valley, North West
River amma Kikittamit. Nunatsiavut ilinniatungit ajunnamagilauttut.
Tutsialauttut *Inuttut* amma katatjalutik. Uvattinik pisittungititsisialauttut.
PSSSP Kaujitsiutinga. IlinniavitsualiaKattajunut ikajotiuKattajut
ikajuinnatuk ilinniatunuk atugiamut amma aliasotiKagiamut
ilinniavitsuaminnimi. Pigianninganit takusimavugut sepanik nukKasimajunik,
sunamut kisiani apviataugaluumut. InuttâtitsiKattavugut inuKagunnaitunuk
siagu upalomallutik KinugautiKasimajunit. Mânnaujuk kamalikKugut
Kinugautinik ukiumi ilinniagumajunut. UKâlajek, Inuit ilinnianingit
ilinniatitsijiugiamut pigiasilauttut Septemberami 12 ilinniatillugit
ilinniaginnalutik amma 6 ilangani ilinniaKattatillugit Ilinniatitsijiugiamut

North Atlantic-imi. Atautsik ilinnianguinnatuk nukKasimajuk sunamut
apviataumut. Nutâmik KinijanniKalikKuk napvâgajammangâta
Kanuttogutilinnik ilinnianimmut. Kaujitsiutet atuagaillu tuniukKataulittut
nunagijaujunut Kagitaujakkut katutjiKatigennikut amma Facebook,
nâlautikkulu atuagatsakullu. SakKitigumajavut unutsiumitigiangit ilinniatut
ununniKalittilugit 22-nik. IlikKusitigut uKaudjjigajik suliatatâsimalittuk Inuit
Ilinnianinginni Ilinniatitsijiugiamut. Ola Andersen pigiasilâttuk suliaminik
November 24th, amma iniKalâlluni College of the North Atlantic
ilinniavingani. UKâlajek, ilinniagetsimajunut allaKutet. PSSSP Ilinnianingit
pitaKajut pijagetsimajut allaKutinginnik 1987-nimit, 97' amma 1997 tikillugu
2007, aullatitaumalittut ilonnainut Nunatsiavut nunanginnut tunijauillâlutik
pijageniujajunut. kinatuinnak pitâgumajuk allaKutinnik Kaujitsigialik CLO-
minik nunagijatsini ubvalu uKâlallutik PSSSP suliaKapvinganut St. John's-imi.
October-imi katimajuKalaukKuk akungani Minister, Ministeriup
Tullianejumut amma PSSSP suliaKatinginnut St. John's-imi. UKâlajek,
KaujitsigumalikKunga pillugit Inuit Pathways. Piujumik tusattitaulaukKugut
ippasatuinnak. Taijaujut Assets Program, taikkua kenaujaKattisiKattajut
Inuit Pathways, Kaningiligiattaumajuk Mertz 31st, 2016. NâjigiaKalauttuk
Mertz 31st, 2015, taimaimmat atautsimi jârimi ilagiattaumajut. Taimaimmat
tamanna piujummagik, amma Kanuttoluta ingainanianninganik. Inuit
Pathways ikajuKattajuk ikajuttaugialinnik ilisimannikut pivalliagamik amma
suliaKasongugiamut ilisagamik. Tamanna piujummagik.. Nomarangit

nâmmasisimatsiatut kenaujaliginnisammut, iluingajut kenaujattâgijausonit
amma Nunatsiavut kavamangata tuniggusianginnik. SuliaKattet
pijagetainnalauttut jâriup agvangani piusiusimajunik ukualu Service Canada
suliaKattingit malingatsialugit angiKatigegutiusimajut, Tamanna ottugautik
ilautitsijuk Kimmigunnimik 2013-14 Jârimi Pannaigutinnik amma
kamagillugit 2014-15 Jârimi Aulatsigiamut Panniagutinnik. SakKititauluattuk
angusimammangâta tugâgutiujunik amma Kimmigulugit
malittausiagaluammangâta Pimmagittumik kenaujaliugutiKagiamut
Pannaigutet. Assets suliaKattingit ilaulauttut Inuligijet Pivalliagutitsanginnik
katimajinut Ottawâmi. Tamakkua katimajiujut ilautitsilutik ITK amma
ilonnainik Inuit kenaujattâgutingita angiKatigegutinganik tigumiattet.
PivitsaKatitsimijuk Kimmigugiamik jârimi pivalliagutiusimajunik, sunait
atuttaugajammangâta amma piunippânik ottugausiugajattunik
kiggatutsigiamut. Piluattuk pivitsait katiKataugiamut taijanut Employment
amma Inogusiujunik Pivalliatitsijinnik Canadami suliaKattinginnik
Aulatsijillagiup atâni. Taikkunangat kenaujattâKattavugut.
UKâlautiKalauttut isumâlutaujunik amma Kaujittitaugiallalutik suliaKapvimit.
Atummagittuk tapvaniuluak jârimi aulatsilaugamik kingullipângani jârimi
assets piusiukKujanginni, amma Kaujigumatsialaullutik pannaigutinnik,
tâvatuak Kaujilauttugut Kaningiligiattaumajumik jârigiallamut. UKâlajek,
tamanna ilagiallugu, Inuit Pathways suliaKattingit tataminnatumik
KaikKujaulaummijut katiKataugiamik Aulatsijillagimmut NunaKakKâsimajut

Aulatsigiamut Tiliujillaginganut amma suliaKattinginnut ESDC
SuliaKapvinganit. Adjiungittuk Kinugautik tigumiattilimmut katiKataugiamik
takunnaKatigellutik. Inuit Pathways suliaKattingit, kiggatuttelu ITK,
ilauliaKititsilauttut Tullianejumik Minister McNeill fonnitigut.
Piujummagiulauttut pivitsauluni takugiamillu piujunik piungitunillu amma
sunait asianguKujavut Kângititaullutik 2015-nami. PivitsaKattuKalaugivuk
uKausiKagiamik Ottawâmi suliaKattinginnut Kanuk ikajotet
ikajusongummangâta taggamiunik amma uKâlagalâllutik Nunatsiavut
kavamanganut. UKâlajek, pitsialaunninginnut katimannimi tugâgutet amma
kenaujait kamagijautsianingit, Nunatsiavut kavamangata kenaujaliugutingit,
kamagijaullutik Inuit Pathways, tunijaumajuk Ottawâmut
ottugautitsautillugu. Nalunaittausialauttuk suliagijausimatsiajuk tallimani
jâriusimajuni. Inuit Pathways uKâlaKataunginnatuk kampaniujunut
katutjiKatigennulu piusitivalliagasuallugit ikajutigennet amma suliatsanut
pivitsaugajattut. Ikajuttigennikut aulatsijet ilaulâttut taijanut Northern
Exposure 2015 piusitigumallugit ikajuttigennet. Panniagutet
kamagijaummijut ilonnailu Inuit tigumiajut kamagijaullutik ITK pitaKagiamut
piusiugumâttunut 2016 Northern Lights Festival Ottawâmi. Nakummek,
uKâlajek.

UKÂLATTI: Nakummek, Nittunattok Patricia Kemuksigak. Ilitagijaga Nittunattuk Richard
Pamak, Minister IlikKusiliginnimut, Pingguanimmut amma
Niuggutitsinimmut.

MR. PAMAK: Nakummek, UKâlajek. Ullâkut ilonnasi. Nakutsavunga

Kaujitsigiamik, UKâlajek, amma kiggatuttet katimajitsuani

Septemberami Francis Murphy tilijaulauttuk nutângulluni

aulatsijiunialittuk uKausiligininmut. Francis suliaKaKataulautsimajuk

uKausiliginnimut amma ilisimannimik tunitsisialluni uKausiligijittinut.

Ilagiatsigumagivunga uKâlajek, ilauliaKitillugu

MinisteriuKattalauttuk, Johannes Lampe, amma

MinisteriuKattalaummijuk William Barbour, uKausiligijivut

iluingasialittut malittinagu sulijajugialinnik aulatsijitsak

Kinijattaujogaluak atâgut Labradorimi *Inuttitut* Ilinniagusiujunni.

Octoberami tujummitilaungitavut Jeela Pallaq-Cloutier. Jeela

Inuttitut uKausiligininmut aulatsijijuk ITK-kuni. Atausiq Inuktut

Titirausiq Task Force pigiasittaumajuk 2012 Kimmigujutsaulutik

Inuttitut uKausinik allatausonguninginnik. Ilonnâgut tukisijaujuk

amma angittauluni Roman Lithography piunitsamik katititsigunnatuk

Inunnik atutuinnagatik tigikKutonnik. Jeela niuggulauttuk Nain,

Hopedale, Makkovimmulu katiKataugiattuluni uKausiligijinnut amma

tukisigiagasuallugit Labradorimi Inuit isumâlotingit allausingillu.

Christine Nochasak amma Sophie Tuglavinga itsivaKataujok

Canadalimâmi UKausiliginnimut katimajinginni. SuliaKaKataulâkKugut

Jeela amma ITK Canadami uKausiliginnimut katimatsuanitsamik.

Novemberami LITP suliaKausinga, Labradorimi *Inuttitut*

Ilinnianimmut katimajingit katilauttut Nainimi pijagegasuallutik
nutânik ilinniagutitsanik. UKausiligijivut ilaKallutik uKaudjigajittinik,
Elizabeth Gotbonton Concordia Ilinniavitsuanganit
suliaKaKatautsiatuk Isumatât katimajinginnut, pijagettumik
tammamajuKammangât kamaKattajut ilonnainik allataumajunik.
TakKimi Kaijumi pijagelâttut ilonnainik 41 ilinniagutitsanik, amma
suliaKausiKanialluta pijagegiamik ilinniagutitsanik KikKangani 2015.
UKâlajek, ilagiatsigumavunga uKausigikKaujanginnut AngajukKâk Leo
amma Minister Mitchell. Pimmagittumik ullusiugutiKalaugatta
IlikKusiligipvisaup initsanganik Nainimi, September 3rd. amma
ilangautillugu Kaujimattisigasuanimut sanajuKanninganik amma
takugatsanik pannaigutiKalluta piusiusimajunik St. John's-imi.
October 16th-nami, Nunatsiavut AngajukKaunet katimajingit
Kaujitsigialaummijut GEO Centerimi ilisaigiallagasuallutik taijani
Rooms. Taikani GEO Centre Atanigusik amma ungatâni 100
inutuKaunitsait amma kavamamiutait kenaujaliugutilellu
unikkautilauttut malittilugu nigimmânik. Mânnaujullu
nakummegumavunga tamaiginnik NG amma ikajuttaugutilinnik
ilaulauttunut ikajullutillu piunippâmik Kaujimatitsigasuagiamik,
Nakummegumagivunga Nunatsiavut Group of Companies
kenaujatigut ikajulaummata piusiujukkut. SuliaKammagigiaKavugut
piunippaugasuattumik maligatsaliupvimi, piluattumik

kenaujalittânimmut tikivallianittini. IkajutsitaugiaKavugut
prâvinsimut ilikKusiligigasuanitinni. UKâlajek,
Kaujitsigiagumagivunga suliajiunginnatumik Illusuak
Pannaigiatitsijinginnut. PannaigutiKagasuannik takugatsaugajattunik
amma pivalliagasuannik angijummagiujuk amma ilautsiagiaKallutik
nunaliujuit ikajugunnalutillu katitsuigiamik piusitsaugajattunik
sakKijânginnaniattunut takugatsanut. Malve Petersmann amma
Anita Kora suliaKaKatigeniattok katitsuilutik adjinguanik amma
unikkausinik takKini Kaijuni. Pigiasisimaligivugut ikajuttiKagiamik
suliaKausiugunnatunik pannaigutiKagiamik ilonnatik nunagijaujut
ilautsiatillugit. Pigasuaniattuk ilikKusiligipvik taggajâpviKagiamut
uvattinik pivitsaKatitsiluni sanasongugiamik
piusiliuttaumajunik/takugatsanik katitsuiluta KaikKugunnalugillu
pingguatiuKattajut. UKâlajek, Ilagiatsigumagivunga ikajuttigillugit
Memorial Ilinniavitsuanga, pillagittumik Kinugautik ilikKusitigut
Kaujisagiamik kenaujatsaKutet tunijaumajut taijanut Social Science
amma Humanities Research Council, taijavut SSHRC. Pigasullaugu
Kinugautivut SSHRC Ikajuttigennikut Tuniggusiatigut SuliaKauset
pigumajangit tusugijangillu Nunatsiavummiunut, nunalinnut
uKâlaKataulaukKugut September 23rd tikillugu October 17th upallugit
ilonnatik nunagijaujut Satusattausimajop Iluani amma Northwest
River ammalu Happy Valley, Goose Bay-mi. UKâlaKataunnik

pigiasilauttuk isumaKalluta sakKitisigiamik pingasolingajunik ; nunak,
sivulinnet amma ilikKuset. Asiagugiallak, kamagillugit ilisimanningit
Kaujisattet, naluanisijuKagunnalaungilak Kanuk Kaujisannik
pigajammangât. isumalaukKugut Kaujisannik malingagajanninganik
Kaujimausinik inogusiusimajunik ilijaugunnatillugit.

UKâlaKatigelaugivugut Kaujisannik ikajutsigiaKanninganik
Nunatsiavut ikajuttaugutilinginnik amma kavamaujumik. Nigiuvugut
tusagiamik May 2015 Kinugautivut angittaugajammangât. UKâlajek,
ukiatsâk piujummagik kamagiamik amma itsasuanitatsiugiamik.

IkajuttaulaukKugut tapvani jârimi Trevor Bell Kaujisattinginnut
Memorial Ilinniavitsuanganit kamagunnalaulutallu nunamik
Moraviamiut Misiuninginnik Hopedale amma Hebronimi.

Kaujisattaumajut ikajuniattut uvattinik Kauigiamut tusugijaujunik
sivunitsami itsasuanitaligijet agganitsanginnut.

KaujisattuKagunnalaukKuk nutânik ukunani Kauk, Killisuak, amma
KakKikkaKutonni. Tamanna Kaujisannik atulluni Kulausonik
adjiliullutik Kanutuinnak. UKâlajek, Ilagiallugu takKini Kaijuni
niggutitsiajet suliaKattingit ainiujajut ilonnainut Inuit nunanginnut
uKâlautigigiattulugit pivitsaugunnatut suliaKaKatigegiamik
piusitivalliagasuallugit niugguKattajut Nunatsiavummut
unikkautiKagunnalutik taimangasuanit naittunillu unikkausittinik.

KipukKami Niuggutitsinimmut Pannaigutik sakKititaulauttuk

nunalinnut September 29th. IlaulaukKunga uKâlautautillugu
KipukKami amma suliaKaKatautsiagumallunga nunalinnut
sakKititsigiamik nutânîk niuggutitsiniugajattunik. UKâlajek,
suliaKaKatautsiagivugut taihanut National Inuit Arts Initiative
pivitsaKatitsigunnaâlalluni sananguatinik amma Novemberami, 2015,
mâanna jârimit sivullipâtsiamik takutisigunnaâlalluta Labradorimi Inuit
sananguaninginnik amma katimatsuanimmik. katimatsuanik
pivitsaKatitsilâttuk takutitsigiamik adjigengitunik sanajaumajunik
ikajuttaugutilittinut amma malittausiagunnaalutik
sananguatiugumâttunut. UKâlajek, Kaujitillugit ilaulaunniganik Inuit
Studies katimatsuanimmut Laval Ilinniavitsuangani Quebec City-mi
October 29th tikillugu November 1st. katimatsuanik ilautitsilauttuk
nutânîk Kaujisautiugunnatunik unuttut uKâlatillugit Nunatsiavummit.
katimatsuatuligijet angiutiKalauttut Memorial Ilinniavitsuangata
2016-nami katimatsuatitsigiamut St. John's-imi, amma
suliaKaKataulâlluta MUN katimautistanik. UKâlajek, Kaujisattik
France Rivet sakKelauttuk atuagammik taijamik Abraham Ulurikab
amma CBC takugatsamik "The Nature of Things" âkKisuttaumajuk
Europe-imi September nâningani ilautillugu Johannes Lampe
tunitigunningani Abraham atuagaliuttilu. Takugatsaulâttuk 2015-
nami CBC-kut. kingullipâmi, uKâlajek, Newfoundland NTV,
uKagunnaKunga takugatsaliuttik Garry Smith sitamaulingajumik

nutâmik takugatsaliulâttuk Nunatsiavummumiunut NTV

Tusagatsanginni. Kaujimavunga pingasuit takugatsausimalittut,

sitamanga tapvani takKimi. UKâlajek, takujausongummijut

Kagitaujakkut. Nakummek, uKâlajek.

UKÂLATTI: Nakummek, Nittunattok Richard Pamak. Mânnautillugu Tilitjigutikkut

29(2) tikigatta 35-minotini pijagepvisammut. Ilonnainut

angittaugumavunga katimajitsuanut ailluta ministered

uKausitsanginnut. Ilonnatik angittot? Akigattujut? Piujuk. Ilitagijaga

Nittunattuk Greg Flowers, Minister Inositsiagittotitsinimmut amma

Inogusiujuut Pivalliagutinginnut.

MR. FLOWERS: Nakummek, UKâlajek, imaKâ ministerivut suliatSaKatsuasimajut

amma akuni uKâlakKaumata, piujogaluak anititsigiamik

tusagatsaujunik asinginnut katimajitsuanut. UKâlajek,

akunialoniangilanga, kinakkutuinnait Kaujimammata nutâmut

tikitaumalimmigatta, amma ânniasiuupvivut suliatSaluviniKasimajut

Nunatsiavut nunagijanginni wovingani November 10th. kinatuinnak

kapittaugumajuk uKâlagunnatuk ânniasiuupvimi paitsijinut

ullusaliuttaugumallutik. Ilonnatik nunagijaujut sulli kapputilet

kinakkunut ânniasiuupviliagunnasimangitunut, Ammalu, UKâlajek,

nunalinni paitsijet apvitattet ilaulaummiujut ammâmatitsisongugiamut

katimatsuanimmut Happy Valley- Goose Bay-mi. UKâlalauttuk Dr.

Jack Newman ilitagijautsiatu ilinniatitsiKattaninganut paitsijinik
ikajugiamut anânaujunnik ilagengujunillu. Maggoni ulluni agvamilu
amâmatisigiamut ilinniatitsilauttuk suliaKattet nunaminut
utigunnalutik. KinijainnaKugut illugijaujuni paitsijitsamik Nainimi.
Mânnaujuk nukKasimalittuk paitsijik suliaKasimajuk ikajulluni
suliaKattinik piulimatsigiamut paitsijiugiamut ilinnianimmik.
SivukkatattiKalikKuk suliaKattinik KipukKami. Barb Edmunds
suliatsatâsimajuk. Salutitsiapavut. Nutamik paitsivimi
aulatsijiKaligivuk Hopedale-imi, Franciska Mitsuk. Hopedale-imi
taijauluaKattajuk Tabea, Uvattinut suliaKaKataulimmijuk,
NutâKaligivuk paivimmi aulatsijimmik KipukKami. Atinga Janelle
Gear. Ilonnainik ilisimagialinnik pitaKangitugaluak. Tamaimmat,
aulatsisimavugut laisinsiKagata unuttunik sugusunik. Taimaimat,
Kanuttovugut, tamanna sittutilâttavut laisinsiKatsialuni
aulatsigunnalâmmat. Nutâk Ilaget Upavitsanga Nainimi
pijagettauKujautsiatuk ikajutsitaugumallunilu prâvinsimut.
Upavitsaujuk nolâttuk âkKigiattautainasimajumut
attasijaugunnatumut DNJ-kunit. Pigiasilâttuk 2015-nami.
Suliagijaunginnatuk ingalakasâlillamilu. Taijaujuk Aboriginal Head
Start. kenaujatsaKutet angittausimalittut pingasugilittangani jârimi.
Angiutaumajuk Aprel 2014-namit tikilulugu Mertz 31st, 2017.
SuliaKattet ailauttut Fredericton Octber 19th 21st-imut aillutik

taijamut Atlantic AHS katimatsuanik, amma suliaKattet ailaummijut
Happy Valley, Goose Bay takunnagiattulutik ilaget upasonganik
atuttautillugu. Sugusiaggulait ilinniavigisonga, Language Nest
Hopedale-imi. Language Nest Hopedale-imi pitsianiKajuk. Sâkset
nutagait taikanejut, Amma Nainimi KinijagasugaluakKugut, ullumimut
sitamanik nutagaKavuk maggogiallâk KanuttogutiKattitautillugik,
taimâtsianak pigumâttuk Hopedale-itut. Taimali, uKâlajek,
taimasângunniamat. Nakummek uKâlajek.

UKÂLATTI: Nakummek, Nittunattok Greg Flowers. Mânnaujuk

nukKalauullagumavunga, nukKagalâlłuta 20 minotini,
pigiasiniammiluta ailfaliak fimfimi. Nakummek. (*NukKalauullanik*).

UKÂLATTI: katimautitsak five, “kiggatuttet UKausitsangit”. kiggatuttinik

uKattuKagumavâ? Ilitagijaga kiggatuttik Dan Pottle.

MR. POTTLE: Nakummek, uKâlajek. kiggatullugit Canadami Angnigusugunnatut

amma Nunatsiavut kavamanga, salutitsigumavunga Gerald Andersen

St John’s-imit uKausiulaummat ilangauninganik 14-nanit

nunaKakkâsimajollutik Canadamiut tigujausimallutik 2015 Indspire

Award pitâlłalluni. Gerald tunijausimajuk suliaKausimajamminut

avatiliginimut amma piviannatugijanginnik. UKâlajek,

suliaKasimajuk ogannianimmut Marine Institute Memorial

Ilinniavitsuangani 27-ini jârini. kamaluasimajuk UKâlaKataulluni

nunaKakKâsimajunut Canadami amma ukiuttatumi.

SuliaKaKatausimatsiajuk nunalituKannut Newfoundland
Labradorimilu, Nunavut amma Nunavik. UKâlajek, Gerald
suliagisimajangit nunaKakKâsimajunni piluatsimajuk sakKitisigiamik
ogannianimmut imaligigiamillu ilinniatitsinimmik. Pigiasititsisimajuk
ogannianet pivalliagutitsanginnik Nunavummi, Nunavik, Nunatsiavut
Innu Nation, Federation of Newfoundland Labrador Indians amma
Labrador Metis Nation, taijaulittut NunatuKavut. Gerald
suliaKaKatausimajuk Miawpukek First Nation Conne Riverimi
pigiasititsigiamik akunimut ogannianimmik amma imaligigiamik
ilinniatitsinimmik. Marine Institute, UKâlajek, sakKijâvallaiajut
taggamiuni amma pitsatusitillugit ikajuttigennet nunalituKait
nunaginginni. Gerald suliaKajuk takugiamik inosuttunik
suliatsatâgianginnut ogannianikkut amma imaliginikkut ilinniatillugit
pivitsaKagajangit ilinniagiamik taimaittunik. UKâlajek, salutitsitavut
Gerald Andersen. Nakummek UKâlajek.

UKÂLATTI: Nakummek, kiggatuttek Dan Pottle, Canadami Angnigusugunnatunut.

Ilitagijaga kiggatuttik Tyler Edmunds, KipukKak.

MR. EDMUNDS: Nakummek, UKâlajek, Ilitatsigumavunga pigumanniisialauttunik

KipukKami Inuit Nunalet kavamanga kaunsalitsanik angnigusutillugit.

Nakutsanammagilauttuk kinakkunik takugiamik ilaugumajunik

sunanut kajusiutjaujunut nunalet kavamanginnut amma piujumik

ikajutsilutik nunagijaujumik. Nakummegumajakka atimminik

ilitsisimajut amma salutillugit angnigjausimajut. Nalungilanga
pigunaninginnik amma jârini Kaijuni aliasutsianiattut
suliagigialimmini. UKâlajek, November 2nd KipukKami Appalittet,
taijauluattut Aulajok Tamammik sivullipâmi jâritigut appalilauuttut
pisullutillu. Tapvani jârimi pikkujilaukKugut five kilometere
Kaningilinimmik. Taikau Club aittutuilauuttut sâlakkumautitsanik
tunijaumajunik taijanut Trappers Running Club amma aikittutâgijet.
kenaujaKattitaulluta sâlakumautinnimut SuliaKapvinganut
IlukKusiligijet, Pingguatuligijet amma Niuggutitsijet, amma kamajut
nakummegutiKatsialauuttut ikajuttaunimmik. UKâlajek, 23
ilauKataulauuttut jârilet 11 tikilllugu 73. Nakummelugik Jim Goudie
amma Grant Gear ikajugunnalaummânîk jârimi kamaKattalutik
appalinnimik amma ikajullutik Kanuilingajutsaumangâta piusiugialet.
HSD suliaKattingit KipukKami angijumik ikajulaummijut.
Unuttugiallalu akilittutaugatik ikajulauuttut, nakummejautsiatut.
UKâlajek, tujummiKugiallangittaga Pastor Canning nunalinnut
KipukKami. Ajukittuilauuttuk 12 jârini, amma tusagami nunalet
ajuKittuijuKangitut, atimminik tunitsisimajuk amma
sivanniatitsiKattaniattuk atausimillonet jârimi. Nakummek, uKâlajek.

UKÂLATTI: Nakummek, kiggatuttek Tyler Edmunds, KipukKamiunik. Ilitagijaga

AngajukKâk Herb Jacque, Makkovik.

MR. JACQUE: Nakummek, UKâlajek. Sivullipâmi, Kaujitigumavatsi suliajigijaujunik nunagijagani. Pingguavitsak sanajauninga inganiKatsiajuk. Matutsimattitauniattuk ukiumi tapvani jârimi. Nunalinni Ikijunniattet illusanga pijagettaujutsak takKiup nâningani, amma ilitatsigumallunga kinakkunik nunagijagani. Sivullipâmi. Salutitsigumavunga Dion Rideout, nutâk ilinniavimmi angajukKâgijaujuk. Ilinniavimmi angajukKâgijauKattalauttuk, Liz Evans Mitchell, aliasutsiaKujaga nukKanimmini amma nakummelugu 30-ni jârini ikajusimammat nunagijattinik. Ammalugiallak, ilitagigumajaga Marilyn Faulkner, suliaKapvitinni ikajuttiulittuk Sheila Park aullalaummat nollunilu nunagijattinit. Nakummemijaga ikajusimammimat. Amma salutitsigumavunga ilonnainik kaunsalimejunik angnigijaumajunut, amma suliaKaKatigitsiagumajakka sitamani jârini Kaijuni. Nakummek, UKâlajek.

UKÂLATTI: Nakummek, AngajukKâk Makkovimmi, Herb Jacque. Ilitagijaga Gary Mitchell, Itsivautalinga NunaKatiget Inuit Nunalet kuaparesanginni.

MR. MITCHELL: Nakummek , UKalajek. Ullâkut ilonnasi. ItsivautaKalilaugamanit September 9th-imi, suliatluluviniKasimavunga amma sungiusagasuallunga suliajigialiganik amma kamagijaugialinnik aulatsinellu piusigigialinginnik. UKâlaKataunnanginnatuk ikajuttaugutilinnut, amma kiggatuttinut Upper Lake Melville-imi unuttumagiummimata ikajuttaugutilet. ApitsuinaKattajut pidjuttilinnik ilaliutinnimik, illuliginimik, illuit âkKigiattaunitsanginnik, Kijunik Muskrat Falls-imit, Muskrat Falls-imi suliatluluvini, UKâlaKataunnimik/Kaujimmattitaunimik, apitsotet sollaru Kanga Nunatsiavut kavamanga katimatitsilâkKât nunagijaujumi, Upper Lake Melville-ime? Ilangit apitsotet kiugunnatagaluakka, asingit kiugunnangitaka asikkanut kiujaugiaKasot. Taimaigaluattilugu,

Ippiniavunga ilonnatik apitsotet kiujaugiaKanninginnik.
IkKagijauKattaniannanga kiujaugumaliguma sunanut
Kaujimagialikkanut. Septemberaminit angnigusujuKakKâtillugu
nutâtsanik AngajukKauKatigetsanik NunaKatiget Inuit Nunalet
kuaparesanginni amma sutaijattunik katimasimalilluta. Nutât
angajukKauKatiget Eileen Burden, Leanne Hill, Sheila Saunders, Ruby
Best, Jennifer Mitchell amma Edward Mesher. Pigumatsiatut
angajukKauKatiget amma uKâlaKatigetsiasimajut Kimmigugiamik
nutânik pivitsaugajattunik. Ilangat suliajiaugumajuk
uKâlautigisimajavut uttogumavugut pigutsegiamik pitâlluta nunamik
amma sunanik pigutsenialilluta. Ikajuttaugutilet atuKattajut Nunalet
kuatsevinganik ikajuniattilugit tigullaigiamik pigutsiagijausimajunik
ukiatsâmi. Suliangujuut ikajugajattut silamettilugit, piujummat
isumanginnut amma nukiKatsiagasuamut amma ikajulluni niKitsanik
pitâgijausonik Nunalet kuatsevinganik. Ippiniavugut taimâk
pigunnatut, ottugausiugajattuk, amma Kanuttoluta Kanuk
ikajugajannitunik ikajutsitaulluta piusiugumajummut.
SivullipautigiaKagajattavut, Nunalinni Kuatseviujuk, aulatautsialuni,
pitâgiaKavugut sulli moosivinimmik. Pitâsimavugut maggonik
laisinsinnik pisongugiamut moosimik, atautsik prâvinsiup
kavamanganit amma atautsik Nunatsiavut kavamanganit. Atausik
laisinsik tigujaumajuk, sulli moosittuKasimangilak. kingullia laisinsik
pitâgijaumalittuk moosinniagiamik Rigolet nunangani amma
pinniagumagajattunut matulauttuk November 28th. Ikajuttaugutilet
atuluaKattajut Nunalet Kuatsevinganik pigumammagilittut
niKituKammik, amma apigiKattalutik Kanga pijuKagunnalammangât.
Kanuttogivugut niKijattâgiamik Gros Morne-imi
omajunniatuKanningani akuniulungituk. Ilagiatsiguma
Septembereautillugu hundred eight atusimajut Kuatsevimmik

hundred four Octoberami. Ununnutsimiujuitsait 200-tinut Nunalet
Kuatsevinganik atujut niKet tikiajappata. UKausiKagumavunga
tuniggusiagilauttatinnik \$10,000 Ikkajuttiget
AngajukKauKatigenginnit ilingajutsak Nunalet Kuatsevinganut,
Kanuttolunga kenaujakkuvittinnilâttuk tapvani takKimi niKinik
katitsuigiallagunnagatta ukiatsâmi. Mânnaujuk, Kuatsevivot
pitaKatsiatuk paunganik, appinillu. PitaluviniKavuk siugaujatsimajunik
oganiK amma ogâtsunik, kavisilegutisimavugut hundred fifty-nit
pitâgilauttatinnit Decemberami. PitaKagaluakKugut nutânik
Kuattisimajunik iKalunik pisijaumajunik Torngat Co-op \$4.00
paunnitut, akitujugalammagik taimaittunik pitâgiak Kuatsevittini.
PitaKagivugut pijaugialinnik tamaungatitausimajut unuttunit
omajunniatinnit piugijautsialutillu. Asinginnut sulijagijaujunut
ikajuKattagivugut, sollu Kanuittailinik Umiattuluni, nukKangattitaujuk
upingasâmunut ilinniatitsijimmik pitâgunalaunginatta ukiatsâmi.
Kukiutittâsongugiamut atugiamullu Ilinnianik, ilinniatuKalaukKuk
pigianningani November amma Kaujisalaulluta ilangit
ikajuttaugutilivut ilinniagajammangâta, tâvatuak itsivautaKalungilak
atuinnanik Kinugautilinnut ilonnatik inuKalilaummata. Asinga FAC
ilinnianitsak ullusalik Decemberami, amma ikajuttaugutilet
apigijaujut uKâlakKulugit college-imut itsivautattâgiamut
ilinnianimmi. Tamanna kamaginiattavut ikKanammagimmat
ikajuttaugutilivut Kukusijagiamik ilinnianitsanginnut
omajunniagamullu inogutitsamik. Pillugu Mikigianniasongugiamut
Ilinnianik, ilinniatitaujuKalâkKuk 22nd November Goose Bay-mi,
amma Kanuttoluta ilangit ikajuttaugutilivut atiliutsimajut
ilinniaKataulânninginik. David Wolfrey ilinniatitsilâttuk,
uKausigillugillu ikajunningit Nunaligijet Piviannatuligijellu amma
SuliaKapvinga Ilinniatuligijet kenaujatigut Pivalliatitsijet

ikajugunnamata ilinnianik pigiasikKulugu. Pijageppat
mikigianniagamut ilinnianik pivitsaKatitsilâttuk ilinniatunik
ikajuttaugutilinnik nunamosongugiamut; mikigitjiluni
kenaujaliugiallagamut malingallutillu ilikKusimminik
piusituKamminilu. Alianattojângituk, allakasâjaKalluta kisiani
aullagunnatugut ilatsajatta piusigilauttangatut kisiani laisinsiKalluni
mikigianniajuKasongulimmat. Pijagellunga suliaKaKatauvugut DHSD
suliaKatinginnut atuinngatjigiamik Inovianut piluattumik tajiamut
Nalujuit Unnusanga. Kuviananginnatuk amma KaikKujilluta
kinakkutuinnanik legion-imut ullusiuKataugiattulusi. Nakummek,
uKâlajek.

UKÂLATTI: Nakummek, Gary Mitchell. Ilitagijaga Joe Dicker, AngajukKâk, Nain.

MR.DICKER: Nakummek, UKattek. Kuviasuvunga Kaujitsigiamut utisimalittugut
suliaKapvitinnut Nainimi. Pijagettaulauttuk Octoberami, taimaimmat
utisimalikKugut amma suliaKalimmiluta. Mânnautilillugu
nakummegumajakka Ulapitsaijet katimajingit kenaujaKattisimmata
iluvipvivut âkKisuttauninganut. PiKutitsanginnik iluvipviup amma
âkKigiagutitsanik akianut ikâpvimut. Amma piluattumik Inuit Nunalet
kavamanga Nainimi KinugautiKalauttut namminik illuKapvisannik.
Ulapitsaijet uvattinik aittuisimajut 30-nik illuKapvisannik
akitutigitillugu \$7.5 miliun. Taimaimmat nakummek tamatsumunga.
Pillugit sâttujât sulli tikisimalungitut Nainimut. Sulli itsavinejut Goose
Bay-mi atuinnaulittut usijaugiamik Astron tikimmipat kingullimi.
Tikisimatualippata suliaKaliaKilâkKugut matugasuallugu nutâk
upavitsak, piluattumik ukiukKâtinngu. Pillugu unuttolingajuk illuk,
UKâlajek, uKaudjigiajivut kampanet, Atsanik Consulting amma ASCI,
ATCO katilâlittut December 1st pijagettumik Kimmigulutik
unuttolingajumik illumik. NâninganegiaKalauttuk December,

taimaimmat sivulliulingajut. kamagillugit piungitumetsigajattut Kimmigunimmi, nigiuvgut nogiamik tapvainaunitsak. Tamanna tusagianga piujummagik. Pillugu Charles Lake SuliaKausiujuk, upalumagalâttuk, tainna atuttaulâmat taijavut Nutaungituk imittavialuk sunait pilukagajappata. Sunamik nigiangikaluattugut, asianut atusongugiaKagajakKugut. Nutât piKutitsait ilijausimalippata, uKâlajek, nunalinnit unaniunitsak, pitsatuluatlagajattuk imaup ingiganinga, suliaKattivut NICG, Nainimi Inuit Nunalet kavamanga, ottugalâttut illunik Atsanik Tujummiuvinganit ununga ottugallutik imaup pitsatuninganik, pitsakilliutinik pitagiaKagajammangâtta. Kanuk pijaulâmmangâta pitsakilliutet uKâlautaulâttuk wogimi Kaijumi kaunsalet katimalippata. Ikiyunniatet hâllinga. UKâlajek, minguattauninga pijagettaulittuk. Pijagettaujutsaujuk minguagutet tikituappata Goose Bay-mit. UtakKimijut piKutigiallanik, tikijutsiat pingasuni, sitamanuillonet ulluni. Ilonnatik piKutigalait nutâmettut piulimatsivimi utigunnalâlittut ikijunniavimmut suliaKagunnalialilluta. UKâlajek, mânnaujuk nakummegumavunga Nunatsiavut Group of Companies Kijunnik tikititsilaummata ukiatsâmi. Sivullimi pingasuit usilluat, amma kingullipâmi tallimaullattut usilluat. Ilonnatik Kijuit tunijaumalittut. Nakummelugit akilittutaugatik ikajulattut amma inuit nunalet namminik Kijunnik aitsigunnalaummata. Ilitatsigumagivunga ilanginnik akilittutaugatik ikajulattunik Kijunnik tuniukKaigiamut, maggolauttoni wogini, namminik ikajutillutit uKâlajek. Ilitatsigumavunga John Ikkusek Torngat kuapanginnit ikajugunnalaummat kuapait motakângagut aittuKattaigiamik Kijunnik. Pingipat John, pijagesagaigajalaungilagut tapvainak nillalilaummat amma Inuit pigumatillugit Kijunnik. John ikajugunnalattuk 100-mejunik illulinnik. Asingillu katutjiKatigennet,

ilitagijaugialet, RCMP, kaunsalet ilangit amma Pastor Andrews ikajulauttut tuniukKaigiamut Kijunnik. Nunalinnik ikajotet pigiasimalittut, UKâlajek. PitâlaukKugut \$17,000 prâvinsiup kavamanganit. IkajugunnaniakKugut sâksinik inunnik tapvona \$17,000, sulli amigatsivugut senanik inunnik nâmmasigialinnik sitontimminik. katiKataulaukKugut MHA Randy Edmunds. UKâlajek, ullop sivungani maungaKâgata. Auka Fraitâgiulauttumi, uKalauttuk kenaujanik Kinijanianniminik. PitâgiallagiaKavugut \$16,000 ikajugiamik senanik El-tâgialinnik. Ajuppat, aggâni nâmmasigunnalângitut pigiaKagajagamik 900 sitontinik asiagut 420 nâmmasigiamut. Taima, uKâlajek, Nainimit. Nakummek.

UKÂLATTI: Nakummek, AngajukKâk Nainimit, Joe Dicker. Ilitagijaga Jim Tuttauq, AngajukKâk Hopedale.

Mr. TUTTAUK: Nakummek, uKâlajek. maggoni wogiulauttoni Hopedale Inuit Nunalet kavamanga nutânik kaunsalittâlauttut ilijaulagilutillu. Tallimanik kaunsalimettuKalikKugut, amma Donestâgimi, 20th, sivungagut angnigusuttisilâkKugut atautsimik ikajuttaugutilimmik amma atausimik ikajuttaugutiKangitop itsivautatsanganik. Amma sivullingani wogiup Decemberami sivungagut angigusuttisigunnalâkKugut amma Kanuttoluta sepanik kaunsaliKalâlittugut. PCB Salummasattauninga tapvani jârimi pitsianiKalauttuk. Hopedale Inuit Nunalet kavamanga nakutsautiKammagilauttut nutâmik kantrakkiutimmik taijanut Senexen. Anitatsanik amiakKuKangilak tapvani jârimi. Ilonnatik umiakkut aullatitaumalittut. Senexen pitsianiKasimajut, piujummagimmik kantrakkilutik. Taimâgalak suliaKasimalittut 30-ni jârini sulijugigunnasiallugit. UKumainnigalalet fifteen hundred tonnes sukkutaumajut itjuut pettaumajut unatattuligijet inigiKattalauttanganit amma katitsutaumajut pingasuni jârini

pigiattaumalauttut atuttaumajut saujautitsigiamik. ImaKâ 630
pongujuut sukkutaumajut nunajait pettaumajut Octoberami tapvani
jârimi, ilagiallugit 520 pongujuut aullatitaulauttut Novemberami.
MâannaKammik tikitainnalaukKunga St.John'simit katiKataullaunga
namminilinnut PCB-ligijet katimajinginnit. UKâlautiKalaukKugut
sunanik sollu kangidlutinnik, pitagalaKatsiamat amiakkuvininnik PCB-
nik. SakKititsilaukKugut pingasunik piusiugunnagajattunik Kanuk
kamagiamik kangidlutinnik. Maggok pidjutilek piusiugunnatonnik
ubvalu Kinijagiamik amma asigiallangu sautsigiamik.
UKâlautigigiallagunnalâttavut nunalet katimattitaulippata Hopedale-
imi kavamangillu Newfoundland Labradoriulu amma Stantec,
avatiligijet amma katutjiKatigennivut. Ullumimut, nakummelugit
NGC, Hopedale pitâsimajuk sepanik Kijuttalinnik piulimatsivinnik
nakummegutautsaluni nunalinnut. ImaKâ sitamanit sâtsinut
woginut inutuKait motakânga ingainasimajut uvattinik
tataminniatitsiluni. Nigiulaungilagut motakâmik kisiani aggâgut.
Tikisalauttavut Goose Bay Motors. Motakâk akilittaumajuk ilangagut
IGA amma Hopedale Inuit Nunalet kavamanganut, IGA tunitsitillugu
\$19,000, amma Hopedale Inuit Nunalet kavamanga \$14,000-tut,
akitutigilluni imaKâ \$33,000 motakâk, sepanik itsivautalik.
Mânnaujuk ajutsaumingavugut motakâk ingatigianga ulluk tamât
KinugautiKagiaKagatta kenaujanik suliatsatâtsigiamut
motakâttisammik. Atuvugut suliaKattitinnik mânnaujuk. kinatuinnak
kiukatangituk fonninik, aitsikataKattajuk inutuKannik. Ammalugiallak,
inunnik aititsiKattamilluta mipvimut ânniasiupviliagialinnut.
Ajunnasok tingijot tikiKattamata Kitigaligalammi amma suliaKattivut
nigigiattusimatillugit suliaKattivut Kitigalitsiutigiattusimatillugit,
tâvatuak pigasuaKattavugut. UKâlajek, Unuttolingajuk , 65%
pijagetsimalittuk. Ilonnanga silatinga pijagetsimalittuk.

SuliagijauluagiaKalittuk ilua, sollu vaijait, Kammait, asingillu,
nigiuvugut pijepvisammik pigianningani Mai pijagegiamik,
ajunnaKongituk. Mânnautillugu, uKâlajek, nakummegumavagit
uKausiKakKaugavit unatattuliasimajuttinik UnatannisuaKatillugu.
Amma ilonnatinnut puigujaugiaKangituk. Nakummek, UKâlajek.

UKÂLATTI: Nakummek, Jim Tuttau, AngajukKâk Hopedale. Iitagijaga kiggatuttik
Roy Blake , Upper Lake Melville.

MR. BLAKE: Nakummek, uKâlajek. PivitsaKagumavunga uKagiamik aliasunniganik
kiggatuttiugiamik Upper Lake Melville nunanginnut. Maggonut
ilausimalikKunga pijagenniusimajonnut kingullipâmi
katimalaugattanit, ilanga college of the North Atlantic Kuattijausonik
tungaviliusongugiamut, Salutigumajakka ilinnialuttut pijagellutik,
Jerry Ford, Patrick Maggo, George Mogridge amma Kelly Okkuatsiak
pitsiaKullugillu sivunitsanginni. kingullia ilinnianimmik
pijagenniuluttuk Academy Canada sunanik ilinniagiamut. Brad Hurt,
Brad Saunders, Lydia Tuglavina, Tabea Aggek, Wayne Best amma
Salome Jararuse. Ilinnialuttut atuinnaulittut iinniavitsualiagiamik
puttunitsanut ubvalu sunanik ilinniagiattugiamut pitsiaKujakka
sivunitsanginni. Ilausimavunga iluvitauninginnut Vilroy Hefler,
Ambrose Aggek, Juliet Karen Pazzouli, amma Maria Sarah Atsatata.
Salutitsigumavunga kitsajunik malittunik ilagengujunnik. Hefler
ilaget, Hefler-Elson, Mackey amma Dawson ilaget, Aggek amma Obed
ilaget, Hope amma Pazzouli ilaget. Bill Onalik amma Atsatata ilaget.
UKâjek, nakutsalautsimavunga takugama Regina
Merkuratsolauttumik jârini Kângisimajuni. kitsajunut Merkuratsuk
amma Dicker ilaget, amma Tony Mesher. Nakummegumagivunga
Philip Earle amma suliaKattinginik Air Labrador ikajutsisimatsiamata
ilagengujunnik aititsigiamik nunagijaujunnut iluvitsigiattulutik, Philip
Earle suliaKattingillu nakummetautsiagialet. Nakummek, UKâlajek.

UKÂLATTI: Nakummek, Roy Blake, kiggatuttik Upper Lake Melville. Iitagijaga Diane Gear, AngajukKâk, KipukKami.

MS GEAR: Nakummek, UKâlajek. UKâlajek, Kaujitsigumavunga katimajitsuanik ilanginnik suliaGijajunik nunagijattini. Sivullimi, nutâk ikijunniatet suliaKapvisanga pijageniujalittuk pijagepvisaKallutik January 31st, 2015. IkijuKalippat imaKautet, senait illuit pigiasijauluttut upingasâmi pijageniujalittut. Waijangit pijagelittut. Ikumaligijet tikijutsaujut November 20th. Nutât imait akKutingit pijagetsimalittut, utakKigivugut ikumaligijinnik âkKisuigiattugiamut. Pijagejutsaulittut wogini Kaijuni. UKumaitsautiKalaukKugut imaKautinnik, imaKautet KakKamijut, nunalet tappângat imatâKattajut. UKumaitsagalalaukKugut wogiup nâningani. Kuagutjausimalluta, waijangit pejatsimalaummata napajummi. Ikumait pitsakiluatlaluttut illumik nigumititsigiamik. Taimaimmat Kuagutjausimavugut amma pitsatuningit nunalinni mikiluatlaluttut. Nakummat, suliaKattivut suliaKasagailuttut amma nigumiutinnik âkKisillutik imait ingalagunnaniattilugit ilingajut nunalinnut. Nutâk nunalet upavitsanga sukkaitumik pijagevalliajuk, ajunnasiugalavugut ikumannut waijannulu. Pijagegumajavut Decemberami, imaKakisianiulittut Mertz ubvalu Aprellimi. UKâlajek, Nakummegumajaga kiggatuttik KipukKami, asingillu, appalitisilaummata KipukKami. Unutolauttut tamânejut amma aggâgut taimâtsainak pigumajut. Nakummek angijumik Tyler. Nakummegumagivunga kinakkutuinnannik atimminik tunitsilauttunut angnigijaugiamut kaunsalimejutsaulutik. ImaKâ ailifauluttut. Iluingalittut kaunsalet, suliaKaKatigetsialuta sitamauniattuni jârini. Salutitsigumagivunga Sheila Priddle angnigijaulaumat AngajukKâp tullinganejutsauluni KipukKami. Nakummek, uKâlajek.

UKÂLATTI: Nakummek, Diane Gear, AngajukKâk KipukKami. katimautitsak six, "Utinnik UKausikkut apitsotinnut." UKausitigut apitsotitsaKavâ? katimautitsak seven, "UKausikkut Apitsotet" pitaKavâ? Ilitagijaga Diane Gear, AngajukKâk KipukKami.

MS GEAR: Nakummek, uKâlajek. UKâlajek, apitsotiga ilingajuk Ministerimut Nunaliginnimut Piviannatunginullu. PSCJ KinugautiKalauttut pigunnautimmik ujugattâgiamut Postmill Lumber akKutinganit. Wogiulauttuni uKautijaulaukKugut tunijaugiaKanninganik katimajitsuanut, UKautigunnaKamma kamagijaulammangât katimajitsuanot. Ajuppat, Kanga kamagijaugunnatok Nakummek, UKâlajek.

UKÂLATTI: Nakummek. Ilitagijaga Nittunattuk Darryl Shiwak, Minister Nunaliginnimut Piviannatuliginnimullu.

MR. SHIWAK: Nakummek, uKâlajek, amma nakummek apitsotinnut, AngajukKâk Gear. PitaKangilanga ullumi Kaujitsiutininik. UKautigunnaKâkKagit Kauppat. Nakummek.

UKÂLATTI: Nakummek, Ilitagijaga Joe Dicker, AngajukKâk Nainimi.

MR. DICKER: nakummek, uKattek. Apitsotiga Ministerimuit IlikKusiliginnimut, Pingguanimmut amma Niuggukatattisinnimut. Illusuak pigiataunsimanninga pijagetsimalittut . Tâvatuak pidjutaujuk Kuligettitâsimajut nunami skidoot akKutigiKatatjanginni taimangasuanit atuttausimajuk nunalinnut. Apitsotiga Mr. Minister, sunanik âkKisuijuKalâkKâ kinakkut ingigajut tamauna Kanuittailigutitsanginnekk ukiumi. Nakummek.

UKÂLATTI: Nakummek. Ilitagijaga Nittunattuk Richard Pamak, Minister IlikKusiliginnimut, Pingguanimmut amma Niuggutitsinimmut.

MR. PAMAK: Nakummek, uKâlajek. Nakummek AngajukKâk Dicker. Ilitagitsiatavut KanuittailigiaKannet inigijauniattumi. Pisigumavugut puttujunik avalunnik kaivallagunnatunik inigijaulâtumi, inggaviummagiKattamat skidoonut amma ilanginnik akKutigijauKattajunik matutsigumavugut, akKutiuppâKunnagit. Tikisaniujavugut puttujunik avalunnik, ârinsiutillugit, amma ajunnangippat tikisagaiKujavut. Nakummek, uKâlajek.

UKÂLATTI: Ilitagijaga Tyler Edmunds, kiggatuttik KipukKamiunik.

MR. EDMUNDS: Nakummek, uKattek. First Minister uKakKaujuk ullâk CA Nunatsiavut Marine amma prâvinsiup kavamanga tikitsinianninginnik usigatsanik itsavinut sikuit apviangippata. Sikuit apvianiappat CIA Nunatsiavut Marine amma prâvinsiup kavamanga tikitsigunnagajaton niuviatsanik tingijotigot?

UKÂLATTI: Nakummek, ilitagijaga Nittunattuk Kate Mitchell, First Minister.

MS MITCHELL: Nakummek, kiggatuttek apigiusinnut. Ahali, mânnaujuk, pititsitillugit sikuit ubvalu anuget tikitsigumajut usigatsanik, sulli uKâlautigisimangitavut, Kaujimavunga silait asiangukallapata, piusitsaugunnatunik kamagasuagajakKugut. Okay? Nakummek, uKâlajek.

UKÂLATTI: Ilitagijaga Roy Blake, kiggatuttik Upper Lake Melville.

MR. BLAKE: Nakummek, uKâlajek. Apitsotiga ilingajuk Ministerimut Nunaliginnimut Piviannatugijanginullu, Minister Shiwak. Siagugiak uKakKauvutit Ministeret uKausitsanginni mooset laisinsingit sitamauninginnik ilonnainut Nunatsiavut nunagijanginnut amma pingasottillugit Uppwer Lake Melville-imi. Apigiusiga ilinnut, sumat pingasutuinnait Upper Lake Melville-imi? Nakummek, uKâlajek.

UKÂLATTI: Nakummek, ilitagijaga Nittunattuk Darryl Shiwak, Minister

Nunaliginnimut Piviannatugijanginnulu.

MR. SHIWAK: Nakummek, uKattek. AviukKatauningit, nunalinni pijaugunnatut mooset taijamut TH 35. Tunijaulauttuk AngajukKaunet katimaginnut pikKujiusiKatillugu Kanuk tuniukKaigiamut moosiujuunik. AviukKatauningit, amma sulitsiatumik uKavutit. Sitamait aviukKataumajut tallimanut Inuit nunagijanginnut, pingasuit ilingagajattut Upper Lake Melville-imut. Ammalugialak asiangutigalâttavut tapvani jârimi. Moosigiallak, sâtsiuKattajut ilonnaini nunagijaujuni, maggogialâk ilingajok inogusiusongujunnt nunagijanni, amma pinasuannik kamagillugu Nunatsiavummi tapvani jâriuniattumi, asiangugajammijut. Amma pingasugiallait asiani Upper Lake Melville, maggugiallânik tamatsumunga ilingatitsivugut. kajusiutjauluasimajuk TH Nunatsiavummi. Taimaimmat takugunnaKusi pigunnuanniginnik Nunatsiavummiut. KaujimakKugatsi, iluani Upper Lake Melville, ilauKataugunnaKusi prâvinsimi sâlakkumautinnimut ilingajunik Upper Lake Melville moosinniagiamut iluagut prâvinsiup laisinsingagut. Ajunnasonguvuk kinamut Nunatsiavummit aigasuagimik tamakkununga nunaujunnt. Akitujugalammagik. Tamakkua ilangit isumatsasiugutaugialet. Piluattuk iluani TH 35-imi Nunatsiavummi, taimaimmat unuluatitsivugut iluani Nunatsiavut. Nakummek, uKâlajek.

UKÂLATTI: ApitsotitsaKagiallavet pillugu pijaugunnatut moosinniagiamot?

Mr. BLAKE: Nakummek, uKâlajek. Tukisimausikkut pingajunga sulli tunijausimangituk –tammagajattunga, Kanutuinnak. Amma tânna maligatsaulittuk mooset pijaungipata sivungani Fevruar 25, 2015, laisinsit tunijaugajattut nunalinnut Nunatsiavummi. Nakummek, uKâlajek.

UKÂLATTI: Nakummek. Pigiasigit, Nittunattok Darryl Shiwak.

MR. SHIWAK: Nakummek, uKattek. kiggatuttik uKagi allagunnatok sivullianik
apigiusigikKaujamminik pillugu pingajua? TukisitsiaKaunginakkut,

UKÂLATTI: Apigiusigigiallaguk, sir.

MR. BLAKE: Tukisiavunga pingajua sulli tunijaumangituk, kinamullonet.
Pijâgengilanga. MaligatsaKalimmat mooset pijaumangipata sivungani
Fevruar 25, 2015, laisinet tunijaugunnatut nunalinnut
Nunatsiavummi.

UKÂLATTI: ApigijuKagi allamat. Tukisiumivât apigiusiujung?

MR. SHIWAK: Yep.

UKÂLATTI: Pigiasigiallagit.

MR. SHIWAK: Nakummek, uKâlajek. Kaujimangilanga pingajua laisinsik
tunijaumammangât kinamut Upper Lake Melville-imi.
kamagigasugunnataga. PiusiuKattajuk, uKakKaugama, laisinsigiallait
pillugit pingasuit Upper Lake Melville-imi amma sitamani
nunagijaujuni, isumatsasiugutauluttut, piusiusimajutigut
jâriulauttumi, laisinet tunijaugiallagunnatut. Tamanna
piunippaugajattuk, amma kamagijauKattaluni jâriujuk ingiganingani.
KaujigitigiallagajakKit pingasojunik laisinsimik uKausitigut
apitsujuKalippat. Nakummek, uKâlajek.

UKÂLATTI: Nakummek. Iitagijaga Gary Mitchell. Itsivautalik NunaKatiget Inuit
Nunalet kuaparesanginni.

MR. MITCHELL: Nakummek, uKâlajek. Apigiusiga ilingajuk Ministerimut
Ilinniammut amma kenaujatigut Pivalliagutaugunnatunut.
Tukisimavunga suliaKapvet siagu pitaKatitsiKattalaunninganik
Kuattitaumajunik iKalunik Nunalet Kuatsevinginnut Nunatsiavummi.
Tukisimausikkut 13,000 paunnet tunijaumajut Nunalet

Kuatsevinginnut tapvani jârimi. IsumaKatuinnavunga
tunitsijuKagunnamangat nutâjanik , Kuattisimajunik iKalunik Upper
Lake Melville-imut. AkilegiaKalluta \$4.00 paunnimik pisigiamut
iKalunik ilingajutsamik Kuatsevimmut akitujummagik Inogusiujunut
piujummata inunnut, iKalunik pitâgunagaluakKugut Kuatsevittini.
Tâvatuak akilegiaKaguvit \$4.00 paunnituk, akitujummagiusok.
IsumatsasiuttuKasimavâ tunijaugajammangâtta Kuattisimajut iKaluit
ilingajutsait Nunalet Kuatsevinginnut. Nakummek, UKâlajek.

UKÂLATTI: Nakummek, Ilitagijaga Nittunattuk Patricia Kemuksigak.

MS KEMUKSIGAK: Nakummek, uKâlajek. SuliaKapvivut kenaujaKattisilauttuk
suliaKaKataullutik SuliaKapvinganut Nunaligijet Piviannatuligijellu
iKaluttâtitsigiamut, uKumainnilinnik 10,000 paunninik.
Kaujmallagingilanga Kanuk tuniukKataumammangâta, kamaginiataga
kiugunnalutit uKausitigut apitsujuKalippat. Nakummek
apigiusigijannut.

UKÂLATTI: UKausikkut apitotitsaKagiallavâ? UtakKigalâgitsi. Ilitagijaga Herb
Jacque, AngajukKâk, Makkovimmi.

MR. JACQUE: Nakummek, uKâlajek. Apigiusiga ilingajuk AngajukKâmut.
Siagulauttuk Kaujimavutit Makkovimmi Inuit Nunalet kavamanga
KinugautiKalauttuk Tasiujatsoak kenaujakkuvinganut atugatsanik
illuliupvisannut, tukisimausittut Kaujititsiutivut nâmmalaungituk.
Allasimajunik uKagaunnaKet sunanik amigatsisimammangâtta?
Nakummek, uKâlajek.

UKÂLATTI: Nakummek, Ilitagijaga Nittunattuk Sarah Leo, AngajukKangâ
Nunatsiavut.

ANGAJUKKÂK LEO: UKâlajek, apigiusiujuk kiugunnaKungitaga
kenaujakkuviligijiullunga. Itsivavunga AngajukKângullunga

Nunatsiavummi. UKâlaKatigegunnataga AngajukKâk Makkovimmi silatâni itsivaupviup.

UKÂLATTI: Nakummek, apitsutuKagi allagumavâ? Aigiasigatta katimautitsamut eight, "Allasimajutigut Apitsotet" Allasimajunik apitsotitsaKavâ? katimautitsak nine, "Utinnik Allasimajunut Apitsotinnut" allasimajunik apitsotitsaKangilak ullumi. katimautitsak ten "Nâmmasingiutet" pitaKavâ nâmmasingiutinneq? katimatitsak 11, "kiuguset nâmmasingiutinnut" kiugusiKaniangilak ullumi. katimautitsak 12, "Kaujitsiutingit Pimmagittunik amma Pillagittunik katimajet" pitaKavâ ullumi? katimautitsak 13, "Sâmottauningit AllaKutet" Iitagigumajaga Minister kenaujaliginnimut amma Nunatsiavut kenaujaligijinga Nittunattuk Dan Pottle.

MR. POTTLE: Nakummek, UKâlajek. Sâmotsigumavunga kenaujalittâjunik Labradorimi Inuit kenaujaliugutingita kenaujakkuvinganik jâriup nâninganut December 31st, 2013. Nakummek, UKâlajek.

UKÂLATTI: Nakummek, Nittunatok Minister. AllaKutik sâmottaumajuk nomarattâniattuk 01-4(3). Iitagillugu First Minister, Nittunattuk Kate Mitchell.

MS MITCHELL: Nittunatok UKâlajek, nakutsavunga sâmotsigiamik maligatsanut allaKutimmik taijamik, "Atugunnanik Nunatsiavut katimavitsuanganik Hopedale-imi."

UKÂLATTI: Nakummek, Nittunatok First Minister Kate Mitchell. AllaKutik nomaraKaniattuk sâmottaumalluni 02-4(3). AllaKutinik sâmogatsaKavâ? PitaKangipat aigunnalikKugut katimautitsamut 14. katimautitsak 14, "Kaujitsiutet Auladjaigutinnik." KaujitsiutiKavâ Auladjaigutinneq? Iitagillugu AngajukKânga Nunatsiavut, Nittunattuk Sarah Leo.

ANGAJUKKÂK LEO: Nakummek, Nittunatok UKâlajek. Kaujitsigumavunga Mitwogemi, November 19th, auladjailâttinga, tulliujiitillugu First Minister, Nittunattuk Kate Mitchell, malittumik auladjaigutimmik: Tainna Veryan Haysom, ikKatuijik Nunatsiavut kavamangani, KaikKujauulluni Kimmigugiamik *SuliaKattet Maligatsanginnik* angnigijaumajuit Nunatsiavut katimajitsuangita iluingatillugit katimajet. Kinijavunga Ilonnainut angittaugiamik tamanna kamagigasuallogu. Nakummek, UKâlajek.

UKÂLATTI: Nakummek. Sulli asinginnik auladjaigutiKavâ? katimautitsak 15, “Kaujitsiutet Auladjaigutinnik Sivullipâmi Atuattaunitsanginnut Maligatsait.” KaujitsiutiKangilak sivullimi atuagatsanut maligatsanut. PitaKangilak auladjaigutinnik sivullimi atuattaugialinnik ullumi. katimautitsak 16, “Auladjaigutet” pitaKavâ auladjaigutinnik ullumi? AngajukKâk, tukisimavunga pigiasigumajutit auladjaigutigikKaujannik siagugiagalâk.

ANGAJUKKÂK LEO: Pijâgengilanga, uKâlajek. kamagalatuinnavugut Pimmagittunik Tilitjigutinnik. ImaKâ auladjaigutiga utakKigiaKaniattuk 24-rani sitontini.

UKÂLATTI: Nakummek, UtakKigalâgit. AngajukKâk, ilagiatsigumavet?

ANGAJUKKÂK LEO: Nakummek, uKâlajek. Atuinnagutjigalavugut ilonnainik pusiugialinnik. Mânnautillogu Nittunattok uKâlajek, Kinijavunga angittaugiamut pigiasigiamik auladjaigutimmik ullumi *SuliaKattet Maligatsanginnik* Kimmigunnimik.

UKÂLATTI: Nakummek. AngajukKâk Kinijajuk angittaugiamut pigiasigumalluni auladjaigutimminut ullumi. AukâttuKavâ? PitaKangilâng? Nittunattok AngajukKâk, pigiasiligit.

ANGAJUKKÂK LEO: Nakummek, UKâlajek, amma Nittunattut kiggatuttet. Imaimmat *SuliaKattet Maligatsanga*, Inuit Maligatsanga 2008-02 Inuit

maligatsanga sakKititsijuk *SuliaKattet Maligatsanganik* ilaummitillugu
Maligatsait uppigusiujunut amma nâmmasigituKalippat
malittaugialet angnigijaumajunut Nunatsiavut katimajitsuanginnut,
amma imaimmat ilonnata, angnigijaumalluta, kamatsiagiaKavugut
sivulittiuluta amma Kanuk tamanna maligatsaujuk
attuiniKaniammangât kamagigialittinik. Ammalu, imaimmat,
AngajukKâsannut angnigusunniKalaukKuk 9th September, 2014.
Amma, pivitsaKalaungitut ilinniatitaugiamik attuinigisongunnik
SuliaKattet Maligialingit amma kamagigialingit. Mânnaujuk,
auladjaivunga, tulliujiuullunga First Minister, Nittunattuk Kate
Mitchell, Taina Veryan Haysom, ikKatuijinga Nunatsiavut
kavamangata, KaikKujauulluni Kimmigugiamut *SuliaKattet*
Maligatsanginnik angnigijaumajunut Nunatsiavut
katimajitsuanginnut iluingallutik uKâlaKatigenninginnut katimajet,
Nakummek, uKâlajek.

UKÂLATTI: Nakummek, AngajukKâk. Auladjaigutik sakKititaummat. AngajukKâk,
uKausigigumajait auladjaigutet?

ANGAJUKKÂK LEO: Nakummek uKâlajek. Naittotillugu, kiggatuttusait
angnigijaummata upingasâmi, Kimmigulauttavut *SuliaKattet*
Maligatsangit kiggatuttelu taitsumani, uKalaullungalu taimâtsainak
pilâninginnik AngajukKât taimâtsainak *SuliaKattet Maligatsangit*
ilingammata taikkununga. PivitsausiakKomijuk, piluattumik
nutângunitsanut suliaKapvimi, iliumisimalimmata
angnigijaumannimi, Kimmigulutik *SuliaKattet Maligatsanginnik*
tukisiumigasuallogu. Nakummek, uKâlajek.

UKÂLATTI: Nakummek. kiggatuttigialait uKagumangipata, uKagumappatalonnet,
AngajukKâk pijagettunik uKagumavâ matuillunilu.

ANGAJUKKÂK LEO: Nakummek, uKâlajek, ilagiatsigumavunga, Kanuttolunga
angnigijaumajut pivitsaKaniattut Mr. Haysom sâmenningani
apitsuKattalugu nalunaitsiKullugulonnet *SuliaKattet Maligatsanginnik*
apigiusitsaKappata. Nakummek, uKâlajek.

UKÂLATTI: Nakummek, AngajukKâk. Pijagemmat uKâlautauninga. Ilonnatik
angiutilet auladjaigutimmik uKallit aye?

KATIMAJITSUAT: Aye.

UKÂLATTI: Angingitut auladjaigutimmik? Auladjaigutik kajusimmat. Iluingaluta
katimajiuligatta, amma KaikKulugu, Veryan Haysom, uKâlakKulugu
katimajitsuanut.

MR. HAYSOM: Nakummek, uKâlajek, katimajitsuat. Salutillusi nutângullutik
angnigijaumajut, Ununnisinnik Kaujimagaluattunga,
ilangaungituinnatuk. Amma atisi ikKaumagikukkit, pijâgingilanga.
Tyler taikKoKaugakku, Travis amma Jimmy, Eddie. Piujuvuk utigiamik
tamaunga. Kagitaujatigut takugatsanKangilanga,
takugatsaKajugaluak sunanik kamagigialikkanik.

UKÂLATTI: Ahali, apigiutitsaKavet AngajukKâk?

ANGAJUKKÂK LEO: Sukkajumik. Kaujimangilanga ilonnatik adjiliuttaumajunik
pitaKammangâta *SuliaKattet Maligatsanginnik*.
Ajunnanginitsaugajattuk pitaKappata, Veryan, uKâlautijuKanningani?

MR. HAYSOM: Ahali, AngajukKâk; taimaigaluattilugu, pitaKangikaluappata.

UKÂLATTI: Nakummek. UKâlaKatigillugu uKaudjigijavut, atuinngutjigumavugut
Nunatsiavut *SuliaKattet Maligatsanginnik* ukununga
Angnigijaumajuit PikKujanganik tunijauniappata katimajitsuanut.
Mânnautilugu nukKakalautta utiniammiluta 1:30, iluingaluta
katimajiulluta, Kanuingitok?

(NukKalaulanik)

UKÂLATTI: Ilonnatik tamânelimmimata, sulli iluingalutakatimajiuvgut, ilauKataujuk

Veryan Haysom, IkKatuijinga Nunatsiavut kavamangata.

UKâlaniattuk amma Kimmigulugit *SuliaKattet Maligatsangit*

ukununga *Angnigijaumajuit PikKujanganut*. Pigiasigunnaligavit, Mr.

Haysom. Naittumik pigiasikkâtinnagu, Iluingaluta kamaniagatta,

Kanuttovunga Nittunattuk Darryl Shiwak inolipvisiutsiaKullugu.

Inolipvisiutsiagit. Taimali, Mr. Haysom, pigiasigunnalikKutit.

MR. HAYSOM: UKâlakKujaukKaunginnavit. Nakummek, UKâlajek.

kamagigasuaniantaka *SuliaKattet Maligatsangituinnaungittuk*

ilangillu iluanettut *SuliaKattet Maligatsanginni*. Ottugausinnik

sakKititsigasuaKatatniakKunga uKâlautaugiaKakKotunik.

Kanitsaniagasi uKâlagalammaginiagama, ottugausinnik, ottugausinut

tikigutta uKâlautaugunnaniattut. Asiagut uKausikkut, sunait

sakKimagiKattamata ubvalu pivalliamagittut. Pigiasiutigigumajaga

nakit *SuliaKattet Maligatsangit* pigiasimmangâta pigianniKajut iluani

Labrador Inuit Maligatsasuangani. *Labrador Inuit Maligatsasuanga*

pigiasijuk Ilangani 1, ubvalu kapital 1 ilangillu pigiasiutausimajut,

amma ilanga pigiasiutausimajuk, 1.1.3 (n), uKuset takujaugunnatut

pigianninga *SuliaKattet Maligatsangita* takugumagutsiuk. UKajuk

imaimmat, pigianninga *SuliaKattet Maligatsangita*. Pijut iluanit

Labrador Inuit Maligatsasuanginni uKajuk allasimajumi 1.1.3(n),

“*Labrador Inuit Maligatsasuanga* Labradorimi Inuit

sivukattatiuningit, inogusiujuut, ilikKuset amma kenaujaliugutilet

katutjikatigenningit atâgut *Labrador Inuit Maligatsasuangata*

pigiasijaumajut malillutik pusiugialinnik.” Unuttunik

taisinialimmiluni pusiugialinnik. (N) uKajuk, “Tukisimannik

Kanuilingausinginnik, pitsatuninginnik amma piusigigialinginnik

sivulittet amma kiggatuttet Inunnik Labradorimi tunijaujut

ikajutsiniatilugit ilonnainik Labradorimi Inunnik nigiuullutik sivulittet

amma kiggatuttet Labradorimi Inunnik inogusiKallutik
sulijutsanimmik, sulijutsalutik amma isumagitsialugit ilonnatik inuit,
uKaudjigiagiKattalutik, pitsianiKallutik, tunganatsiatumik ottugallutik
pitsatunimminik, adjjelititsilutik amma angiutiKallutik
kajusiutijammini, nâmmasingsiutitsanik sakKetaililutik amma
kiggatutsialutik nallinginnik sivulliuji gasuagatik amma namminik
suvuppiagutitsaminik.” UKausimmaget. Unuttut tukigijangit, amma
tulligettitâllugit ubvalu uKausittangagut tukisigasuagajattavut.
Sivullipâmi sunauvât sivulittiunet, inoguset, ilikKuset amma
kenaujaliutet katutjiKatigenninget atâgut *Labrador Inuit*
Maligatsasuangata? Unuttogajattut, ununningit pititsiluattut
AngajukKâmik, katimajitsuanik, AngajukKaunet katimajinginnik,
SuliaKattinik, Inuit Nunalet kavamangit amma Inuit Nunalet
kuaparesangit. Ilonnasi uKâlapvigillusi, uKâlapvigilusilu adjjengitunik
suliaKausiKatillusi. Atautsik ilonnasinnut adjjutijuk ilaliutijusi
katimajitsuanut. kinakkut sivulittiuvât amma kiggatuttet Inunnik
Labradorime? Ilitsi. AigunnaKusi suliaKapvisinnut. AngajukKâk, First
Minister amma Ministeret, AngajukKât, Inuit Nunalet kaunsalingit,
Ilaliutijut AngajukKaunet katimajinginnut, Inuit Nunalet
kuaparesangit. Tamânejusi sâmi, ilonnasi sivulittiuvusi amma
kiggatuttiulusi. Sunauvât inigijait, pitsatunet amma pusiugialet
ilinnut tunijausimajut sivulittiulusi amma kiggatuttiulusi? Suliagijasi
ubvalu suliaKapvigijait inigijauluattut, suliaKapvilagik, pusiullagigiallet
amma pitsatunet tigumiajasi. Sunatuinnait suliagijatit sivulittiulutit,
kaunsalinnelutit, AngajukKângullutit, ItsivautaKallutit Inuit Nunalet
kuaparesanginni pitsatuniujut ubvalu pusiugiaKajut tunijaumajut
ilinnut atâgut *Maligatsasuap.* Kanuk tukiKavâ tunijaunnik?
Tamakkua pitsatunet ilinnut tunijaumajut. TukiKajuk pitsatunet
amma pusiugiallet amma inigijait aliagijait, suliaKapvet aliagijait,

ilautitsijut sulijutsanimmik amma kamatsiagiaKannimik. Kanuk
tamanna tukilek? Sunait sulijutsanet? Sunait kamagijaugialet?
UKausiKajuk sunaummangâta sulijutsanet amma sunaummangâta
kamagijaugialet. Sulijutsanik amma kamatsiagasuannik, igvit
atugunnalutit pitsatuninnik amma piusigigialinnik ikajutsiniatilugit
ilonnainik Inunnik, namminituinnaungittuk, ilannâtiungituk amma
ilatit, kiggatujannongittuk, sulijugijaugialinnut amma
kenaujaliugutiusonut nallinut nunagijaujunut ubvalu nunaujumut,
Ilonnainut Inunnut. Asiagut uKausikkut, aulatsiniagutsi sivulittiulusi
amma kiggatuttiulusi, apigiusiugiagialet sunamut sângaviuliguvit
ubvalu pikKujauguvit, Kanuk pivingâ ikajutsiniattumik ilonnainik
Inunnek? Ubvalu Kanuk pigunnaKinga ikajutsiniattilugu Inunnek?
Tamanna ilinnut tunijausimajuk. Tamanna kamagigialet. kamagillugu
piunigijanga, kamalaugit sunanut niugiugijaupviKammangâppit,
tâanna ilangaujuk. Ikajugunnamijuk kamaguvit piungininginnik. Manna
piunginigijanga, Kanuk pijuKagunnaKa Inuit ilinnik sulijutsangippatâ?
Kanuk pijuKagajakKâ sulijutsagunnaiguvit AngajukKâmek? Kanuk
pijuKagajakka sulijugijaugunnaiguvit AngajukKaunet katimajinginnot?
Kanuk pigajakKet sulijugijaugunnaiguvit katimajiuKatinnut
sâmekatinnot? Amma piluattumik, Kanuk pigajakKet
sulijugijaugunnaiguvit kiggatuttanot? IsumaKavunga takunnaliguvit
taimailingajunik piunginiujunik, tukisigajakKutit sulijugijaugunnaiguvit
inunnut kiggatuttanut, sunait katavallialigajattut. Sunait
uKumaittoliaKillutik. Ilagiallugu sulijugijaunnik amma kamagigialitit,
Maligatsasuak uKajuk iluani 1.1, sunauvâ? 3(n) sunanik
niugiunniKavuk amma, sivulittiulusi, niugiugijauvutit sunanik
pigalagamik, amma tulligettitâKavuk. "sivullillutit inosinik
sulijugijaujunik. Sulijutsalutit isumagitsialugillu ilonnatik Inuit. Kanuk
pijuKagiaKammangât uKalatsialutit. PitsianiKallutit,

tunganatsiatumik sulitsiatumillu atullutit pitsatunigijannik. Kinijallutit
adjigetsiatumik amma angiutautillugit kajusiutijatit. SakKetaillutit
nâmmasingiutitsanik. kiggatullutit sakKititsitaillilutit
piutsanitsaunimmik ubvalu aliasutiKanginimmik amma
sakKigasuannak iminik sivuppiagutigigajattanik.” Ilonnatik
ikKanattut, sivullipâk amma kingullipâgijanga ikKanannipaujok.
kingullipâgijanga tamakkunangat pingasolingajunit. kamagitsiagunni,
pingasolingajunik uKajuk. UKajuk putsangiluagiaKajutit nallinginnik
inunnik asinginnut. Kanuk atautsimmut piguvit adjigettumik pillugit.
TukiKajuk pigasuagiaKangitutit kiggatugasuallugit Inuit ubvalu
adjgengitut Inuit adjigengitumik sunanut kamagigunnangittanginnut.
Tamanna aliasutiKannik. UKammijuk atugunnangittait Kanuilingauset
namminik sivuppiatigasuallutit. Tamakkua niugiugusiujut.
Taimaimmat pusiKagiaKavutit ilumiutanlinnik niugiugusiujunik.
Nigiugijaujuk sivulittinut atâgut *Maligatsasuap*. UKausigikKuajaga
sivullipânga ikKanannipaujuk, isumaKallungalu sivullipânga
uKumainnipaujuk. Sulitsiatuk, apvianiattuk inogusigijannik.
Nigiugijauvutit sivuligiamik sulijugijautsialutit. Unuttojut apitsotet
Kanuk tukiKammangât. Sumat sulijutsavet inunnik? Ilangit inuit
sulijugijauKattajut sunanut sakKitisimajamminut, Ilangit sulijugijaujut
suliagiKattajamminut. Amma ilangit sulijugijaujut
pigunanninimminut. Tamakkunangat pingasunit, pigunnet amma
inolluni pusiugunnatut. Tamanatuinnaulungituk *Maligatsasuap*
uKausigijanga *SuliaKattet Maligatsanginni*. Ilagiallugit pusiugialet
amma nigiugijaugialet pigunnamimi sivulittet, *Maligatsasuak*
uKausiKagiallamijuk asigiallanginnik. Ilangat Allasimajumi 4.3.7
Maligatsasuammi , *Maligatsaungittumi*, uKajuk, “Ilaliutujuk
katimajitsuanut pettaugunnatuk suliaKapvimit pilukasimannimut
pitsiasimangimullu (uKagiallamijuk) ilautillugit siKumitsisimannet

SuliaKattet Maligatsanginni , ilautillugu *Maligatsani Piusiugialinni* amma nâmmasingiutet maligatsait sakKititaugunnatut katimajitsuanut ilaliutijunginullu.” UKâlautaummagigajattut sunait sulimmangâta ubvalu piungitommangâta piusiujut. *Maligatsasuak* nalunaitsijuk pettaugunnatutit suliaKapvimit pilukasimannimut piungitosimanimut amma ilautitsimajuk siKumitsisimannimik *SuliaKattet Maligatsanganik*. *Maligatsasuak* uKammijuk Allasimajumi 4.3.7, pijâgengilanga, 4.22.1, katimajitsuat pigialet (atujuk uKausimik pigialik) sakKititsilutik *SuliaKattet Maligatsanginnik* ilautillugit nâmmasingituKappat piusiuugialinnik ilaliutijunut katimajitsuanut, Nunatsiavut AngajukKaunet katimajinginnut, Inuit Nunalet kavamanginnut, Inuit Nunalet kuaparesanginnut.” Tikititsivuk *SuliaKattet Maligatsanginnut* , *SuliaKattet Maligatsangit* sakKivuk tainna *Maligatsasuak* uKatsiamat pitaKagiaKanninik. SakKijuk ilitatsigami, *Maligatsasuak* ilitatsimat sollu pigunnasiannimik, inogusiujuut sulijugijautsiagiaKallutik, isumatsasiugutiutsiagunnalutik, amma Inuit pitaKagiaKammata inogusigijamini maligatsanik, maligatsanik pigiagasuannimut tukisiniagavit sunait nigijugijaummangâta ilinnit uKumailutaugajattulu. Kanuk pijukagajakKâ malingikuvit maligatsanek? *SuliaKattet Maligatsangit* tikititsivut kingullianut. kingullianogutta, *SuliaKattet Maligatsanga* iluingaijuk. IsumaKallungalu uKumainnipâk tigusigiamik ilonnainik piusiuugialinnik amma ilonnâgut maligatsanik iluanettunik *Maligatsasuap* amma *SuliaKattet Maligatsanginni* atunniKatsiatillugit nunagijattini. Tamaunga tikiniakKunga, sivullimi uKausigigumajakka *SuliaKattet Maligatsangit* . *SuliaKattet Maligatsangit* maligatsaKajut uKausiKallutik Kanuittutuinnanik piusiugunnatunik isumatsasiuguttaugialinnik. Ilingatitsijuk, pigunausittut, apigiusinnik sunait pitsianiummangâta angiluamik uKâlanimik.

ApitsosiKanginnaniakKuk tukittaugajakKotunik. PitaKanginnaniakKuk
naluliumautinnik. Ilonnâgut, maligatsait tamânejut. PiusiKagiaKavuk
malijaugialinnik. *Maligatsaujuk*, sivullipâmi, pigiasiutilik
pidjutaujumik. Sumat tamanna kamagijavot? Pidjutinga
Maligatsaup sakKititaujuk ikajotigigunnatanginni Nunatsiavut
katimajitsuangita, ubvalu AngajukKaunet katimajingita nunalet
kavamanginni, ubvalu Inuit Nunalet kuaparesanginni, nunalinnut
sulijugijaujut. Pidjutinga piulimatsigiamik nalunginimmik amma
tusugijanginnik Inuit namminik-kavamaKagiamut amma
sivulittingita. Ilitsi aulatsijiuvusi amma katutjiKatigenniulusi. Tâna
katimajitsuat ilangaujuk katutjiKatigenniuluni taimâtsainak
AngajukKaunet katimajingit. Inuit isumaKappata tâna
katutjiKatigenniujuk sulijugijaugunnagittuk, inuit isumaKappata
tamânengitusi kiggatutsialusi, namminik-kavamaKannik
tukiKalungituk. NaluliumautauniakKusi ubvalu namminik-
kavamaKannimi ubvalu tâna inigijavut. Ilangat pidjutaujuk
tigumiagiamik angnigijaumajunik nunalet Kanuttogutigijangit
sivullipautitautillugit namminik tusugijaKanniup, amma
maligatsaliujuKalluni. SakKititsimijuk apitsotimmik piusigijanginnik
angnigijaumajut uKausiugunnatillugit kamagijaullutilu. Asiagut
uKausikkut, kamagillugu. Angnigijaumajullu takugatsausiallutik
siKumitsipata *SuliaKattet Maligatsanginnik*. Tamanna
pimmagittojuk, pimmagittojuk nunalet pidjutigijanginnut. Sivullipâk
SuliaKattet Maligialinga , Kanuk piliguvit amma suliaKaliguvit,
pigiaKavutit malillugu *Maligatsasuak* amma *SuliaKattet*
Maligatsanga, amma killigiudjigitigisimajait. Maligatsauluattuk
ilonnatik angnigijaumajut pigiaKajut sulitsialutik. Tamanna
uKausimmagik, pimmagittumagiujuk. UKaniammiluni
sunaummangâta uKausiujut. Sulitsialuni pigiaKannik,

nalunaittausimangituk, tukiKajuk sulitsiagiaKannimik, salugani,
sulijugijautsialuni, Maligatsanik siKumitsigani, tunganatsiatumik
pilluni amma piungitunik sakKititsigani , namminituinnak pigasuagani
Kanuttogutigijamminik, sulinnipaugasualluni pigunnausikkut
asinginnut ilaliutijunut kavamamut, ilagijamminut, ilannâminut
ubvalu kiggatuttaminut. kiggatugasualluni kisiani
Kanuttogutigijanginnik kavamait, kiggattutapit, iluingajumik
isumagitsialugit ikajotiugunnatut pitâgigunnatit. Sulingitumik
uKaniagani ubvalu sivullitilluni piniannigâlluni asimminut, ilamminut
amma piungilititsigajattunik suliagigialinnik, atullunilu atulluni
akilusianik kiggatunnimut, kenaujanik atulluni amma
akilitsatâgutinnik atugunnalutik kisiani tiliusiusimajukkut.
Unuttumaget , akunimmagik kamagigasugajattavut.
UKausiKagumavunga pingasunik sitamannilonet. Sivullipânga (f)
Pigasuannik namminik-KanuttogutiKagani. Pigasuannik namminik-
KanuttogutiKagani tukiKajuk, pigasuanginnik suliagigialinnik malillugit
tugâgutitit. Pigasuagani sivuppiatitsigiamik tusugijannik. Tamanna
piujogajattuk sivulittimut tamakkua sivulittet Kanuttogutigijangit
sakKesongummimata angnigijaugiallagunnanimmik. Amma
pigumaguvit angnigijaugiallagiamik, pigumagajakKutit sollu
ikajutsijojâllutit asinginnik, tâvatuak piluagasuallutit
angnigijaugiallagumamut tamakkua kamagigasuallugit
angnigijaugiallagumamut. Amma angnigijaugiallagumaguvit,
tamanna kamagigasuallugu, *Malittaugialik* uKajuk sunanik
uKatuinnagiaKangilatit ubvalu asinginnik pivitsaKatitsiluallutit
kinakkunik. Taimaimmat akuttujumik angigusuttet Kiagunatut
suliaKapvinut ikajuttaugumalluni. Amma ilangat pigunnalutit
sulaigijanni kamagasuallutit. kamagasuannik ilautitsijuk
ikajugasuannik angigusuttinik kavamait maligatangitigut ubvalu

kavamait suliaKapinginnit, ubvalu
allât namminilet suliaKapinginnit, ikajugasuallugit
ikajuttaugutigialinginnut. Amma ikajugasuannik apvialuKattangittuk
angnigijaumajop pivitsagigialinginnut. Tamanna Kanuilungituk.
Tamanna Kanuilungituk. ApumautauliaKigami, angnigijaumajuk
pigasualippat kitsanattunut ubvalu kina ikajuttaugiaKalippat.
Maligatsait Kujanâttaugalâsot. SakKititsilutit pimmagittumik
atugunnanimmik ubvalu pimmagittumik ikajullutit. Tamangât
ikâvutit. PilugunnaiKutit tunganattumik. pilikKutit KanuttogutiKallutit
ilinnik isumaKalânninginnik angnigusuttuKagiaKalippat. Tamanna (f)
amma (j). kingullia Kimmigugumajaga puiggagasuannik
utipviuniaguvit akiliutimik amma ikajotiugunnatunik.
Angnigijaumallusi sivulittiulusi, amma angnigijaumallusi
kiggatuttiulusi, kinallonet Kulikkut takunnalungituk, tamanna
kamagigiallet, sakKitisimallugu, amma pititsigunnalutit pivitsaKagavit
pititsigunnagiamut, pitsatuniKagavit, tiliugigunnaKutit. Taimaimmat
ajunnalongituk aulatsijiKangikaluaguvit ubvalu angajukKâmik
Kimaigiamik suliaKapvimik sugalagiattulutit sollu âkKisuigiattulutit
iggavinnik, Kulât âkKisullugu, skidoot atuinnauguttillugu
aullautigigianga wogiup nâningani, amma Kitigaliup kingungani
taimâk pillutit. Tamanna pitsiagasuannik, piggasuannik isumallutit
akilittaugiamik amma ikajotiusonik, asiagut uKausiugunnaKuk
uvattinut akilittauvutit amma suliaKapvimegiaKallutit. Atuniaguvit
Inuit kenaujannik, tainna kenaujaliugutik suliaKanikkut
pitâgijaugialik sulitsianikkut. SuliaKapvimik Kimainiaguvit
suligigiattulu umiat ubvalu Kulâgijait asinginillonnet akilittutaullutit
suliaKagiamik ilaliutillutit, kiggatuttiulutit, ministeriullutit
AngajukKângullutillonnet piujolungituk. Tamanna pitsianiulungituk.
Amma kingullikut pigasuannik pitsianikkut ilautitsijuk atunnimik

amma kenaujanik atunnimik, akilitsanik amma akilitsatâgutinnik tunijaumajunik. Tamanna nalunalungituk, amma ilangani atugiamik akilitsatâgutimmik ubvalu akiliusiamik sunamut namminik pigumajannut, ubvalu, piniujallutit âkKigiatsigiamik siagugiak. Tamannaulungituk pitâttitausimanninut kavamait piKutinginnik. Tamatsumunga aittutausimangilatit akilitsatâgutinnik, kenaujanik amma akiliusianik. Taimaimmat akuniungitugaluak, ikKaumagaluaguvit âkKigiatsigiamik amma kamagiamik akilitsanik, akuniulungituk atulukagiamik kenaujanik. kingullia pimmagittuk maligatsak, pigasualigatta pitsianikkut sakKegata nâmmasingiutitsanik.

MS KEMUKSIGAK: Veryan, apigigajakKinga uKâlagiallaKâttinâk? Allasimajuk (j) uKâlautiKallutit inunnik ikajuttaugumajunik suliaKausiKallutillu, ottugausimmik KaitsigajakKen ilangani uvannik ottugauset ikajuKattamata.

MR.HAYSOM: Tamanna uKausiginiattaga siagugiak, Patricia. Ikajugasuallugit, ottugausik sollu kinatuinnak suliaKapvinoppat inutuKaulluni uKalluni saniliga inutuKaummijuk amma takKitigut sikkitâKattaluni kavamamit magguituluni angiluamik pitâgiKattajaganit. Sunamik kingumavingâ, ikajugajakKama Kanuk kenaujanik amigatsigama ikajuttaugumallungalu. SuliaKannik ilautitsigunnatuk kamalluni kiggatuttaujuk âkKisiluni tâksinik tâksiligilluni tauttilitsaKagami, tâvatuak kamagigasuallugit atugunnanimmik amma KaujititsiutiKallutik pitâgiamik ittusiutimmik amma kenaujanik ikajotiusonik, amma, utittitaujut kavamannit, nakit pitâKattamangâtsi prâvinsimiungipat, tamaita ilingajunik tâksinut amma unautitsanut ilingajunik. Taimaimmat kiggatuttaKavutit Kinijajumik ikajuttaugiamut. Killigiudjilutit sunanut ikajuttaugunnamangâta. killigiudjilutit sunanik pitâgigialimminik pitângitunik. Aitillugit

kinamut ikajugunnatumut, Kaujimatitsialugit . Allât ilagigajattasi aigiamut kavamait suliaKapvinganut, iluanengikaluattillugu suliaigigiallippiit. UKaliguvit taima, atuniattaga akiliutiga kiggatunnimut, ilinnut tunijausimajuk sunamut atugatsautillugu, asiagut maligatsaup pivutit amma atullugu kinagiallak ikajutsitaungâniattillugu.

MS KEMUKSIGAK: Tukisivunga.

MR.HAYSOM: Okay?

MS KEMUKSIGAK: Ahali.

MR.HAYSOM: Taima. Pigasuannik pitsianikkut ilautitsijuk taimaittugalannik, kingullia pimmagittuk maligatsak pigasuannik sakKetaililluni nâmmasingiutitsanik. Pigasuannik sakKetailliluni nâmmasingiutitsanik ilaujuk adjigengitunik maligatsanik KimmigugekKaujatsinik. Pigasuaniaguvit namminik ilinnik ikajutsiniattunik, nalunagajagunnaikuK pilittutit sakKititsigiamik nâmmasingiutitsanik. Tâvatuak nâmmasingiutitsanut sakKititsinik asingallagiujuuk maligatsait. Tamanna maligatsalagik. Suliagigialinnik piliguvit isumaKagiaKangilatit namminik tusugijannik. Ilagiallugu malitsiagialitit nâmmasingijuKalippat sittutitsiutet maligatsangit. Amma nâmmasingijuKalippat sittutitsiutet uKausiutsiajut Ilangani III iluani *SuliaKattet Maligatsanginni*. kingullia maligatsak sakKititsitailigasuannik piujungitunik. Taimâtsainalingajuk. Angnigijaumajut imminik piusigigumajamminik pigiaKangitut piungitumik, namminik inosigijasi, piungitumik sakKegunnatut suliaKapvisinni. Asiagut uKausikkut kiggatuttituinnak katimajitsuani pigasuagiaKangituk angutiup annaulonnet inosinginni piungitumetitsigajattuk angnigijaumajumik katimajitsuanut. Amma sakKititsitailigasuannik piungitumik ilautitsiluni tigumiagiamik

Maligatsasuammik amma Inuit maligatsanginnik. Amma papvisâttailinnimik. SakKetailigasualluni amma Kipilulluni ilaugiamik ottugausiujuuni piusituKangagut Inuit ubvalu/Inuit

Maligatsasuangagut. Ilautitsijuk pitsâtailigiaKannimik iluani Ilangata IV. Ilautitsijuk kiugunnagiamik kiggatuttaujunik, asinginnik angnigijaumajunik amma nunalinni suliaKattinik tamakkua kiggatuttaujut suliaKattelu Kaujimaniammata namemmangâppit suliaKallutik, asiangummijuk aullasimagavit. Namminik inganak, tâvatuak ingalutit suliaKagiattulutit, amma ilautitsimijuk piusititsigasuannimik nunalinnik sivulinnikut amma malillugu

SuliaKattet Maligatsanga. kingullia maligatsak atugiamik namminigijaujunnik. Maligatsaujuk angnigijaumajut atugiaKangitut ubvalu atutitsilutik nunalet piKutinginnik, ikajutsinikkut, namminik pigumannikut, namminik ikajutsinik ubvalu sivuppiagasuannik atugiaKatinngu. UKausiKammijuk sunait ilautitaujut kavamait piKutinginni, iluingatitsilungituk tâvatuak ilautitsijuk. kenaujaliugutet, kenaujait, ilagiagutet amma akilitsatâgutet, Kaujitsiutet, fonnet amma adjiliugutet, Kagitaujait amma Kagitaujakkut ikajotet. IsumaKavunga âkKisusimajut sunait atulukattauKattajut, sulli unutsigiagajattut. Ottutigillugu, kavamait suliaKapvingit ubvalu kavamait atugunnatangi amma kavamait piKutigijangit. Atuniaguvit kavamaup suliaKapvinganik namminik suliaKagasuallutit, suliaKangitunik, tamanna piujolungituk, piujoungituk, piujolungituk. kingullia maligatsak pitsianik sulijutsanillu.

Angnigijaumajut suliaKaKatimminik, ilagellutilu, kiggatuttet, nunalet amma nunaliuKatiget pijaugialet pitsianikkut amma sulijutsanikkut. kinatuinnak ilinnik pilukâjuk sulijugijaullagigiaKangituk, tâvatuak sulijugijaugalâllutik. kinatuinnak ilinnik pilukângituk, maligatsagijait sulijugillugit asitit. kingullia maligatsak kamatsianik,

sulijugijaugunnaik amma takugatsaunik. Angnigijaumajunut
nigiugijauvutit kamatsiagiamik, sulijugijaugiamik amma
takugatsaugiamik ilonnaini suliajiganni, piluattumik nunalinni
piviannatojunik. Ottutigillugu, suliaKagiattulutit aullaguvit
akilittautillugu Nunatsiavut kavamanganut, kamatsiagasuannik
tukiKajuk suliajigialek suliajigillugu. kamatsiagiaKannik tukilik
kamagitsialugit kenaujait atujait suliaKagiattulutit aullalutit, amma
takugatsaunik tukilik uKautillugit Inuit sunamik
suliaKausiKasimammangâppit, sunanik ilisimammangâppit sunanilu
ilisimammangâppit, ikajutsiniattillugu ilonnainik Inunnik.
KaujitsiutiKangikuvit utiguvit, uKausiginnagit akilittusimajait amma
atusimajait, amma suliaKatsiasimangikuvit, siKumitsivut
maligatsamik kamatsiagiamik, sulijugijaugiamik amma
takugatsausiagiamik iluagut (c) sunanik kajusiutjiliguvit
tunganatsiatunik piusiujunik, Kaujitsiutikkut, amma maligatsakut,
piluattumik takujaugiaKaguvit, kantrakkititsiguvit ubvalu tilisiguvit
kinakkut tunijaugiaKammangâta ubvalu ikajotittâgiaKammangâta.
Nigiugijauvutit kiugiamik piusigisimajannik. Amma nigijugiaullutit
ikajutsigiamik kinamut apigijauguvit Kanuk pisimammangâppit.
kingullipâmi, nigijugijauguvutit Kaujitsigiamik kiggatuttanik Kanuk
kavamaup kenaujanginnik atummangâppit ikajotinillu
pitâgisimajannik kavamammit, sumat aullasimammangâppit, Kanuk
angitigijumik kenaujanik atusimammangâppit aullasimallutit amma
sunamut atusimammangânni. kinamut apigijauguvit, kiugiaKavutit.
Piusinnik pigiajuKalikKuk mâna, pigiasijausimallutik ilanginnut
ilaliutijunut Canadaup katimajitsuanginnut atusimajangit sakKitillugit
Kagitaujukkut kinakkutuinnanut takujaugunnatillugit.
Pigiasijausimajuk katimavitsuami atautsimut katimajiuKataujumut
malittauliaKilillunilu. Taimaigaluattillugu pigumausittut pigunnaKutit.

Kanuk kenaujait atummangânni ilinnut kamagijaugajattuk. Taimali tikigatta Ilanga III NâmmasingjuKalippat Sittutitsiutet. Amma NâmmasingjuKalippat Sittutitsiutet uKumaittumaget. Piusiugialik ajunnalungitugaluak. NâmmasingjuKalippat Sittutitsiutet sakKiKattajut ilaliutijuk ottugajuKatillugu pitsatunimmik ubvalu piusiugialimik taitsumanitsainallu Kaujimalluni angutiup annalonnet namminik Kanuttogutigijamminik pilinninganik. Sivullipâk apomautaujuk Kanuk kinatuinnak Kaujimavâ asiata Kaujimajanganek? Kanuk ilaliutijuk sâmeKataujuk Kaujimavâ isumagijaganek, Kaujimajakkanek? Kaujimangilasi. Kanuk ottugasuagaluaguvit, Kaujimanigilasi Kanuk isumaKammangâmma sunamilu Kaujimammangâmma. NâmmasingjuKalippat sulijutsagialet amma niugiullutik inuk pitsiagiaKaninganik. Amma NâmmasingjuKalippat uKausigigaillet. utakKigiaKangilatit kinamut takujaugiamik ubvalu Kaujijaugiamik, Kaujippata upalulautlagettuk. kingullianut tikilluta, kingullia nâmmasingjuKalippat sittutitsiutet. kinatuinnak nâmmasingiutaujuk sivullipaulluni Kaujmaniattuk. KaujimagekKutit Kanuk pijuKammangât namminik. kamagiaKavutit. KanuigiaKangilatit, apomautaujuk sittutigunnatait. uKagiaKavutit nâmmasingiutiKajunga. Amma namminik peniallutit ilaugiamik piusiujunut ubvalu kajusiutjaujunut. NalunaitsigutiKatsiaKuk Kanuk nâmmasingiutet sakKisongummangâta. Saujaungimagillutit maligatsanut, maggonik KaujimaluagiaKavutit. Ilangat kinatuinnak ilagijait ubvalu illumiuKatet, Kanuttogutilet pitsatunigijannik, piusigijannik, ubvalu kajusiutjaugialinnik, taimali nâmmasingiutitsaKavuk. Ilaugunnangillatit ilagijatit ubvalu illumiuKatitit ikajutsitauniattilugit kajusiutijannit ubvalu piusigijannit uKalikKânak nâmmasingiutitsaKanninganik. kingullia uKumailuattulu sakKiviugajaguvit nâmmasingiutitsanik. SakKisongullutilu inuit

takuppata, uKagajappata nâmmasingiutitsaKajutit,
taimaingikaluaguvit. TaimailijuKappat kamatsiagaKavutit.
Taimaittunik KaujiluagajakKutit asinnit namminiungituk .
SakKituappat, uKattuKatuappat nâmmasingiutitsanik
sakKiviugajakKutit, ilonnatik ikumait ingalatillugit. NukKalutit
kamallutit. TaimailingajuKappat apomautitsaKavutit,
kamagisagaigialet apomautauninganik. UKausitsaKavuk
sivulittiuninni, sunatuinnait sakKisongummata. Taimailinganiaguvit,
namminik-KanuttogutiKallutit, sulinniKagajangituk. Sivulittiuluni
tamanna sulitsiatuk. Naittumik kingullia Ilanga IV, taijaujuk
sulukattuKagiaKangimagittuk. Tamanna maligatsak inogusinnut
ilingajuk, maligatsauluni pititsitailigiamut angnigijausimajunik
imilukagiamut ejalukattomagiamut suliaKagiaKaligutik amma
piusigigialimini angnigijaumalllutik amma sivulittiulutik.
UKattauKangikaluappat piusilukagiaKangituk. Piusilukauguni,
kamagijaummagittuk amma sulukatuKagiaKagani maligatsatigit.
SulukattuKagiaKatinnagu, Kanuk pigiamik apomautaujumik,
isumatsasiugataugajangilatit asiagut, nukKagiaKagajakKutit.
Sunagiallauhât. Amma KimmigugiaKagajakKutit allasimajumik
pidjutilimmik atuliaKittitaunimmik. Ilonnâgut atuliaKititsinik
pigiasiutaujuk kinatuinnak uppigusujuk *SuliaKattet Maligatsanga*
siKumittausimagajappat KinugajuKagunnaKuk uKâlajimmut
uKaudjigijaitigit Kimmigugiamik. UKâlattik kamagunnatuk
nâmmsingiutaujumik killigiudjilunilu sulimmangât.
SulinniKagajammangât, ubvalu uKausituinnaupat amma
papvisâginniupat. UKâlattik Kimmigugunnatuk ilonnainik
Kinugautaujunik siKumittausimappat *SuliaKattet Maligatsanga*
sulukatuKagiaKangininganik. kamagijaugunnatuk
pimmagittinganik. Amma ilonnatik pimmagittut aititauKattajut

katimajinnut pigiasigunalutik kamagiamik, pitsatuniKallutillu
nukKatitsigiamik petsigiamillonet. Petsinik, pikKujiusiuppat,
kamagijaugunnatuk katimajitsuanut taikkua katimajitsuait, atâgut
Maligatsasuap, timiuttitaujut pitsatuniKallutik petsigiamik
angnigijausimajumik suliaKapvimit. Tamanna *SuliaKattet*
Maligatsagijanga. Naillitillugit uKausigijakka.

MR. UKÂLATTI: UKagumavet Madam AngajukKâk?

ANGAJUKKÂK LEO: Ahali. Pijagettojâligavit allaKutimmik. Tapvainagalak uKausiKagajakKet
ikajotiugunnatunik amma aittosianguKattajunik aittosiatsanik
kamaluviniKattagama tukisigiagumatuinnavunga.

MR.HAYSOM: Ahali.

MR. UKÂLATTI: Nakummek.

MR.HAYSOM: Utiguvit piusiugialinnut angnigijaumajut isumaKatsiagialet kamatsialutillu
suliatsaujunik akilittaugutigiKattajamminik, apitsotiKanialellutillu kinatuinnak
angnigijaumajuk ikajotittâpat, aittosianik, tuniggusianik? Sumat
aittuiKattajot angnigijaumajunik ikajotiusonik, aittosianik, tuniggusianek?
Apigiusiulippalittauk pigunnasiannik. Apigiusiulunilu sivullipâk
kamagijaugialik, amma apigiusiummitillugu takunnâgutiusimajuk.
Angnigijaumajuk pitâppat tunijaugumajunik namminilimmit aullâsimavimik
atjagunnalugit amma ilagijangit atautsimi wogimi omajunnialutik amma
iKallunialutik, ikajutsisiagajattuk, amma apigiusik Kanuk takunnâgusiuvâ?
Ilangat kappianattumegutaugajattuk tukisijaungipat amma
isumagijaunialillutit ikajuttaulinninik ubvalu sunamik aittuigiaKalinninik
kinamut ikajutsisimajummut. Sunait sakKipata ilautitsijut nunamik atugiamik
ubvalu tunijauninginnik piviannatuit ubvalu tunijaunnet attasinnet amma
laisinset namminilinnut, isumagijait sukkutaugajakKâ ? Sunanik
akilitsaKagajakKet kinamut kenaujaliugutilimmot? Ubvalu pigasuagajakKet
piunippâmik Kanuttogutigijaujunik Inunnot? Maligatsaliuttiulusi,
piusiullagialik, piusiullagialik katimajitsuani, suliaKapviujuni amma

namminik Kanuttogutigijaujuni ilinninginnaniattut. Sangutitsigumaniattut kajusiutijannik amma sangutitsigumallutik maligatsaliagijannik amma malittaugialinnik. Sangutitsigasuannik atausituinnaulungituk. Ununningit piKattajut Kaujisattausimajunnit, akigattotiusimajunnit amma ilinnut pinniagusiujunut, Sangutitsigasuannik piKattamijuk ilinnik Kanuk pikKujinnimut ajunnanginitsauniattilugu inogusigijait. Taimaittut sangutitsigasuannet, sunanik ikajotittâlutit, tamanna maligatsak sangusaigasujuk. Tamanna maligatsak uKajuk “ angiutiKannik ikajotigiallanik, ilaliutijuk angiutiKagiaKangituk akiliusiammik, akilegutinnik, aittosianik ubvalu ikajotiusonik kisianiungituk kenaujanik pikKujiusingagut kavamait ubvalu angajukKauKatiget ilaujuk angutiup annaulonnet suligigialinginnut.” Maligatsalagiujuuk angiutiKagiaKangilatit aittosianik ubvalu tuniggusianik. Atausik piusiugunnatuk maligatsani, angiutiKagunnaKutit akiliusianik kavamammit suliaKapvigijannit ubvalu angajukKauKatigennut suliaKaKatigijannut. Atautsik piusiugunnatuk. Asingit aittotet ilinnut apomautaujut. kingullianik piusitsaKagivuk. kingullia maligatsaujuk aittotitsanut. 3.12 uKajuk maligatsaulautsimajuk, maligatsak allasimajumi 3.11, “ ilingalungituk kenmaujatigut aittotinnut ubvalu ikajutsiutiugajattumut ilaugajattuk kamagigialinginnut suliaKapviup.” Aittotiujuut uKumaittosainnatut, amma ilangit maligatsaKammijut. Ilanga, pitâgunnaKutit aittotiujuunik Kujanâgialitit. kingulliagut, akitujummaget aittosiat, asiagut uKausikkut, sollu sananguatausimappata ubvalu minguausimappata, tunigunnatit pikKujippata katimajitsuat. Tunigunnatasi, kavamaujummut, taimaimmaty aittosiat uKumaittumaget. Maggolingajok apomautaugajattok. Ilanga, takunnasogijatit, aittosianik pitâniaguvit, atautsimik ubvalu aittosianik, atautsimit akitutigijumik \$250 akiluamillonet, Kujanâniallugu. kingulliagut, pitâgijait akitujummagiuppat, Kaujitillugit katimajitsuat uKaniallutik pigiaKammangânni. Aittosiat. Aittosiat sunauvut ajunnalungituk amma kinalonnet apitsugajangilak, taimaimmat

pitâgijausongujut. AngajukKâk katimaKatauniattuk Premierimut Prâvinsimi.
Amma Premier uKalluni katigajangilagok ullâsiutitullunuk, akililâttaga.
Premier akileniattilugu AngajukKâpit ullâsiutinginnik. Aittotijuk. Ikajutsijuk.
kina tamatsuminga uKâlausiKaniakKâ? Auka. aittotitsauluni
atuttaugunnatuk. AngajukKâk ubvalu First Minister KaikKujaujok taggânut
majukKamut katimagiattugiamik amma tautsiKatigeniallutik aittotinnik. First
Minister aittutaujuk uJagamut sananguataumajumik. UKagiaKavet,
pijâgengilanga, pitâgiaKangilanga aittosianik ukua. Angiutigiguk aliasullutit.
Aittotijuk. Taimaittuk. Illumoguvit pigiallugu. UKagajattilugit katimajitsuat
pigigunnamangânni, angautillugu Kammamollugu, ubvalu piujummagiuppa
aittosiak, inunnut âjaugialik kiggatuttanut. kenaujamminut atusimajut.
Tamanna maligatsaujuk angigiamik aittotinnik ubvalu angiutiKannik
aittotiugumajunik. Pitâgunnagikkuvit aittotimmik apigiusigigiaKangitait,
tamanna ottutiginiattaga siagugiak. Tamakkua uKausigigumakKauj akka
pidjutilet *Maligatsanik* , pijagepviginiangitaga ottugautinik sakKeKânnanga.
Asianut aigumaligama, *Maligatsak* pigiasijuk taisilluni *Maligatsasuamik*
piusiugialinnik iluagut *Maligatsasuap*, amma asianik maligatsaKagivuk iluani
Maligatsasuap. Ilangaujuk Kanitânettuk omatiganetulu. kingullipaulluni
piusiugialik, malitsiagasuannik maligatsaujunik. Allasimajumi (y).
Kimmiguniagutta nigiuji jaunninginnik sivulittet, iluani (n).
Taunungagalammagik atuatsigiaKavutit pillugit maligatsait amma sumat
uKammangât tainna *Labrador Inuit Maligatsasuanga* amma ilonnatik
katutjiKatigenniujuut maligiaKamangâta maligatsaujunik. *Maligatsait* ilangut
maligialisi. Ilangaullunili malittaugialik. Angiluattuk maligatsanit. Ilangat
piusiugialet maligatsami allatausimangituk, ilonnatalu tukisimalluta, ubvalu
taggasinimiuni, maligatsait adjigetijut kinakkutuinnait kinalonnet Kulânigani
maligatsaup. Tamannalu ikKanalluni sivulittinut taikkua sivulittet piniappata
pigasuaniappatalonnet Kulâni maligatsait, sakKititsiniattuk
maligatsaKanginimmik. Nalunait sijuk piusilukaujunik ubvalu

sulijutsanginnimik maligatsamik Kanuitsagatik. Sivulittet maliKattangittut maligatsamik. kina maligiaKavâ? tusannaKattamijuk atautsimik maligatsaKajuk atausiulingajunut amma maligatsait ajutsatunut. Tusasonguvusi maligatsaKajuk suvulittinut asiagiallanganik maligatsaKatillugit inuit. Taimaittunik tusagunnaKutit, maligatsalet poleset asinginik maligatsaKatilluta, Ilonnatik apomautaujut maligatsait. UKajuk maligatsait atungininginnik atuttaugatillugu. Tamanna ikKanammagittuk ilonnasinnut isumagigiaKallugulu. Sunait nigijugijaujut, Kângettojângitusi maligatsamik. Apitsotituinnaungitut sulijugillugit maligatsait. Kulânnettujângimijuk maligatsait. MaligatsaKalimmat asiagiallangit PikKujait Kaujimagalitit, unautuinaungittuk *SuliaKattet Maligatsanga*. kingullia ikKanammagittuk *kenaujalittânimmut Aulatsijet PikKujanga*. UtiniakKunga *kenaujalittânimmut Aulatsijet PikKujanganut* ottutigiallanut, pikKujaujuk uKausilik kavamamik. kinagiiallaup kenaujaKutingit tamânengitut. Nunatsiavut kavamangata kenaujaKutingit. Taimaimmat sivulittituinnaungittut amma suliaKattet Kaujimagialet PikKujammik sulijugillugulu. kenaujait ajunnalungitut kamagigiangit, amma kenaujait asiujijausagaisongummijut. Taimaimmalu *kenaujalittânimmut Aulatsijet PikKujanga* ikKanammagittuk. NukKagalâgumavisi, ubvalu uKâlatuinnalanga? Nigiuvunga tamanna uKâlautaullaginiattuk.

UKÂLATTI: Atsutuinnak.

MR.HAYSOM: Okay.

UKÂLATTI: Sulijugullu tamanna, ottugavugut-. nukKagalâniakKugut, taraippat sivuppiatuinnaniagutta....

MR. HAYSOM: Okay.

UKÂLATTI: .. Kaujimaniagavit.

MR.HAYSOM: TikiniakKoKugut taraimut, imaKângugajangituk. TikigajakKugut taraimut kisiani nilliatuKangimagippat. Patricia apigiusiKakKaujuk ottugausimmik, amma ottugauset ikajugunnasiattut. ApigiusitsaKalikKisi?

UKÂLATTI: ApigiusitsaKavet?

MR. JACQUE: Ahali. Tukisigiagumatuinnavunga. Atâgut nâmmasingituKalippat sittutitsiutinni, kaunsalinut katimaKatauguma amma nukaga, najaga, ujuguga, Kangiaga, anânaga, atâtaga, kinaugaluaguni, pigunnautimmik Kinugappat ubvalu Kinugautimmik ubvalu suliaKakKujilluni, ikajutsitauniagikaluallunga, nâmmasingiutitsamik sakKevinga, uKagiaKavingalonnet nâmmasingiutitsaKaniganek? Nakummek.

MR.HAYSOM: Taimailingatillugu, ilagengullusi, ahali, uKagiaKavutit nâmmasingiutitsamik sakKegajanninik. Kanullonet ikajutsitauniangilatit. Kanugalak ikajotiKajugaluak, ikajotiugunnatuk ilatsajagijannut. Amma asiagut ikajutsiniakKoguvit annanik ubvalu atâtagijannik ubvalu nukagijannik, piuluagajakKuk uKaguvit nâmmasingiutitsamik sakKegajanninik, okay? Herb, uKagiällaKuvammâ, sunanik allasimajunek, ubvalu tamanna Kanuigigunnaitait kiugasualluget?

MR. JACQUE: Kanuingingitaga.

MR.HAYSOM: Kanuingituk.

UKÂLATTI: ApitsutuKagiällagumavâ? Atsot.

MR. HAYSOM: TusalaukKunga nanikiak, uvannenginnaluni, sumaummangat atsok. Nalunattuk sumat ilangit isumannenginnamangâta amma ilangiungituk. kinamikiak tusalaukKunga kinalonnet iligunnangituk pitsiagamik ubvalu pitsianiKagamik atuatsinituinnakut allanik. Angijumik isumagilauttaga amma inogusigigani sulijugitsiataga. Taimailingammat. Atuatsinik taimailingajuk naluaniistisot, pitsianiKagiaKavutit. Kanuk tukiKatsiatok? Pitsiagasuannik ilisattaugunnatuk piusiujukkut nunatsuami. Ilisattausok piusigijakkut. Aiguvit ilaunialillutit tattukut KaKuattakullu. Ilangani sininnatuinnak. Taikkua sinannait uKumaillisot. takuKattanagit sinannait, tukisinnagit sinannait ubvalu Kanuk pigunnamangâta. Sinannait ilangani Kinnitatuinnait KaKuttamik ilaKallutik. Ilangani aupuluttait amma iviujait katingajut. IkKanammagikKuk isumatsasiullutit sunait piujommangâta amma piujongitut piusiujut Kaujigiamik sunamik apumautiKammangâppit amma Kanuk apomautet

sakKiKattamangâta. killigiudjigalâgumavunga uttotinnik atullunga. Ajunnangimmagittuk isumagiamik piujmik pigasuagiamik tammangajumik pillututit. Tukisigajangilatit kisiani takunnalugit uttogauset. Isumagillugit uttogauset, sakKititsiKauvunga atautsimik Patricia-mut siagugiak. NiaKuganit pikKaujuk, amma sunamik tukiKagajangitukilinnut. katimaKatigegalannik, uttotigilugu, ilaliutigumajunik kamajiullutik katimajet, ilangat taimaittunik kamakKâluni, Kaujimangilanga Katsetulluta katimasimalimmangâta, sâksinik sepanillonet, tukisinaliaKijuk, uttogauset inunnut ilijuagunnatut piunippaulutillu inogusiujuni, apitsotillaget suliajiaugialellu. Apomautaujuk, uttogasuinni, ilautitsijuk inullaginnik. Tamanna kamagijaullagigialik. Sunait tigujaugasuagiamik ajunnasongummijut, tugâgutiungitut ubvalu pidjutaungitut. IsumaKannamijuk kinatuinnak Kimatautuinnalinninganik, piungitumesimannimut ubvalu Kanulukak pisimannimut. Tamanna nallelonnet pidjutaungitut. Pidjutauluattuk inogusiujummi pitaKagiamik sunamik sulijumik, ilinnut aingagajattumik, attuigajattumik ilinnik, tukisitsiagajattanik Kanuk apomautaujut sakKisongummangâta inogusiujuni. Taimaimmat atugasuavunga uttogasusinnik inogusillagiujuni. Amma tamakkuagalait sakKitainnasimajut, Ilangit sukkajuit amma ajunnagatik. Ilangit uKumailuattut. Pingasuniuluak uKausiKagumavunga. ailikKânagna tamakkununga, inogusillagiKavuk *SuliaKattet Maligatsanginni* uKausigigumajakkanik. Imailigajut. Kimmigulugit unuttut angnigusunniusimalittut amma kamagillugu *SuliaKattet Maligatsangit* amma nâmmasingiutausimajut *SuliaKattet Maligatsanginni*, sunait sakKigallasongujut. *SuliaKattet Maligatsangit* sakKivalliajut katigasuallugit *SuliaKattet Maligatsangit* sakKiKattajut angnigusuttuKanialimmat, ununningit *SuliaKattet Maligatsangit* nâmmasingiutaKattajut nutâmik kavamattâtuKammat. Unuttugalait pidjtauKattajut, ilangat ilaliutijut, nutât angnigijausimajut, KaujiKattangittut Kanuk uKumiattigimmangât ajunnatommmangâlu *SuliaKattet Maligatsangit* amma Kanuk tammagaittuKasongummangât, sukkuisot inogusigijatsinik. Asiagugiallak angnigusuttiKavuk uppigususjunik nutâmik piusiKanialittumik, nutânik kiggatuttinik kenanillu, amma sunait sakKituammata taikkua (a) kappiasujut amma (b) Kanuk pigumatlatut. IsumaKagivunga ilangit sâlagijaugamik nigilukasot isumaKallutik angnigijaugâsimagialet amma Kanutuinnak inogusigijanik piungilititsigasuanittut. Inogusillagimmik takuniakKutit *SuliaKattet Maligatsangit* nâmmagijautinnagiit amma *SuliaKattet Maligatsangit* piungililutik. Ilangit ilisotet, amma asingit tapvainak Kaujitsisot sunanik KaujimagiaKanninik kamagitsialugillu. Inosillaget uttotik sivullipauluni. Inuk tuKuvuk. Kaningitumilu tuKullutik. Ilagijangit

akilegunnangittut utittisigiamik timgijanganik iluvittaujusautillugu, amma kavamait suliaKausingit amma kavamait ikajotigisongit ilonnainik akilegunnagittut. Angnigijaumallutit apigijauvutit ikajugajammangâppit. kavamanut ikajuttauKallutik amma nâmmasillutit kavamait ikajuniangitut, akilitsasillutit utittisigiamik timimmik nunagijanganut atullutit akilitsatâgutinnik. Siagugiak, igvit asingillu katimajet, ilautillugu ministeriujuk, kenaujaliugasuanialillusi akilegiamik akilitsagijannik. Minister allagalannialilluni suliaKattinut ikajugajammangâta akilegiamik akilitsamik, UKautijauKattalutik suliaKattet atullutillu kavamait Kagitaujanginnik. Suna piungituvâ? Amma sunait tammautausimajot?

MR. BLAKE: Kaujitsiutet pitâgisimajatit akilegiamik akilitsatâgutinnik, Kanuk uKausigigunnatagâ? Kanuk tamanna sulijugijait sulimmangât, tukisinaniattillugu.

MR. HAYSOM: Kaujitsiutiulaummata aittotiga apigijaugama uKausiKajamangâmma. Kaujitsiutet uvannut tunijuamajut sulijugitsiajakka.

MR. BLAKE: ApigigajakKaget kinamut Kaujitsiutitâsimammangâppit, asiagut Kaujimagama.

MR. HAYSOM: KaujitsiutittâKattavunga Maligatsaligijikkut SuliaKapvinganit kavamammi amma AngajukKauninnit, taikkua tunitsiKattatillugit.

UKÂLATTI: Nakummek. Ilagiatsigumavet, Madam AngajukKâk.

ANGAJUKKÂK LEO: Sulli Iluingaluta katimajugunai, right? Okay. ImaKâ Roy, ikajutsiniatillugu ilinnik, punitsaugajakKuk Veryan pijagekKâtillugu tukisinannisauniattuk. Kanuigingikunni.

MR. BLAKE: Kanuingituk.

ANGAJUKKÂK LEO: Pigunnagutta, UKâlajek, Kaujimangilanga Kanuimmangât. Veryan sivulimi pijagettillugu, piunitsaugajakKotuk, isumagijakkut.

UKÂLATTI: Nakummek, uKausigijannut. Taimâk pigunnaKugut. UKâlatillugu amma pijageppat apitsugunnaKusi.

MR. HAYSOM: Okay. Pigiallagasuavunga. Taimali. Tamanna uttugannimik apomautaujuk. Naillitillugu akunimut amma sunanut sakKiviusok. Sunatuinanut apitsotiujunut piusiugilainni, maggolingajok. Mangali asianut nottavutit, ikKanallagilunilu tukisigiamik sunait sivuppianiKasongummangâta sunait piujoninginnut amma angittaugunnatunut. Tamanna pigiasititsijuk

kinakkutuinnanut angittaugajattumik. Suliagigialingit angnigijaumajut piujummagiujuk. Inuit ilaget sunamik pigumammagittut uKumaittojunni. NalunanniKangilak apigiutitsaKaganilu. takukKaugatta suliagijaugialet nigiuugialet. Taimaigaluattilugu, ullop nâningani piujogajattuk sunait sivuppianiKappata. Sivullipâk sivuppianiugajattuk sunait tammasinmangimangâta. Amma atuatsigumavunga naittumik atugammait taijaujunit, "What I learned about Poilitics." TaijaugusiKammijuk. "Inside the Rise and Collapse off Nova Scotia's NDP kavamanga." Allataumajuk Graham Steele, Ministeriujuk kenaujaliginnimut ilaliutilaullunilu Nova Scotia maligatsaliuttinginnut 12-ini jârini. Akuniunitsaungippat. Tataminnianattuk atuagaujuk. UKâluattuk Nova Scotia-mut. UKâlangituk katimajitsuanut sollu tamânetut. Kaujimagatsi pijagegutinga piujolungituk katimajiuKatinnik pitaKagiamik. Taimaigaluattilugu. Tamannaulungituk atuagumakKaujaga. UKâlautiKajuk sivullimi, suliaKannimik. Ilanginik atuatsigasuvunga pejattausimajunik uKausinginnik. UKâjuk, " Unuttuit uKâlaKattajut ajutsamagittut, kenaujatigut ubvalu kitsanikkut tamaitulonnet. PiutsaKallutik. Tusâttaugutik suliaKapvimit, ilagiagutigiKattajanga." UKâlautiKajuk suliaKannimik amma angnigusuttiujunik amma Kanuk-. Ilangit sakKivalliatillugit. UKâlautiKajuk ikajuttigijamminik Kanullu ikajummangâta. UKagiallamijuk ilitsinut ikKanammagittuk. "Asingit Inuit takujut MLA's kenaujattâviusongunninginnik. Nalautsiguvit saniguannik kenaujait aniakKaniattut. Tamanna MLA pasigatsaugutinga. Sivulittet aukâgiamik piutsangittut. AngajukKâgijaujuk ubvalu kinakkut katutjiKatigenet kenaujatsiuligaimmata, MLA tunitsiKattajuk tuniggusianik. MLA's angitsimajut, unuluat inuit Kinijanalillutik kenaujanik, taimâtsainak piKattajut jâriup kingulliani. Kinugautaujut kenaujait amma MLA angigumanninga nalunaisigutiusok MLA atuKattajanginnik. Kinuguatet KângeKattajut MLA namminik ippiasumminit akileniattilugu. Taimaimmat MLA's napvâgialet kenaujaniktunigatsaminik nakigiallak." Nova Scotia-mi piusiusimajut nalunaisijut Kanuk nunalet kenaujaKutinginik napvâgiamut tuniggusiatsanik. Tamanna uttogausiujuk, nunatsualimâmi, sivulittet apumautigijanga. Takunnatautsainavutit apigijaugiamik kenaujattâgumannimut, takujauvutit kenaujaKanninik. Prâvinsiujuumi taimailingaluttuk kenaujait atulukattausimanninginni. UKumaigijauKatatsiamjuk MHA-nut kenaujanik sakKititsigiamik ikajuniattilugit kiggatuttaujunik. AtuliaKiniallutik kiggatuttet kenaujaKutinginnik ikajutsiniallutik kinakkunik angnigusuttunik ubvalu unuttunik angnigusuttinik. Taimaimmat uKumaittumagiujuk. kavamait

isumangagut amma *SuliaKattet Maligatsangit* Kanuk kamagijaugutiusot. Nalunatitsigunnailuni MHA's namminik tunitsigunnatut. Takugunnagavit, sollu uvak, amma unuttut kenaujaliugutiKatsiaKattangittut. TunitsiKujauvutit kenaujanik, kenaujanillu tunitsilutit, amma naminik kenaujagijatit. Kanuk piusigijait namminik kamagijait. Sivulittiulusi, ajunnasiugajakKusi taimainngikaluatunga sivulittiulunginama. Sivukatattiulusi, taimâk pigiamik nigijugijauvusi. Sivukatattiulusi, atausiallusi pituagutsi, kinakkutuinanut ikajugiamik nigijugijaugakKutit. UKumaittumenialilutit. Kanuk uKumailitait kamagigunnaKât? Kanuk kenaujanik sakKititsigajakKet? UKumailutammagik. Tamakkua uKumaittumetitsisot, tukisinattut uKumaittumegetet. ApikKusik pigiasillagianiattillugu, apomautiKalippat, Kanuk apomautitsak sakKiKattavâ? SuliaKagasuannik Kanuilungituk. Aittuinik inunik namminik kenaujagijannik, Kanuingimijuk. kenaujaliugasuannik KanuilukKongimmijuk. Aiguvit katimapvisuamut, takusonguvutit allasimajumik ubvalu Kaujitsiutimik ukkuami nunalet kenaujaliugasuanninginnik Inuvianut niKitsatâgutitsanut inunntut ajutsajunut nunagijaujumi. Kimatsigik tunijasi maunga katimavitsuamut. kamagijaujuk Inuit Nunalet kavamanginnut, uKammiluni, tigusigunnangillagut kenaujatuinnanik. Takuminattuk. Kimigutaugunnatuk. kinalonnet uKangituk tamanna tammangittuk. Tamakkua isumagijaugialet, ikajutsitaugiaKallutilu. kenaujaliugasuannik ikKanammagittuk. kenaujaliugasuannik, tammalungituk. Atunnik namminik kenaujagijannik aittotitsautillugu kinamut, Kanuilungituk. Apomautitsak Kanuk sakKiKattajok? Apomautitsak sakKiKattajuk kenaujaliugasuannimi angnigijausimallutit kinamut uKumaitsajumut, Sumat apomautauliaKiKattavâ? Asingauvuk uKagiamik kenaujaliugasuajutit niKiKautimmut ilingajunik kinakkutuinnait Kinugagunnatillugit. Asianguummijuk uKagiamik kenaujaliugasuanninik ilingajunik ilagengujunut ubvalu sunanmut. Ah, uKaniakKutit, kinalittauk Kanimammagittuk aullagiaKalluni kamagijaugiattuluni sollu Montreal-imut kisiani kamagijaupviusomut? kenaujaliuKataugasuagajangilangâ? kiugusiugajattuk pigunnaKutit amma auka pigunnangillatit. IlauKataugunnaKutit kenaujaliugasuallutit. Auka, pigunnangillatit ilaliutillutit katimajitsuanut. Namminik pigasuallutit ilautitsijumik Kanuittunik âkKisimausinnik taikkua kenaujait ilinnut ilinganiattinagitm kenaujait ainiattinagit suliaKapvinut, amma kenaujaliangusimajut ainiattillugit kinamut ikajuttauniattumut, kinamut kamaniattumut kenaujanik. taimailingagajattuk âkKisimausik kenaujaliugasuannini. Sunait apomautauvât? Apomautaujuk sakKivalliasok. kenaujait iligunni akilitsatâgutinnut, aittotitsaliumavutit. Sulli kenaujait

tunisimannagit, ikajuttaugumavutit akilitsatâpviusonut 30-ni ulluni ununnisannilonnet inogusigijanni. Aittuisimavutit Ikajuttaugutilimmut ubvalu angnigusuttimut, imminik uKumaigilittait. kenaujaliugasuanialillutit akilegutitsanik akilitsatâgutinnik, kenaujaliugasuagunnaiKutit ikajuttaugutilimmut ubvalu kinamut ajutsajumut, namminik kenaujaliugasuavutit akilegutitsanik akilitsatâgutinnut.

UKÂLATTI: Sarah Leo apigiusitsaKakKomat, tâvatuak Joe Dicker apigiusitsaKakKoKaujuk. Tulligettitâllugit sivulliuKaujuk, sivullipâmi apigigialet.

MR. DICKER: Apigiusiga Kujanâttaga. kiujaugettuk.

UKÂLATTI: Pigiasiligit, Sarah Leo.

ANGAJUKKÂK LEO: ApigiusitsaKangilanga. UKausitsaKajunga, imaKâ Roy uKausigigasukKaujanga, tuinganut aigasuvunga. Kaujimavunga uKâlautigijannik, Veryan, tukisititsigumatuinnavunga. IsumaKavunga ilanginnik naluliumautitsiniattutit. Taimailingalaungituk. Kinugautet kenaujanik amma tuniggusianik sakKilautuk, immigottumik kamagijauulluni. Sunatuinnait akilitsatâgutinginnelauttut, KinujuKalaugunnaiKuk kinamut akilitsatâgututilimmut. UKâlausikagiaKavugut piusiugilainnik inunnut tukisijauniammat, Taimâk pilaungituk. Kinugautet kenaujanik pijaulauttut katimajitsuanut. asiagugiallak asinga katimatsuajiuKataujuk, akilitsatâgutinga, iluvittaugutitsanut, maggok immigolauttok. Ilanga kinaup akilitsatâgutinganelauttut KinujuKalungilak kinamit tunijaugiamik kenaujanik akilegutitsanik akilitsatâgutimminut. Tamanna tukisijautsiagialik tamanna uKâlautigiguttigu.

MR. HAYSOM: Kanuingituk. Nakummek tukisititsigiagavit. Asiangutitsimat. Piusiugialet taimâtsainalingajut, taimaigaluattilugu, akilitsaKaguvit kenaujaliugutiKagasuagiaKangilatit, apigiusiulikKuk, sumat piujongitok? IkajotiKallagingilak. Tamanna ikajutsiluasimajuk kinagiiallamik. Piusiusimajuk apigiusiugunnangittuk. Piusiusimajut uKumaittolillutik . Asinga pidjutaujuk apomautisittisujuk atuttauningit kavamait piKutingit, kavamait Kaujimatitsiutingit, Kagitaujait, Kagitaujatigut tugâgutet. kavamait Kagitaujangit kenaujaliugutigigasuallugit. Atuttauningit suliaKautet ikajugasuallugi ikajuttaugutilik, ubvalu katutjiKatigennet ikajuttaugutiKallutik, atuliaKititsigunnaKuk kavamait piKutinginnik Kujanâgigiamut kinamik amma pitaKatillugit pimmagittunik ikajotiusonik. Tamanna ilangaujuk sakKujuk *SuliaKattet Maligatsanginni* apigiusilik

atugiaKangitutit kavamait piKutinginnik uivisâgiamut ubvalu nammiik pigumausinnik. Namminik pigumannik pigumanniujuk ikajutauniattillugu atautsik amma atautsik kinatuinnak ilagimmagittait. Taimali sunamik tammautiKasimavutit, piujumik pigumasimagaluallutit, pidjutaujuk piujotillugu, âkKigiatsigasuannik KaningiligiatisimatiluguapitsotitsaKalittillugu Kanuilingausinganik piusiusimajut. Amma nunalet isumangagut, ubvalu kamavait isumangagut. Apigiusik sunait pigumaset ilingatillugit atausimut angnigusuttimut ubvalu maggonut ilonnainullonet? kavamait piKutingit atuttauniappata kenaujaliugasuannimut atutsimut inummut, kavamait piKutingit atuniakKatet kenaujaliugutigigasuallugit ilonnatik Inuit? Taimâk piguvit atausiallutit apomautillagittâvutit kiugasuagiamik. (A) sunanik pigunnaKet? Kanuk angitigijumik kavamait atugunnaKât? Sunait suliaKausiujut asiangutitauvât? Sunait piusiugialet? Kanuk killigiudjigunnaKet atautsik inuk ikajutsitauniattillugu aippanga ikajutsitautinnagu? Ubvalu ilonnainik inunnik ikajutsiniakKâ? Uttogausiujuk, sunait kamagijaugunnangittut, ilanga kenaujaliugasuanniup ilingaluattunik suliaKattimut, ilaliutijunut suliaKattinut. Amma tamanna apigiusigunnamijuk. SuliaKattet uKumaittumenialittillugit. SuliaKattiusimaguvit tukisiniakKutit angajukKâgijait ilinnut Kaippat uKallunilu, kenaujatsiuvunga sunamut ilinganiattumik, ajunnatuk aukâgasuagiamik. SakKisongujuk. AngajukKâgijait aullaijuk uKummiaganik kenaujaliugasualluni sugusingata ilinniavingani pinguaKataugaittugiamut. Ilinnut Kaivut UKallutik, tikittinik pisigumavet? Aukâgiamik ajunnagalattuk. Ilangani aukâgumangilatit. Ilangani sunaungituk. Ilinnaut tukiKattojângituk kenaujait pillugit. Ilangani angajukKâk/suliaKattik ilagengujut, amma uKumaittumentitaullutit angajukKânut. Tamanna uKumattumagik kamagigasuagianga, Kaujimangilangalu taisigunnamangâmma *SuliaKattet Maligatsanginni* uKajuk taimâk pigiaKangilatit. Tâvatuak pitaKavuk, Iluani *SuliaKattet Maligatsanginni*, pisiKagiaKavutit pitsialugit asigijatit, piluatumik nunalinni suliaKattet, sulijugitsialugit. Ilangait sulijutsagiaKannik nunalinni suliaKattinik, uKumaittumentinnagit. Taimaimmat, piujotsiagasuannik, sunait sakKininginni, tammautaugunnatut, ubvalu sakKititsilutik apomautitsalaginnik. Tamanna uKausigiluagumakKaujaga Kaningiluatlatinnagu, unuttovut kamagijautsiagialet. kamagijautsiagialik, aullanik suliajijaujunni asiangutiniannagu namminik ilinnut, ubvalu kavamaujummut. kamatsialutit kiggatuttatit uKumaigijangit namminik kamagillagigasuannagit, angnigijaumangilatit akilegiamik kinaup uKumaigijanginnik. Isumajâtsiagit sunanik kamagasualiaKikKânak. Sangutitauniagani kavamannut

pigiasititsigunnamat atulukannimik nunalet kenaujanginnik ubvalu taijaulukanninginnut nunalet kenaujaKutingit. kenaujaliugutiKagasuannik Kanuilungituk. Kenaujaliugasunanik angittaugunnatuk. Tâvatuak kamatsiagiaKavutit kenaujaliugasuannimik inosigijanni. kamagigasuanigunni, âkKisimanniKatsiatillugu kamatsialutit amma takugatsausiallutit, amma piungitumetitsiniattinagu kavamagijannik. kenaujanik sanagasuagit. Kanuingituk. Imminik kamagillugu. Tâvatuak kamatsiagasunnik, takutsaunik atummagigialet. kenaujaliugasuallutit kinamut ilinganiattumik. Atullutit kenaujattâvimmik. Apigillutit inunik âtsiKullugit kenaujattâvimmut. kamatsialutit kenaujaliangusimajut aitillugit kinamut kenaujaliuttaugasuajumut, Kaujimatitsisiallutit kinakkutuinnait Kaujigunnamata Kanuk pisimamammangâppit.

UKÂLATTI: Sarah Leo. UKagumakKoKaugavit.

ANGAJUKKÂK LEO: Okay. apigiusitsaKavunga uKâlautigillugit kenaujaliugasuannet amma, uKagavit Kanuingituk kenaujaliugasuagiamik. UttogausiKatuinnavunga taimaittuKammat Nainimi. Pinguatet Huskies. Goldimik sâlaKasimajut, ainiujammata prâvinsimi pinguaKatigejunut, Nakutlaput taikkua. kenaujaliugasuajut nâmmatumik aigiamik prâvinsimut. Aullaikatajut nillinattutalinnik niKinik. Tikettinik aullailâmmijut. Mikijojuk nunagijaujuk. AkigattunagajakKâ, ilaliutillunga nunalinnut. Ikajugukkit aullaigiamik tickettinek?

MR.HAYSOM: AukaukKotuk, tâvatuak kinakkut tukisinnilukatinnagit tamanna AngajukKâp piusigijanga naminilu pigasuagani. NalunanagiaKangimujuk namut kenaujait ainiammangâta. Tukisijautsiatuappat amma kinamut Kaujijaumattitauppat tamanna kavamaup sulialungitanga, taikkua inuit kenaujattâniattut immigottillugit, amma pitâniiallutik, igviungituk amma Nunatsiavut kavamangaungituk.

UKÂLATTI: ApigiusitsaKagiallavet?

ANGAJUKKÂK LEO: UKausituinnak. UKausigigiallagumajakka Huskies naittumik. Kaujimavunga taimaiKattajut ilonnaini nunagijattini, Kanuk kenaujaliuttuKagasuaKattavuk, ilaliutillutalu nunagijattinut. Kaujimagavit, Kaujimagavit taikkuatuinaungittut Huskies, tâvatuak ullusiugutitsaKavugut amma pingguagusiujuunik sunatuinnanillu suguset ilaugutaugusinginut, piujogajattuk kinatuinnait Kaujimappata, pisittotiKakKavunga Huskittinik.

UKÂLATTI: Nakummek. Mr. Dan Pottle, apitsotitsaKavet?

MR.POTTLE: Nakummek, Itsivautalek. Apitsotiungituk atausiulingagani, uKausituinnak. Piugijaga Veryan uKâlausigijangit, tamaungalaugamanit katimajitsuanut, pingajugilittanga tamânenninga. Veryan sulitsiaKommijuk sunait pidjutaujut pillugit *SuliaKattet Maligatsangit* sakKiKattatjut inuit katimapvimeliaKimmata. kiggatuttitunnaulungituk, ilisimajaga inogusigani amma ilingattiniammijaga sivulittinut. IlinniaKattavugut ilisimannikut. PigasulikKânak, apigigiaKavutit. kamagillugit inigilitaminut tikikKâtinnagit. Kaujimagavit, nâmmasigituKagajakKuk iluagut *SuliaKattet Maligatsangagut* ilinnut ubvalu asianut katimajiummut, ikajutsilunga uKaudjigiagalâllungalu pingasuni jârini tamânesimalinningani sivulittiulunga kavamagijattini. Nakummek.

UKÂLATTI: Greg Flowers, apigiusitsaKakKogavit ubvalu uKagumavet.

MR.FLOWERS: Ahailâ, imaKâ ilagiallugu Sarah uKausigikKaujanganut. Kanuingituk tâtsumunga ubvalu uvannut kinagiallmollonet kenaujaliugasuagiamik sunanut nunagijattini suliaKapvimut aitingituaguttugu. Sigugiak uKakKaugavit uKumaitsaKattanimik, tâtsumunga uvanillonet kinamillonet. kenaujaliugasuatuagutta silatânit suliaKapviup Kanuigajangituk?

MR. HAYSOM: Auka. tamatsenut, Greg amma Sarah, ajunnamagittuk ilangaummat tâttumejuk. Piujugajattuk uKâlautigiguttigit tâttumetitsiKattajut. Tusattaugumagajangilanga aulaniagasi tikittinik kenaujaliugasuallugi suliaKapvigijanni. tukiKajuk tattulagik amma tunganattogani. Maligatsautojâttuk uKalluni aittosianik tigusiKattanak. uKatuaguvit uKagiaKajutit, aittosiatuinnait Kanuingitut, sunaugatillonet amma \$5 tikittet, \$1 tikitet, pisillutit talimmanik pitâgigunnalugit 3 tâlatut. Kaujimagavit, sunait, ikKatuijet uKausingatut, tamakuagalait malugijaugiaKakKongitut,. UKausigillugu, mikijugaluagutik, kamatsialagigiakavusi ilinnik ikajuniangituk ubvalu ilagijannik. amma kenaujaliugutigigasujait uttogausiuniattuk kamatsiagasuannimik takugatsaunimillu, tamanna sakKeniammat kamatsiatunik katutjiKatigenninik. Nalunaitsiniallutik kenaujanik, ammalu Kaujiniallutit Kanuk angitigijumik kenaujattâsimajuKammangât amma sunanut atuttauniammangât. Okay. uKalungilanga aukâllunga, aullainiagasi tikittinik suliaKattigijannut. Kaujimavunga taimainginnatuk. UKatuinnavunga isumatsasiugutigitsialugu kamagitsialugu, ilangani angijummagimmik kenaujait pijausongummijut ubvalu angnijumik sâlaKallutik ubvalu tuniggusiamik, kamatsialuagiaKagajakKutit. Asingaummijuk sâlaKagiamik sikidoomik.

UKÂLATTI: kamagajakKugut suli apitsutigiallanik. Piujumik inganiKakKotuk, Kanuigijaungipat, ilonnainut angittaupat. Taima, atautsigiallamik apitsugasuajuk Greg Flowers nukKagalânialigatta. Suli Katsiumata apigiusiugumajut.

MR. FLOWERS: Okay, Veryan. Tukisijaga, uKanguatuinnaluta, uttotigilugu, ilinniavik. Ilinniavet kenaujaliuKattajut Kangatuinak sunanut piusitsanut, uKangualuta, paniga uvalu inning ilauKataujut sunamut kenaujaliugasuallutik uvannulu ainiallutik kenaujamik tunitsigajammangâmma. Kanuingitok, sullu, imaKâ, AngajukKânga Makkoviup apigikKaumat. Uvannik ikajutsiniangikaluattilugu, ikajutsijogaluak taikkuninga, sollu Happy Valley-Goose Bay nanilonnet, Kanuingitung, taimâk pigiamek?

MR. HAYSOM: kamagisimallugu, kamagijaugiaKagajattut tâttumegutaujut, piusiugijait suliatsiaKottuk. Piggagasuagiavutit tamakkuninga tukisitsialikKânagit uKâlautigillugilu. Ilangat, Danny uKausigikKaujanga, apitsotitsaKaguvit naluliumaguvillonet, apigillutit ikajuttaugumallutilu. Utipvigillugit ilinniatuit. Ahali, suguset kenaujaliugasuaKattajut ilinniavimmi. Pillugit kamatsiagasuanet, takugatsaunet ilonatik takugajakKotasi ottugautet kenaujait iliniavimmoniappata. Asianik apitsositsaKagivuk. Sugusiga pingguatunniKataujuk, amma pingguatet kenaujaliugasuaniattut. Sunamik asiangutitsivâ? Sunamik asiangutitsiKonigutuk nalunangituappat aullaijutit tikittinik akungani suliaKapvini suguset pingguatunniKataummat, pivutit suguset pillugu, inuit Kanuitsaniattinagit uKumaittumegasuangimut angajukKâlu, Minsiteriujuk uvannik uKumaittumetitsipat. Kaujimagavit. kamatsiagiaKavutit Kanuk isumagijaummangâppit suliaKattinut amma Kanuk ilinnik pimmangâta. kamatsiagiaKagivutit apitsotimmik Kanuk angitigijut kenaujait pigumajaummangâta. UKagunnaKunga, angijummagik kenaujak. kamatsiagit. 5 tâlak amma 5 tâlak kenaujaliugasuannimut, kinalonnet tamatsuminga apigiusiKaniangituk. kamagitsialugu Kanuk pimmangâppit.

MR. FLOWERS: AdjutigiaKakKongituk akungani 5 tâlak, 5 tâlaugaluaguni ubvalu 10,000.

MR. HAYSOM: Apiginga pigumallutit 5 tâlatut amma apiginga pigumallutit 10,000 KaujigajakKutit adjigeninginnik, tâvatuak....

MR. FLOWERS: well...

MR. HAYSOM: ...piusiugialik, sulivutit.

MR. FLOWERS: Ahammarik.

MR.HAYSOM: Sulivutit. Piusiugialik tamânettuk. Kaujimavutit, ikKatuijet uKausinga maligatsait isumâlutiKangitut *mikinitsaujunik*. AtunniKangitunik. kinatuinnak apakataugajattuk sikarelukaKalluni, kinalonnet pasigatsatâtitsiniangilak. PiusiugiaKajuk pitaKagiaKangilatit sikarelukannik, atugiaKangitait. Maligatsanengituk. Ilonnâgut tamakkuagalait apakataugutiginiangitatit, mânautillugoluak. Amma atuttaugiaKangituk. Inogusillagiujuumi, kamatsialagigiaKavutit atullutit isumagijannik, kinalonnet tamatsuminga isumâlutiKangituk. Taimailingatuappat Kanuilungilatit, PiusiullagigiaKajuk aukauulluni; apigiaKangilatit suliaKattinik kenaujanik tunitsigajammangâta. Tamanna piusiugialik, taimâtsainak aittosianut. Sunait adjjungilât? Adjjungituk, inogusiujuut nunatsuangani, sunagalait adjjengitumik piKattajut.

UKÂLATTI: Mânnautillogu Kinuvunga nukKagalâgiamik pigiasiniammiluta 3:40, UtikKuniattaga Veryan Haysom, Suli apigittuKagumammat Iluingalutta katimajunnitinni.

(NukKalaullanik)

UKÂLATTI: Pigiasigiasimmigatta Iluingalutta katimajiulluta. Kimmigunik Nunatsiavut *SuliaKattet Maligatsanginnik* ukununga *Angnigijausimajuit PikKujangani*. Nakummesiallugu Veryan kaigunnalaummat uKâlagiattuluni katimajitsuat Iluingallutik katimanninginni. PijagegutiKakKoKaugatta uKâlautigillugu allasimajut iluani Nunatsiavut *SuliaKattet Maligatsanginni*. IkKaumakKulugit katimajitsuat, apigiusitsaKagutsi, ammaKattalugit uKâlautet piusiliuttaugiaKammata. Nakummek. Richard Pamak apigiusitsakaKoKaummat.

RICHARD PAMAK: Nakummek. Ottugauset piujummaget, Veryan, nalunalungilak, uKausiugiallagalâppat, imaKâ, isumagijakkut. ApigiusitsaKagama angnigijaummalunga, ubvalu kinaullunga nunagijaujunni, kenaujaliugasuannimut, ilonnatik maligatsanik atugunnaKugut sakKetailigiamik piungitunik. kenaujanik piulimatsivinik âkKisigunnaKunga. kinamut kamagijautigajattaga, amma tiliugigunnaluta, tuniggusiaKaniappat. UpagunnaKutit inunnik tunitsiKullugit. Kaujimallutillu igvit apigiusiKanninik tunijaugiamik. Amma angnigijaumajut ilitatsigajattut *SuliaKattet Maligatsanginnik*, unuttongittugaluat nunalinni ilitatsijut *SuliaKattet Maligatsanginnik*. Uvannik takugajattut, taimâk pigaluaguma, silatâni suliaKapvima, iminik pigasuannik kenaujaliugasualluni, nunalet uvannik takugajattut Richard Pamak. Minsiter IlikKusiliginnimut, Pinguanimmut. Kanuk pijauttailigajakKâ, maligatsait tamânegaluappat? Amma kinatuinnak

Kaujippat nunalinni tamanna pigiaKangitoninganik, akigattumat *SuliaKattet Maligatsanginnik* Ministeriuluni ubvalu angnigijaumalluni, angutik, pidjutaujumik tunitsinialluni. Kaujijautillugu kavamammut, nunalinnut ilonnainut. Maligatsait tamânegaluattilugit, suli attutauniKavutit kina sunanik sakKititsipa, allât KaujisagiaKagaluagutta, sulijumik pisimagaluattilugit, sunatuinnanik pitaKalluta, ilonnatik maligatsait tamânetilugit, amma Kanuigata, sulli sukkuisot tamânettut. Kanuk tamanna sakKititauttailigajakKâ?

MR. HAYSOM: Unuttunaget tapvani apigiusigijanni. Innunut Kanuk isumagijaummagâppit kamagigunnasiangitait. Nalunalungituk, inunnut isumagijaugumavutit sulisiatonnik amma kina pitsiagasuattuk, kina namminik pigasuangituk, amma kina pigasuanginnatuk kamagigasuallugit Inuit Kanuttogutigijangit, tamanna isumagillugu, takunnagusijuk ilinnik. Taimaigaluattilugu, inunnut isumagijavutit asiagut, nalunalungituk ajunnatumik akKutitsaKavutit namminik takunnâgusittut amma Kanuk imminek piKattamangâppit. Malugigunni, pigunnaKutit, namminik sinnâgillutit, uKâlatsialutillu Kanuk pimangâppit. Asiagut uKausikkut, takugatsausiallutit, kiutsiagunnaulutillu, kiullugit apikKusijut ilinnut. Tukisititsiniammangât kinamik naluliumautilimmik ubvalu isumaKajumik asiagut apigiusiummijuk. TaimaijuKagiaKavuk, sakKitalitillugit apomautaugunnatut malitsialugit *SuliaKattet Maligatsangit*, malitsiatullu. SakKititailigajattit apomautet kiutsiagunnaulutit, atuinnaunginnalutit kamagillugillu sunait ilinnik uKumaittometitsijut. Sulijutsagialik amma kamagijaulluni sulijugitsinikkut, sulijugijaunnik tamânegiaKatillugu. Tamakkua ilonnatik iluanettut *SuliaKattet Maligatsanginni*. Taimali kenaujaliugasuaguvit amma tukisigasuaguvit inunnut isumagijaujuk Richard Pamak, Minister IlukKusiliginnimut, Kaujimaguvit amma tukisimaguvit, nalunagiaKangilak taimâgalak piliguvit piggagasuannimut kenaujaliugasualiguvit kinamit apigillugit tunitsigajakKet tamatsumunga, Kaujimaguvit isumagijaunninik, igvit, uKagiaKavutit, ilinnik apigivunga nunaliuKataulunga, uKaumiattumitigasuangilagit kiggatuttiulunga ubvalu Ministeriullunga. Kanuttolungalu tamanna ikajutsijuk.

UKÂLATTI: Apigigiallagumavet?

MR. PAMAK: Apigiusiullagingituk, pijâgengilanga, Kaujimagavit, ikajugasuagiak uKumaittuk ilagengigujunnik ilangani, amma isumagiajuguvit pigasuannik Richard Pamak. Maligaluattilutit maligatsanik amma malillugit allaKutet, Ahali, suli Ministeriuvutit IlikKusiliginnimut Pingguanimullu. Ippiniannatuk sunamik

kamagasuanguinik pidjatauunik siKumitsilikKutit maligatsanik, sunamillonet pigasuannak. Kaujimagatta, katimajuKageppat ilitatsiniakKugut *SuliaKattet Maligatsanginnik* tukisinitsagilugulu. Inuit nunalinnitukiismangituk *SuliaKattet Maligatsanginnik*, uKagajattut, isumavunga Richard Pamak ubvalu Richard Pamak, Minister IlikKusiliginnimut, Pingguanimut amma Niuggutitsinimmut. Uvannik attuilukagajattuk, amma attuilukalluni Nunatsiavut kavamanganik inuit isumaKappata Ministeriunninik IlikKusiliginnimut, Pingguanimut amma Niuggutitsinimmut, Kaujimangilanga, uKausituinnak, Kaujimagavit, ilinniagutaugajappata, amma Nain angijualolungituk, taimaittugalait sakKigajangituk. Inuit isumagajattut takunnalutit, amma, uKallutik, ahali, piujumik pigasuavutit nunalinni. TamânettuKagajagivuk, siKumitsigajannimik maligatsamik. Kaujimagavit, sakKitailigasuallogu, sunaKutaugunnainik kinallutit ubvalu ilaliutit kavamammuk, ilangani Kujanâttautojâgialik. UKausituinnak. Nakummek.

UKÂLATTI: Nakummek. Ilagiatsigumavet Mr. Haysom?

MR. HAYSOM: Ahali, ilagiatsigumavunga sumat ikKanammagimmangât ilaugiamik apitsuniujunut sunait sulimmangât maligatsait amma sunait ilingammangâta *SuliaKattet Maligatsanginnut* kavamaujuk iluingatigasuatuinnaunagu. Asiagut uKausikkut, sulijugennalugu kavamaujuk amma kavamait katsungaigutautsiatillugu. UKalaugama ilaugumajunga uttogausillaginni. Amma Kanuingituk pitaKagiamik *SuliaKattet Maligatsanginnik* amma *Maligatsasuumik* pitalek piusiugialinnik. Kanuk piusiugialet atunniKasonguvât inogusillaginne? Kanuk maligatsait atullagiKattavât inogusillaginni, nalunalungimijuk sunanik apomautiKaniangilatit sunamik pingikuvit. Tamakkua ilonnatik apomautaujut, apomautet piusiujuni amma malittaugilinni. IsumaKagumagajangilanga Kimmigugatta *SuliaKattet Maligatsanginnik* Kanuk piusiKagiamik amma sunait sulimmangâta amma sunait piujongimangâta, ubvalu kinaup ilinniagusigijanga Kanuk pingimagilluni. Tukigijanga, nalunailluni takkua uKumaittut pidjataujut, uKumaittut nunatsuamellagiamik amma sugalattiulusi nunatsuami.

UKÂLATTI: Nakummek. Mr. Jim Tuttau. ApigiuisitsaKakKogavit.

MR. TUTTAUK: Ahali, nakummek. Tusannimagittuk, Kaujimangilanga tâttumangâta ubvalu Kinnitaummangâta, tâvatuak bingkuit. KaujimakKauvunga sakKitigajattait. AullaiKattavugut bingotinnik kaunsalet suliaKapvingani akungani 3:00 amma 4:00 p.m, aulataulluni Pingguatuligijet suliaKapvingani. Kanuk piungitigijumik nâmmasingiutiugunnaKâ?

MR. HAYSOM: Apigivamma isumagilautsimangitaganik, bingonguatiunnanga. Isumavunga aulatsiguvit malillugit malittaugialet taisimajakka Katsetulugit pingasuittulungalonnet, ununnisaungipata, KanuigajakKongillatit. Sivullipâmi suliaigijanga pinagguatligijippit katimajingita, ubvalu pingguatuligijet suliaKapvinganit, pigiasittitaumallutik kaunsaligijinnut, tungâgutiKallutik nunalinni pingguaninnik, takugatsausiavutit sunamut tamanna pidjutiKammangât. SuliaKausiujuk aulataulluni katimajinnut nunalet kavamanginnit, atugiak nunalet kavamangata piKutinginnik kenaujaliugasuannimut KanuilukKongituk. Apitsotiugajattuk kenaujaliugasuannik tigujauppat kenaujagijannut, amma akilegutet takujauppat, amma inuit kamajut kenaujanik pasigatsaugajattut sunait piungilippata. Taimaimmat apigiusiujuk, sunait tamânegiaKatillugit sulaigijanginni nunalet kavamanginni, ikajutsiniallutik atuinnaunut ilonnainut nunaliujunnut. Taimaimmat Kanuingituk.

UKÂLATTI: Nakummek. ApigiusitsaKagiallaKogavit.

MR. TUTTAUK. Nakummek. Ahali, sunait sakKigajattut, utipvigillugu tuKujuKappat ilagengujunni, ubvalu nallingit ilaget utigumammangâta iluvitsigiattugiamut, asiagullu. Ilangani suliaKapvik ilagengujunnik bingotitsigiamik kenaujaliugasuallutik inunnik utitisigiamik nunagijamminut. Tamanna nâmmasingiutiugajakKâ?

MR. HAYSOM: Ahali, asianut nolikkogavit. ilimanattumelualigajakKuyit apomautitsanut sivulliutitaunimmut ubvalu ikajotiusonut atautsimut inummut ubvalu atautsinut ilagengujunnut amma pitaKattinagit sivulliugialinnik ubvalu ikajotiusonik. IsumaKavunga tamanna kamagimmagigialet. SuliaKausiujuk âkKitaumappat pingguanimmud, atugasuagunni kenaujaliugutigigasuallugu ilagenut ajutsajunut silatânegajakKotuk tugâgutiujop. Malunnatojâniallilluni atuliaKilinnik kavamamit suliaKausinginnik ubvalu kavamait ikajotigsonginnik taimaittunut atugatsaungittunut, amma malunnagajammijuk atujatit ikajutsinaittilugu kinakkunik ilagengujunik. Adjigilungimijanga immigottumik suliaKausiKappat amma immigottunik kenaujaliugutaugunnatunik inunnut ajutsajunut, amma tukisimajautsialuni, ikajutsijuk kinakkutuinnanik nunagijaujumi. Nunalinni ikajotiKaluagajakKuk ikinnisautillugit uKumailutausot kinamut ilagengujullonet. Tamanna ikajutsivâ?

UKÂLATTI: Mr. Gary Mitchell, apitsositsaKakKogavit.

MR. MITCHELL: Nakummek, ahali, apigiusitsaKavunga. Pillugu allasimajuk 2.4(e), uKajuk, “Naluttinagit angnigusugunnatut amma suliaKattet nanigaluammangâta angnigijaumajut suliaKagiattusimallutik, piluattumik ingigagiaKagutik suliaKagiattulutik.” Apigigumavunga aullasimaniaguviit suliaKapvinit, Katsini sitontini ubvalu pulâgiasimallutit kiggatuttanik ubvalu suliaKagalaguviit nunalet akungani, apigigumavunga kiusagaisommut iligunni Kagitaujanni suliaKapvet aneniattutit nalunaisigiaKavutit naneniammangâppit suniammangâpilu. SuliaKapvimik Kimaimaniaguviit, KaujitsigiaKavet aullasimalânnine? Sukkailigiagasuavungam nunagijanni, Katini sitontini, kiggatuttatit Kaujimagialet? Kanuk Kaujittitaujattot? Kaujimagavit, uKautillugit suliaKattitit aneniattutit. Kaujimattitaujagiet anituaguviit suliaKapvimit, ubvalu Kimainiaguviit suliaKapvinik, ubvalu suliaKapvimik Kimainiammangâppit tapvainâk? kingullianik apigiusitsaKaniakKunga siagugiak, pigunnaguma?

MR. HAYSOM: IsumaKavunga, Gary, tâna apigiusik tâtaumetsijik, amma nâningani, apitsosiujuuk ilisimannik. Nani tukisiumigajakKingâ 2.4(e) piluattumik ingigaguma suliaKagiattulunga, amma pulâgiasimalluni kiggatuttanik ingiganilluasiangulungituk. Piluattuk, ubvalu apomautaujattuk mâni kina suliaKagiattusimappat Ottawâ-mut amma Kaujimannak nanemmangâta wogimi amma napvâtaugunnagatik wogimi. Tamanna ilanga apomautausok kamagigasujait. Ottawâmut ainiaguviit Kaujimagialet Kanuk uKâlapviugunnamangâppit. Kaujimavutit. 30-tet jâret nâsimalikKut misijimillonet Kimaigunnalaungilatit, Kagitaujakkut ubvalu fonnikut. PigunnalaukKutit kisiani uKautillugu kiukatattik namoniammangâppit Kanuk napvâtaugunnamangâppit Kimaillutillu fonnet nomaranginnik. Ubvalu atinginik tujummiuuet. Atusogilittatinnik ullumi, misijjinik KimaigajakKutit uKajumik anigalâniattutit suliaKapvimit ullumilu suliaKapvimeniangitutit. PijaugiaKavâ anigalâniaguviit suliaKapvimit Katsini sitontini suliaKagiattulutit? ImaKângukKongittuk. Sunait tuavittut sakKesot Katsituinnani sitontini? Ilonnatik kiggatuttatit KaujimagiaKangituk Kangatuinnak anigalâtualiguviit. Ununningit isumaKaniattut suliaKapvimejutit. Aullaniaguviit akunimut inggalutit. Misijitjimik KimaiKattalutit ubvalu Kaujitsiutimmik . Anituaguviit suliaKpavimit misijimik KimaigiaKavutit. Apigiusiujuuk uKagiamik tâttumenniganik KaKuttamillu? Auka. Tâvatuak asiutuinnaguviit ubvalu kinamullonet nanemmangâppit Kaujimajaunnak, piluattumik tuavittut sakKipata. Maligialinnik siKumitsigajakKutit. ApigiusitsaKagiallavet?

MR. MITCHELL: Okay. Inggavugut suliaKagiatugiamik. PigiaKavita Kaujimatitsigiamik kinakkutuinnaneq? Kaujimavunga unuttut angnigijaumajut KaujitsiKattangittut, ilangit angnigijaumajut pigaluattilugu, kinakkomangâta Kaujimanagit. Taimaimmat sukkajuk kiugusik, ubvalu Kaujimatitsinik aninianninik katimajitsuanot? Ilangit atuKattajut tuavittunik amma kiujaugeniallutik nunamit aullasimajuKappat. Naluliumavunga piujogaluammangât tamanna. Tukisinagumatuinnavunga tukisittituniattugut ilanginnik, piungitumegumangilanga. Nakummek.

MR. HAYSOM: Suli uKalikKutit kiugasuagiamik. Piujuk ottotigigianga, amma sunamik tammautiKasimaguvit? Piunippât sivunganegajattut Kaujimattisisagainnik, piluattumik akuni aullasimaniaguvit. Piunippaumijuk kiullutit Kaujimatillugit inuit Kanuk ilinik uKâlagunnagiamik, amma nani napvâtaugunnamangâppit. Sunamik tammautiKannik, suliaKapvimenginik ullâkut, Kitigaligeppat suliaKannik Kaujitsingikkaluaguvit, isumaKavunga, sunait apomautaujut sakKipata. Asiagut pigunnaKutit aullalutit Ottawa amma kinalonet Kaujimatinnagu nanemmangâppit, sumalu tamânemmmangâppit, Kanullu pimmmangâppit, siKumitsisiagajakKutit maligatsamik. UKautigunnangillagit Kanuk pigiaKammangâppit Kanullu pigiaKammangâppit, KaujimagiaKavutit ingiganinganik. Ingiganimmi iluingajumik malikKutit piunippaujunik amma ikâgunnalutit. Amma tammakatainnaguvit piunippâkut, ikâgunnaniangilatit, ikâpviugialimmik.

UKÂLATTI: Nakummek. Sarah Leo, apigiusitsaKavet?

ANGAJUKKÂK LEO: Ahali, uKausituinaumiju. Utilluni Richard uKausigikKaujangit pillugu nalulluni inuit isumaKammangâta ilinnik angnigijaugutigisimajannik. IsumaKavunga, Veryan, piujummagiuvutit, tukisitsisiagavit, ilangani nalunattoKattavuk tukisitsiagasuagiak amma adjiulugani Kanuk pijukagalualimmangât. Ilonnâgut ajunnaKongittuk. Mikijumik nunaKavugut. Inuit uvanik Kaujimajut Sarau-niganik. Kaujimajut AngajukKângujunga Nunatsiavummi. kenaujaliugasuanniaguma UKallunga tamânevunga. Sarau-vunga kenaujaliugutiKagasuajuk Huskies.

Nâjivuk unnikkausik. Sunaupângituk. Aullatitsigajaguma Kagitaujakkut Nunatsiavut Gavamanganit atitâtausimajumik Sarah Leo, AngajukKak Nunatsiavummi, Kagitaujakkajung Kinillunga kenaujannik nammasiangimagitsiatuk. Amma issumajunga angijongituk, takkunângitaga angijotilugu inuit, ailiguma, aigajaguma kenaujatsiugiallunga tamanellunga AngajukKângullunga Nunatsiavummi imângangutillugu tamanellunga Sarah-lunga kattimaviup aullaitanginni ubvalu sunagiallakiak. Isumajunga Kanuk imminik sakkijatitsigasuannik suliguma. Sunaugajappat piKattatanik ullu tamât piKattatanik jari tamât ilangatuinauvutit nunaliujunni kenaujatsasiuKataujuk, inuit takkuniakKut ilinik taimâk. Aullatitaugajappat suliaKapvimit ubvalu angijumik takkujatsamik uKajumik AngajukKângujunga amma Kinijajunga kenaujammik, tânna asialluasianguvuk, amma issumajunga taimak kamagijaugialik. ImaKâ sunautojângimagitillugu uKajaga, taimaigaluattillugu taimâk takkunnâjaga.

MR. HAYSOM:

Āhaila, issumajunga nalautsisiamagitutit, uvanga tâkkuninga ajunatutitsilatlaKattatunga, KaKialivunga. Atautsimik ilagiatsigunatunga, atautsik uKausigikKaujait. Aulatitsiguvit Kagitaujakkut Nunatsiavut Gavamangata nalunaikkutalimmik, nalunangimagikKuk atujutit gavamaup piKutinginnik amma igvit uKatsialikKutit sulliatsagijagani kiggatullunga gavamammik atullunga gavamaup pigutinginnik. Amma tanna aivuk ikungagiamagialuk Kanuk inunnut takkunâtaumangâpit nunaliujummi. Tanna uKautjivuk nakit Kailimangâpit. UtigumakKauvunga KimakKaujatinut nukKagalagatta apitsosiukKaujunut Greg-imit,taimaimat assingit apitsositsaKapata, utigumaniakKunga Greg apitsosigikKaujanganut nâniganni.

MR. UKĀLATTI:

Atsuilangugaluak, pigunaguta, pitaKavugut atautsimik apitsosimmik Mr. Herb Jacques-imit amma utigunaniakKugut tapsumunga apitsosimmut. Amma, atsuilangugaluak, maggok, KaKialivunga. Amma utigunaniakKugut, âhaila.

Mr. JACQUE:

Nakummek. Utipvigituinalugu mitsânut aitosiannik. Ilonnata Kaujimavugut inoKativut iluingaluta. Uvak ilanâga Kaippat illuganut amma Kaitsilunni nillimik, mitimmik, ubvalu sunamik, tanna aitosiangulikKa, ubvalu uvak, utitisillunga, pisiutillugu utsualummik, tanna tukiKalikKâ tautsigutinimik? Nakummek.

MR. HAYSOM:

Taima. Immaimat, Kaujimavunga *Maligatsaujuk* uKalungituk aittotiKanimik, amma taimâk pitjutinnik uKâlautiKangilak. Isumajunga aitotiKanik innunut imminik pillutit amma imminik inosigijanut amma immigulingalutit Kanuingituk. Ātsigumaguvit aitosiammik kinamukkiak, Kanuingituk. Amma issumajunga uKâlautigikKaujatinut sivungagut, uKatsiaKaujunga kiggatujait Kaipat ilinnut ikajuttaugumalunni suligijanut amma aigumajutit kenaujammik igvit ippiasunnit amma aitumilugu, sunamulonet nukKangatitaungituk ubvalu apviataungituk. Imakâ tukkiKatsiangituk. Igvit imaKâ nukKatigunangitanut situgiasivutit, amma ilinut kenaujaigutsilagituk, taimaigaluatilugu nalunangituapat igvit kenaujagijatit amma assianut aingitutit Kinilugu, Kanuingituk. Igvit aituigunatatit aitosiannik innunut. Iluannetop apitsosimmi kinakiak âtsipat ilinut nillimik, issumajunga, ajunangimagituk, sunamik piungituKangilak tamâni. Aiguvit Imminik Ikajujutit maliganginut maligak 3.11, uppijunga, amma takusallugu, taimâk uKâlalungilak, aitosiannik tigusigiamut imminut inosigijannut. UKâlautiKavuk aitosiannik tigusinnik ilaujunik suliaKapvinut ilingajunut. Amma tigusikattaguvit nillinik piusiKatillugu piusinnik kinamukkiak ubvalu Kanuk suliaKaKatamangapit suliaKapvini, apitsunatsivuk. Ilanâgiguni Kaitsijuk nillimik Herb-iup ilanâgimauk, Kanuingituk. Piungitolungituk. Taimmaimat apitsosiugunaKuk, Kaujimavutit, sinanagalauvâ Kinnitaumat amma KaKutaulunni? Sinanagalauvâ aupaluttaumat amma iviujaulunni? Asiagut uKausikkut, takkusagiaKavutit sunauluasiangumangat sutuKalimmat. Amma ilanâpit nillimik aitupâtit, Kanuilungituk. Utsualutsiujiguvit tapsumunga igvit ippiasunit, Kanuingituk, piungitolungituk. Amma, Kaujimavutit, ipigilungitunga takkua nukKangatitsilungituk aitotiKatigegiamik ubvalu Kujanagigiamik Inuit

piusituKanginik aitotiKatigegiamik. Tâna aigutiKagasuatuk piungilutanik takkutsausonik siKumitsinik gavamami amma sangutitsinik anigijausimajunik kajusittisiKatatunik amma maligaliutinik, amma tapvunga takkunâluavugut. Takkunângituk igvit inosinik Kuvianaitotilugu. Kuvianaitojuk nammatumik anigijausimagatsi.

MR. UKÂLATTI:

PigiasituinNagit apitsosigi Allanut.

MR. JACQUE:

Taima. Tâkkua timiujuit pinguatuliginimmut amma pinguatuligijet katimajingit ilingaKataupat councilikkunut, imminik ikajujung anigijausimajuk itsivaKataulunni Pinguatuligijet katimatinginut? Nakummek.

MR. HAYSOM:

Auka

MR. UKÂLATTI:

Nakummek. Diane Gear, apitsositsaKakKotutit. Sarah Leo, ilitatsivunga apitsositsaKajutit.

ANGAJUKKÂK LEO:

Nakummek. Amma apitsositsaKatsiamagitunga, uKausimituinaungituk, amma Kanutojunga kiuniatama ilonata tukkisiniagata. Amma apitsosik uvak apigijausimajunga sulijagani. PitaKavugut anigijausimajunik aullakatatsainatunik. AullaKatatut suliamminut. AullaKatavut silakKijagiattulutik, amma ilangani tamâgik akullilugik. Amma apigisimavut aullagiaKagamik amma nanelamangammik, sulliaKagajammagâmik sulliaKapvimi asiani tamânigamik amma nalliaguvuk aullasimasongugiamut ubvalu tamâniligegamik, taimak pisongugiamut. Amma tâna ajunnatumagialuk kiugianga uvanut, issumagijagali, uKataililunnanga, ilangiujut suliatat pivitsaKajutsaungilat suliaKalutik asianni suliaKapvimi. kingulligijanga, namukkiak aullasimaguvit -, imminut ilingajumik, nukKangagaluaguvit ubvalu silakKijâjutit amma igvit-, ubvalu kigutiligijimosimajutit amma aullagunaniagunailutit, ubvalu Kaujimajutit nukKangautitit amigalitut, tâna tukiKangilak asianut sulliaKapvimut aillutit suliaKagiasiniillilutit. Amma issumajunga Kanukkiak tâna tukkisinatotigunatait.

MR. HAYSOM:

Sarah, tâna aungagiagunataga, kiulugu tâna? Ilangat atausik aivigigumanaitaga, pitaKavunga maggugialânik, sollu,

inigiujok ottotiugunnatok uKâlautigigumajâkka, amma uvak aullasimanik amma aullasimaniup mitsânut ilangauvuk. Ilangiuvut aullasimaniup mitsânut nalautsingilat. Ilangiuvut aullasimaniup mitsânut nalautsijut, amma ilangit maligatsaligiijup uKagialinga. Amma issumajunga tannagalaujuk ajunnotinagu kiugusik tapsumunga, amma tigusiaKavutit adjigengitunik Kanuilingamagata amma ottugalugit. Taima.

MR. UKÂLATTI:

Nakummek. ApitsutuKagiallatuKagumava? Diane Gear.

MS. GEAR:

Una ilagiatsijuk Herb apigiusigikKaujanganut anigijausimajuit itsivaKatauningit Pinguatuligijet katimajinginni. SunaugajakKa councillet akkilegajapatâ Pinguatuligijet katimajingita katimajingit akkilitaupatâ? SiKumitsilikKa?

MR. HAYSOM:

ImaKâ piungitogajatuk. ImaKâ Kanuingituk. Issumajunga illunanginut adjigengitunut nalunaigiaKavutit sunauluasiangumagatâ. Amma taimaimmat sivullipâk apitsoSIGAJATAGA tanna anigijausimajuk magguatullunni akilitauvâ? Asiagut uKausikkut, anigijausimajuk pitâvâ akiliusiamik, Kanuitumik akiliusiamik, sunaugaluapat ullukujumik ubvalu assiagut? Taimaigaluatilugu, anigijausimalunni, itsivaKataujuk katimajinni. Taimaippat, pitâjutsauniangimagikut kenaujammik. ImaKâ, assiagut, katimajiuKatauvut akilitaungimagilutik tannaugajakKuk siKumitsingituk asimitut akilitautuagunni katimajiuKatiminut. Igvit maliven?

MS. GEAR:

ImaKângugaluak...

MR. HAYSOM:

Aukâ? Kanuingituk. ImaKângugaluak, Diane, imângak âkKilaulagu. Atautsik ilangat piKatatasi kiggatutiulusi katimajiuKataulusi itsivaKatauKatavusi katimajinni Kangaulimmat. Manna ilangit katimajiujuuit ilonangit kiggatutitut anigijausimajunut katimavitsuami. Amma ilangit katimajiujuuit pitaKagunaKut kiggatutiujunut amma assinginnut. Takkua assingit inuit katimajiuKataujuit akilittaupata, tannaujuk pitâlunginamik akiliusiamik ubvalu sunamik Anigijausimajutitut kiggatutitut. Anigijausimajunut,

pitâvusi sunagalanik ubvalu akiliusiannik
Anigijausimaninut, amma imaKâ asinginnik pitâgunatutit
akiliusiannik anigijausimaninut katimajiuKatauninut.
Kaujimalungitakka maligatit. Taimaipat akilitauKataguvit,
akilitauKataguvit katimajiuKataulutit anigijausimalutit,
ilangaupat akiliusiagiKatatanut, ubvalu adjuungitumik
kenaujatâguvit katimajiugiamut anigijausimalutit, taimaivuk
tammajuk anginitsamik akilitaunnimik assia kinakiak
katimajiuKatinni kenaujatâKatamat. Taimaimmat
uKatuinavunga apitsosinnut kissiani Kaujimallunga
sunaumangat kiugunaniatagit angilunga ubvalu aukâlunga.
Taimaimmat ilinnut apitsositsaKavunga. Kanuingituk.
ImaKângugaluak, sivullipâk apitsosiga anigijausimajuit Inuit
Nunagijangani katimajet akilitauKatavât, akiliusiannik,
ilitatsiutimik akiliusiannik, Kanuitumikkiak kenaujammik
itsivaKataulutik anigijausimajunni? Ahaila ubvalu Aukak?

MS. GEAR:

Ahaila, pitâKatavut, amma Pinguatuligijet katimajingita
katimajingit. Taimaitlunga apigikKauvunga siKumitsimangât
anigijausimajuk maggunik kenaujatâgajamat ubvalu
ilitagiutimmik kenaujammik, Kanutuinak taigumagunni.

MR. HAYSOM:

Kanuingituk. ImaKâ, utigasuavunga sivullimik
KiumajotigikKaujannut. Piujongituk magguinit akilitaupata.
Kanuingituk taimak pinngipata. Amma magguilingajunik
akilitaupata magguitulunni asiangutisimajumik
tatumungatsainak. Kanuingitok. Tanna nalautsingituk.

MR. UKÂLATTI:

Mannaujuk apitsositsaKava assinginnik? Auka? Mr. Haysom.

MR. HAYSOM:

Kanuingituk, nakummek, Mr. UKâlatti. Utipvigigialugu
maligialugu uKâlautigilautanganik ubvalu
apitsosigilautanginnik sakkittitautut Mr. Flowers-imut
nukKagalakKatinata. UtigiaKalikKunga issumakkut manna
amma takkunâlunga akKigajammangakit. PitaKavuk
Katsinikkiak utotaugunnatunnik taimailingajunik, ubvalu
sunaujunik sakKisonik tapvangatsainak. Taimaimmat
apitsosik, tukkisiagusigilautaga, pijumik Greg-imit
unaulaukKuk kenaujammik sakKititsigasuaguma ilingajumik
iliniavimmut amma apigijunga suliaKatinik aitosiatsanik,

nalautsivâ ubvalu tammavâ, amma issumajunga tanna kiusimajaga. Asianguvuk apitsosik imailingajumik ministeriulutit tikitaugajaguvit Kinugautimmik kenaujammik, otunngualugu, iliniavimmit iliniavimmut ilingajumik, ubvalu iliniaviup pinguatinginnik, Kanuingilak aitlugit kenaujammik? Takkua kenaujammik Kinugajut. Ministeriujuk kenaujammik Kinugalungilak, taimaigaluatilu kinakiak kenaujammik Kinugajuk amma Kaivut gavammammut kenaujatsasiugiutlutik. Taimaimmat kingupitingâlugu uKumaillutaujuk. Ministeriulungituk ubvalu kiggatutik kenaujammik Kinugajok, nunaliujut kenaujammik Kinugajut amma ilinut Kaivut. SunaulikKâ nalautsijuk pusiugialik tamâniligunni? Utivuk kiggatujannut tikijunut igvit ukkuanut amma uKalutik ikajutaugumanimminik iluvitsiutitsamik, mânali adjiungitovuk. Takkua Kinugavut kenaujannik kiggatullutik iliniavimmik. Tâna piungilutaKavâ? ImaKâ, piungilutaKatuinagialik. Piungitolautuni ulluni sivungani ilikKâgata iligialitinik katimajitsuavimmi, kiggatutet atuKatalaukKut kenaujannik, amma aitotiKatlutik kenaujannik inunnut Kinugajunut , amma kiugusinga tapsumunga aukak, taimak pigunangilatit. Summaungitok? ImaKâ, pigunangitait kiggatujappit iluani kenaujait aitosiagijaitit suliaKasongugiamut kiggatujappit iluani . Ilinnut kenaujammik aitotiKatuinangimagilutit ilaliugutilinut ubvalu kiggatujannut, amma tâkkua adjingengilâk. Apitsosik kingullia unaulikKuk. Inuit Kinugappata kenaujammik amma ilinnut Kaippata amma Kinullutik kenaujammik, igvit , nalâguttomik, ikajugunaKen? Amma kiugusinga angigajatutit ubvalu aukagajatutit. Atautsimi sunamikiak kiugusinga aukaugajatuk. Amma asiagut sunamikiak angitaugajatuk. Takusalaulavut anginnik kissiani tukisigunni anginnik aigunaKutit aukânganut. Gavamak pitaKapat atugatsamik, otungualuta kiumajutitsamik, TimiKutaujuk Ilinniatuliginimmut amma kenaujaliugutinut Pivalliataugutinginullu atutausomik kenaujaKatisisongulluni pinguatuliginimut, piluattumik iliniavinnut, ilisautiutillugu, amma Katsitukkiak kenaujaKavuk tamani, amma pitaKavuk sunanik nalautaugialinnik pitagunagiamut kenaujammik tapvangat. Taimaippat

kiggatutik aititsigunalikKuk Kinijajumik kenaujammik
kamallagitunut suliaKattinut gavamaup iluani
Kaujisautilimmik Kanuk Kinugiamik, kinamillu takugiamik.
Amma pivitsaKalikKut ilaliugutilet ubvalu inuit
sakKititsigasujuit kenaujanik aillutik nallianut timiKutimut
nallianut suliaKattimut amma tatatuilutik tatatugatsamik
amma otuKataulutik asinginnut uttugajunut takkununga
kenaujannut atuinaujunut tapsuma mitsânut ubvalu
ikajotausomut. Taimaimmat kiggatutiulutit taimak
pigunnaKutit. Taimak takkua ikajugunnatit. Takkua
suliattsat takkununga inunnut kiggatujannut. Kanuingituk.
Tammalungilak. Tanna angivuk. Sunamikkiak piutigunaKatit.
Aukkâninga sakKivuk pivitsaKangipat sunamik pivitsaujumik.
PitaKangilak pivitsamik pigumajannik. SunialikKen?
Ajunnamat, aukkâgiaKavutit. Igvit kenaujagijannik
atugunagilatit kiggatujatit kiggatotigigialinnut. Igvit
aigunagilatit ministeriujunut Kinijallutit pitaKamangâta
kenaujanik Kanutuinak atusoginnik ubvalu
kenaujaKamangâta ijitsimajammink ubvalu Kanutuinak
atusominik kenaujamik ilinut Kaigajataminik. Taimak
pivitsaKangilak. Taimailiugutimik kenaujaKangilak. Aukak.
Aiguvit Kaninginitsamut ailikKutit siaKijânatumut ilinik
kappianatumotsisumik. ImmaKâgulungitogaluak. Igvit
aitutuinalugit kenaujammik igvit ippiasunit amma
pijagetuinalugu. Igvit nâjiniakKutit iliatsolilutit taimak
pigasuaguvit, tanna imminik pijait. Taimaigaluatilugu
kamatsialutit tapvani pitaKangipat pivitsaujumik. Amma
taima pitaKavuk pingajuaganik tamani. Amma pingajuanga
kinakiak Kinugajuk kenaujammik kinakiak kenaujaliugasuatuk
Kaijuk ilinut, amma kavamak pivitsaKangilak, tanna inuk
Kinijajuk kenaujammik ningaugijait. Amma ningaugijait
sakKivuk ukkuanut kenaujatsiujuk kinamon, iliniavimmut
pinguatinginut pivitsaujumik. Amma manna igvit
uKumautiKalikKutit-, piluatumik ministeriuguvit kamallutit
kenaujammik, pitaKalikKutit uKumautiujumik
takkusaujatumik imminik ikajujutit. Summan? Igvit pilikKet
sunamikkiak ikajugusulutit ningaunik? TanaugunaiKuk
apitsosik kavamak pitaKamangat kenaujammik?

kenaujaKava? Igvit tatatugialinnik ilingajunik Kinugautinnik
tatatusimaven? Ahaila, ahaila, ahaila, ahaila, ahaila.
Takkuninga ilunanginnik pisimajutit, mannaujuk tikivutit
imminik ikajunimik piusimik unnaujuk takkusâutojaniatuk
sollu ikajujunganga ningauganik? Igvit piunitsameniakKutit
uKautilugu ningaut kamakKulugu tatatutaugialik
pijausimangapat assianut iliniavimetumut, kinakiak
pinguatuligijikkunni; kinakiak ingikKatitsijuk pitvitsamik,
assiagugiallak, igvit pigunangilatit kajusitisigiamik. Tanna
kajusititaujuk pijaugialik kinamukkiak amma igvit
ilauKatautinnak. Taimaimmat takkua pingasut
uKâlautigigumakKaujakkakka sakKititaukKaujunit, ubvalu
sakKiKaujunit, uKâlautigikKaujatinik nukKagalâkKagata. Amma
issumajunganga taimatuinak uKagunatunganga utotigikKaujatinut,
ubvalu tapsomunganga utotimut. Uvanga assianik utotimmik
sakKititsigialaniatunganga.

MR. UKÂLATTI:

Mr. Haysom, pigiasigialatuinalaugit.

MR. HAYSOM:

Nakummek, Mr. UKâlattede. Kanuingituk. Utotigiallak. Amma
sulli uvanga Kaujitsisigumajunganga pijugut utotinik,
ilingalungitunik imminut atullugit. Assiagut uKausikkut,
uKalungitogaluat, ilitsi sunamikkiak pisimajusi ubvalu
kappianamelittusi. Uvagut pijugut imailingamat
tigusigasualluta sullilagitunik sillatsuami amma sakKijangitut
tigumiajavut pigiasiniammata tukkitâgiasililunni amma
uKâlautiKallunni ikajusummik tukkisinatsialitilugu
sunauluasiagumangâta. Taimâluk. Taimaimmat unauvuk,
tukkisiagusikkut amma imak tukkisiagusiKavunganga. Tâkkua
nalautsisialutik sulijut ubvalu nalautsisialutik Kaujimajaujut.
Ammauligivuk ilingajuk iluvitsinimmut, amma uvagut
maggonik adjiungitunik pijuKatillugu amma pigiagumajakka
nallikatâlugik. Taimaimmat iluvitsituKaniatuk,
utotigingualugu, Nain-mi. Amma ilaKajut ilagengujuni,

utotigingualugu, Rigolet-timejunik, amma
iluvitsiKataugiatugumajunik. Amma KailikKut
ikajuttaugummalutik kiggatutiujusi angnigijausimajusi. Amma
pilikKutit fonnikut amma uKâlalutit Air Lab amma uKallutit Air
Lab-ikunut, uvaujunga, kiggatutituinak, ubvalu uvaujunga,
Ministeriujunga, ubvalu uvaujunga, AngajukKâk nanikiak,
ubvalu uvaujunga, katimatitsijiujunga amma Kaujigumajunga
âtsigajammangâpit ingiggatitsanik ukkununga inunnut
pigunangitut, akilegunangitut imminik amma aigumajut
ilaminut iluvitsiKataugiattulutik Nain-imi. PiungilutaKava
tâna ubvalu sunamikiak pitaKava tâna? ImaKâ
piungilutaKavuk. Sivullipâk piungilutak unauvuk. AtulikKen
suliagijannik amma suliaKapvinik atulikKen ikajotitsamik
ubvalu sunatsiamikkiak kinamukkiak ilingajumik
pigajangitannik ubvalu atuinaungitumik ilonainut inunnut?
Amma imminik apigiguvit tapsominga amma tikkilutit
tapsomunga apitsosimmut aukak, tanna pigunagajataga
kiggatulunga ilonainik Inunnik, igvit tukkisigiaKavutit tanna
ilonainut, angnigijausimajuit pijaugajangituk kiggatullutik
ilonainik Inunnik. Taimaigaluatilugu uKalauta nammasijutit
igvit issumakkut tanna pigunataga. Tâna kingullia apitsosik
pimmagikKuk Kanuk pinialimanganni. Amma
unnunimagingagut takkua kamagillugit Kanuk pimmangâpit
atunginitsauvuk unauluatuk Kanuk pimmanganni. Amma igvit
fonnimik tigusijutit amma uKallutit, uvauvunga,
kiggatutiujunga katimavitsuami, AngajukKângujunga,
Ministeriujunga, Kinugajuk, taimaipat piusigijait
suliatsagitilikKat tâna sullilagitumik katimavitsuap,
sullilagitumik suliatsamik. Amma nalunaitiatutit Nunatsiavut

kavamanga ilauKatauvuk, amma igvit, suliaKapvet iluani
kiggatutiulutit, ilauKataujunga. Amma kiuppatta, asso,
Kanuingituk, piujuk, pitaKavugut ingiggautitsanik takkununga
inunnut amma ingiggautitatauvut, KaujimaniakKusi tanna
korparaisak, tanna kampaniujuk, ilitsinik takkunianialikKuk
mannaujuk sunamikkiak utitisigiaKalitutit. Amma tâna
adjigigalatanga igvit wohegagiatu simaguvit inutollutit
kiakiap aullasimavingani iKaluniagiatulutit. Adjigingitanga
imminik pisimangitutit. Igvit pisimajait assinut,
taimaigaluatilugu Nunatsiavut kavamanga ilauttilitait
pisimakKauganni suliat sagijanni, amma pitaKalikKuk
aitugunga aitusuginiakKagit. ImaKâ utipviugunatuk
kampaniujuk Kinijaniamat kenaujaliugutitsamik amma ilinit
sunamikkiak Kinijajuk. Tannaugasuappat, nigiuigit
fonnaugiamik amma imminiluasiak ajunatuminalilutit.
Mâna imaKâ nallilonet takkua maggok tammangitok.
Piunitsamagik tigullugu fonnik amma uKallutit tingijop
kampaniganut, immailingavuk. PitaKavisi Kitsajunut
ingiggautitsamik maligatsamik ukkua inuit
atugunagajatanganik? Tanna Kimaipviutisijuk kampanimik
ukunengauluatonik idluatongitunik pitaKanginigâlutik taimak
maligatsamik, tapsomani nalautsâgajalikKutit imminut amma
angajukKâminut Kaujimautigialimminik allatigut, una
maligatsatâgigialivut, ubvalu akKisikalavut amma angimilutik,
Kanuingituk. PitaKangilagut maligatsamik, taimaigaluatilugu
pigasuajavut. Tapvanili piusimi, asiagulluasiak ottugasimajagi.
Ilitsi aivigisimajasi Kinijatlusi Kaujigatsamik Kanuitunik
maligatsaKamangata amma KaujitigatsaKamagâta Kanuk
piKatamangâta. Isumajunga tanna imakâ piusiujuk

pivitsaKagialik, ilitsinut ilingajuk, aungagiagialak aigialik,
pitaKagatsi adjiungitumik ilagenimik Air Labrador-rikkunut.
Amma igvit fonniguvit Air Labrador-rikkunut, tukkisiajut
amma igvit tukkisiavutit pitaKaninganik adjiungitumik
ilageniKajugut. AtulikKen inigijanni Kanuiliugiamik
kajusitiniatanginni? Kaujimangilanga. UnuttoKatavut sunait
kinamut uKâlaKatiKammangapit illuani. Apitsotillagijuk
atuinaugajakKen taimatsainak assinginut tingijotinut
apigigiamut amma ilonanginnut tingijotinut? Ubvalu taimak
pilikKen Lab Air-riumat amma Kaujimalutit
ilaliugutiKaniKagavit? Taimaimmat apitsotitsiamaget. Amma,
ammagiallak, takulikKutit takunânatsiangituk,
taimaigaluatilugu una kamagitsiagialet Kanuk suliaKapvit
amma inigijait ilauKataujumut kavamammut,
Kaningitojagaluattilugu, nalunangituk ilaliugutiKâtsiatuk
ilinut, amma atugaluagunni ikajotitsamik atausimut inummut
ubvalu atautsenut ilagenut Kanuilingajumut
sakKijâlungitumut assinginut ilonainut. ImaKângugaluak
Kanuingituk akigatuluni *SuliaKapvimi Maligatsanginni* ulluk
nappat, taimaigaluatilugu takulikKutit Kanuk ajunangimangat
pigiasininga âKuninga anugimut. Ilangagiallanga ilauKataujuk
igvit , kiggatutiulutit , ilauKataugummijutit iluvitsijunut.
Amma igvit apigilikKutit Air Labrador-rikunik, pitâgunaKinga
ingiggautitsamik ilauKataugiamut iluvitsijunut? Amma
nalunangituk tammajuk. (A)igvit atuvutit suliaigijannik amma
(b)tânnatuinaangituk aittosiammik aittutauvutit,
KinugautiKavutit. Amma nalunangituk siKumitsijuk
maligatsanik. Taimaimmat kingulligikKaujanga otutigilugu
atugumakKaujaga, amma mâna ammalikKaga

uKâlautauniatilugu Kanuk uvak otugasuakKaugama
otutinguanik takkutitsigasuakKaujunga magguigunjonik
adjigengitonik pivitsaKakKauvuk. Atautsik nalunangituk
siKumitsijuk maligatsanik, aipanga nalunangilak
siKumitsingituk, nani igvit ikajulutit kiggatujannik, igvit
iniKalikKutit nalunatumogiamut amma ajunanginitsaulitilugu
siKumitsigiamut. Taimaimmat apitsoset/uKâlautiKannik.

MR. UKÂLATTI:

Ilitatsivunga Roy Blake

MR. BLAKE:

Unauppalli, uKalunni, sujukkiak, ilaliugutilik ajulisimappat
Nain-imi amma ilagijangit nunaKajut Upper Lake Melville-imi,
AES ikajutaujut, amma aigumajogaluat Nain-imut. UKallanga
uvkana fonnijunga Air Labrador-rikkunut kiggatullunga
ilanginnut amma Air Labrador uKavut, angilutik,
Kanuitsalungilagut tapsomunga taimak uvagut
taimailiuKatavugut unnutuituluta sivungagut amma
Kuviasuvugut ikajugiamut. Tâna siKumitsigajalikKa?

MR. HAYSOM:

Auka, issumajunga siKumitsingitutit tamani. Air Labrador-ikut
maligatsaKapata taimailiugiamut, amma nalunangitumik
maligatsaKapata amma tapsominga piKatasimapata
sivungagut amma pigialalâmmijut sivunitsami kinakutuinanut
amma ilunaginnut, issumajunga tâna Kanuingituk.
Aitutaumagatsi ilitsi adjiugitumik ilagegutimmik Air Labrador-
rikunut, Kaujimagumagajakkunga sunaunmangât
maligatsangamma, sulitsiamangat, uvanga pikKujigajakKunga
takkunaniujunni, ilonasi kiggatutiujusi katimajitsuami
Kaujimajutsauvusi sunaumangât maligatsanga Kangakiak
ullungani ilitsi Kinuviugajagutsi, Kaujimaniagama ilitsi
ingigatitsiKatangitusi kiggatujatsinik suliaKapvinganik
adjingatut provincial kavamangatut amma federal
kavamangatut pitalet kiggatujaminik suliaKapvinik
suliaKatilinnik amma, Kaujimavusi, Kanuitutuinanik
ikajutiKatlutik. Ilitsi sunamik suliaKaligutsi, amma ilangat
tâna suliak, kiggatullusi kiggatujatsinik tigusiKattalâkKusi
Kaujigatsaujunik nakituinamagik. Taimaimmat tannaluatsiak

ilitsi tigusilikKusi Kaujigatsaujumik maligatsamik Air Labrador-
imit. Ilitsi piuluamik ikajugajakKusi imminik amma
kiggatujatsinik tigusigajagutsi allasimajumik maligatsamik
suliaKapvinetilugu ubvalu tukKugiasimalugu. Kaujimagutsiguk
sunaumangât maligatsak, Kaujimagutsiguk Kanuk
atutausongumangât, amma uKautjigunaKusi inunnik
ainialilusi tingijop kampaninganut Kinijallusi (a), (b), amma (c)
nigiulugasi (d) Kaujimaligatsi maligatsanganik, ilitsi
aijutsauKoKusi pitaKalusi maligatsaujunik asinginit tingijot
kampaniujunit, takkunangat provincial tingijotinginit, amma
ilangit inuit nunaKamata sollo Montreal-imi ilingajunut
takkua Air Canada. Air Canada-kut pitaKaKatalaukKut
piujumagimik pivitsamik. Ullumi, pinginitsaulikkuk,
taimaigaluatilugu Kaujimajutsagivasi sunaumangat, amma
ikkajuvallisongumat. Amma ilingatuinagilak uKumaitsanimit
mitsânut. Ilitsi Kaujimajutsauvusi sunaumagâta maligatsangit
amma namut aijutsaumangâpit ikajutaugiamut sunatuinanut
sullu Ittusiutinut ikajutsiutinnut. Nalautsâvunga ilunasi
pitâKatatusi El-nik ilitsinut, taimaigaluatilugu, Kaujimavusi,
ukkua sunagalait sollu Ittusiutinut ikajutsiutet amma
angitaumajuk kenaujak ilagiagutik, pitâgiamik tax
kenaujanginnik amma sunagialait adjigalangat. Kaujimallugit
maligatsait amma Kaujimalusi Kanuk aitsigiamut. Taimaitlugu
piluatumik Air Labrador-mik, ubvalu tingijop kampaninga,
pitaKavuk taimaitumik maligatsamik amma taimaitumik
kiugusiKanimik, tâkkua kavamaup maligatsagivauk. Tâkkua
korporasaup maligatsagivauk, amma ilitsi ilisimajusi
Kanuilingamangata amma attutlugu ilingatillugu kiggatujanut.
Tâkkua Kanuigalângimagit. Tâkkua suligajausimatsiatut.

MR. UKÂLATTI:

ApitsositsaKagiallaven?

MR. BLAKE:

SunaugajaKâ piKatapata piujunimigut omatimigut amma
sunamik pitâniagatik?

MR. HAYSOM:

Tâнна, tunganinga, taikkua imminik uKumailutagilikKauk.
Kaujimavusi, piungilutak uvanga uKautsigiagasuasimalikKasi
pikKunasi ilitsi piujotumik omatitsinit, ilitsi imminik
ippiasutsinit ilitsinut akkilimik. Tâнна kampaniujuk,

nalliatuinaugaluappat tingijot kampaninga,
pijutsausongugiaKangilak atsaniluni tigumiatinginnik
tingijonik. Pijutsaungilat imminik ippiasuminit. Pijutsauvut
pitaKagiamut maligatsanik kamatsiatumik akkingit
adjigetitausiatillugit ilonainut aiKatatunut. Takkua imminik
sullianza.

MR. BLAKE: Pigilungita.

MR. HAYSOM: Pigilluasiangitait aukak. Aukak.

MR. UKÂLATTI: Ilitatsivunga Sarah Leo-mik

ANGAJUKKÂK LEO: Amma manna tusatsaunialikKunga ippiniatojananga,
suligaluatuk. Atsuilâ, pigijavununa tâna kenaujaliugutitsak.
Tâna Air Labrador-ri ingiggatitauvuk ilangauluni NGC-kut
ilaulunni LICST-kunut amma Inuit kenjaujaginnik pitâKatavuk.
Kinuniaguvit kinamukkiak KinotiKallutit akiKangitumik
assiujitisigasujumik, apigiligit, PAL. UKakKaugama sullu
ippiniangituk.

MR. UKÂLATTI: ApitsugiallatuKagumavâ? Aukaupat, Mr. Haysom.

MR. HAYSOM: Pingajuanga sulitsiatuk ototigigumajaga imaKâ
sulijojatsiangituk aippangitit. Taimaigaluatilugu ilauvuk
tukkinga aullakatanik anigijausimajunut. Amma
uKausitsaluviniKavuk aullakataniup mitsânut
anigijausimajunut. Isumajunga, sivullimik, nalunangilak
suliatsamut aullagiaKânnik atummagiKuk amma
ilaummagiKuk ilitsinut sulijagijatsinut. Ilanginut anginitsamik
aullasimagiaKaKatatut, amma ilanginut aullasimagiaKaKatatut
ilingatillugu suliamminut ubvalu ilangat tilijausimajamminut
assiminit. Amma ilanginut tamâniKataujunut sâmi
aullakatapâloutsimaniangituk. Aullasimanimut imailivunga
tingijokut asianut aillutit amma asianugiallak amma
sinittavimut aillutit maggonik pingasunilonet unnuanik.
Taimaigaluatilugu tukkitanga amma ilangautillugu,

ilangagogalak aullagiaKanik ilaujuk sulianut. Isumammijunga
ilangiujusi sivullipâmik aullagiujusi, piluatumik takkua
tingijoliniungitut, aullakatanik ubvalu aullanik
takkujauKattavut pitâgutaunnimik anigijausimajunut.
Summat? Imailingamat, aiKatavusi assinganut nunanut,
piujunik nigitsiaKatavusi, sinitaKatavusi sinitavini
akilitaumajunik, kavamamut akilitautillugu. Amma
issumangikuvit aullaKatannik pitâgutauniujuk ubvalu
atutumagiujuk, uKautigunasiakKasi unutojut kiggatutase
takkunasiamagitut taimak. Amma takkuluasiatut
Kaujimangikutik summat aullamangâpit, Kaujimangitut
namolimmangâpit, amma tusalautsimangitut uKausimmik
susimammangâpit aullasimanini. Taimaigaluatilugu igvit
kamatsiatutit amma takkutsausiatutit amma sakKijâtitsiatutit
aullasimaninut, inuit akKutimmi takkunâvut piujumagik
suliaKapvinga, amma angijumik malugijauKatatuk amma
angijumik uKalukiutaumitluni. Ilangat sumaumangat
ukkuanguvut atutsianginik ubvalu atulukanik aullasimalluni
kenaujamik atutsianginik amma aullasimalluni ajunangituk.
Takkugianga ajunatuk unaumat pijauKatamat
takkujaunangitumi inunnut, amma kamagijaugunamat
sunalittuKasimamangât aullasimakKadluni Kanuk kenaujait
atutausimamangata alakasajatigut. Aullasimanik
angijumagiuvuk kavamaup akilitsanginni. Kaujimangilanga
Kanuk angitigimangât. Kaujimangilanga Katsitosimamangât.
Taimaigaluatilugu atuinaujunga nalautsâgiamut inutuinak
akKutimi, Kaujigajapata Katsitut aullasimanik
kenaujauKaktatuk atutaujuk, ilonatik akingit ilonatik
aullasimanet ilingajut Nunatsiavut kavamanganut, tâkkua

tatamimagigajakKut Kanuk angitigimangat tânna kenaujak.
Taimaimmat tânna ajunangituk akigatugianga. Tânn
Kuatsânganatovuk amma tânna sunaujuk inunnt
kamagijauniakKuk amma ippigiutigitsialugu.
Taimaigaluatilugu ajunatoninga kamagigianga amma
sunaujuk pijauKatamat takkusaungituni nunaliujunnt,
tungavillagiKavuk, atutsiamagiluni amma nalautsisialuni
atunninga, tâkkununga tunganatosiatillugit sivullitet ubvalu
anigijausimajut aullakataKatatuit. Amma taimaimmat
tunganatosianik atumagikKuk. Mânn ilanginut ottugautinut
ubvalu immigolingajunnt, amma ilangit
sakKititausimaligekKut Sarah-mut, anigijausimajuk imminut
sugialik aullautiKagialimik, amma atuvuk Nunatsiavut
kavamangata kenaujanginnik aullautiminik, taikkua
nalunangituk tammajuk. Tânn atujuk kavamaup
kenaujanginnik imminut pitsaminik ubvalu imminut
ikajujumik. Nalunangituk tammajuk. ImmaKâ kinalonet
apitsositsaKangilak tapsumunga. Sunakiak
ajunanitsaugiasivuk sujuKappat kiggatutik, anigijausimajuk,
imminut sugialik aullautiKagialimmik amma napvâlikKuk
suliagigajattaminik pigunasilluni idjujumik aullautitsamik
akkinganik ubvalu aullautimik akkinganik. Imaililugu
nalunaitiatumik piunginipâk ammalu ajunanginipâk, amma
uKalungitunga taimak piKattatut, tânn uKangitaga taimak
pittuKaKatatuk, anigijausimajuk aigumajuk Goose Bay-mut
Makkovik-mit pivitsaKagumalunni Inoviasiutitsanik
niuvinniagumalluni amma napvâvuk suliatsagigajattaminik
Goose Bay-mi pivitsaKatitaulunni aullagiamut Goose Bay-mut
kavamamut akilitaujumik, niuvinniaKâlunni angigganialilunni.

Tâna ajunamagigalattuk kamagigianga, amma tâna
anjunamagigalattuk takkugianga atutautillugu. Igvit kissiani
KaujimagajakKutit pigunaguvit issumangata iluanusongulutit
kiggatutiup taimâk piKatatop. Taimaigaluatilugu igvit
iluanosonguguvit, issumangata, ubvalu igvit napvâgunaguvit
taimak pittuKajuk, issumajunga ilonasi angiKatautuiningit
tammajuk, issumajunga angiKataujusi tammajuk
piungitumagimik atulukagami tatigijauniminik, ilagiillugu
atujuk kavamami inigijamminik amma kavamaup
kenaujaginnik imminut pitsaminik amma imminut
pitâgutitsaminik. Amma asianut ototimut ailikKugut. Amma
kingullia otugautik imaKâ sakKiluaKatatuk ununisanni, amma
unauvuk. Tâna anigijausimajuk aullasimavuk
atummagitumik kavamaup sulianganik. Nalunangilak
apitsosiKalunni atummagituk kavamaup sulianga. Amma
nalunaitzialunni, tikkitauttuKasimangilak KaikKujaugutimik
kavamamut atuniallilugu aullasongugiamut. Tâna
atummagituk kavamamut suliatsak. Kanuk adjjungitovâ?
I mailingamat, anigijausimalutit, unutulut
KaikKujauluviniKatalâkKutit. PitaKaniakKuk aitutaujunnik
salaKasimajunik Cabot College-mi, ubvalu College North
Atlantic-imi mâna taimak Kaujimajaulituk, St. John's-imi,
amma KaikKujausimajutit amma takkunâKataulutit inunnik
nâjjunik. Tâna KaikKujaunnik. KaikKujaunnik imaKâ
aigunatuk Katsinukkiak anigijausimajunut. ImaKâ atautsik
anigijausimajuk suliatsagijanga tamânijutsaulunni,
taimaigaluatilugu tatamigajangilanga ununisaupata. Tapvani
ilangaugiaKatlatuinaKuk suliagigialingit. IlangaugunaKuk
suliagijanga Ministeriup Iliniatitsiligininimmut ilaugiamut,

piluattumik kinakiak pitâtitauniattillugu sunamik tunijaullunni
pijagenimi ubvalu, piluatumik, Nunatsiavut kavamanga
ikajutsisimapat ubvalu ikajusimapat ubvalu tunitsisimapat
sakKijâjumut pijagevigijajumut. ImaKâ tâna inuk
ilaugunaKuk. Taimaigaluatillugu kinakiak atugajapat
aullautigillugu, pigiasivuk apitsotausongunialitillugu,
piluatumik, ilangautillugu, tâkkua imminut ikajujuut ubvalu
imminut pitâjut. Taimaigaluatillugu tapsominga
uKâlautiKangilanga. UKâlautigijaga unauluakKuk. Tâna
kavamaup suliatlagivâgu. Minister-riujuk Nunalignimmut
katimagiattugiaKavuk St. John's-imut aulatsiligijallagimut
DFO-kunut. Tâna kavamaup suliatlaginga. Amma tâna
aullasimaninganni anigijausimajuk pivitsaKalikKuk imminut
pisongulunni, pisongulunni imminongajunik. Tâna ilinik
asianotsivuk amma asianut pivitsamut. Amma issumajunga
ilonasi ilitatsivusi tâna pivitsak. PijauluviniKattatuk.
Taimaigaluatillugu, sunamilonet pitugagunangilak, amma
sunamilonet uKatuKagunangilak kissiani imak. TukkiKavuk
summat aullasimanik takkujauKataningit ikajuvalliKattaningit.
Tamani summat pitaKamangat amma imailingavuk tâkkua
aullanet amma aullaniujuk, piluatumik ajutsajunut inunnut
nunalet nunaliujunni, summat takkunâmangata
ikajuvalliutaumangat, summat takkunâmangâta
ikajuvalliutaumangat suliaKapvimi. Taimaimmat
piusiusimajunni issumajunga tikkitaupat *SuliaKapvimi*
Malitaugialet, piusiuksiaKanik sakkivuk sivullipaulunni.
Sullitsiasongugiamik sunalilimmangâpit atummagikKuk.
Sullitisitsisiagiamik sunalilimmangâpit atummagikKuk. Amma
nalautsisiakKuk igvit aullajutit kavammut atullagitunik

suliaKagiatujutit, amma nalautsisiakKuk pijutit atutlutit
imminik ikajujunik sollu niuviniagiasimajuk sugusingata
Inoviasiutitsanginnik. Amma sulitsiatillugu amma
sakKijâtitsialugu, inuit tukkisiniakKut. Ahailâ, ikajuvallisok
suliaKapvik amma ahailâ, atulukalungitutit ubvalu
atutsiangitutit kavamaup kenaujanginnik ubvalu atunak
kavamaup kenaujaginnik imminut ilingajunik.
Taimaigaluatilugu, issumajunga uKâlautaulungusok
tapsomangat. Amma kingullia utotigillugu uvanga
atugumajaga kinakiak aullajuk amma
akKisiutjausimaniailunni anniasiupviliagiamut amma aullajuk
sulliatsalagimut katimagiatujuk, taimaigaluatilugu
aullaumagiaKaniatuk katimanimmit anniasiupvimelunni.
Tâna piusiusok imminik takkusimajaga KatsetutluguKkiak.
Ototiunguatillugu, ototiunguatillugu uvanga
takkuluasiasimajaga, takkusimajaga. Tâna sunamikkiak
tammautiKajuk. Amma suna tammautinga igvit
sanigânotsivutit suliannik, sanigânotsinnik suliagigialinnik
amma pigigialinnik amma sanigânotsinnik summatigvit
aullaKaummangâpit sivullipâmik imminik
ikajugiatusimallutit.Taimaimmat sunialikKet
tamanegajaguvit? Isumajunga naitotillugu Kiugusinga igvit
âkKisuilutit adjjingingitanganik anniasiupviliagiaKanet.
Taimaimmat igvit âkKisuiniangitutit takkugiamut
kigutiligijimmik,ubvalu ijiligijimmik, ubvalu kenaujaligijimmik,
katimaniup akkunganni tapsomaup aullautigisimajannut
suliatsamut. Manna tukkisiajunga sullijummi sillatsuami,
ilangani ajunamagikKuk âkKisuisimagiamut
takkusongugiamut, piluatumik ânniasiutinnik. Amma tanna

tukkisiajaga, atuinaugetilugit, ajunamagiKuk, ajunamagiKuk
pisogigiangit nammasiatumik. Igvit pivitsak âkKitausimajuk
ullunga tigungikunni, igvit takkuniangit tit anniasiutimmik
kissiani pingasut takket nâppata. Tâna sullilagitung sillatsuak
amma tukkisimijaga. Taimailingautjauliguvit igvit
pivitsagigiaKanipat takkugunaguvit ubvalu
tautsegunamangapkit katimavitsannik. Igvit
tautsegunangikuvit âkKitausimajumik anniasiupvimut, igvit
uttuniakKutit katimanitsait tautsigasuallugu. Amma Kinullutit
inunnit Kinuitsânimmik. Igvit Kinullutit inunnit
paigijaugumallutit, amma Kinullutit inunnit pigiakKunagit
katimanimmik tamanetinak assianegiaKagavit
tautsitaugunagitumegiaKallutit, atummagituk
âkKitaugesimajuk. Tâna nalautsâgijuk âkKitaugesimajumik
pitaKaguvit kavamaup suliatsanganut aullaKânak.
ÂkKitaugesimajuk sakKigajapat kavamaup aullavinganut
kingulliuluni, taimaipat âkKitaugesimajuk nongagiaKavuk.
ÂkKitaugesimajuk sivulliulunni kavamaup aullavinganut,
tâna aullautigigialet sivulliuniapuk. Amma
pigijaugunangikuvit, tautsitaugunangipat katimanik ubvalu
akKigiallugu katimanik ilinut nammatigassuallugu, igvit
sivulliagut pivitsaKajutit tâtsumunga ilingaluattumut,
aullatitsigajakKutit asinnik ininnetillugu, ainialillutit
takujaupvigigialinnut namminik atullutit piusinnik, kavamak
kiggatulunnagu. Taimaittuit piusiujut piusilet
atuttaunitsangit.

MR. UKÂLATTE:

Nakummek.

MR. HAYSOM: UKausitsaKagiavunga tamatumunga, tãvatuak...

MR. UKÂLATTI: UKausitsaKagiavun?

MR. HAYSOM: Âhailã.

MR. UKÂLATTI: Malillugu Tilitsigutik 5.2, Kujanãtuinnangimagillugu Tilitsigutik 5.1, "kiggatuttik KinugagunnaKuk aulatjaigutimmik Kaujitsingikaluaguni katimajitsuanik ubvalu katimajet Iluingatillugit kajusigiamut itsivaKatigennimik Kãngiutigaluagutik sitondimik Kaut tamãt nãjigiamut kajusiniannisak isumatsasiugutigillugu katimautitsani malillugit malittaugialet. Aulatjaigusik ilingagiaKavuk katimautitsanut isumatsasiugutaujunut. Aulatjaigusik KinuangusimagiaKavuk sivungagut ullusanganit Kaut tamãt nãjikãtinnagit, ammalu aulatjaigusik uKãlautaugiaKangituk ubvalu âkKisigiagutauulluni, ammalu nilligunnatuKalikKuk, kina aulatjaigumajon?

MR. POTTLE: Nakummek, Mr. katimattisijek. Aulatjaivunga, tullejuk AngajukKãk Sarah Leo, katimajet Iluingatillugit kajusiKullugit pijagellugillu kamagijaugialet uKãlautigijavut tamãni Kitigaliup kingungani ammalu kajusilluta finfillugunut. Nakummek, Mr. katimatitsijek.

MR. UKÂLATTI: Aulatjaigutik Kanuingituk. Ilonnatik angijut, uKallit ai?

KATIMAJITSUAT: Aye.

MR. UKÂLATTI:

AukâttuKavâ? Aulatjaigutik kajusittitauvuk. Kajusinialigatta katimajet Iluingatillugit. Suli katimajet Iluingatillugit katimagatta. kajusiligitsi.

MR. HAYSOM:

ImmaKâ, Mr. UKâlatte, apitsotiKavuk, apitsotik tigusâllago kajusikKâgata?

MR. UKÂLATTI:

Âhailâ. Mr. Gregory Flowers apitsotitsaKakKomat.

MR. FLOWERS:

Nakummek. Kaujimangilanga taigiaKammangâkkit Mr. UKâlattimik. Tamânelluasiunginatta. Tâvatuak, taimaitillugu, Sunatuinnanik isumatsasiuttisikKoligavit ilonnainik tâna uKâlautigidlugu. Ilâli, takujaugiaKaguvit St. John'simi ottotigillugu, ilâli, unuttualojugut, ubvalu unuttut inuit aullagiamik piutsaKattangitut, ammalu taunungalutik Kaningitumut takujaugumagiattulutik ubvalu asiagut, Kaujimavutit tuKunnigajattutit maggonik Kupanuannik atautsimut ujagammut, taimaittut, summat taimâk pigunnangilaten? Tamanna naluliumanattuk uvannut. Asiagulli, takujaugiaKaguvit pigiasillutit, nakituinnak, sâksini takKini ammalu aigiaKallutit. Taunanennini, uKâlautiKavutit Tullianik Minister, ubvalu kinamik, ammalu katimajuKalâttillugu taitsumani aullagiaKatillutit ânniasiuttaugiattulutit. Taimaimmat piKattavusi, ate ilonnatik atausiallugit pilillavot. Akilittauniammat atausialluni ubvalu asiagut. Akilittaungituk Nunatsiavummut. AkilittauKattajuk insuarisimagatik inositsiagittotitsigasuanimut ikajuttaugutinut, tamanna asingaujuk, asiagullu, taimaimmat ailâlikKunga. Ammalu utituinnangimagillutit uKaniallutit, tamatumunga aullatitaulaugama, una pigunnagunnaitaga ammalu tagvainak utigiaKaniallunga maunga Montâgimi. Fraitâgimi utiniallutit, Montâgimi aullagiaKaniiligemmilutit kavamamut aullatitaullutit. Isumagali asiagut piguvit ammalu pijagellugu,

ajunnanginitsaugajattuk. Ammalu tamanna
nâmmasingiutituinnaungituk. Aullanituinnaujuk suliat
suliaKagiattulutit ammalu takujauvitsanut aillutit. Asiagut
âkKisuisimagutsi tamatsumunga, âkKisimajannik, tamanna
piujongituk uvannut.

MR. HAYSOM:

Ate. Naluliumatitsigumangilanga, nalunualadapat, sittutigialivut.
OttotiniK sakKititsiKokKaugatsi. Asinginnik naluliumanattunik
uKakKaugatsi kamaginiattaka. IsumaKavunga sulijumik
uKâlakKaugatsi aullalâttinga katimaKataugiattulunga Fraitâgimi,
ammalu katimaKataugiaKallunga Montâgimi.
IngiggagiaKaniallunga utimut ammalu aullanialigemmilungâ?
ImmaKâ pivitsaKagajangilasi piluattumik iniKagutsi Inuit
nunalinginni. Imminik pigialinnik pigiaKagutsi ammalu
suliaKallutit suliat sagigialinnik, atautsikâgialekkik. Ammalu
atugutsi kavamaup kenaujanganik, kiggatuttiulutit, atuttaugialet
kavamami suliat sanut. Ammalu atuniagutsi kavamaup
kenaujanganik, namminik, tamanna uKumaittojuk. Taimaigajattuk
ilinnut, namminik, akiligialitit akilittautillugit insuarisimagatik
inositsiagittotitsigasuanimut ikajuttaugutinut tamanna
ottotigillugu. ImmaKâ tamanna kenaujatigut piulitsiniugajattuk
insuarisimagatik inositsiagittotitsigasuanimut ikajuttaugutinik
kenaujanik aullalutit atuniangananni kenaujangit, tâvatuak
taimaigaluattillugu inositsiagittotitsigasuanimut ikajuttaugutet
kenaujait ilingagialet insuarisimagatik
inositsiagittotitsigasuanimut ikajuttaugutinut akiligialinnut.
Ammalu angnigijaumajut kiggatuttet aullagiamut kenaujangit
ilingagialet angnigijaumajunut aullagiaKalippata suliaKanninginnut,
taimaimmat KaujimagiaKavusi Kaujimallugit nallingit namut
ilingammangâta kenaujatsini. Tamanna tatigijaugialik ammalu
takunnatautsialuni. Tamâginnik atuguvit, sakKisimagaluappata
Nunatsiavut kavamangata kenaujanginnit, tamâginnik atuguvit

piungitumetitsigajattuk. Summat? Ilâli, insuarisimagatik inositsiagittotitsigasuannimut ikajuttaugutet piujojagattogaluat ottotigillugit suna naluliumautauppat. AullajuKagajappat insuarisimagatik inositsiagittotitsigasuannimut ikajuttaugutinik atulluni St. John'silia'pat, Kaujimavunga adjigeKattangitut niKitsangita akiliutitsangit, ottotigillugu, Ministeriup atugajattangititut. Taimaimmat pimmagiuvuk kamagiamut tamatsuminga kinatuinnak asivut ikajuttaugutilik aullapat insuarisimagatik inositsiagittotitsigasuannimut ikajuttaugutitigut, suliaKapvimut aullatitaungimagilluni, adjiugajangimagittuk tamanna piusiujuk.

MR. UKÂLATTI:

Sarah Leo. UKâlakKulimmijaga Sarah Leo.

ANGAJUKKÂK LEO:

Kaujimangilanga, immaKâ tukisiatsianginama, immaKâ Veryan uKajuk, isumakkuli, tukisinatsiaKaujuk. AullaKattavugut suliatatinnut. AiKattavusi katimajunut ubvalu KaikKujausimagatsi ikpiniadlusi piunippaumat atugiamik Inuit kenaujanginnik atudlugu KaikKujaugatsi. Ilangauvunga taimaittuk, Veryan uKakKaumat, miliunettudlusi KaikKujauKattagatsi atautsimi ullumi. kamagiaKaKattavusi sivullipautijaugialinnik, ilâli, aullaniangimagigatsi. PiusiKaKattavuk katimanitsait âkKitausimalimmata. OttotiKalauanga. Ottotet ajunnangiluaKattajut. Aujauluttumi ailaukKugut ICC katimaniammata. AngajukKauKatigenguKataugama ITK-kunut ICC-kunullu, nigijugijauvunga ilauKataugiamut ICC katimatsuaninginnut, Nunavimmi aggâniulauttuk. Kaujituagama ullusanginnik Kaujimalidlungalu ilaulâttugut, kamalaukKugut akKutitsanik. AkKutitsavut Edmontonikut. Paniga iniKajuk Edmontonimi. Taimaimmat uKaniadlunga, sunale? Wogimi nukKangalâkKunga tamaunâliguma niuggulugu paniga. Utigama, kamanialidlunga atusimajakkanik-, aullasimaKataulaugama inunnut, atugialingit

tamaunâllutik, pikka taimaittolaummijut. Tâvatuak taitsumani
imminituinnak aullasimalaungilanga. Tamanna
adjigingimagittanga. Ailaungilanga ICC-kunut Kaujimalaugama
nukKalâttunga Edmontonimi. Kaujimatualigama akKutiKaniattugut
Edmontonimik Nunavilialluta, atulauttaga tamanna
nukKangagiamik wogimi paniganellunga. TakujaugiaKaguvit Goose
Baymi ammalu Kaujimaliguvit âkKisuigajanninik-, ubvalu St.
John'simi, ubvalu Timbaktu, ubvalu namut, âkKisuiniakKutit
takujauvitsanik. TakujaugiaKaguvit, ânniasilupviliallutit. Ikpiniallutit
suliatsanut ilingajumik pigunnatannik tamâni. Âkisuisonguvutit
katimanitsanik. Tamanna ilangani naluliumanaliaKiKattajuk,
tâvatuak Veryan uKakKaujuk âkKisuigunnangitutit katimanitsanik.
Avitsimagialet, tukisiangilanga suna naluliumautaummingât
ajunnalungimat. Aullalutit katimanitsamut. katimajuKagiaKammat
tamâni tamanna piujuk atugiangit Inuit kenaujangit
ilauKataugiamut katimajunut. Ajunnangimagittuk. Tâna
apitsotauluajuk. ÂkKisuiguvit katimanitsamik, taimailingalilli,
kinatuinnamut. Tamanna piunippauva atugiamik Inuit
kenaujanganeng, katimajunegiaKavinigâ? Taitsumanitsainak
takujaugiaKallutit ânniasiotimmut. Okay? Okay, ânniasiotinnut
ailigit. Aillutit takujauvitsanut pigiaKagavit, Ministeriullutit
kamagialik, tamanna piujuk atugiamik Inuit kenaujanganik.
Adjigek. Tamaungalangalauvutit taimâtsainak, Kanongituk.
Tâvatuak avitsimallugik. Suna pitjutigigiaKangitait
katimajuliagiamut takujaugiaKagavit ânniasiotimmut Ânniasiotik
Scrivensimut Goose Baymi, sollu, Kanga, Kaujimaven?
Kinigiagunnangitatit, Kaujimangilanga, takugatsait sakKititaujut
Sananguatet katimanitsangit, ubvalu asingit katimanet Labrador
North Chamber of Commerce, ubvalu kinakkunut,
taitsumanitsainak ilaulânnini taimaimmat akilittaugajattuk
kavamamut aullasimallutit suliatsanut. Kaujimangilanga tamanna

kiummangât naluliumautitsinik, tâvatuak, immaKâ, Veryan,
atsâtuinnalunnak, tâna namminik Kaujisimajaganik tukisititsiutik.

MR. FLOWERS:

AukaukKotuk. Sollu, isumakkt, immaKâ, ammalu pilaungilanga-,
taimâk pisimangitunga sulii, uKagasuatuinnavunga, sollu,
takujaugiaKaguma St. John'simi, insuarisimagatik ikajuttaugutinut,
ullusagani tamânegiaKallunga. AullagiaKallutit, Kaujimavutit,
takujaupvisaKallunga, sollu, pingasunik ulluni
aullasimagiaKaKattagavit, ubvalu akuniunitsak. UKallunga,
Kaujimavutit, fonnitauguvit Tullianut Ministerinnut, ubvalu
Kaujimangimagillutit aullagiaKajutit, Tullia Ministeret-, ubvalu
uKâlavutit, ajai, taitsumanitsainagalak taunungagiaKallunga
katimajunut, ilai? UKaniallutit, ajai, Kaujimangilanga, Kaujimavutit,
summat ilonnatik pigasuagajangitavut atautsikon
imailingangimagilluta, aullaluta, utigiaKaniallimilutit Fraitâgimi,
Montâgimituininak aullagiallagiaKaniallilutit. ÂkKigasuallugit,
tamânegigavit. Summat katimagasuagunnangilagut
taitsumanitsainak utimut tingigiaKalânginavit ammalu
aullagiaKanialligemmilutit Montâgimut utigiallallutit? Tamanna
uKâlautigigasuaKaujaga. Kaujimangilanga tukisiammangâtsi
uKagasuajaganik.

MR. HAYSOM:

Âhailâ, tukisivunga, Kaujimavutit, kiugusiga avittisimatuagunni, ammalu âkKisullugik adjigettagik sulitsiajumillu, tamanna Kanuingituk.

Tamanna Kaujimajaugialik. ApitsutuKangilak

KaujimagajautsiagiaKangimangât. KaujimagiaKavusi, atuttaugunnatut insuarisimagatik inositsiagittotitsigasuannimut ikajuttaugutet. Ubvalu, taimaittuKangipat, ministered sulitsaKallutik aullagajappata. Tamanna atugunnatuagunni ammalu kamagitsialugik, Kanuingilatit.

UKagiallagajakKunga tamatsumunga, ajunnangipat. AngigajakKunga, atujunik taimaittunik ammalu atuppâtailigiamut kenaujanik piulitsilusi taimâk pigutsi piujuk. Kaujimattisitsialusi kinamik taimâk pikKâgasi.

UtigunnagajakKugut allasimajunut takutsaunik, kamagiaKannik ammalu tatigijaugunnanimmut. Ammalu tamakkuninga pitâniagutsi

akiKangitunik aullaKânnak, uKautigialisi Sarah, ubvalu uKautillugu Kate, ubvalu uKautillugu Minister kenaujalignimmut, ubvalu allât uKautigunni Tullia Minister kenaujalignimmut uKautillugu, imâk pilangavunga uKautillugulu tukisitillugu. ÂnniasiupviliagiaKavunga St. John'simut Donerstâgimi. UtigajakKunga Hopedalem. katimagiaKavugut.

ÂkKisuigumavunga tamânegumallunga wogi nâningani ammalu

atungimagillugu tingijogutik, uKumatsatuinnangimagillunga

âkKisuigiamut sitonditsanganik uKumaittunillu, iligunnataga wogi nâninga ministered ingiggautinganut tujummiuvitsaganut taitsumani

wogi nâningani ministered kenaujanginnut pisigiallangimagillunga

tingijokkogutitsaganik? Atuinnauvunga tamanna Kanuigajangituk

Kaujimagajautsialutit, ammalu tukisititsigunnatuaguvit pusiugasuajumik, ammalu akiligialet akilittauKatigeniatuappata, tamanna Kanuingituk.

ANGAJUKKÂK LEO:

kangusuliumalikKunga tamâni, Veryan.

MR. UKÂLATTIK:

Ai; immaKâ Richard Pamak apitsugumajuk.

MR. PAMAK:

Nakummek. ImmaKâ maggok uKâlautigikKaujâkkik ottotigidlugik piujongitok, immaKâ, aullasimanimmi, angivunga. Akuniungituk tamânesimadlunga, aullaKattasimalikKunga suliansakanut ammalu nukKangagumanialidlunga ulloni maggoni namminik isumaganik ammalu utiniiallunga anggigaganut. Adjigalanga Sarah uKakKaujanganata. Aullasimalauttuk suliansaminut, nukKanganialidluni ilammini ammalu anggiganiamidluni. Kaujimavutit, akilittauKattangilatit namminik aullasimaninnut ammalu tamanna piujuk, tamanna atulukanniujong? Aullaguvit tallimanut ullunut St. John'simut, ammalu akungani niuviniagiattugumaniallutit, takujauniallutit inunnut aullasimajutit tallimani ulluni ammalu Kanutuinnak pivitsaKadlutit taunani niuvinniagamut. Tâvatuak aullaguvit suliansanut, ammalu nukKanganiallutit namminik piusinnut ammalu utiniammilutit, tamanna atulukanniujong? Ilâli, taimâk pisimavunga ammalu Sarah uKatainnatuk taimâk pisimanimminik ammalu asikkanik Kaujimagivunga taimâk pisimajunik siagunit. Tâna sivullik apitsotik.

MR. HAYSOM:

Tamanna atulukanniukongituk taimâk pituagutsi, kamagitsialugulu. Ammalu, uKagunnaKunga, sivungagut taimâk pikkâgasi, Kaujimattisitsialusi, ammalu tamanna uKâlautauppat, tukisinatsiatuk sivungagut uKallutit Kanuk pigasuammangâppit, taimâk piguvit, tamanna atulukanniungituk. Ammalu atulukanniungituk ullusanik niuvinniagiattugumaguvit atungâllutit ânniasiupviliagutigisimajannik, ânniasiupviliallutit atugialinnik, Kanimannimut nukKangautinnik ubvalu silakKijallutit nukKangautinnut. Kangaulippat Ministeret Kaujilâttut aullaluaKattajut Kanimadlutik aullanigiKattajaminit ammalu silakKijallutik nukKangautimminit, Kangaulimmalu tamanna nâjiKattajuk. Taitsumanilu initsaKagunnaitut taimaittunik atugatsanik ingigganimmut. Piusiugialet taimâtsainak adjigevut. Aullaguvit kavamami suliansanut, asinginnulu kavamami suliansanut, tamanna sulijuk kavamami suliaKannik, angituinnangimagillutit KaikKujaugusinnik namut aullagumatuaguvit. Ammalu adjigengitut ullusangit ammalu

adjigengitut kenaujait atuttaugatsait avitsimagialet ammalu
kititautsialutik atullugit, taimaimmat sunamik tammaniangimagikKutit.
UKumaittuli niuvinniagiattuguvit suliaKagiaKallutit Kitigaliup kingungani
piujungituk suliaKagunnaiguvit sittit atungâgajaganni. Ilâli, una niuvigvik
angmangituk kisiani suliaKaligutta. Kaujimavutit, tamanna namminik
piusigigialet, taimaimmat namminik piusigijait, tâna takujaunitsait
âkKisusimagialik. katimaKataungikuvit imminituinnak pillutit, tamanna
atulukanniujuk kavamaup piKutinganik, piluattumik adjigengitumik
âkKisimangikunni. Ate, pijâgingilanga Sarah suli kangusuliumammat.

MR. UKÂLATTIK: Nakummak. ImmaKâ Sarah Leo ilatsigiagumajuk.

ANGAJUKKÂK LEO: Âhailâ. Veryan, akiniammagikKagit uKausigikKaujannik Gregeimut
pitjutigillugu akulligettisinik-, akulligegiaKangitok ânniasiapvilialluni
ingiggautik ammalu suliatsamut ingiggalluni. Takunnavungali
kinatuinnak aullapat ânniasiuuttaugiattuluni. Ânniasiuuttimmik
takugiaKalluni Donerstâgimi, utigajattut Fraitâgimi. Tâvatuak
katimagiaKalluni Montâgimi, taimaimmat tamânetuinnagaluagutik
Kanguingituk. Isumagali, tamanna taimailingagiaKakKotuk, imâk-,
immaKâ Minister kenaujaliginimmut uKagunnatuk, angutiup suliaKalluni
atugialingit pigiasigajattut sollu tamânenngimagittilugu, aullasimalluni
ânniasiuuttaugiattulu ingiggautinga ammalu aullanialluni nunaminit
pigumausimmitut-, pigumausimmitut tamânelluni tamatsumunga.
Tamannali isumaga. ImmaKâ St. John'siliagama, St. John'simevunga,
takujaugiaKallunga Donerstâgimi, angiggagajakKunga Fraitâgimi,
Kanguingituk. UKumaittongituk. Aullaniammilunga Sontâgimi
takujaugiattulunga Montâgimi. ImmaKâli kavamavut akilegiaKangituk
uvannik St. John'simenniganut wogi nâninga utigumangituagama,
ubvalu takujaunitsaga Donerstâgimelauppat sivungani Montâgiup
katimanitsagani. AsiangutitsigajalaukKunga nallianik ubvalu
aippanganik, ubvalu nukKatillugu nallia ubvalu aippanga. Tâvatuak

imminik pigumavunga St. John'simegiamut Donerstâgimi
takujaunitsaganut. Taimâlli takunnavunga.

MR. UKÂLATTIK: kiugumaven, sir?

MR. HAYSOM: Âhailâ. Nakutsavunga uKâlajannik, ammalu tamanna piusiujuk
sulijokKotuk. Taimaigaluattilugu, aullaguvit St. John'simut angiggalutit
nunannut, ammalu aullanialimmilutit angigganit nunannit utillutit St.
John'simut, pigunnangikuvit ubvalu, asiagut, pigajakKutit akittuigiallutit
kavamaup akiligialingani, taimaimmat pivitsaKagajakKutit piulitsigiamik
kenaujanik. Pitjutaujuk piulitsigiamut kenaujanik
angittausimagiaKavutit sivungagut. Ammalu, uKautikKaugakku Greg,
immaKâ piunitsaugajakKutit tukisimattisiguvit sivungagut taimâk
pikKânak tukisinammat piulitsiniattutit kavamaup kenaujanganik,
angittauniakKutit, aukâttaulutit kisiani asiagut pitjutiKappata.
Tukisinatsiapat atugunnaKutit piusiujumik piguttisituinnalutit kenaujanik
ammalu ikajuttaugutinik ilinigangitunik ikajuttaugutinik kavamami,
aukâttaugajakKutit, atulukatuinnaguvit.

MR. UKÂLATTIK: Âhailâ, pigunnaKutit.

ANGAJUKKÂK LEO: Taimaimmat Kanuk Fraitâg pijaugajalittong? SuliaKapviliagiaKagajakKit
St. John'simut suliaKagiattuluten? Tigugajattait Kanimaninnut ilillugo?
Tigugunni silakKijapvinut ilillugu, kavamak akilegunnangituk.
Taimaimmat suliaKapvimut suliaKagiattugiaKaligajakKen? Taimaimmat
sunamik suliaKaligajakKen kavamangani suliaKapvimi St. John'sime?
Tamanna naluliumautaunnatuk.

MR. HAYSOM: Âhailâ, tâkkua sulijut apitsotitit, ammalu ilonnatik kamagijaugialet. Inuk
St. John'simetuinnapat sunalingimagilluni Fraitâgimi, tamanna takutsak
imminik tamânenninga. Tamanna aittosianguvuk inummit ikajullutik
ilonnainik akiligialinnik. Asitsaugajattuk inuk aukâppat, tiguniangitaga

silakKijautiganut. Tiguniangitaga Kanimallunga nukKangautiganut, ammalu akileniangilanga namminik akiligialikkanik tamatsumunga ilingjaunik. Taimaimmat akiKangitumik angiggagajattut. Kaujimajaugialik ilonnâgut avitsisongugialik suliaKalluni aullasimanimminut. Kujanâtuinnalau llavut kenaujamik piulitsiniappata atuinnanik Nunatsiavut kavamangani ammalu uKatuinnaluta kavamamut aullatitausimajutit Donerstâgimi, ammalu namminik ânniasiuttimik takugiaKallutit Fraitâgimi, tamâneniallutit namminik takujaugiaKanninut. Tamanna ilingangilak insuarisimagatik inositsiagittotitsigasuannimut ikajuttaugutinut. Namminik aullasimavutit. Fraitâgimi atuniangimagillutit kavamamut akilittaujunik, aullasimallutit, atugiaKavutit Kanimannimut nukKangautinnik ubvalu silakKijallutit nukKangautinnik, angigganiallutit Sonabendimi. Ammalu tamanna ajunnangimagittuk avittigiagik aippanganit aippanganut.

MR. UKÂLATTI: Dan Pottle, sunamik ilatsigiagumaven?

MR. POTTLE: ImmaKâ takunnalugu atuvutit kavamaup kenaujanginnik, ammalu Veryan uKausingatut tamanna taimailingajuk. Tamâneniagu vit, ubvalu takujaugiaKagavit Donerstâgimi, angiggajutsaungilatit Fraitâgimi suliaKagiaKagavit Fraitâgimi. Suli Fraitâgitsiutinnik atugiaKavutit, Sonabendimi ammalu Sontâgimi Kanuilingaluappat, taimaimmat suli atuvutit kavamaup kenaujanganik. Suli atugiaKavutit Fraitâgimik, Sonabend ammalu Sontâgimik Kanuilingaluappat, suli akinginnik kavamaup atuvutit. TamânegiaKangikuvit Fraitâgimi, isumakkuli, angiggajutsauvutit.

MR. HAYSOM: Âhailâ, tukisiangitottaugumangilanga inuit asikKituininaninginnik kavamaup kenaujanganik. Kaujititsigasuatuinnavunga kenaujanik piulitsigajanninginnik ammalu, taimaippata, ilonnatik inuit Kanuttogialet piulitsigiamik kenaujanik. kenaujanik piulitsiniangipata, Kaujimangikuvit

piulitsigajammangâppit ubvalu piulitsigunnaguvit, tukisinatsiamagittuk avittaugialek.

MR. UKÂLATTI: UKâlakKulimmijaga Jim Tuttau.

MR. TUTTAUK: Nakummek. Isumagituinnalugu uKâlallunga, St. John'siliadlaguma ammalu, taunungalunga Donerstâgimi, utiniallunga Montâgimi, taunanevunga, fonniniallunga Vogue Optical ijautiligijet, ijekka takujaugiattutillugik ilonnata Kaujimagatta aullagunnaKattangitugut ânniasiuviup tingijongagut silakKijagiattuluta sivullipâmik Scrivens uKaKattajuk, maungalâkKit ânniasiuviup tingijongagon? Anginiallutit. Auka, pijâgingilanga, ullusamik âkKisigunnangilagut tingijommit pejaudlaguagavit. Ate, atsutuinnak. Suna piungituk uvannut-, pingasunik ullunik katimavitsaKallunga. Suna piungilititsijuk uvannik katimajuliagiamut, âktami ullâkut fiaramunut unnusamut, ammalu pijageguma ainiallunga Vogue Optical ijautiligijinut sepami unnusame?

ANGAJUKKÂK LEO: Sunaungituk.

MR. TUTTAUK: Ate, tamanna Kanuingituk. Tamanna sittuvuk, immaKâ.

MR. HAYSOM: ImmaKâ tamâni Kanuingituk, Sarah uKakKaumat. Kamatsialutit aiguvit Vogue Optical ijautiligijinut ammalu tâksikoguvit aillutit Vogue Optical ijautiligijinut, tâksikollutit Vogue Opticallikunit utillutit tujummiuvinnut, tamanna suliaKallutit ingiggautigingitait. Kamatsialusi tamanna uKautigigakku avittisigiaKajutit imminik aulausinnik suliansanillu. Tamâni kamagiaKavutit Kanuk piusinnik, sulimmangâppit, ammalu akiliutitit takujaugajagavit atulukanninik suliansani. IkKaumallutit sanillet inuk ijautittâgialik Vogue Opticallikunit pitâniangituk Vogue Opticallikunit tagvainak ilittut. Taimaimmat kamatsiagiaKavutit tamatsuminga. Tamanna Kanuingituk. UKâlautiKatuinnavunga isumagijaugialinnik.

MR. UKÂLATTI:

Richard Pamak. ApitsugiiallagumakKoKaugavit kingullianik.

MR. PAMAK:

Âhailâ, nakummek. UKautigikKoKaujait sivunganigiak.
Tukisititaugumatuinnavunga. Ammalu, pijovunga ottotigillunga.
Ammalu, manna, Kaujimavusi, KinugautiKavunga angittaugiamik
aullagiamut, ammalu mânnaujuk ullusakka takujaugiamut
ânniasiutimmut. Ammalu KaujimalaukKunga takujaugiamut,
Kaujimavusi, ullulusimajavut, aullagiaKaniaidlunga kingungagut.
Maggonik tingmiagajakKutit atautsimut ujugammut. Suliagigialet
pijagellugu, ammalu 15 minotinik, 20 ubvalu sitondiup agvanganit
sitondimut takujaugiaKanninut. UKakKaugavit asinginnik ullusattâlugu
ingiggavitsait, suliatsanut taitsumani takujaugiaKalânninut aullagiamut,
ubvalu asiagut, Kaujimavusi, taimâk piguvit, utigiaKaniaillunga,
ulluliugiiallunga, ingiggautitsanik insuarisimagatik
inositsiagittotitsigasuannimut ikajuttaugutinut, akitunitsaugajattuk
kavamamut ilonnâgut. Pannaisiaguvit sivungagut ammalu
ullusaliugiiallutit pivitsanik, Kanuingilatit taimâk. Tâvatuak, âhailâ,
Kaujimavusi, piujojunga ottotigillunga. ApitsotitsaKavunga Katemik
manna, uKajuk mâni aullagumajunga suliatsakanut mânnaujuk.
Takutitsilunga, “takujaugiaKavunga suvailiak âktami.” Tamanna
atulukanniujong? Tamanna, taimailingajong? Ubvalu âkKisuigiiallaguma
ullusakkanik suliaKagiamut. Tukisititsigasuatuinnavunga. Imâk,
Kaujimavusi, immaKâ taimâk uKâlakKauvutit.

MR. HAYSOM:

Sukkaitumik ilinniavunga. Tamanna uKâlautigisimakKotaga,
tukisinadlunilu. Tamanna apitsotituinnaungituk suna
sivulliugiaKammangât, potipotik ubvalu manningâ? Nallia
sivulliusimajuk. Suliatsanut aullasimallutit ubvalu takujaugiaKanninut.
Taununganiaguvit suliatsanut aullalutit, takujauvitsanik
âkKisuigajakKutit, takujauvitsait papvisâginiangimat suliatsanik.
TakujaugiaKaguvit tamanna suliatsanut ilingangituk, ammalu
tamatumunga aullalutit, tamanna tagga aullautigigasujait.

Aullagasuaguvit suliatsanut, taimaimmat tamtasumunga aullavutit. Suliatsanut sunamik pitjutittâguvit katimajunegiaKannet, uKagunnagiaKavutit nallianut tamaungamangâppit nallianut, sivungagut takujaugiaKavunga uKaniallutit. Pijâgingilanga; sivungagut takujaugiaKagama. Asiagut uKagajagivutit, ullusaliugunnangikutta asiagut sitonditsanganik, âkKisiutigunnaKammâ? Taimâk uKagiaKavutit. Kimalunnagu katimanitsait. Asiagut uKagajakKutit, ullusaliugunnangikutta asianik, âkisiutigunnaKammâ? Ukunani sitondini sivungagut takujaugiaKavunga. Taitsumanigalak takugunnaKasi, tâvatuak takugunnangitasi taitsumani. Ammalu takujauvitsanut aiguvit, adjigettigiaKangitâkkik. Suliatsanit nukKangallutit, nalligutuinnak. Tamanna amma akiligiaKammijuk. Katimaninnut akilittutaungituk. kamagijaugialik. ÂkKisuillutit atugatsanik, Kaujimavutit ilai? Pinguatuinangimagillutit? Tukisiavunga pivitsaujunik. Hâkinguajuni pivitsaujuk piujummagik atugianga.

MR. UKÂLATTI:

Ai. kajusiutiKalaugit tunigasujannik ai?

MR. HAYSOM:

Hâki uKâlautigingimagillugu. Ate. Ottotigillugit, unuttunik ottotitsaKagiallamat ammalu, AngajukKâk uKautiKakKaumat ilanganik. Ammalu unuttuit pitjtaujut aullasimagiamut, tâvatuak adjigengituk. AtugiaKallutik suliaKapvinik. PiusiKagajattut inuk suliatsaminut aullasimalluni, ubvalu tamâginnik namminik suliatsaminut ammalu suliatsaminut suliaKapvimini, aullasimalluni nunaminit suliaKapvimengualuni suliaKapvimini. Asianut nunalimmut aigutik Nunatsiavut kavamangata suliaKapvinganut. Taimaimmat suliaKapvimeKattavutit St. John'simi. Suliatsanik suliaKaniattutit ammalu namminik suliatsanik Nainimi. Sunauva namminik suliatsait? Akiniagutauniattillugu, ukiatsânguvuk, niglisiugianiattutit. Nainimeguvit, suliaKagajakKutit suliatsanik pijagesimagalualiguvit itsautaKagunnaguvit suliaKapvimi Nainimi, atugunnalutit Kagitaujanik ammalu kavamami suliatsanik ubvalu kamami ikajuttaugutinik sollu Kagitaujatigut,

kavamaup fonningit KaujimaKattaniagavit sujuKalimmangât suliaKapvini St. John'simi. UtakKinialillutit ullumi suliaKallutit silatingani suliaKapvipit ubvalu kavamaup suliaKapvinginni Nain niglisiugiakKânak Sonabendimi ilannât suliaKagesimalippat tamattik aullanialillutik. Tamanna piungitong? ImmaKâ, tukisinatsiajuk, sitijumik ammalu sukkajumik maligatsaliugunnangitutit tamanna Kanuingimangât ubvalu piungitommangât, immaKâli takunnaKusi tamanna tagvainak tammasonguninga? PigunnaKutit kavamami suliaKapvimellutit ammalu suliaKangualutit Nainimegumatuinnalutit niglisiugiagumatuinnalutit. SuliatsaKangilatit Ministeriullutit kenaujaligiji NainimegiaKanninet. Suliatsanik suliaKatuinnavutit Nainimi, pitjutinga suliatanik suliaKajutit Nainimi suliaKagavit namminik pigumajannik wogi nâningani suliatanellutit. Tamanna sulikKongituk. Tamanna adjusiangimagittuk, allât aullagumagiamut ammalu katimanitsamik Kinillutit akiliutitsait aulatjaniammata kavammi. Tamannaungituk...

MR. UKÂLATTI:

Ajunnamat, nakummegumavagit. Pijâgingilanga nukKatigiaKagakkit tamatsumani uKâlautigijanni. Asinginnik kamagiaKagatta. PivitsaKattigumavagit akuniungitumik. Pijagegunnatait tunijait, pigumaguvit. Nakummek.

MR. HAYSOM:

Nakummek, Mr. UKâlattede. Pijagegasuaniattaga tagvainak. kingullipaulittuk uKâlautiKajuk aullasimanimmuk uKautigigumakKaujaga. ImmaKâ Kanuk pigiaKavugut taimaittuni, ajunnangituk, tukisinatsiagiaKavugit sulijollutillu Kanuk pilimmangâppit. Taimaimmat atukKaujaga ottotigidlugu, aullasimaguvit sulingimagillutit ubvalu ilaunguaguvit kavamamut aullatitausimaninnik suliatsaKangimagillutit, atutuinnavutit kavamamik atunguadlugu tamânegumatuinnadlutit namminik isumannik ubvalu isumannik silakKijadlutit, tamanna atulukanniujuk. Ajunnatummagik Kaujigasuagianga. Ajunnamagittuk takugianga, tâvatuak atulukanniujuk. Tamâni piusiujumi, âhali, tukisinatsiagiaKavugit; nukKatuagavit katimaninnik Nainimi

pijageKattajuk kavamamit akilittutaunet. kavamaup kenaujanginnik
atugunnaidlutit, imminituinnak pilidlutit niglisiugiannet pijagellugunut.
Ammalu pijagesimaniaguvit Fraitâgimi, tamanna pijagenniujuj
Fraitâgimut. SuliaKapviliallutit suliaKanguagiattulutit, ubvalu allât
suliatsalaginnik suliaKallutit suliatgagingimagillugu tamâni, tamanna
uKumailititsijuk.

MR. UKÂLATTI: Nakummek, Mr. Haysom. Nakummek tunitjigavit. Tuavillunga, uKagiallagunnangilanga nâmmatumik, nâjillusi uKausitsaKavise utikKâtinnata katimajitsuanut? UKâlakKulimmijaga Dan Pottle.

MR. POTTLE: SakKititsigasuaKauvunga inittisiutimmik, tâvatuak KanuikkKongituk uKautikKauganga uKâlakKudlunga. Aulatjaigutiga akunegiamut itsivaKatigenitsangit katimajitsuat taimaimmat Mr. Haysom pijagegunnatuk tunijaminik ammalu tuavittingimagillugu, tamanna takunnalikKaugakku piusigikKaujait tilitsigutinni uKautidlugu pijagegiaKalittuk tunijaminik. Nakummek, katimatitsijek.

MR. UKÂLATTI: Tukisiavunga suli tunigatsaKagiallajutit, Mr. Haysom.

MR. HAYSOM: Mr. UKâlatte, atautsimik maggonillonet ilatsigiagatsaKakKauvunga pimmagiugasugijâkka kamagillugik. Asiagulli, naillititsituinnagajakKunga uKausigikKaujakkani pitjutigillugit *SuliaKattet Maligatsangit*. UKalikKungali katimajitsuat pivitsaKattisippata uvannik utigunnaKunga siagu pitjutiganut katimajet lluingatillugit, Kaujimavusi, ilonnainut tusattaugajattuk, tâvatuak isumagituinnataga. kamagingikukku uKautigilangakKaujaga *kenaujait Aulatsivillagimmi PikKujangani* ammalu ilangit allasimajut tamâni. Nâlatuinnavunga utipvigigumammangâtsi tamanna.

MR. UKÂLATTI: Ilatsigiagumavit, Mr. Dan Pottle?

MR. POTTLE: Tamatsumunga isumaKavunga pijagelluta uKâlautigijattinik ullumi ammalu pigiasiniammiluta katimajet lluinganinganut sivullipâmik ullâkut.

MR. UKÂLATTI: Tamatsumunga, maligiaKavugut *Tilitsigutinik Ullumi* ammalu KaujitsigiaKavugut aulatjaigutimmik.

MR. POTTLE: TukisiatsiagunnaiKunga, apitsuvamma aulatjaiKudlungâ?

MR. UKÂLATTI: Âhailâ. Atâni Kaujitsiutet aulatjaigutinin ullungani 2 ilingajut
Tilitsigutet Ullumi.

MR. POTTLE: Tâvatuak usemmalu- pigasuatuinnalikKunga-, pijagetuinnalillanga
isumaganik. IsumaKakKauvunga UKâlatti pitsatuniKaninganik
nukKatitsigiamut kamagijaujunik ullumi ammalu pigiasiniammiluta
katimajet Iluingatillugit ullâkut. Nakummek. Tamanna sulijuk.
PigiasilâkKugut katimajet Iluingatillugit ammalu Mr. Haysom,
pigunnapat, Kanuitsangituappat.

MR. HAYSOM: Nâlatuinnavatsi. Âhailâ, tamanna Kanuingituk.

MR. UKÂLATTI: IkKasungiluadliligatta uKattinik/ablasângutitsijinik, kajusigunnangilagut
atâni Inuit maligatsangani uKattiKangimagilluta. Taimaimmat tuavilluta
pijagelautta. Tuavilluta, nakummek, Mr. Haysom. Utigivugut
katimajitsuanut. katimautitsak 17, "Sivullipâmik Atuattauningit
Maligatsait." PitaKangilak sivullipâmik atuattaugialinnik maligatsanik
ullumi. katimautitsak 18, "kingulliani Atuattauningit Maligatsait."
PitaKangilak kingulliani atuattaugialinnik maligatsanik ullumi.
katimautitsak 19, "Angiutauningit Maligatsait." AngiutitsaKangilak
maligatsanik ullumi. katimautitsak 20, "Nâjinik." Katimajitsuat nâjinut
nainamunut ullâkut Kauppat, Metwoch, November 19, 2014.
KaujimakKujakka katimajitsuat, tuktunik katimautiKaniattut Amaguk
Innimi âktaliak agvami.

Ulluk: November 19, 2014 Ulluk 2

MR. UKÂLATTI: Ullâkut Illonasi. Wilson Jararuse angmaiKujaga tutsiujilluni.

MR. JARARUSE: [Tutsiajuk nipiliuttaugani]

MR. UKÂLATTI: Nakummek, Wilson. PijagelaukKugut ikpasak Kaujimadluta pigiasiniattugut katimajet lluingatillugit nâjillugu SuliaKattet Maligatsangit tunijauluttut takunnajumut, Veryan Haysom. Malillugit Tilitsigutet Allasimajut 23(3) Suliatsangit katimajitsuat ammalu Allasimajuk 3 uKajuk, "kisiani asiagut pitaKattitauppata Tilitsigutik 23(1) ammalu (2) Kaut tamât suliatsanginni katimajitsuat pigiaKavut," ammalu allasimajut Kaut tamât ilijaugusingit suliatsangit katimajitsuat. Ilonnginnut angittaugumavunga katimajitsuanut atâni Allasimajuk 16 Tilitsigutinni Kujanâllugu Tilitsigutik 16(1)," katimajitsuat KujanâtsigunnaKut nallituinnanginnik Tilitsigutitut piusiujunik, atuttaujunik, piusituKanik ubvalu pitjutaujumik tamaungatitaujuk ilonnainut angिताusimalluni." Taimaimmat uKautijakka katimajitsuat KujanâkKulugit Tilitsigutik 23(3)-mik utinialluta katimajitsuanut pijagegutta katimajet lluingatillugit. Ilonnatik angijut uKalaullit aye.

KATIMAJITSUAT: Aye.

MR. UKÂLATTI: AukâttuKavâ? Aulatjaigutik kajusittitauvuk. PigiasikKujiligivunga-, nakummek, utigivugut katimajet lluingatillugit. KaikKujavut takunnati Veryan Haysom uKâlakKulugu katimajitsuanut. Nakummek.

MR. HAYSOM: Ullâkut, ammalu nakummek, Mr. UKâlattek. UKausitsaKatsiagunnaiKunga uKautigumajakkanik, tâvatuak ikpasak nâjilaukKugut ilangit apitsotitsaKatillugit uKausitsanillu ilingajunik uvannut, isumaKalaukKunga atautsimik kamagiaKannitunik uKautigumatuinnataga kiullunga Kanuttogijauluttunik uKautaudlutik

Richardimut. IkKaumagatsi Richard apigilauttuk, Kaujimavusi, Kanuk
pijuKagajammangât apitsudluni suliganik siKumitsigajagumak
SuliaKattet Maligatsanganik? Ammalu immaKâ kiulaukKunga
angijummagimmik ilingjaunik kavamamut kiudlunga, ammalu
piusiugialinnut kiugusiKagivuk ilingajunik SuliaKattet Maligatsanginnut,
ammalu tamanna uKâlautigigumajaga tuavillunga. Ikajuttaugutilik
isumaKappat ubvalu nâmmasingipata kiggatuttik katimajitsuani ubvalu
angnigijaumajut kiggatuttik siKumitsinipat SuliaKattet Maligatsangnaik,
pivitsaKajut uKausiKagiamik nâmmagingijaminik ubvalu uKautjilutik
KaujisattauKullugit UKâlattimit tamanna piusiuKattajuk SuliaKapvinganit
Allatiup. Ulinnaisigialet sunanik allasimajunik SuliaKattet
Maligatsanginnik angnigijaumajut kiggatuttet siKumitsisimammangâta.
Allasimatualippata nâmmasingilutik ulinnaisillutik allasimajumik
Nalunaikkutamik ammalu kamagillugu nâmmasingiutik aititausimajuk
Allatimut, adjinga aititaugialik kiggatuttinut tamakkuninga kamajumut,
ammalu kiggatuttik pivitsaKattitaulluni kiugiamik. kiugusinga
aititaugialik UKâlattimut, UKâlattik pigiaKaniailluni immaKâ
uKautigilauttaga ikpasak kamgijaugialik ubvalu pigianningani Kanuk
pijutsaumangâta. Taimaimmat UKâlattik pigunnaKuk, kamagillugu
allagak nâmmasingiutik ammalu allagik kiugusik angnigijaumajunit
kiggatuttinit, uKagunnaKut Kanuk pijutsaumangâta unuttolutik ubvalu
kamagijaugiaKangipat. Ubvalu tamanna kamagijaugunnaKuk
kamagillugit tusattaumajut. Ubvalu kamagijaugiallagiaKappat
Kaujisannikut ammalu pimmagittuit kamagijaugiaKavut. UKâlattik
uKatuappat tamanna pimmagiungipat, UKâlattik igitsigajattuk, igillugu
taitsumani, Kujanâllugu nâmmasingiutiujuk sulingininganik. UKâlattik
isumaKappat tamanna sittutitaugunnaninga, UKâlattik kamagiaKavuk
ammalu Kanuk âkKitaugajammangât ubvalu tukisimautinimmut
âkKisiutigajammangâta akungani ikajuttaugutilik nâmmasingijuk
ammalu kiggatuttik ubvalu angnigijaumajuk kiggatuttik. UKâlattik
kamagiiallaKujigajappat Kaujisattisilluni, pimmagiuppat kamagigianga,
UKâlattik pigiasittisigajakKuk katimajinik, inittisijinik katimajinik,

kamaniattilugit tamatsuminga, uKâlaKatiginiammilugu nâmmasingijuk
ammalu kiggatuttik ammalu asingit takunnajuit pigiaKagutik.
Kaujisannik kamagijauKattavuk inittisijinut katimajinut ammalu
piusiugialik pivitsaKattisilluni katimajinit suliansanginnik ammalu
papvisângimagillutik ubvalu ottungimagillutik Kanuk pikkulugit
piusiugialinni. Pijageppata sakKititsigajattut uKautjigiagutininik
ammalu/ubvalu Kanuk pigasuammangâta kamagillugit piusiusimajut.
Inittisiginiappata tâvatuak pettautingimagillugu angnigijaumajuk
kiggatuttik, tagga piusiugasuajuk atuttaugiaKavuk ammalu tamanna
sakKititaulluni allasimajutigut. Inittisigijet katimajet petsigumappata,
utigialik katimajitsuanut, ammalu katimajitsuat timiuvut pitsatunilet
uKagunnatut Kanuk pijutsaumangâta petsigiamut, uKautjigiagutimmik
petsigiamut suliaKapvimit. Taimaimmat tamanna piusiuuvuk
kamagiamut nâmmasingijunik. Ammalu nigiuvinga tamanna ilinnik
Kaujitsininga asiagut kamagingimagillugu kavamatigut uKumailutaujuk.
kingullipâmik uKautigigumatuinnataga ilonnainut una. Una- ammalu
immaKâ piusigijaga aittudlusi nâjjigiamut inittisiutimmik, pijagennikut,
inittisigutituinnak. Ammalu unauvuk. Takusimaligatta SuliaKattet
Maligatsanginnik, ubvalu ilanganik pitjutaujunik, kajusimakKulugit
ilonnâgut Inuit namminik kavamaullutik ammalu katsungaigutiKallutik
illigijaminik Inuit namminik kavamauningit. Ammalu kamausiugialet
angluammagittut ammalu itjunitsaudlutik SuliaKattet Maligatsangit.
SuliaKattet Maligatsangita ilumiutangit unuttumaget ikajotingit
katsungaittisigiamut tamakkuninga, pigunnausimitut, inuit
piusiKammata katsungaigiamut ammalu sulijutsalutik uppilutillu
illigijaujunik sunaumangât namminik kavamaKannik. Tâvatuak
unuluammijut tamatsumangat. Ammalu asinginnik allumiutalet ammalu
asinginnik maligatsak âkKitausimajut ilangaudlutik pitjutingit
pivitsaKattisigiamut inunnik katsungaigiamik ilonnâgut namminik
kavamaKannimi, ammalu namminik kavamaKannik illinattovuk
pimmagiudlunilu ilanginni Kanuk Inuit piKattamangâta suvulillutik
inosimminik. Angnigijaumajollutik kiggatuttet, angnigijaumajut

kiggatuttet, nigiugijauvusi KaujimagiaKanitsinik sulijutsalusilu asinginnik Inuit maligatsanginnik. Ammalu immaKâ piluattumik pimmagiujuk tukisiagiaKajusi tamakkua singiujut maligatsait kamagialet taimaittunik pitjutaujunik piusiumititsigiamut katsungainimmik namminik kavamaKagiamut. Ottotigillugu, atautsik allasimajuk sakKiKattalauttuk mâannaKamik angnigusuttuKagesimalittilugu, allasimajut pigunnasititsilauttuk nukKagiangit inuit angnigijausimajut suliaKapvimut, Allasimajuk 6.4.4 Maligatsasuummi imailijuk, "kiggatuttet Nunatsiavut SuliaKattginginni ilaugunnangitut angnigijaumajunut kiggatuttinut Nunatsiavut katimajitsuanginni, Inuit Nunalet kavamangani ubvalu Inuit kavamangata kuaparesangani, ammalu Inuit kavamangata kuaparesanga ilauttisijuk ICC-kunik. Taimaimmat inuit Kaujimasimalaungitut allatausimajunik Maligatsasuummi ajunnamat sakKititsidlutik suliaKattet Nunatsiavut kavamangani angnigijaunnimata AngajukKaunet katimajinginnut Inuit Nunalet kuaparesangani ammalu sakKititsidlutik taikkua nukKagiasimalauttut. Pimmagiujuk pitjutaujuk tamâni, sulijumik, tamakkua allasimajut iluanet Maligatsasuummi âkKitausimajuk kamatsiagiamut inuit nâmmasingsiutinginnut ammalu adjigengitunik aulausiujunik adjigengituni katutjiKatigeni kavamani tukisimatsiataugialet ammalu avittitausimallutik ammalu adjiulugatik nanegiaKagutik. Ammalu allasimajungit tamâni âkKitausimavuk piusiumititsigiamik katsungainimmik ilonnâgut namminik kavamaKanimmik. Taimaimmat inittisivunga ammalu nigiugijaungilatit ilonnainik Kaujimajonninik ilonnasianginnik allatausimajunik ubvalu ilonnanginnik ilonnanginnik kingullipânganunut maligatsak. Naluliumaguvit ammalu apitsotitsaKaguvit pitaKavuk Maligatsatigut Ikajusonik suliaKapvinik, ammalu uKautjigiavatsi apitsugunnatusi ammalu ikajuttaugumallusi uKautigiattaunikkut. Asia Inuit maligatsanga isumakkuli pimmagiujuk tigumiagiamut katsungainimmik ammalu silijutsanimmik ilonnâgut namminik kavamKanimmik kenaujanut Aulatsivillagimmi PikKujanga.

MR. UKÂLATTI: Mr. Pottle, apitsotitsaKaven?

MR. POTTLE: Âhailâ, apitsugumatuinnavunga Veryanimik. Aikkânak kenaujait Aulatsivillagingani PikKujanganut utigajammangâppit uKâlautigillugu, Kanuk uKasogâ, AngajukKaunet katimajet piusingit adjiulungimata AngajukKaunet katimajinginni petsigiaKagajagutik kiggatuttimik AngajukKaunet katimajinginni inittitaunikkut, immaKâ, AngajukKaunet katimajinginni silatâni SuliaKattet Maligatsangita. IsumaKatuinnavunga atuinnaumangâppit tamanna uKâlautigigalâllugu.

MR. HAYSOM: Âhali, piniakKunga. Tamanna pilangajaga ikKaumausikkut tigumiangimagillunga Maligatsasuummik sâgani, uKumaittugalauniattuk. Taimaimmat isumaKaguvit tammajunga, nulugaKattaniakKusi aggasinnik, apitsulusi. Tamânelauttusi upingasâmi Kaujimagatsi, kiggatuttet AngajukKaunet katimajinginni ilauKattajut AngajukKaunet katimajinginnut angnigijausimagamik ilijaudlutik AngajukKaunet katimajinginnut Sivulittik Ministerimut ammalu kajusittitausimadlutik katimajitsuanut ammalu tilijaudlutik AngajukKâmut. Taimaimmat piusitsaKavugut ilonnata kiggatuttet AngajukKaunet katimajinginni tamânejut katsungaigutjigamik katimajitsuanik, ammalu katsungaigutiKadlutik Sivulittik Ministerimik ammalu katsungaigutiKagamik AngajukKâmik. PiusiKavuk sikkiliugiamik ammalu Katsitut pitaKalimmangâta maligatsak malillugu ilonnatik suliaKaKatigegialet angiliumikKulugu katsungaigutjinik AngajukKaunet katimajinginnik ammalu kiggatuttinik AngajukKaunet katimajinginni. Tamanna taimâk uKagakku, inuk ilauKatautualippat AngajukKaunet katimajinginnut, tigumiagiaKavut katsungaigutjinimminik tamâginnik Sivulittik Ministerimik AngajukKâmillu ammalu, ilonnâgut, katsungaigutjiKasiutillutik katimajitsuanik. Sivullingani, Minister suliagigialimminik suliaKangipat, ubvalu apitsotauppat Minister suliatsangit ammalu, suliaKausingit Ministeriullutik, suliatsamini ammalu pigunnaningit Ministeriullutik, suligunnaningit ammalu uppigusingit

Ministeriullutik, ubvalu atuKattaningit sungiutilukannatunik,
sungiutilukannatunik atuKattalutik suliaKagiaKallutik Ministeriullutik,
taimaimmat Sivulittik Minister tagvainak petsigunnaKuk
angittausimalluni AngajukKâmut. Taimaimmat Minister
tigumiagiaKavuk katsungaigutjinimminik tamâginnik AngajukKâk
ammalu Sivulittik Ministerimik ilauKataugiamut AngajukKaunet
katimajinginnut. Ammalu Minister pejaugunnatuk AngajukKaunet
katimajinginnit. Taimaigajappata nutât tilijaugiaKavut ilijaulutik
AngajukKaunet katimajinginnut, taimaittuKappat, kajusittitaumagialet
ammalu katsungaigutiKallutik katimajitsuanik. Piusiusimajuk sivungani
AngajukKaunet katimajinginnut inuk pejauppat suliaKapvimit, ammalu
atausiadluni taimaisimajut, atausiatuinnadlutik ikKaumausikkut,
inuKagunnaituk taitsumani inuttâtaulaungituk, tâvatuak asia kiggatuttik
AngajukKaunet katimajinginni uKautijaulauttuk maggonik
kamakKudlugu ammalu ininganelluni kiggatuttiup pejausimajop
suliatsangit suliaigillugit. Taimaimmat, ilonnâgut, immaKâ tamanna
tusagumakKaujait, Danny. Sulijong? UKâlautigigumatsiangita
kenaujatigut Aulatsivillagimmi PikKujak. ImmaKâ tamanna
kamagingikaluaguttigu tukungit ammalu tukungit kenaujatigut
Aulasivillagimmi PikKujak. Imâk pigumavunga uKallunga pingasunik,
immaKâ sitamanik, sunait isumagijakka Kaujimagialisi. Sivullia
isumaKaguvit sunanik pimmagiugasugijannik Inuit namminik
kavamangani Kanganunut, isumaKavunga kinatuinnaugaluaguvit
ammalu Kanuk pigasuagaluaguvit ammalu Kanuk
takunnausiKagaluaguvit, nâjjiusiKaKattavusi uKautigidlugit kenaujait,
tamannaungipat puttunippauKattajut pingasut pitjutajut pimmagiujut,
puttunippâgijatsini tallimani. Taimaimmat nallisi pigumagutsi uKauset
ilikkusellu sivullipautigummalugit ammalu pimmagiutillugit namminik
kavamaKannimut. Asia kamaluagumagajattuk niKitsanik,
niKitsatannimik ammalu piusituKanik inositsini pimmagiutitsiluni.
Tâvatuak akuni isumagisimaligunni, kenaujait ammalu kenaujangit
aulatsivillagimmi tamânegajattut. Ammalu kenaujalittâlimmata ammalu

aulatsivillagimmi kenaujanik, unuttunik allagattâsimalittut ammalu kamagijaudlutik sakKititaudlutillu. Sivullipâk nagvâgajattait tukilik kenaujanik aulatsivillagimmi âkKisuttausimajut Maligatsasuammi. Maligatsasuat taimaittunik kamaKattangituk tukunginnik pitjutiKalimmata kenaujanik aulatsivillagimmi. Ammalu ulugianattuKavuk inuit takuKattajangit Katsitommangâta tamânejut ammalu takuKattangituk uKumaittunik pitjutaujunik. Ilangit uKumaittuit pitjutaujut pitaKagiaKajut jârimut ilingajunik kenaujanik, ilonnasi Kaujimagsi. Kaujimajaungituk ilanga angijumik uKumaittoKattajuk suliansanginni katimajitsuak kajusittisigiamik kenaujanik. Taimailautsimangitogaluak kavamak kenaujaigutittillugu, taimaimmat ilanga piusigiKattajanga aulatsigiamut tunitjilunilu kavamak aulatsitillugu aullalugu tunitjiKattaluni kenaujanik. Taimaimmat tamanna pitjutautilugu, kenaujait tikititauKattavut illumut, katimajitsuatiattitauKattajut kavamakkut ammalu piluattumik Sivulittik Ministerikkut ubvalu Minister kenaujaliginimmut. Asingit kinalonnet kiggatuttet katimajitsuani sakKititsigunnangituk kenaujanut maligatsamik, maligatsait uKajuk atuttaunitsanginnik kenaujait, ilijauKattajut katimajitsuanut. Tâvatuak kinalonnet atugunnangilik kenaujanik kisiani kajusittitausimatillugit katimajitsuanut. Taimaimmat sikkiugialik ammalu kenaujaKallutik piusigijanginni, ammalu ilanga pimmagiunippâk katimajitsuak atunit jârimi kajusiutiKagiaKaningit kenaujanik.

kenaujait kajusittitausimatualippata, aulatsigiamut maligatsak akilegunnangituk kavamaup kenaujanginnik kisiani akiliutitsak kajusittitausimatillugu atâni Inuit maligatsanganut. Ammalu maligatsak kajusittisigiamut akilegiamut, angiutiKajuk atugatsanik kenaujanik. kingullia piusiuKattajuk maligatsak kenaujait akilegutet kavamaup kenaujanginnit kisiani akiliutaugiaKavut kavamaup kenaujanginnit ilingajut atuttaugusigigialinginnut.

Ammalu taimaimmat katimajitsuat kajusittisilippata kenaujanik, angiutiKajut atugiamik kenaujanik atuttaugialinnut, piluattumik atuttaugialinnut sunanut. kavamak tigusiligami tâkkuninga kenaujanik, kavamak kisiani atusok kenaujanik sunanut ilinganinginnut ilingapvigijanginnut, kajusittitausimaninginnut pitjutingita. Tamanna uKumaittoKattajuk aulatsinitsangit ministered nallituinnanga minister atujuk kenaujanik sunanut angiutausimangitunik kenaujani ministeriuvuk atujuk kenaujanik sunanut angittausimangitunut atâni Maligatsasuammi ammalu angiutausimangitunik atâni kenaujait Aulatsivillagimmi PikKujangani. ÂkKilugu namminik piusiujunut, piusiKaguvit aullasimallutit kenaujanik atugatsanik Kinuagisimallugit atugatsatit atugunni namminik piusinnut,ubvalu namminik atugunni, tagga atulikKutit atulukadlugit kenaujait. AtulikKutit kenaujanik ilingajunik atugialinnut kavamami aullasimallutit ammalu suliansanut ilingajunik taimâtuinnaulungituk ammalu angiutausimangitut, tamanna tammaniujuk atulukannimut kenaujanik. Taimaimmat tamanna taimailingajuk tamanna Kaujijautijaga uKautigillugit kenaujait Aulatsivillagimmi PikKujangani sakKititausimajut atuttaugatsautillugit sunanut sakKititsinik katsungaigutiKanninga kavamaujuk, ammalu tamakkua piusiujut tammaniujut ammalu siKumitsijut SuliaKattet Maligatsanginnik ammalu aulatsinigijanginnik nigiuigijaugusingatut ministered. kenaujait Aulatsivillagimmi PikKujanga pigiallatâKattavuk taimaittunik piusiujunik, ammalu asiagugiallak pidluni sivumut. Imailigajattut kenaujani aulatautsiagalualluni. Kanuk tukilimmik uKavingâ? kenaujaKagajakKutit, \$500,000-tut ilingajumik inosuttuit pinguagutitsanganut aititausimajuk suliaKapvimut. Tamanna ilonnainut ilingatsiajuk. AngajukKaunet

katimajet pitsatuniKavut aulatsigiamik ubvalu Inuit kenaujanginnik atâni atugialinginni AngajukKaunet katimajet tigusigunnatillugit \$500,000-tut ilingajunik inosuttuit kenaujangit pinguagutitsangit, aulatsiluni KatsitogiaKammangâta atuttaugialet, ammalu maligatsaKasongummijut. Taimaimmat Kaujitigumatuinnavatsi piusitsini ammalu tukisiallusi Kanuk kavamami suliansait suliajiaugiaKammangâta, takunnatuinnagiaKangilasi kenaujanik, tâvatuak KaujimagiaKavusi AngajukKaunet katimajet pigunaningit ubvalu pigunnangingit sakKititsigiamut maligatsanik aulatsigiamik taimaittunik atugiamut. Ammalugiallak, AngajukKaunet katimajet pitsatuniKavut sakKititsigiamut Katsitut ubvalu kenaujanik akilittaugialinnik atuttaunitsanginnut ilingajut kenaujatsangit aullasimallutik ammalu asingit akilittaugialet aittotausimajut inummut pejaummat suliansanginnit taimaimmat ilonnatik apitsotet aullasimalluni atuttaugialet ammalu pigunnatingit sunanik aulatsigiamut pijagenninginnut tukungit AngajukKaunet katimajet Kaujisimajanginni. ImmaKâ, annait angutellu, tamanna uKautigigumakKaujaga. Nâjillunga uKausikka imailingajut. Akunialuk kamagilikKaujavit atulukanniujut. Kaujimavunga inuit takugumangit atulukajunik. Ajunnanginitsauvuk tâttunik KaKuttanillu maligatsaKagiak. Âhali, taimâk pisonguvusi. Auka, taimângungituk. SuliaKattet suliansangit, taimaigaluattilugu, ajunnamagittut nalunattodlutillu. Ammalu sakKiKattajut Kangatuinnak uKumaittut pitjutaujut-, ammalu ajunnanginitsait tâttoningit KaKuttailu ammalu uKumaittut pitjutaujut sinannautillugit. Taikkua pitjutaujut maggojok ikKaumajaugialek. Atautsik kinakiak uJagatsiaKajuk. Taimaimmat kinakiak pitsatunilik, ilonnâgut, Kanuk pigiamik. AngajukKânguluaKattajuk

ubvalu Sivulittik Minister, Minister kenaujaliginimmut ubvalu Aulatsiji. Tâvatuak ujugatsiaKainnavuk. UjugatsialiakKânak, kamagiaKakKânak taimaittunik Kanuk pigiamik, uKautjigiavatsi tigusiaKajusi uKautjigiagutimmik, uKautivatsili KaujisakKulusi, ammalu uKautivatsi maligiaKajusi maligatsanik Kaititausimajunik uKautjigiagusittigut ammalu Kaujisagamut piusiujutigut. IkKaumagiaKavusi ujugatsiaKajuk. Nakummek.

MR. UKÂLATTI: Mr. Pottle, apitsotitsaKakKogavit ubvalu uKausimmik.

MR. POTTLE: UKagumatuinnavunga, Mr. katimatitsijek, ilingajumik Veryan uKausigikKaujanganik kenaujait Aulatsivillagimmi PikKujanganut. KaujimakKulugit katimajitsuat, Mary ikKaumaniattuk taitsumani uKâlattiutillunga suliaKaKatiKalaukKugut Blue Drop Performance Learning PikKujanganik. AkuniulikKuk taimanganit atulautsimalaugakkunit. Taimaidlunga uKâlautiKalâkKunga UKâlattimik ullumi aulatsijiuttitaugama tamatsumani taimaimmat ilangit asiangusimagajattut pisimajut Blue Drop Performance-nit ilingajunik tamâni tamanna ilijausimammat ilinnianik taijaujuk Ilinnianimmik ilitsinik. Taimaimmat uKâlaKatigilâttaga UKâlattik Kanuk UKâlattik aulatsijingugajammangât tamâni. Ilatsinialluta Kagitaujanik ilinniajunut kenaujanik Aulatsivillagimmi PikKujangani. Piujummagik ilinniagianga suliaKautik. Pitalik imminik ottugagiamut Kaujimajannik ilinnianinni. Tigusisok kenaujanik Aulatsivillagimmi PikKujanganik aviukKalugit allasimajut allasimajuni allasimajunilu kenaujanik Aulatsivillagimmi PikKujanganik. ImmaKâ senait ubvalu ailfait adjigengitut tagvani. Taimaimmat ilinniagegavit llanga l-mi ottotigillugu, imminik ottuganiallutit tamâni. Ainiiallutit kingullianut, pingajuanut, sitamanganut ammalu asinginnut ilanginnut tagvani, tâvatuak utittavigisotit, ammalu atugunnalugu ilinniagak Kangatuinnak pigumaguvit. Taimaimmat tamanna atummaginiattuk kiggatuttinut

katimajitsuanut. Taimaimmat tamanna uKâlautiginiattaga ilinnut, Mr. katimatitsijik. Nakummek.

MR. UKÂLATTI:

Nakummek, Mr. Pottle, ammalu nigiuvinga tamatsuminga tusagiamik ilinniagiammik. Suli apitsotitsaKajuKavâ, Kanuttogijaujunik ilingajunik takunnajumut, Mr. Veryan Haysom-imut? Taimaimmat nakummegumajaga Mr. Haysom tamaungasimammat Hopedale-mut uKâlagiattudluni katimajet lluingatillugit. ImmaKâ tamanna KaujigatsasiangukKaujuk ikajutsidlunilu tunijaujut. UKalagavit ikpasak ilangit nutângummata ammalu ilinnianik piujovuk. ImmaKâ ikajutsiniattuk katimajitsuanik kiggatuttinik aulatsigiamut suliaKapvisini. Mr. Flowers, immaKâ apitsotitsaKagavit ubvalu uKausimmik.

MR. FLOWERS:

Âha, pijâgingilanga, Mr. UKâlalte. Atautsituinnak ketakuluk, immaKâ, tukisititaugiamik ubvalu tukisigiallalinga Kaujimajaganik sivunganinitamik, KaujimalikKunga kajusittitaugiamut ubvalu atitâttausimajunik aullagiasiguvit kenaujatsanik ubvalu sunanik, ilonnatik aigialeit Sivulittik Ministerimut. Siagu taimaittunut aigiaKaKattalaungitut. Taimaimmat Kaujigumavunga tamanna nutângummangât uvattinut ilingajuk, ammalu taimailingainnialittuk isuKangitumut ammalu ullumut, ubvalu utittitaulâmmijuk atitâgigiamut adjigengituni piusini asiangusimammat. Ammalu asiangusimajuk ammalu uvanga-, Kaujimavusi, ilangani, Kaujimavusi, isumaKagama Sivulittik Minister akunialuk angiutiKattailigajammat pitjutautillugu aullasimagajanninga ubvalu namut aisimalluni ubvalu taimaittumik. Tamanna-, taimailingagiaKammat, ubvalu tamannatuinnak, Kaujimavusi, tukisiangiluadlaKingâ? Taimaimmat tukisittitautsiagumavunga ai.

MR. UKÂLATTI:

kiugunnatait apitsoteng?

MR. HAYSOM:

Tâna kiugunnangitaga. Tamanna kamagijaugialik iluanimiutanut kamajinut. ImmaKâ uKâlaKatigigialeit Sivulittik Minister ammalu AngajukKaunet katimajet tamanna Kanuilingammangât.

MR. UKÂLATTI:

UKâlakKulimmijaga Mr. Dan Pottle.

MR. POTTLE:

Nakummek, Mr. katimatitsijek. Tamanna piusiuujuk akuninit taimailingalittuk, ammalu tamanna piusiuugumainnalauttuk, tâvatuak Kaujimajautsiangituk tukisiallugu Sivulittik Minister atitâgigiaKaninga aullagasuajuit kenaujanginnik ammalu asinginnik. Âhammarik, Sivulittik Minister atuinnaungipat, tamânengimat akilittaugajangitut. Nallituinnanga AngajukKâk ubvalu Minister kenaujaligijini atitâgisot, Kaujimattituaguttigu Sivulittik Minister taimâk pisimajugut aullasimanningani. Ammalu aullagiamut ammalu Kinugautet

aullagiamut ammalu kajusittitausimallutik Sivulittik Ministerimut tunijaukKâtinngit Kinugautet kajusittisinitsanganut. Nakummek.

MR. UKÂLATTI:

Nakummek, sir. Ilatsigiagumavit sunameng, ilingajunik Ministerinut ammalu AngajukKaunet katimajinginnut, ilatsigiagumavisi sunanik ilingajunik kiggatuttinut ammalu/ubvalu AngajukKânut ubvalu katimatitsijinut?

MR. POTTLE:

Silatingani AngajukKaunet katimajet, ingiggagiamut Kinugautet ammalu asingit ilingajut Kinuganimmut aititaujutsauvut SuliaKapvinganut kenaujaligijet Nainimi aitillugit Dottie Ford-imut, ammalu Dottie kamaniammat tamatsuminga. Ammalu, ilâli, Kaujimavusi, tunitjigutsi ammalu Dottie kajusititsisok tamatsuminga. Ammalu KaujimattisigiaKappat Aulatsijimik, taimâk pigiaKammijuk. katimajitsuanut ilingappat ammalu sunatuinnait ilingappata katimajitsuanut, UKâlattik atitâgigiaKavuk. Silatingani tamatsuma, sunait ilingangitut katimajitsuat suliatsanginnut, ilingappata kiggatuttaujunut suliatsanut ubvalu suliatsanut ilingajunut nunatsini ICG ubvalu Inuit Nunalet kuaparesanganut aigialet kajusillutik SuliaKapvinganut kenaujaligijet aitillugit Dottie-mut.

MR. UKÂLATTI:

Nakummek, sir, tamatsuminga tukisititsigiagavit. Asinginnik apitsotitsaKavâ? UKâlakKulimmijaga Patricia Kemuksigak.

MS. KEMUKSIGAK: Nakummek, Mr. katimatitsijik. kingullipâmik uKâlanigavit, Veryan, uKakKauvutit uKautigiattaugiaKannisinik ammalu apitsulutit apitsotitsaKaguvit. kinamut uKautijaugiaKavitâ ammalu kinamut Kaujिताullutâ? Magguilingajumik apitsotitsaKavunga.

MR. HAYSOM: ImmaKâ kiujaugiaKavutit kamagillugit nanimiungummangâppit. kiggatuttet AngajukKaunet katimajet, sivullipâmik uKautigiattaugajakKutit immaKâ AngajukKâmut ammalu Sivulittik Ministerimut ammalu Minister kenaujaliginimmut. Kiggatuttiulusi katimajitsuani, sivullipâmik aigajakKutit UKâlattimut. Kiggatuttiuguvit Inuit Nunalet kavamangani, sivullipâmik aigajakKutit AngajukKâmut, kaunsalinni katimajuguvit. Ubvalu AngajukKânguguvit, taimâtsainak pigajakKutit Ministeriullutit, SuliaKapvinganut kenaujaligijet sivullimik, Minister kenaujaliginimmut ubvalu SuliaKapvinganut, ammalu taimâtsainak Inuit Nunalet kuaparesanginni. AigajakKutit sivullimik Minister kenaujaliginimmut ubvalu SuliaKapvinganut kenaujaligijet. Taimaimmat tamanna taimailingakKotuk, ammalu KaujimattitaugiaKappat Maligatsaligiup suliaKapvinga ammalu tamanna taimailingagialik ammalu isumangagut ubvalu uKautjigiagusingatut aigiaKagajattut Loretta-mut ubvalu Mark.

MS. KEMUKSIGAK: kingullia apitsotiga, tammasimajuKappat ubvalu siKumitsijuKappat SuliaKattet Maligatsanginnik, kinamut inittitauligajakKa katimajitsuani kiggatutteng?

MR. HAYSOM: Aititaugajappata inittisigijinut katimajinut, inittisigijet katimajet âkKisigajattut inittisigutimmik atuttaugialimmik, ammalu tamakkua pitaKagajattut inittitaulluni uKautjigiagusittigut pejauulluni suliaKapvimit ammalu asiagut. Ammalu uKautjigiagutittigut pejauulluni suliaKapvimit kisiani tamanna kamagijausok katimajitsuanut. Taimaimmat, kamagillugit Kanuk pilukasimaningit, nallituinnangit suliaKaKatingit ikKatuigiaKavut ilonnâgut, ubvalu katimajet suliaKaKatingit

ikKatuigiaKavut ilinnik ammalu uKallutik Kanuk, suna
piunitsaugajammangât uKausik, Kanuk sittutitsiutiugajammangât.

MR. UKÂLATTI:

ApitsutuKagumagunnaiKâ? Ammalu, nakummek, Mr. Haysom.
NukKanialigatta katimajet Iluinganingit utilluta katimajitsuanut.
katimautitsak 2, "Ilitagijauningit Tusâgiattusimajut." kinatuinnak
kiggatuttik ilitatsigumammangât tusâgiattusimajunik inunnik ullumi?
TujummiKungitakka tusâgiattusimajut ullumi ammalu nakummelugit
KanuttogutiKammata katimajitsuanik. Katimautitsak 3, "Minister
UKausingit." PitaKava minister uKausinginneng? UKâlakKulimmijaga
Nittunattuk Richard Pamak, Minister IlikKusiliginimmut,
Pinguatuliginimmut Niuggunimmulu.

MR. PAMAK:

Nakummek, Mr. UKâlattek. Ilangani katimanigisimajattini
uKautjilaukKunga katimajitsuanik Silpa Suarak tigujausimaninga
ilaugiamut Nunavut Sivunisavut, Nunavut Sivunisavut âktani takKini
ilinniatitsiKattajut iniKadlutik Ottawa-mi. Ilingajuk inosuttunut
atuinnaguttigumajunut ilinnialutik ilisagiamik suliat augajattunik
pivitsaujunik sakKititauKattajut Nunavut Nunamik Satusaijet
AngiKatigegutingani. Ullumi Kuviasuvunga Kaujitillusi ammalu asianik
ilaujuKalimmijut. Atinga Eva Obed, ammalu tigujausimajuk
ilinniavimmut. Taimaimmat pitsiaKujâkka Silpa-lu Evalu ilinnianimmini.
Mr. UKâlattek, pivitsaKagumagivunga nakummelunga katimajitsuanik
ullumi. KaujimakKujigivunga kiggatuttik KipukKami, Tyler Edmunds
mâannaKamik pingajungauluttuk jârimi mikigiannianimmut
pilluangunikisautitillugit pigianningani October Happy Valley-Goose
Baymi. Kaujimagivunga pijagelaunna sitamangaudluni aggâni
pilluangunikisautitillugit agvani 2008-mi. Tyler kamaKattamijuk
appalijinik KipukKami ikajuttiKadluni Jim Goudie-mik ammalu Grant
Gear. Sivullipâmik salutijaga Tyler ilauKatausimaninga
pilluangunikisautijuni ammalu pigasuaKattaninga ilaudluni taimaittuni
pinguajuni KipukKami. Kuviasuvunga sanianelaunginama uvannik

takusappat kingungani, nigigajalilaugama pujunginnik. Taimaimmat nakummek, Mr. UKâlatte.

MR. UKÂLATTI: Nakummek, Nittunattuk Richard Pamak. UKâlakKulimmijaga Nittunattuk Patricia Kemuksigak, Minister Ilinnianimmut ammalu kenaujaliugiamut Pivalliagutitut.

MS. KEMUKSIGAK: Nakummek, Mr. UKâlatte. Ulummi tunitjigumavunga kenaujaliugiamut Pivallianiujuunik SuliaKavinga Ilinnianimmut kenaujatigullu Pivallianiujuunik. Mr. UKâlatte, John Lampe tigujaulauttuk kenaujaliugiamut Pivalliatuligijingita SuliaKapvingani aullaigatsanik niuviatsanillu pivalliajutsautillugu. Pigiasilauttuk October 6-mi ammalu suliaKaniattuk tikillugu Mertz 31, 2015. Dana Pamak tigujaulauttuk kenaujaliugiamut Pivalliatuligijinginni aulatsivillagingani ikajuttisautillugu ammalu tâna annak, suliaKaniammijuk Mertz 31, 2015-mut. Service Canada. Nainimi Ikajuttet Suliatsanik suliaKalimmijut, pigiasipvisanga upalungalaugaluattillugu. Rutie Dicker ammalu Boas Bennett tigujausimajok nunalinnik ikajuttisautillugit kiggatullutik Service Canadamik tamatsumani suliatsumi. Tamammik Rutie ammalu Boas, angutik ikajuKattaniattillugu, ilinniatitaullutik ammalu kamagijaugiaKalâttok federal kavamanganut pilukattailigiamut kajusittitaullutik suliatsuminni. Suli upalungajut Kagitaujatigut uKumaittoKattamata Nainimi. SuliaKajut Service canadami sittutitsigasuallutik tamakkuninga, tâvatuak inuit Kaujimammata Nainimi, Kagitaujait piungitoKattamata. Service Canadami ADDDDM, Sarah Filbee ammalu maggok suliaKattet, Nainilialauttok pigianingani October Kimiggugiattudlutik initsanganik Nainimi Ikajuttet Suliatsanginnik

ammalu tusaniadluta taikkunangat asinginni Nunatsiavut
nunalinginnit uKumaitsaKattaningit nunalinni pitâgasuagiamik
federal kavamanganit sollu Implaimantinik, SIN nomaranginnik,
Ittusiutinik asinginnilu. Tikisimajut katiKatiKalauttut Nunatsiavut
kavamangata sivukkatattinginnik ammalu kiggatuttinik Nain Inuit
Nunalet kavamanganit. UKâlaKatiKalauttut AnânuKatiget
Tuminginnik, katiKatiKadlutik Jens Haven Ilinniajuit
katimajinginnik. TakugiattuKattadlutik Service Canada
kiggatuttingit piunitsamik tukisilauttut uKumaigijauKattajunik
ikajuttaugiamut Service Canada ikajuttaugutinginnut
uKâlagunnasianginik pititsitillugu, KagitaujaKangimut ammalu
asinginnik pitjutajunik, ammalu uKalauttut ottugasuanianniminik
ikajugiamik avittusimajunik pitâsongugiamut
pigumajautsiamagittunik federal ikajuttaugutinginnik. Mr.
UKâlatte, kenaujaliugiamut Pivalliatitsinimmut SuliaKapvinga,
ammalu, ilauKataulaukKunga Newfoundland Labradorimilu
katimaniammata 2014-mi. TunitjjuKatillugu ammalu apitsotinik
ammalu kiujauKattadlutik sunait pitjutajut sollu ununnigijangit
ammalu suliatasait, ilikKuset siagunitaillu, aulatsinik ammalu inuit
maligatsangit, avatet ammalu nunamiutait pivianattuit ammalu
nunalinni pivallianet. Mr. UKâlatte, kenaujaliugiamut pivallianik
suliaKapvinga ullumi âkKisuigiallajuk ilumiutanginnik Inuit
Namminik kenaujaliugutilet AtiKautinginnik sulijunik
Kaujisapviusongutillugit atiKautimejut Inuit namminik
kenaujaliugutilet. Kaujisattik tigujaulâttuk Kimiggugiamut ammalu
piusiumitigasuallugit ullumi Inuit Namminik kenaujaliugutilingita
AtiKautinga. Kaujisattik apigijaulâmmijuk âkKisikKulugu
atuttaugatsamik Kagitaujatigut allaKattalutik tamânejunik Inuit
namminik kenaujaliugutilinginnik Nunatsiavummi prâvinsimi

ammalu Canadami. Kagitaujatigut Kaujigatsait ikajutsiniammata
aulatsigiamut ammalu kamagiKattalugit namminik
kenaujaliugutilet pivitsangit Inuit namminik kenaujaliugutilingit.
katimatitsilauttut Raytheon Octoberami, nutâk kampaniujuk
kamaKattajuk taggâni taggisimajunniutinik. katimautiKalualauttut
suliatsanik suliatsaugajattunillu nutâmi kampaniujumi.
Tugâgutilet tatattuigiamut tamâginni suliatsani
pigumajaummagittut pisongugiamut ilauKataullutik Inuit
namminik kenaujaliugutilinginnut. Mr. UKâlalte, Namminik
kenaujaliugutilet Pivalliaunimmut katimajingit. kenaujaliugutilet
Pivalliaunaingita suliaKapvinga uKâlaKatiKasimalittuk Vale
kamagiamut nutânik suliatsanik pivitsaujunik Tasiujatsoak
Suliatsanginni nunaup atânogajappata. Kaujitsiutik
Kanuilingalimmangâta nunap atâni ujuganniigiamut
pivalliaunaingit tunijaulauttut suliatsait pivalliaunaingita
katimajinginnut katimaniammata. Tunitjiniusimajut ilonnainik
piusiuKattajunik suliatsaujunik pivitsaujunik. Vale Kinugammijuk
tigumianimminik asinginnik Kaujigatsanik katimattitaullutik Inuit
ammalu Innu suliatsangit mânnakut sivunitsatinni, nigiujuut
sivungani Inovia. SuliaKaKatiKatsiagiaKavugut Inuit namminik
kenaujaliugutilinginnik ikajugiatsangit atuinnaguttitillugit
Tasiujatsoami nunaup atânogiamut tamanna angijummagiummat
pivitsaujuk. Kinugautik Inuit Namminik kenaujaliugutilet
AtiKautingani Kimiggutausimalauttut katimajinut. SuliaKapvinga
ilauKataummijuk uKâlaKatigeni namminik kenaujaliugutilet
Kanuttogijanginnik tigusigiamut kiasalenittâviuKattajumik Rigolet-
timi. Mr. UKâlalte, Nunalet kenaujaliugiamut Pivallianingit
Suliatsait, ubvalu CEDP. CEDP-ekket Suliatsanik Kimiggutet
katimajet tikitausimajut ammalu Kimiggusimadlutik unuttunik

suliatsanik taimanganit Septembaulaummanit. Taimanganit 2014 Naini tikitausimajuk 102,845.00, Hopedla, 9,959 ammalu Rigolet, 69,490. Suliatsami suli tikitausimangit Kinugautimmik Makkovimmit ubvalu KipukKamit uvani jârimi. Asingit suliatsait atânejut suli isumatsasiugutaugialet CEDP suliatsanginni. SuliaKapvivut aittuisimajuk Torngat Oganniatuligijinginnik iKalunniagutitsanik 150,000-tut. SuliaKagutausimajuk 43,000 paunninik iKalunik aullaigatsanik ammalu 13,000 paunninik iKalunik Nunalittini Kuatsevinginnut. kenaujaKattisilaugivugut Tornganik iKalunik Kaujisanitsanginnut niKitsatallutik, salummasallugit ammalu aullaiKattalugit iKaluit. AittuilaukKugut Gros Morne-mit pisimajunik moose omajunniatautillugit Nunalet Kuatsevinginnut 50,000-tut. Kenaujatigut Pivallianimmut suliaKapvinga aittuisimmijut utittigiaKangitunik kenaujanik \$30,000-tut jâri tamât aittuKattadlugit pingasuni jârini atuttaugatsanik akiliusiatsangata Inuit Kaujisattingita Ikajuttinganik iniKajuk Nainimi. Mr. UKâlalte, AnânauKatiget Tumingit Avittusimajut Inuit Annait katutjiKatigenga ikajuttiKadluni kenaujaliugiamut Pivalliajuit suliaKapvinganik ammalu Annait Pivianattunik Pivallianingit tunitjilauttut Kinugautimmik aitidlugu katutjiKatigenginnut Annait Canadami, “Sivuppianingit Inuit Annait Labradorimi Ujaganniavini SuliaKapvini.” Kenaujaliugiamut Pivallianimmut suliaKapvingit ilauKatauKattajut Aulasijinganut Niuggutuligijet Kanuk pigajammangâta ilauKataujut Rigolet-timi atuinnguttisigiamut Mealy KakKasuanginni SilakKijapvingani. Mr. UKâlalte, uKautiKaniagivunga ilanginnik sakKilâttunik pivallianiujunik suliaKapvimi. Nunalet niuggutitaulâttut pannaitaujut nâningani 2014 tunitjigiamut sakKilâttunik katimanimit uKâlautigillugillu

kenaujaliugiamut Pivalliagutet sivullipautijaugialet
Nunatsiavummi. Tunitjiniulâttuk manna kamagijaujuk
kenaujaliugiamut Pivalliagutunik kamajinut. Kenaujaliugiamut
Pivallianet suliaKapvinga kamajuk katingatitsigiamut Kinugautinik
allasongugiamut katimatitsilutik ilonnaini tallimani Inuit
nunalinginni ukiungutillugu 2014-15. Ilangit kiggatuttet
kenaujaliugiamut Pivallianiujujumi kamajingit ilauKataulâttut
Taggâni katimaniulâttumi ammalu TakugatsaKallutik S. John'simi
Januaraulippat katiKatiKallutik ammalu piusiumitigasuallugit Inuit
namminik kenaujaliugutilingit. SuliaKapvik namminik
takugatsaKapviKalâttuk. Pitjutigillugu Muskrat Fallsimi suliaisait,
piggagasuagutjiKattavugut ikajuttaugutilittinik
suliaatsatâttagasuadlugit Muskrat-imi. PitaKangikalualluta IBA-
mik, prâvinsi uKasimajuk tigulagiamik Labradorimiunik.
UtakKivugut Kaujitaugiamik Nalcor-ikkunut Kaujigiamut Katsinik
inunnik ilinniatitsigiaKammangâtta LATP-kutigut aittutauKattajut
sulia Saulâttunik Muskrat-timi. Mânnaujuk kititangit suliaKattet
Muskrat-timi Inuit ikittumaget. Kisiani 3.5-ituinnait percentingit
suliaKajut. Nakummek, Mr. UKâlattek. Ilâ, ammalu
uKagumakKauvunga, tamanna nâmmangituk. Nakummek, Mr.
UKâlattek.

MR. UKÂLATTI:

Nakummek Nittunattuk Patricia Kemuksigak. UKâlakKulimmijaga
Nittunattuk Darryl Shiwak, Minister Nunaligninimmut Nunamilu
Pivianattunik.

MR. SHIWAK:

Nakummek, Mr. UKâlattik, Lower Churchill Lake Melville-mi Suliatsak.
Prâvinsimi ammalu Federal Idluatsaiviligijingit Kimiggusimajut ilingajunik
Lower Churchill Suliatsanginnik September-ami ammalu October-ami,
tamâginni. Akunimmagik suliaGilauttavut Kaujisadluta. Tamâginni

idluatsaiji takusimajuk piusiugasuajunik, tâvatuak nigiuvgut
Kaujitaugiamik Kanuk pigasuammangâta tamâginni piusiugasuajonni
Kangakiak sivullipâni pingasuni takKiuniattuni Nutâmi Jârimi. Uvani
ukiatsâmi pijagelaukKugut wogi nâdlugu nunami Kaujisadluta Lake
Melville-mi kamaluadluta nunanganik ammalu sunanik ilingajunik
Kanimmasiugunnatunik ammalu kusitsiasajanik ikajuttiKadluta
Ilinniavitsuanganik Manitoba ammalu Memorial Ilinniavitsuanganik.
IkajuttiKadluta Dr. Sunderland Harvard Ilinniavitsuanganit, ammalu
pijagelaummijavut suliasimajavut nigijauKattajut kaujisadlugit ammalu
nujanik ottugadluta kusitsiasajaKammangâta Upper Lake Melville
nunalinginni ammalu Rigolet-timi. Mr. UKâlattek, Kaujisadlutik
kamalauttut akungani Katsinik Kanuittunillu ogannik puijinillu
nigijauKattajunik Inunnut Lake Melville-mi ammalu Kanuk unuttigijunik
kusitsiasajaKammangâta. Tamanna suliangujuk ingiggainajuk
Kaujisannikut kamannikullu SuliaKadlutik pivallianikkut ilinniavitsuat
ikajuttigijautillugit piunitsamik tukisiagamut ilingajunik
kogutjauKattajuni attuiniugajattunik Lower Churchill Suliasigijautillugu
ammalu Inuit nunalet inositsiagittontsanginnut inotsialutillu.
PigiasilaukKugut NigijauKattajunik Kaujisadluta ammalu Nunait
Ottugattautillugit Mertz 2014-mi. Ununnisait 1300-nit Inuit ilagellu
Rigolet-timi, Northwest River, Happy Valley-Goose Bay ammalu Mud
Lake ilauKataulauttut Kaujisannimi ammalu ununnisait 500-nit nujangit
ottugattaulauttut. 26 Inuit Kaujisattet ikajuttingit tigujaulauttut
suliatsami Kaujisagamut nujanik ottugallutik. Mâna Kaujisasimajavut
kamagijaulittut ammalu nigiujut aikatagamik nunalinnut
Kaujitsigiattulutik sakKisimajunik upingasângulippat.
Nakummegiallagumavunga ammalu nakummelugit Inuit Upper Lake
Melville-mi ammalu Rigolet ilauKatausimajut niKinik Kaujisattiluta
ilingajunik kusitsiasajaKammangâta Inositsiagittotitsigasuannimi
Ulugianattunik Kaujisajuni. Tamanna pimmagiujuk ikajutsiniattuk
uvattinik tukisiatsiagamut ilingajunik akungani Inuit
inositsiagittotitaugasuanningit ammalu sakKijâjuut sivunitsatinni

nunamiutait avatini Lake Melville-mi. SakKijânginnaniattut Nunalinni kamagijausimajut, Mr. UKâlatte, kajusimavugut suliaKagiamik tamatsuminga sakKititausimajumik. Pimmagiuluak, suliaKapvivut kamatsiasimajut suliatsanik sivuppiatitsigiamut, ammalu nakutsavugut suliaKapvinik ikajusimajunik. Kamagisimalittavut ilonnanga piusiusimajuk nutânik sakKijânginnaniattunik sungiutigiamut unuttunik tujummiuvitsanik illunik. Maggok sanilliget tungavet pitâgijausimajok Nainimi pivallianingitigut Nunatsiavut Suliatsangit. Nunanga suliagijausimajuk Nainimi ingiggainatuk, ammalu pijagettaulâttok sanilligek tungavitsâk uvani wogimi ammalu Kaujimattitaulâttut nunami tungavitsangata Kanuilingausitsanga. SakKijânginnaniattut SakKititausimajut ikajuttigetillugit unuttut katutjiKatiget ilautillugu SuliaKapving Inositsiagittotitsigasuannimut Pivalliataugutinullu kamagijausimajuk Makkovimmi pigianningani tagvani wogimi ammalu, kamagillugit pivallianingit, pigiasillutik KipukKami wogingani November 24. Pijagelâttut Kaujisanningit Makkovimmi ammalu KipukKami pitaKattisigunnaulâttut nunalinnik sakKititaulâttut inunnut atuinnaulillutik Inoviani. Kaujitsilâttuk uvattinik Kaujitsilutillu nallingit sanajaugiaKammangâta ammalu maligatsanik kamallutik pigumajaujunik ilingajunik taimaittunut ammalu kamagillugit niKitsagijaugunnatut. IkajuttiKalluta Minister Kemuksigak SuliaKapvinganik Ilinnianimmut ammalu kenaujatigut Pivallianimik, ammalu ikajuttiKalluta Torngat Oganniatuligijingita kuapanganik kajusimajut tunitjigiamik iKalunik iKalunniatausimajut Nunalet Kuatsevinginnolugit ammalu DHSD Suliatsangit ilonnaini nunalinni satjugiami. kamagijavut ilonnatik aullatigiangit iKaluit Nainimit Nunalet Kuatsevinganit ammalu KinigiapviuKattajuk Kuatsevik aulataujuk Hopedale Inuit Nunalet kavamanganut. Tamanna ilonnâgut suliagijaujuk suliatsani. TautsegutiKasimavugut iKalunik oganut NunatuKavukkunit, ammalu sivullipâk tikititaulâttuk 1500 paunnet ogait. Tamatsuminga KuviasotiKatsiavugut. Piusiumitigasuallugit niKitsait ammalu pitaKattisilluta niKitsianik ammalu sakKititsiluta oganniatitsigiamut

ammalu suliaKattisilluta ilonnâgut. Asiagut ilingajuk apitsotaukKaujuk
Minister Mitchell-imut, tâvatuak Mr. Mitchell, ippasak katimajitsuani,
uKautigianiattaga tamanna kiullunga uKâlallutik apitsotinni
apigiutigilauttait ilingajuk Upper Lake Melville-miunut ammalu
iKaluttâlâttut siagugiangulippat uKautigianiammijaga siagugiak ullâk.
Hopedale. SuliaKaKatigimmijavut Hopedale Inuit Nunalet kavamanga
ottugiamut ammalu piggagasuallugu prâvinsi atuttaulâttunik \$6 miliun
dâlanik ilingajut salummasaigiamut Hopedale-mi. Wogiulauttumi
ikajuttet aisimalauttut St. John'simut ikajuttiget katimaninginni. Nunak
salummasattaunitsanga pivalliajuk, ammalu suliaKajut nunami nunalinni
pijagesimalittut uvani jârimi. Mânnaujuk piggagasuagivugut
suliaKattisigiamik piunippaujukut sivuppialuta salummasattaunitsanga
Hopedale kangiani. Kinugalaugivugut prâvinsi katimattiKudlugit
nunalinni katimallutik Hopedalemi atautsilonnet Minister ilautillugu.
Mânnali, tamammik Minister Avatiliginimmut AsikKitailinimmulu
ammalu Minister Labradorimi ammalu NunaKakKâsimajuk kamaji,
tamânejutsâk. Kinugavugut tamanna sakKiKullugu tagvainak
pigunnasituappata. Attutaunimmut ammalu Ikajuttaugutet
AngiKatigegutinga, Mr. UKâlalte, Tasiujatsoami Suliatsait ammalu
Torngat KakKasuanginni Silatsualimâmi SilakKijapvik. Katimalauttut
September 19, 2014-mi. Taitsumani katimaniammata
KaujtitaulaukKugut matuttausimaninga kântraktinga tigulagiamut
sivungani suliaKattisanik ejalukanut imailunillu ottugagiamik
tigulagiamut ammalu tamânegajattunik, ammalu Kaujtitaulaugivugut
FEL 3. Tasiujatsoami ujuganniavinga matuttausimajuk katidlugit 37
ulluit Januaraminit, ammalu mauttaudlutik pingasuit adjigengitut
suliaKapvet. Tamakkua pannaitausimajut matuttaugiamik.
kamatsiagiamut pitsiagiamut ilauKataullutik aullatitsiKattagiamut
maligatsanik prâvinsiup atuKattajangit kampaniujuni. Ammalu ikittuni
ulluni matusimalâmmijut Decemberami. Vale Kaujtititsilauttuk uvattinik
atuttauliaKititsinianniminik sivungani suliaKattet Ejalukanik Imialunillu
Ottugattaunitsangita Suliatsanginnik. Tamanna piusiujuk unuttuni

uganniavini aulatsjini ammalu asinginnik suliaKapvini suliatsanik. Uvattinik Kaujitsilauttut tamanna atuttauliaKilåttut nâningani September ammalu ammalu ilangauniiallun sivungani slialet kamagijauKattalutik ânniasiutinut. Mânnaujuk 44 percentinga suliaKainnatut sulialet Tasiujatsoami Inojut. Vale asiujsimajut ilisimatsiajunik sepanik âktaniungikuni siKallevimmi suliaKattinik ikittuni takKiusimalittuni. Suliatsanut ilinniatitsijuk SiKallegiamut 101 nigiujut pitâgjiallâlânniminik ununnisanik Inunnik ammalu Inuit ilinniatitautillugit tamakkuninga inuKangitunik inuttâtitsilutik akunimut suliatsanik. Vale kamaniattuk ottugalluni inosuttunik inunnik Kanuttotitsigiasmut ilauliaKillutik ilinniavitsuani ilinnialutik ilisimagialinginnik Kangautillippat ilisimaniallutik ilisimagialimminik ammalu aulatsigiamut suliatsanik. Vale pijagelittuk ilusitsanganik FEL 3 Kaujisagiamut nunaup atâni ujamaniagiamut, tamanna tunijaulauttut katimajitsuanut tunitijjuKaniammat tikigatta ippasak. NiKitsatagiamut Akiliusiat Pilukattausimajunik katimajet ilauttisijuk ullumi Ron Wood, katimatitsijinga ammalu Henry Lyall. Katimajet Kanuttojut tigusigiamik pingajutsanganik katimajini. Mr. UKâlalte, Torngat KakKasuanginni Silatsualimâmi SilakKijapviup IBA-nga, katimalautsimangitut Auggosiminit. kingullimik takunnautillutik katimagumajut Nainimi Fevruar 19-mit 20-mut 2015. Nakummek, Mr. UKâlalte.

MR. UKÂLATTI:

Nakummek, Nittunattuk Darryl Shiwak, Minister Nunalignimmut Nunamilu Pivianattunik. UKâlakKulimmijaga Nittunattuk Kate Mitchell. Pijâgingilanga. UKâlakKulimmijaga Nittunattuk Dan Pottle, Minister kenaujaliginimmut, SuliaKattinik Kagitaujanillu.

MR. POTTLE:

Nakummek uKâlattedek. Mr. UKâlattedek, suliaKajut pivalliasimalittut unutsiumitidlugit atuttaugialet Kagitaujatigut. SuliaKapvinga Nunalignimmut Nunamilu Pivianattunik, Nunatsiavut Suliatsangit ammalu Nunasiavut AngajukKaunet Kagitaujamelittut. IlauKataudlutik nutânut atugatsanut ilagiattausimajunut, katutjiKatigennimi Kagitaujait

sanajausimajut piusiumitidlugit. PivitsaKattisidlutik uvattinik nutângunitsaik ammalu atugiangit Kinijasongullutik ilonnâni Kagitaujammetunik. Mr. UKâlalte, tugâgutiKavugut SuliaKapvinga IlikKuset, Pinguanimmot ammalu Niuggunimmot ammalu Ilinnianimmot kenaujaliugutinullu Pivalliagutet Kagitaujanut iliukKalugit nâningani jâriup. Ammalugiiallak, IT suliaKattet sakKititsilâttut piunitsanik atugatsanik ilonnainut atuKattajunut ammalu unutsiumitillugit Kaujimajaugialet atugiamik Kagitaujanik. Mânnaujuk atuttautitsivugut atuKatigennimik Metwochini suliaGijanga Janice Vardy kamagiamut apitsotinik suliaKattitinit ubvalu angnigijaumajunit kiggatuttinit apitsotiKappata Kagitaujamettunik. KaikKujavut, Mr. UKâlalte, ilonnatik ilaukKulugit ilinniagatsanik. Mr. UKâlalte, uvani jâriuniattumi IT suliaKapvinga asitâgisimalittut ilonnainik Nunatsiavut kavamangata atuKattajanginnik. Takutsaungitogaluat sulisivut atuKattajut, nutât atugatsait atuinnaujuk ammalu atutsiadlutik ataKataujuk suliaKapvitinni ammalu aulataudlutik IT suliaKapvinganut. Ammalu, atuliaKilaukKugut Aliant Kagitaujatigut atajumik akungani aulatsivillagitta suliaKapvingani Nain ammalu suliaKapvitinni Happy Valley, Goose Baymi. Mr. UKâlalte, tamanna nutângujuk ilijausimajut ilonnainik âkKisingikaluattilugu pitjutaujunik Nainimi, pivitsaKattisujuk kenaujalgijittinik ammalu ilaliugutilinnik suliaKattinik ataKataugiamut atuttaugatsanut pigumajaujut aulatsiatillugit piujumik. Kajusimavugut Kaujisagiamut atuttaugunnatunik ammalu jârimi atuttausiasot asitsaugajattut ullumi atujattini. Nakummek UKâlalte.

MR. UKÂLATTI:

Nakummek, Nittunattuk Dan Pottle. UKâlakKulimmijaga Nittunattuk Greg Flowers, Minister Inositsiagittotitsigasuanimut Pivalliataugutinullu.

MR. FLOWERS:

Nakummek, Mr. UKâlalte. Kaujitsigiiallagumatuinnavunga suliaKapvinganit, Mr. UKâlalte. Pannainik katimanitsangit

SuliaKapvingani Inositsiagittotitsigasuannimut Pivalliaaugutinullu kajasimajuk katiKattagiamik pingasuittulutik. Kingullipâmik katimalauttut Octoberami. Pitjutinga katimajet kamatsiagiamut ilonnainik atuttaugatsanik tamânetsiagaluammangâta piusiumititsigiamut ikajutsilugillu piunippaujunik Kanuttogutijaujunik Inuit sugusinut, inosuttunut ammalu ilagenut. October 15-mi KinijalaukKugut sugusinik paitsigunnatunik Happy Valley-mi. Ammalu pitaKavugut ammalu Kimiggudluta pannaigiamut ilonnainut sugusinut Roddickton-imi nunalinni ammalu unutsivalliatillugit niugguKattajut utimut angigganginnut nunalinnut. UKumaitsajunik SungiutijaulukaKattajunillu kamajet pijagetainnalauttut maggoni wogenni suliaKadlutik Rigolettimi. Mânnaujuk St. John'simejut maggoni ulloni katimagiattusimadlutik 35-ngani prâvinsiup kavamangata suliaKattigit pingasunit suliaKapvinit; AES Inositsiagittotitsigasuannimut ammalu CYFS. Maggoni ulloni ilinniatitsilâttut 50-nik suliaKattinik Whitbourne-mi, âhali, ammalu tamanna taimailingajuk. Nakummek, Mr. UKâlattek.

MR. UKÂLATTI:

Nakummek. Suli asingit minister uKausitsalen? Taimaimmat nukKagalâkKujivunga pigiasiniammiluta 20 minotini, ailfaliak finifimi. Nakummek.

(NukKagalâk)

MR. UKÂLATTI:

katimautitsak 4, "kiggatuttet UKausingit." PitaKava kiggatuttet uKausinginneng? UKâlakKulimmijaga Richard Pamak, kiggatuttik Nainimit.

MR. PAMAK:

Nakummek, Mr. UKâlattek. Tikisimalauttuk Richard Riley, United State kiggatuttinga Inunnik Kaujimattisiji, tikilauttuk nunattinut ammalu tujummititsilaungimagittuk kiggatuttik Sean Lyall ammalu kiggatuttet Nainimi suliaKattet, Tullia AngajukKâp, Beni Andersen, kiggatudlutik

Nunalet kaunsalinginnik Nainimi. Tikitaulaugivugut Minister Kemuksigammut, uKakKaugama sivunganigiak Sarah Filbee, Service Canadami Ikajuttinga Tulliata Minister. Tikilauttuk Nainimut October 8-mi. kenaujaliugiamut Pivalliatitsijet suliaKapvinga ottugattaumik suliatamik suliaKattisijuk ikajuttigetillugit Service Canada ikajugiamut kavamamik Nainimi nunalinnit. Ammalu tujummititaulaugituk Nain suliaKattiginnut Minister Kemuksigak. Illuit Pitjutigillugit. Kiggatuttiudlunga, kamaKattavunga illunik pitjutaujunik nunalinni wogi tamât. Kaujimagatsi Nain Hopedalelu illuKatsiangimanik. Mr. UKâlattek, Kaujitigumatuinnalusi asingillu kiggatuttet katimajitsuani pitjutaujunik kamagisimalittakanik ammalu kajusimavunga kamagigiangit illusait sollu angutik akuni iniKasimalimmat Kimainnatausimajumi motakâmmi 75 ulluni. 26 ulluni tamakkunangat ulluni ukiungutillugu agganini iniKasimajuk. Maggok angutek iniKatillugik tupimmi asianik aivitsaKanginamik. Ittonitsak sinittagiakataKattadluni itsivautatsualinnut illulinnut. Nulettuit initsasiuKattadlutik unnuami initsaminik. Atautsik takulaummijaga trakkigani sinittuk. Aippagek sugusilek anikKujausimajok iniKasimajok 10 by 12 Kimatullivimmi imaKangitok kokviKangitok initsasiugianiannigâdlutik Upper Lake Melville-mut Kinigiallutik illusaminik. Ilaget pingasut iniKadlutik 12 by 14 Kimatullivimmi, ammalu, imaKangitok kokviKangitok. Mr. UKâlattek, tamakkua ilangit pitjutauKattajut takuKattajakka, ammalu suliaKattajut unuttunik taimaittuKavuk. Ullumi illusait sanajauKattajut Torngat Illuligijinginnut, Newfoundland Labrador Illuligijinginnut, NNG Illunik Sanagiattingit, ikajutsivalliKattajut. Mr. UKâlattek, ammalu Kaujitsigumagivunga katimajitsuani nutânik suliatamik iluani Nain SuliaKapvingani. Rutie Dicker nottausimajuk Allatimmit/Fonnik kiukatannimit Nunalet Kaujimattisijigilittanga ammalu suliataminik pigiasilauttuk Montâgimi, October 6. Tainna SuliaKainnaKattajuk, ilonnâgut atâni Nunatsiavut AngajukKaunet. Rutie Allatigilauttavut/Fonnik kiukatattigidlugu 19 jârini. Sarah Karpik nutâk Nunalet Kaujimattisijingita Aulatsijinga Nunalignimmut Nunaillu

Pivianattuit SuliaKapvingnai ammalu ilonnâgut ilatuinnanganilu suliaKaKattajuk. Tamâneniattuk pingasunut jârinut. Pigiasilauttuk suliaKainnatuk Montâgimi, September 29. Frances Murphy nutâk suliaKainnatuk ilonnâgut uKausinik aulatsiji atâni IlikKuset, Pinguatuliginimmut Niuggunimmulu suliaKapvingani ammalu pigiasilauttuk Montâg, October 6, 2014-mi. Dana Pamak nutâk suliaKainnadluni ilainnanganilu. Tilijausimajuk Mertz-imunut atâni kenaujaliugutet Pivalliatuuningita Ikajuttinga atâni Ilinnianimmut kenaujaillu Pivalliatuuningita suliaKapvingani ammalu pigiasilauttuk Montâg, October 6-mi. Minister Kemuksigak uKakKaumat, John Lampe nutâk ilonnâgut ilainnanganilu suliaKattajuk tilijausimajuk Mertz-imunut, Niuviatsanik Kinijattik atâni Ilinnianimmut, kenaujaliugutinut Pivalliatuujut suliaKapvingani ammalu pigiasilauttuk suliaKainnatuk October 6-mi. Christina Goldhar nottitausimajuk Avatinik Paitsigiamut Kaujisattimit nutâmut suliaKainnaluni suliaKattajuk, Aulatsijiulluni Maligatsanik atâni Nunatsiavut Allatingata Auggos 4-mi. UKautigigumatuinnajagalu, ammalu, unuttunut suliaKattinut KimattausimalikKugut. Toni White Kimailauttuk suliaKainnatuk UKausinik Aulatsijiulluni Auggos 29-mi tamâni suliaKakKâdluni âktani jâri. Joe Dicker nukKaujilauttuk suliaKainnatuk Nunalinni Inunnik Kaujimattisijiulluni. IlauKataulittuk uvattinut ullumi mâni katimajitusani AngajukKângulluni Nainimi, suliaKapviminekKâdluni sepani jâri. Josh Pamak nukKaujilauttuk suliaKainnatuk Niuviatsanik Kinijattinut ammalu aisimalittuk Nova Scotiamut pijagegiattudluni ilinniaivitsuami ilinniajainik Auggos 18-mi tamâni suliaKakKâdluni atautsimi jâri. Mr. UKâlatte. Mr. UKâlatte, pivitsaKagumaligivunga mânmna salutitsilunga kitsajunik Aggekut ammalu Obed ilaget mânaKamik ajulilaummat Ambrose Aggek. Ammalu salutitsivunga Merkuratsukunik, Dicker ilaget ammalu Tony Mesher ilangillu mânaKamik ajulilaummat Regina Merkuratsuk. UKumaittonginnatuk ilagenut ammalu nunalinnut ilonnâgut naglivijainik asiujimmata imminiannimut ammalu ilonnatik nunalimmiut ikajuttigeKattavut saipatsainikkut. Piujummagik

takugiamik immigojunik nunalinni akilittutaugatik ikajuKattajunik
nunagijaminik ikajuttiget suliaKattigejuk ilaitsimata
ikajuttaugiaKadlutik. Taimâk uKâlagegama, Mr. UKâlatte,
nakummegumavunga Nain Care, kenaujaliuKattangituk katutjiKatiget
unuttut annait kajusimaKattajut kenaujaKattisidlutik nunalinni ammalu
ikajudlutik ilaget ikajuttaugiaKalimmata. Salutitsivunga kitsajunik
ilagenut ajulilaummat Bob Voisey mânaKamik ajulisimalauttuk Happy
Valley, Goose Baymi. Bob ajulilauttuk ittuKautimedluni ammalu
iluvitaugiattulauttuk angiggaminut Nainimut. Piugitsialauttaga
sulijugitsiadlugulu Bob ammalu, unuttut asikka nunalinni.
NipaKalaungituk ikajunginnadluni kinatuinnamik pigunnaligami.
Pijagellunga, Mr. UKâlatte, salutitsigumavunga tamâginnik
angutikulunnik annakulunnilu pattanguagiattusimalauttunik Nainimit
sâlaKasimalauttut sivullipaudlutik avittusimajut pattanguatillugit
pilluangunikisautidlutik Labrador Citymi wogiup nânigilauttangani,
ammalu aullalâmmijut piluangunikisautiKataugiattulutik prâvinsimi
pattangualippata pilluangunikisautillutik November 29-mi Arnold's
Cove, Newfoundlandimut. Kanuttogutitsiajakka Nain Huskie
pinguattingit pitsiaKullugit. Atsuse, Huskies, atsuse. Nakummek, Mr.
UKâlatte.

MR. UKÂLATTI: Nakummek, kiggatuttik Nainimi, Richard Pamak. UKâlakKulimmijaga
kiggatuttik Canadamiunik, Mr. Dan Pottle.

MR. POTTLE: Nakummek UKâlattedek. Mr. UKâlattedek, kiggatullugit Canadamiut
kiggatuttingata SuliaKapvinganit, salutitsigumavunga kavamattinik
ilingajumik Kaijumut nainangani ullusiunnisanga Nunatsiavut
kavamanga ammalu atuttaugiasilaummaninit Labradorimi Inuit
Nunamik Satusaijet AngiKatigegutinga. Mr. UKâlatte, ajunnavovuk
uppigiamik tuavijumik tikiligemmata nainangani ullusiunnisak
timingutitaulaummanit kavamavut December 1-mi. Nakummevunga
ilonnainik sivungani sivukkatattiuKattalauttut, mânnalu sivukkatattivut,

Nunatsiavut kavamangata suliaKatingit ammalu ikajuttaugutilet Labradorimi Inuit Nunamik Satusaijet AngiKatigegutingani suliaKappâKattamata mingutulautsimagatik kamatsiadlutik kavamavut aulatsiaKullugu atuttausiallunilu piusigigialingatut. Mr. UKâlatte, November 29-mi Canadamiunik kiggatuttet SuliaKapvinga katingatitsilâttuk St. John'simiunik St. John'simi ullusiullutik nainangani ullusiuttautillugu Nunatsiavut kavamanga. Mr. UKâlatte, kajusimakKujivunga ilonnainik Labradorimi Inuit ikKaumakKulugit Kanuk tukiKammangât tâna pimmagiujuk ulluk ammalu nakummelugu Kakkeviak, piulijivut, aulatautsiaKattagatta paigijaudlutalu ilonnata. Mr. UKâlatte, nakummegumagivunga Royal Canadian Legion Command SuliaKapvinganik ikajutsilaummata Nunatsiavut kavamanganik ilauKataugiamut IkKaumajaunimmut Ullungani ullusiutillugit St. John'simi. Mr. UKâlatte, KuvianammagilaukKuk ilisigiamik ikKaumautimik nalunaikkutamik piguttumik kiggatullugit Nunatsiavut kavamanga ilitagijautillugit Inuit unatattunesimajut sivunittini ammal ullumi ilauKataujut nunatsiavattini. Nakummek, Mr. UKâlattek.

MR. UKÂLATTI: Nakummek, uKâlakKulimmijaga katimatitsijinga Sivunivut Inuit Nunalet kuaparesangani, Trudy Mesher-Barkman.

MS MESHER-BARTON: Ullâkut, Mr. UKâlatte. UKagumavunga Sivunivut HEM-elauttut October 1-mi angnigusuniagatta angajukKauKatigetsatinnik. Taimaimmat ilonnainik angajukKauKatigeKalikKugut, tâvatuak pititsitillugu ilageluadlanik maggok suliaKattiumanik kavamamut, asianik angnigusugiallatitsigiaKalaukKugut November 12-mi. katimalaukKugut angnigusudluta maggugiallânik kiggatuttisânnik. Taimaimmat iluittolittut angajukKauKatigevut. Ammalu tigusilaukKugut agvatuinnangani suliaKaKajutsamik aulatsijiulluluni Kuatevimmik ammalu nigijugut Kanuk pigajammangâtta kenaujattâgiallagiamut asinginnik suliatsanik sakKititsigumagatta nunattini. Unuttunik

KanuttojuKavugut. Ikittunik Kagitaujatigut allaviulaukKunga piujunik isumagijaujunik Kanuk inuit takugumammangâta Kanuk pijunik, ilinniagamik ilauKataugumajut, ilinniagumajaminik. Ammalu nigiuvgut pigiasigiamik tamatsuminga mânnakut sivunitsatinni. Ottugattaugatsamik sakKititsilaukKunga kina moosenut laisinsittâgajammangât moosesatinnik, tâvatuak kiujaulaugilagut, ammalu immaKâ ullumi suli nâmmasialungimat pinniagiattugiamik moosetsiugiagamik. Nigiuvgut tamanna asiangulânninganik ammalu aullagunnalâttugut sikidottigut. Ammalu aippatuinnanga ukautigigumajaga salutitsigumavugut inosuttumik annamik nunattinit. IkajuttaugutiKangituk, tâvatuak tainna, Kaujimavusi, piugijautsuajuk iniKajuk Nainimi. Piujuaggulak annâgualuk. SâlaKasimajuk Miss Pitsiasimananut Newfoundland Labradorimilu ammalu ilonnata pisittotigingimagittavut, salutigumatuinnajaga kiggatullugit taggamiut sitjangani ikajuttaugutilet. Nakummek, Mr. UKâlattede.

MR. UKÂLATTI:

Nakummek, ukâlakkulimmijaga Gary Mitchell, katimatitsijik NunaKatiget Inuit Nunalet kuaparesangani.

MR. MITCHELL:

Nakummek, Mr. UKâlattedek. Sivullipâmik, uvangalu, nakummegumavunga Tyler piujummagimmik pisimalaummat Mikigianniatet Sukkalinikisautitillugit pingajungausimalaummat, ammalu ilonnatik nakummejakka ikajuttaugutilet ilausimajut Mikigianniatet Sukkalinikisautitillugit. Tamanna piujummagik, ammalu piujovuk inuKutivut ilauKattamata taimaittunut takutitsidlutik Kanuk pigunnataminik pigumaligamik, ammalu taimâk pisot. Inositsiagittommat ammalu takutitsigunnadlutik asiminik ijuasittaugunnaniminik asiminut taimâk pigutik, Kaujimavusi, inositsiagittomattuk piujodlunilu piusigijavut pigumasongunnitininik, pisongujugut asitta pisonginnik. Ammalu unnusa katimalaugatta, immaKâ, piujummagiulauttuk, tuktuut

KaujimajaugiaKanninginnut. Ammalu sivuppiavalliaKottugut
atausiulluta ammalu unuttut piujolauttut uKautigijaujut.
Nakummegumavunga AngajukKâk Leomik suliataminik
pitsiaKattamat suliaKattillingillu sivulittiuKattamata sivuppiagamut,
tamanna pimmagiujuk pitjutaujuk illigidlatavut ilonnata
pimmagiudlunilu ilonnatinut. Atuinnaguisimangilanga
uKausitsakanik, ikittunik uKagumatuinnavunga Kaujimattisigiamut
Kaujimajaugialinnulu ilingajunik. kamagiKattajaga Nunatsiavut
kagitaujatigut Kaujimattisiutinga. Piujuaggulammik nutâmik
Kagitaujatigut KaujimattisiutiKavugut, tâvatualli pitaKatsiangituk
ullumimut ilingajunik Kaujigatsanik, ammalu kingullipâk
unikkausiusimajut, tammaguma uKautijauniakKunga,
upingasâminitavinik, uvani upingasâmi. Ammalu isumaKavunga
piunitsamik pigiaKannitunik ammalu ununnisanik ilisilluta-,
ulluminitanik Kaujigatsanik sujuKasimalimmangât. Maggonik
pijuKasimalaukKuk ukiatsâk Kaujilauttâka pijausimanegik. Aippata
takunnadlunga tusagatsanik unnuami ammalu Illusuak
tunjiausimaninga St. John'simi. Tamanna tusagiulauttaga,
KaujimattitaugumasimagaluakKunga. ImmaKâ katimajitsuat
kiggatuttet Kaujimattitausimajogaluat tamatsuminga
kajusigasujumik, angijummagik tunijautillugu taimaittuk.
Aippanga KaujilaukKunga Kagitaujatigut. Atukatigevik.
UKattuKasimalaummat pitsiaKujijunik omajunniatittini Gros
Mornemi. Kaujimalaungilanga omajunniagiattusimaninginnik.
Kaujimagaluallunga tamaungalâttugut, Kaujimalaungilanga
angittausimammangâtta. Taimaimmat piujogajalauttut
katimajitsuat kiggatuttet Kaujimattitaugajasimalauppata
sivungagut Kanuk angiutaukKâtinnagu ammalu omajunniatet
taunungaKâttinagit. Kaujimavusi, taimaittunik
KaujimagamaKattagaluakKugut KaujimattisiKattaniagatta
ikajuttaugutilittinik apitsulippata sujuKalimmangât, ammalu
apitsutuKainnaKattamat sujuKalimmangât Nunatsiavut

kavamangani ullumiulittuk. KaujimattitauKattagumalaukKugut
uKautigisogiKattaniagattigit taikkununga. Pimmagiuvuk uvattinut
Kaujimagamik Kaujigatsanik KaujititsiKattaniagatta
ikajuttaugutilittinik sujuKalimmangât. Pimmagiuvuk
Kaujimattitaugiamik tamatsuminga, ammalu tamatsuminga
uKagama, AngajukKâp allasimajanga Kagitaujattigit
tusannatutsiavak. KaujilaukKunga ikpasak, Kinijadlunga, ammalu
Kaujigatsaliusimajasi, takutitsilauttut sujuKalimmangât
ullumimunut, tâvatuak âkKigiagialiugaluak unikkausivut
akulaittumik KaujimattitauKattaniagatta ilonnata. Kagitaujatigit
allagait, immaKâ, kamagijaugiaKammijut SuliaKattet
SiKumitsitailigiamut Maligatsanik. Ammalu isumaKavunga
tamatsuminga kamattuKattisijuKaniangituk, tâvatuak SuliaKattet
SiKumitsitailigiamut Maligatsanik uKajuk, “kiuKattagialet
kiggatujaminik, angnigijaumajut kiggatuttet ammalu inuit
ikajuttaugialet pivitsaKatualigutik.” Tamanna kinamut
ilingattingitaga, tâvatuak isumaKavunga Kagitaujatigit tusagatsait
sakKititausimajut ammalu kiujuniagatik. Ammalu immaKâ
pimmagiuvuk kamaKattagutta atunit asittinik, KaujimaKatigelluta
Kaujigatsanik Kagitaujatigullu allaganik. Kaujimattitaunik
angijummagiuvuk ammalu tatigijavut tamanna. Dr. Tom Gordon
Goose Bayliammat ukiatsângulauttumi katingatitsitillugu ubvalu
Kaujigatsanut katimatitsitillugu nottitauvallianingit ammalu
piusituKait. IlauKataulaukKunga katingajunut.
InuKatsialaungimagikKuk, uKâlautiKalaukKugut
uKumailutauKattajunik KaujimattisijuKagasualimmat ubvalu
Kaujimajunik sujuKalimmangât
nunalinni. Dr. Gordon Kailauttuk suliaKapviganut Kaummat
ullâkut, uKâlautiKalaukKuguk sunanik, KaujimaKatigegiaKanik
ilangaulauttuk uKâlautigilauttavuk. Ilanga uKautigilauttavuk
immaKâ namminik nâlautiKagutta inilimmik Happy Valley, Goose
Baymi ubvalu Upper Lake Melville. Ammalu tamanna uvannut

uKautausimalaummijuk sivungani, maggonut
angajukKauKatigennut kiggatujonnut angajukKauKatigettini
immaKâ namminik nunattini nâlautiKagutta Upper Lake Melvillemi
ikajutsigajattuk uvattinik Kaujimattisigiamut inuKutittinik.
Ikajutsigajammijuk sakKititsigiamik, Kaujimavusi, tigumialluta
ilikKusittinik omattilugit inuKutivut KaiKattatillugit ammalu
uKâlautiKallutik ilikKusinik piusituKanillu ubvalu sollu tuktulittâjunik
Kaujimajaugialinnik ilonnatilli nunalet nâlautiKatuammata
namminimminik. Tusâsonguvugut OKâlaKatiget Nâlaulinganik.
PitaKadlulalu CBC ammalu Big Land. Tâvatuak namminik
nâlautiKagutta namminik aulallugu atulluta namminik
Kaujjautigatsatinnik, immaKâ tamanna ikajutsivalligajattuk
kaujimattitaugiamut sunanik ammalu, Kaujimavusi,
Kaujimattitaulluta ullumimunut sunanik ammalu Kaujimattitaulluta
ammalu pitsatuniKattitaulluta kavamaulluta Kaujimatitsigiamik
ilonnainik ikajuttaugutilittinik. Nakummek, Mr. UKâlattek.

MR. UKÂLATTI:

Nakummek, uKâlakKulimmijaga AngajukKâk Hopedalemi, Jim
Tuttauk.

MR. TUTTAUK:

Nakummek, Mr. UKâlattek. kiggatullugit Hopedale Inuit Nunalet
kavamanga, mânnaujuk nakummevunga Minister Kemuksigak
SuliaKapvinganik Ilinnianimmuk kenaujatigullu Pivallianimmik
kenaujaKattisilaummata \$9,959.07-tut ikajotitsanik sanagiamut
puttajunik itsavinik atugatsanik tikittuKappat niuggujunik pujulinik,
ikajulauttuk suliaKattisidluni pingasunik inunnik maggoni wogenni,
ammalu Minister Shiwak suliaKapvinga ikajulaummat oganik
iKalunillu. Ammalu mânnaujuk pitaKavugut, Kaujimattitaullugu
Carla Pamak, Hopedale Inuit Nunalet kavamanga ammalu Nunattini
Kuatsevivut, aittutausimalaukKugut 60 idlivinik iKalunik
maungatitaudlutik piulimajaudlutik ilonnatik nunalinni
pigumajauKattamata siKingani Hopedale. Ammalu , nâjillunga, Mr.

UKâlatte, uKagumatuinnavunga Hopedale Inuit Nunalet kavamanga piunitsamik piusiKalittuk kamatsiagiamut ânniasiapviliagialinnik Goose Baymut ubvalu St. John'simut aijauKattalimmata inutuKait motakânganut ammalu tikimmata Kitigalisimagaluammat tamânettisinginnalikKugut Kitigalisimagaluammat. Nakummek, Mr. UKâlatte. Nakummek, Mr. UKâlatte.

MR. UKÂLATTI:

Nakummek. UKâlakKulimmijaga Mr. Herb Jacque, AngajukKâk Makkovimmi.

MR. DICKER:

Nakummek UKâlattek. Sivullimik, pingasut. Sivullia sittutigiajaga nakummegutigilauttaganit ippasak uKautiKaniagama kenaujanik pitâgisimajattinik Nunatsiavut kavamangani. UKalaukKunga tikitausimajugut \$7.5 miliun dâlanik ilingajunik 30 nutânut tungavitsanut Nainimi, tammadlunga uKasimalaukKunga uKaniagama Ulapitsaijet katimajet nakummejutsausimadlunga Tasiujatsoak kenaujakkuvininganik. Taimaimmat tammasimajaga âkKijaga ammalu nakummevunga Tasiujatsoak kenaujakkuvininganik tauvidlutik kamasimalaummata allagattinik Kinuganiagatta. Salutitsigumavunga manna, Mr. UKâlatte, nutânik kaunsalittinik. AngnigusuttuKagiaKaniammat sepanik itsivautaKalaukKugut inuttâniadlutik ottugajut nâmmalaummata. Atautsik nukKagiaKalauttuk namminik pitjutiKadluni. Taimaimmat pannailikKugut angnigusugiallagiamik wogimi Kaijumi, Dienestâgiulâttumi. Ammalu sitamanik atinik KaitsisimajuKavuk. Atautsik nukKagiaKalauttuk annak atiminik petsidluni ilaugunnalaungituk pitjutautillugu ilageluadlanik, Nunatsiavut kavamangani suliaKattiugami. Tâvatuak pingasunik asinginnik inuKavuk Kanuttojunik ilauKataugiamut Nunalet kavamangani, tamanna kajusimattisitsiajuk uvattinik. Taimaimmat wogimi Kaijumi, Dienestâgimi KaujjutsaulâkKugut kina sâlaKalâmmangât ottugajuni. kingullipâmik, nakummagumavunga Nunatsiavut

Group of Companies, aittuisiaKattamata utittigiaKangitunik,
immaKâ, tungavitsanganut katimmaviup. UKaniangilanga
uKâlautautuinnaninganik nunalinnut. Inuit angijummagimmik,
angijummagimmik ammalu Kuviasujut takusonguligamik
katimmavik makitatsialittilugu. Ammalu, uKakKaugama,
uKâlautautsialittuk nunalinnut. UtakKigunnalaugunnait aigiamik.
Tamanna akuninut, akunimmaginut jârinut takunnataulilauttuk,
ammalu allât ulugianattolilauttuk inunnut piungilimmat.
Kappiasulilauttut katagagajanninga. Taimaimmat suliaKappâtillugit
ikKasutsiadlutillu kingullivut, nakummegumajakka tamanna
taimailaummat Kinuganikkut ammalu satusaiKatigennikut, immaKâ
Nainimi Siagunitanik katimajet. Ilaulauttut kamadlutik pingasut
inuit nunattinit, piluattumik, Elsie Jenkins, AngajukKâvut Sarah Leo,
taitsumani ilauliaKilauttok katimajinut ilautuinnalugani
AngajukKângunimminut, KanuttogutiKadluni sakKititsiniadlutik
katimajitsanik Kinijattisanik sanagiagutitsanik illutinnik
siKuttilimmat. Ammalu asia inuk ilitagigumajaga Don Dicker St.
Tâkkua pingasut inuit suliaKalauttut mingutulautsimagatik unuttuni
jâriusimalittuni ammalu, sivullipâmik, minguatugunnalauttuk
Kulânga, illuk namminik kenaujamigut minguguttittâlauttuk ilua
minguattautilugu silatingalu, ammalu ikajuttaugunnalaukKugut
sanajinut tamaungatillugit NGC asiagut pusiKadlutik
takugiattudlutik Kanuk pigajammangâmmik. Ammalu tamanna
tunijauniammat, immaKâ, NGC, akilittutaugatik, apitsugatik,
sanagiasisimalauttut sâksini wogini. Mr. UKâlatte,
tammagajakKunga uKautigingikukku Fran Williams,
suliaKappâlauttut mingutulautsimagani suliaKaKatiKadluni
Siagunitanik katimajinik ilauKataulaugami tamatsumunga. Illuk
pijagesimalittuk. ImmaKâ kisimi suliajiaugiaKalittut igalângit,
tamanna imminik kamagilâttanga. Tâvatuak sivanniatitsilaukKugut,
saimmatittautillugu katimmavik. Taitsumani
katimmaviKalaugunnaigatta, pingasunut takKinut, Sarah? Ammalu

ullusiulaungitut Nakummegutimmik. Taimaimmat, sivullipâmik, saimmatittaumat katimmvik, nutâmik angmataudluni pijagettaumat ammalu unuttut inuit ilauKataulauttut. kitsanattolauttuk. Ingitet tutsialauttut, ammalu nakummejuKalaukKuk AngajukKâk InutuKaujunit nakummedluni inunnik uKautaukKaujunit ammalu kampaniujumik. Ammalu Nainiliaguviit mânnaujuk tagvainak malugusugajakKutit tagvainak, Kaujimavusi, katimmavik makitatsialinninganik. Sitijutsiangulittuk. Piujunik tungaviKalidluni. IsumaKavunga pigiasinialimmijuk inuit tamaungaKattanianinninginnik katimmavimmut. Nakummek, Mr. UKâlattek.

MR. UKÂLATTI:

Nakummek. UKâlakKulimmijaga Mr. Gregory Flowers, kiggatuttik Hopedalemi.

MR. FLOWERS:

Nakummek, Mr. UKâlattek. Ippasak, Mr. UKâlattek, uKautiKalaukKutit ilanginnik unatattumesimajuvininnik Nunatsiavummiunik kiggatusimajut, ammalu nittujakka ullumi. Maggonik atennik ikKaigelaukKunga atuatsiligavit atinnik, ammalu ullumi ikKaumagumatuinnatâkka ullumi. UKautigigasujâkka alakkasâjamut allasimajâkka, Julius Hunter, mânemiungusimajuk, immaKâ, ilai, Kaujimausikkuli, sulikiggatujuk ullumik. Ammalu ununnisanik 20-nit jârinit unatattunesimalittuk ammalu Lonnie Shuglo inosinga nâdlugu Unatattutinnesimalittuk. Taimaimmat uKautigigumatuinnaKaujâkka. Nakummek, Mr. UKâlattek. Ammalu immaKâ unuttunik sulipitaKavuk Kinigialittinik kamalluta kinakkut nunattinik kiggatusimalimmangâta. Nakummek.

MR. UKÂLATTI:

Nakummek. Aitigialitit tâkkua atet SuliaKapvinganut IlikKusiliginimmut, Pinguatuliginimmut ammalu Niuggutuliginimmut. UKâlakKulimmijaga kiggatuttik KipukKamit, Tyler Edmunds.

MR. EDMUNDS:

Nakummek, Mr. UKâlattek. UKautilaugakkit katimajitsuat kingullipâmik itsivaKatigeniagatta, inosuttuit KipukKami suliatKajut atâni NL Atuatsigiutsagiamik ammalu nigiujut Kaujimajaminik piusituKani pivalliagiamik ammalu nunameKattalutik. Suliatsak pigiasilauttuk, Mr. UKâlatte, ammalu inosuttuit ilinniatitauKattajut Kanuk talluliugiamiik, Kamutinin ammalu Labradorimi ivitsukanik ivigiamut, ingiggasongugiamik nunami, mikigitjik ammalu piusinginnik ilisimajaugialinnik pisogigialingit nunameligutik. Suliatsak ilautitsijuk nainanik ilaujunik ullumimut ammalu kajusimaniattut Jânuaramunut. Mr. UKâlatte, October 17-mi Ms Sophie Tremblay Morrissette, Suliakapvimi Aulatsiji Torngat Sananguatinginni, niuggulauttuk KipukKamut inunnik Kaujiimattisigiattudluni. Nakummejaga Ms Tremblay Morrissette tamaungalaummat pigiasigiattulidluni sivullipâmik suliatanginnik Torngat Sananguatuligijingita uKautausimajuk katutjiKatiget sakKijâninginnik kiggatugiaKanningit ilonnainik Nunatsiavummiunik. KipukKaliasimaniagami uKâlaKatiKaKattalauttuk sananguatinik mitsutinillu angigganginni, ammalu inuit katimattitautillugit pisilauttuk 22 hontat dâlatut niugiatsanik. Nigiuvunga, Mr. UKâlatte, tamanna ingiggainanianninga ammalu mitsutet sananguatellu KipukKami asinginnilu nunalinni atugunnaniammata tamatsuminga ikajotiujumik sivunitsatinni. Mr. UKâlatte, Sananguatet Ullusiusimaningit piujummagiulauttut sakKititsigiamik katsungaininginnik inosuttuit ammalu takutitsigunnadlutik allasimajaminik ammalu pigunnasimajaminik AngajukKâvut ippasak uKalaummat. Tamakku ullusiunniujut pivitsaKattisigunnaKut inosuttutinnik uKautiKagiatsangit sunanik ammalu apomautauKattajunik takunnaKattajaminik piguvalliadlutik Nunatsiavummi. Takutitsigunnalauttut auladlutik uKumaigiKattajaminik pitjutautillugit niuttaKattanik, nutigut

pinniataukattanik ammalu imminiaKattanik. Taimaittunik tamakkua uKâlautigisogiKattajangit uKâlautigidlugit pitjutaujuit sulitsiajut. Ammalu takutitsigunnadlutik takunnataudlutik ânanânik piusinginni. Ilitatsimajut pimmagiuningit ilikKuset ammalu inigijangit, ilauKataugialet nunamellutik, nunagijamini, ammalu Labradorimiut Inuit isuKangitumut Labrador Inoniattut Kanutuinnak pijuKagaluappat sakKiKattajunik. Taimâk uKagama, pitsiaKujakka ilauKataujut ullusiunniulâttumi piunippâmik pikKulugit. Ilonnatik niungit siKuttisimagaluappata kamagisokulungit, ilai? Atsusi Huskies.

MR. UKÂLATTI:

Nakummek. UKâlakKulimmijaga kiggatuttik Upper Lake Melville, Patricia Kemuksigak.

MS. KEMUKSIGAK:

Nakummek, Mr. UKâlattek. Upper Lake Melville unikkausivut sakKititauluttut Octoberami. Ununnisanik allalilaummata, nenitsigiaKadlutillu ammalu aullatigiaKadlugit, Roy ammalu uvak sakKitigunnaulâttavuk atautsik unikkausik uvani jârimi tamanna ajunnamat ikajuttaugutilivut nakutsaKattajut kaujitsiutittinik pisimajunik Nunatsiavut Suliatsanginnit ammalu Ikajuttaugutinginnik ammalu Kaujimattisiutinnik katimajitsuanit. Kunommingavunga aullatitauKattasimajut ilinniaviliattitaulutik idluatsaiviliannisangit utakKititauligemmimata. Ilangit inutuKavut ajulisimalittut ammalu ilangit ajulilâmmijut tusalautsimagatik KaKialipviunimmik ubvalu aittutaullutik akiliutimik. Uvangu, salutitsigumavunga kitsajunik Aggek/Obed ilaget. Merkuratsuk-Dicker ilaget, Hefler, ammalu Hope ilaget. Gary Mitchellilu ilisigiattulaukKugut nalunaikkutammik IkKaumajut UnatattumeKattasimajut Ullungani ullusiutillugit Happy Valley, Goose Baymi kiggatudlugit Nunatsiavut kavamanga. Illuit pitjutigillugit ammalu initsaKaKattangit tamanna suli angijumik pitjutaummagittuk Nunatsiavut ikajuttaugutilinginnut Happy

Valley, Goose Baymi. UKumaittovuk namut aijutsaumangâtta ikajuttaugiamut. Nakummek, Mr. UKâlatte.

MR. UKÂLATTI:

Nakummek. UKâlakKulimmijaga Mr. Roy Blake, kiggatuttik, Upper Lake Melville.

MR. BLAKE:

Nakummek, Mr. UKâlattek. SuliaKappâsimalikKunga mingutulautsimananga, Mr. UKâlatte, initsaKangitunik Upper Lake Melville sulii ullumimut pitjutaummat ikajuttaugutilittinut, Mr. Pamak uKakKaumat unuttunik pitjutiKavut Upper Lake Melville, takugiattugiaKaligavit ikajuttaugutilimmik inilimmik motakâvinimmi ubvalu tupimmi. Sonabendiulauttumi kiggatuttaugutilik uvannt fonnilauttut nainaliak nainami ullâkut. Upper Lake Melville, taitsumani, silanniludlatillugu. Tainna inosuttuk annak pisugalasimajuk akKutini 14 sitondini. Tamanna uKâlautigigakku ullumi nakummegumammagikKunga Lieutenant Hawes ammalu Salvation Army-kut kajusimadlutik ikajuKattamata initsaKangitunik. Akuniungitumut iniKattisiKattajut ikajutsidlutik. IlisiKattajut ikajuttaugutilinnik, ikajuttaugutilinnituinnaungituk, kinakkutuinnanik initsaKangitunik ilidlugit tujummiuvinut maggoni ulloni. Tâvatuak, uKakKaugama, tamanna akunimmoKattangituk. KinijagaluakKugut akunimut ilingajutsanik sittutitsigiamut; taimâtsainak Minister Pamak uKakKaumat. Ammalu nakummegumavunga Nunatsiavut kavamanganik, ammalu ullâk, Mr. UKâlatte, ammalu nakummelugit ukua: Gill Saunders, Debbie Shiwak, Fay Laylla, Jen Best, Bert Pomeroy, Joseph Townley, Muriel Edmunds, Theresa Hollett, suliaKattangit DHSD ammalu Northwest River Kelland Driveimejut ammalu Corte Real SuliaKapvingit, ammalu ilonnatik Nunatsiavut Tullingit Ministeret ammalu Ministeret. Tamakkua inuit suliaKapvingillu suliansaganik uKinnisauttisiKattajut. Nakummek, Mr. UKâlattek.

MR. UKÂLATTI:

Nakummek. Are there any more member statements? I recognize Ordinary Member for Makkovik, Kate Mitchell.

MS MITCHELL:

Nakummek, Mr. UKâlattek. Sivullipâmik, uKagumatuinnavunga, ilagillug Herb, nakummegumavunga Liz Evans Mitchell ikajutsiaKattamanik nunattini. NukKalauttuk suliataminik 30 jârini ilinniatitsisimadluni ammalu maggoni jâriusimalittoni angajukKângudluni ilinniavimmi. Ammalu salutitsilunga Dion Rideout ininganelimmat ilinniavimmi angajukKângudluni. Ammalu pitsiaKujakka pinguaKattajut takutsautitsidlutik katingajet, , ukua-, Kaujimangitunga aullalaummangâta aullalaungimangâtalonnet, tâvatuak ippasak, pannailauttut Goose Bayliagasuadlutik pinguagiattulutik ullusiu juni. Ammalu Makkovimmi, salutitsigumavunga The Pantry ammalu Wood Box katimajingit. Herb ilauKatauKattamat tâkkununga. Piujualunnik kiggatuttiKavugut. Ilonnatik atingit ilitagijaujut: Todd, Jodie, Herb, Myrtle, Caroline, ammalu pitsiasimajut tamatsuminga âkKisuidlutik; immaKâ taijasi niKinik kamaKattajut. Kuanik niKitsaKattisiKattajut ammalu asinginnik nigigatsanik nigiu giavut, Kaujimavusi, niKitsanik. Ilâli, sollu, sanauganik, sukaranik, immuk, taimaittunik nigiu giavut ikajutsianianningit inunnik, Kaujimavusi, kenaujaliutsiaKattangit ukiumi. Ammalu, sottaga, salutitsigumavunga pivuttinik Golden Huskie Nainimit, kingullia angiggavut. Ammalu nakummegumavunga takutitsigunnamata inuit nunattinit Mikigianniagamik Pilluangunikisautinut. ImmaKâ, tammaguma uKautijauniakKunga, immaKâ ailfanik inuKavugut, tâkkua piujut nunattini unuttut. Ammalu asiagut tujummiKujingilanga angiggasimajumik, Betty Jararuse. Annak inosuttuvut pijagesimajuk Ilinniadluni Nalunaikkutamik Paitsijiugiamut, ammalu suliaKaKataulittuk DHSD-kunut Makkovimmi. kitsautigilauttavut aullamat Dawn Michelin, immaKâ, Kaujimavusi, asiujidluta ammalu ilagiadluta

angigganiammat. Tâvatuak pimmagiuvuk uvagut, Kaujimavusi, nakummegianga inosuttuk inuk aullasimajuvinik pijagegiattudluni ilinnianimminik ammalu utiniadluni ikajugiattudluni paitsigiamik inuttinik. Taimaimmat nakummek, Mr. UKâlatte.

MR. UKÂLATTI:

Nakummek. Suli kiggatuttet uKausitsalen? katimautitsak 5, "UKâlalluni Apitsotet." Ippasak November 18, 2014-mi AngajukKâk Diane Gear apitsulauttuk Minister Nunaliginimmut ammalu Nunani Pivianattunik, Nittunattuk Darryl Shiwak, ukuninga pitsotinik: KipukKami Inuit Nunalet kavamanga Kinugasimammat SuliaKapvinganit Nunaliginimmut ammalu Nunani Pivianatuni pigunnautimmik ujugattagiamut Kijunniavimmi. Maggoni wogiusimajonni uKautijaulaukKugut tamanna kamagijaugiaKaninganik katimajitsuanut. Tamanna kamagijauniakKa tamâni katimajitsuat itsivaKatigenninginne? Taimainiangipata, Kanga kamagijaulâtton? Nittunattuk Minister Shiwak, Minister Nunaliginimmut ammalu Nunani Pivianattuni, kiugumajong?

MR. SHIWAK:

Nakummek, Mr. UKâlatte. Kiullugu apitsotinga AngajukKâk Gear, SuliaKapvinga Nunaliginimmut ammalu Nunani Pivianattuni nigiujut pikKujaliattâgiamik, tagvani itsivajuniungituk, tâvatuak isumatsasiugutigigialinga katimajitsuat Januar 2014-mi ubvalu Mertz 2014-mi katimalippata nigiuvgut atuinnautigiana jârimi Kaijumi ujugannianitsasinnut. Nakummek, Mr. UKâlatte.

MR. UKÂLATTI:

Ammalu kiggatuttik Upper Lake Melville, Roy Blake, apigilaugaluattilugu Minister Nunaliginimmut ammalu Nunani Pivianattunik, Nittunattuk Darryl Shiwak, ukuninga apitsotinik: Tukisiavunga pingajua laisinsik suli aिताusimangituk kinamut. Ammalu, maligatsak manna, moosenik niKitsatasimangipata Fevruar 25, 2015-mi laisinsinga aिताulâtuk nunalinnut iluani

Nunatsiavut. Minister Nunalignimmut ammalu Nunani Pivianattunik kiugumajong?

MR. SHIWAK:

Pitjutigillugit kingulliata ilanga apitsotik nâninganut Fevruar, Fevruar 28-mut, laisinsik atuttausimangipat Upper Lake Melville, PiulimajauKattajut kisiani nunalinnut Nunatsiavummi. Taimaimmat sulivutit. Pitjutigillugu apitsotigikKaujait, kiggatuttik Upper Lake Melville apitsotinga pingajua laisinsik Upper Lake Melville aittotausimangituk, ilonnatik tallimait laisinsit Upper Lake Melville atuttausimalittilugut mânnamut. Tamammik Nunalet Kuateveingit Upper Lake Melville tigumiajut atautsimik moosemut laisinsimik atunit. Asingit pingasut atuttausimalittut ammalu aittotausimajut ikajuttaugutilinnut. Nakummek, Mr. UKâlalte.

MR. UKÂLATTI:

ammalu katimatitsijinga NunaKatiget Nunalet kuaparesangani, Mr. Gary Mitchell, apigilauttuk Minister SuliaKapvingani Ilinnianimmut ammalu kenaujaliugutinut Pivallianimmut, Nittunattuk Patricia Kemuksigak, isumatsasiugutiKasimammangâta aittuigiamut nutâjanik Kuanik iKalunik Nunalet Kuateveinganik Upper Lake Melville suliaKapvisinnit. TukisikKauvunga ullâk Nittunattuk Darryl Shiwak uKausigikKaujanganit apitsotik ilingaluanninganik SuliaKapvinganut Nunalignimmut ammalu Nunani Pivianattunik. Taimaimmat, Mr. Mitchell, Kanuingituk Nittunattuk Darryl Shiwak, Minister Nunalignimmut ammalu Nunani Pivianattuni, kiugusingit uKakKaumat ullâgiak? UKâlakKulimmijaga Nittunattuk Darryl Shiwak, Minister Nunalignimmut ammalu Nunani Pivianattuni.

MR. SHIWAK:

Nakummek, Mr. UKâlalte, ammalu nakummek katimatitsijek apitsulaugavit ilingajumik Ministerimut ippasak. ImmaKâ kiullutit ajunnangitumik apitsotinnik SuliaKapvinganut Nunalignimmut ammalu Nunani Pivianattuni Kinugauttâlaungituk tamatsumunga,

tâvatuak Kuviasutuinnavugut aittuigiamik. Ammalu taimâk uKagama, âkKisuigesimaligekKugut, kamagisimajavut aittuigiamik kuaparesaujuk, kuaparesatuinnavongituk, tâvatuak kuaparesatsi iKalunik. UKautilâttavut suliaKapvik aittuiKullugu 250 paunninik iKalunik NunaKatigekkunut ammalu honta paunninik oganik kuaparesatsinut, ammalu honta paunninik iKalunik Sivunivukkunut ammalu 75 paunninik oganik. Nakummek, Mr. UKâlatte.

MR. UKÂLATTI:

katimautitsak 6, "UKâlalluni Apitsotet." PitaKavâ uKâlalluni apitsotinik? UKâlakKulimmijaga AngajukKâk Makkovimmi, Mr. Herb Jacques.

MR. JACQUE:

Nakummek, Mr. UKâlatte. Apitsotiga ilingajuk Sivulittik Ministerimut. Unuttuatidlunga apitsotigisimalittaka. Unuttualuit ikajuttaugutilivut apitsuKattajut pitjutigidlugit adjinguat Nalunaikkutait aullaluni atugatsait ânniasiuoviliallutik. UKautigunnaKamma Kanuilingalimmangâta tamakkaa? Nakummek, Mr. UKâlatte.

MR. UKÂLATTI:

Nakummek. I recognize Honourable Kate Mitchell, First Minister, Nunatsiavut Government.

MS MITCHELL:

Nakummek, Mr. UKâlatte Âhailâ, nakummek apitsugavit, AngajukKâk Jacques. katiKatiKaniagatta Minister Russellimik October 28-mi, tamanna uKâlautigilauttavut katimautitsatinni ammalu immaKâ inuit Kaujimammata pigianingani October 1, suliaKajuk ingiggautinillu suliaKattet adjiliugilâluginnaimata Nalunaikkutanik satjugiami piusigilauttamitut. Taimaimmat tamanna Kanuttogutigilauttavut. Ammalu Kaujimavugut, Kaujimavusi, nalunaikkutattâgiamut aullaliguvit kavamamut ilingagialik ammalu kavamamut angjutausimalluni. kavamamut sakKititausimagialik Nalunaikkutak. Ammalu kiujaulaukKugut

Minister Russellimut Kaujimajut tamatsuminga ammalu suli suliagijangit. Taimaimmat tamanna kamaginiattagva ilonnainik attutauniKaKattamat nunagijattini. Nakummek.

MR. UKÂLATTI:

ApitsugiallatuKagumavâ? UKâlakKulimmijaga Mr. Roy Blake, kiggatuttik, Upper Lake Melville.

MR. BLAKE:

Nakummek, Mr. UKâlalte. Apitsotiga ilingajuk Minister Kemuksigammut. UKalaukKutit minister uKausitsanginni ullumimunut 3.5 percent Labradorimi Inuit suliatsatâttausimajut suliaKapvini Muskratimi. UKalaugivutit tamanna nâmmangituk, ammalu sulivutit, nâmmangituk. ApigigiaKavunga Ministerimik, igvit ammalu/ubvalu suliaKattitit katimalaukKisi ullumimunon katimaKatigidlugit Nalcor pitjutigillugit suliatsatâttausimajut uKautigilauttatit ammalu Kaujimavunga maliKattangit? Nakummek, Mr. UKâlalte.

MR. UKÂLATTI:

Nakummek, uKâlakKulimmijaga Nittunattuk Patricia Kemuksigak, Minister Ilinnianimmut ammalu kenaujatigut Pivialliagutet.

MS KEMUKSIGAK:

Nakummek, Mr. UKâlalte, ammalu nakummek apitsugavit, Roy. katimaKatiKaKattasimalikKunga Nalcor-ikkunik ammalu Astaldi ammalu Vallard pitjutigidlugit suliatsatâttausimajut piusiujuunik. Tullia Ministerivut unuttuatidluni katimaKatauKattasimalittuk siagunit Nalcor-ikkunut asinginnut kântraktititauKattajunut. Uvattinik uKautjiKattajut kititanginnik ikajuttaugutilet suliatsatâttausimajut ununnisauKattajut kititanginnit, tâvatuak isumagiKattajavut tamanna sulingituk. Tullia Minister NacNeil Kinugalauttuk Nalcor-ikkunit atinginnik pigumadluni ikajuttaugutilet ilinniatitausimajut LAMP-kunut, ununningit suliatsatâttausimajut. Suli kiujausimangilagut, ammalu kiujaungikutta mânnakut, sakKititsilâkKugut uKâlalluta tamanna

nâmmangininganik. Ammalu kenaujaluvinnik atusimavugut ilinniatitsigiamut inunnik, tâvatuak suliatatâttauKattangit suliatani. Tamanna nâmmangituk, ammalu uKâlattuKasimavuk inuit pejattaulinningit suliatanginnit. Nalco sulijumik uKasimangituk, tâvatuak tusâKattavugut inuit suliatanginnit pejattaulinningit ammalu ilangit ikajuttaugutilivut. Piggagasuagialivut. Taimaimmat nakummek apitsuKaugavit, ammalu piggagasuallugit Nalcor-ikkut ammalu prâvinsiup kavamanga. ImmaKâ suliaKattiKajutsait suliatanik kamajitsamik maligaluammangâta uKausigiKattajaminik Muskrat Fallsimi Suliatanik, taimaimmat nakummek apitsuKaugavit.

MR. UKÂLATTI:

Ilatsigiagumavit apitsotinneng, sir?

MR. BLAKE:

Nakummek, Mr. UKâlalte. ImmaKâ maggolauttoni pingasuni wogiulauttoni, sakKititsilauttusi Muskrat uKâlautigidlugu percentingit suliatatâttauKattajut Innu, Inuit, Labradorimiut, Newfoundlandimit, ammalu taitsumani uKautjuniagakkit uKalaukKutit suliaKapvet sakKititsilâttuk Kaujitsiutimmik, ammalu Kaujigumavunga sakKititsisimalikKisi ullumimunon. Pisimangikutsi, summân?

MR. UKÂLATTI:

UKâlakKulimmijaga Nittunattuk Minister Patricia Kemuksigak.

MS. KEMUKSIGAK:

Nakummek, Mr. UKâlalte. pannaigutiKalaukKugut sakKititsigiamik Kaujitsiutimmik taimaimmat pitaKalaukKugut. SuliaKaKatigilauttavut Kaujitsiutinik suliaKattik ammalu Minister McNeil. UtakKilangalauttok kiujaugiamik Nalcor-ikkunut taimaigaluattilugu-, kititanik pitâlauttut kinakkut ilinniatitausimammangâta LAMP-kutigit, tâvatuak kititanginnik tigumialaungituk kinakkut suliatatâttausimammangâta. Ammalu Tullia Minister McNeil unuttuatidluni uKâlaKatiKasimalittuk Nalcor-

ikkunik Kinijadluni, tâvatuak pitâlaungilagut. UKalaukKunga tagvainak pitângikutta sakKititsilangalaukKugut Kaujitsiutimik Kaitsingikaluappata akuniuluadlalmat. ImmaKâ pigianningani wogimi Kaijumelâttut pitângikutta sakKititsilâkKugut Kaujitsiutimmik. Nakummek.

MR. UKÂLATTI:

kingullia ammalu tânnatuangunialittuk uKagiallagasuaguvit apitsulutit. Nakummek. UKâlakKulimmijaga Mr. Joe Dicker, AngajukKâk, Nain.

MR. DICKER:

Nakummek, Mr. UKâlattede. Kaujimangilanga kinamik apiginialimmangâmma. Pitjutiga uKautausimajuk pitjutigidlugit illuit tungavitsangit sanilligejut. Kaujimavunga illuit pitjutaunginnaningit Nainimi ammalu tâkkua maggok tungavitsâk illuKalânnegik, sollu, katingajunik pingasuilingajunik. Kaujigumavunga nani-, kinamukkiak uKautijaugunnaguma, AngajukKângullunga, Kaujigunnaâgakkat kaunsalikka, Kanuilingalimmangâtta suliat sami, Mr. UKâlattedek?

MR. UKÂLATTI:

Nakummek. Atâni Tilitsigutet, uKâlalluni apitsotet 32(2). "UKâlalluni apitsotik naittogiaKavuk tukisinatsialunilu ammalu ilingagiaKavu uKâlautaujumut Kaujimatillugu AngajukKâk ubvalu Ministerimut tugâtillugu," tâvatuak taimailingatillugu, Âhailâ, ilinganiattuk sivulittik Ministerimut, Nittunattuk Kate Mitchell, Minister kamagialik illunik.

MS MITCHELL:

Nakummek, Mr. UKâlattede. Ate. Nakummek, AngajukKâk Dicker, apitsugavit. Âhailâ, pitjutigillugik maggok tungavitsâk, taikkua maggok tungavek pisijausimalittok. AngiKatigegutet atitâttaulutik, ammalu tânna sâksinik maggonik illugusiKalâttut tujummiuvik, illusaulâttuk ililâttavut Nainimut. Taimaimmat tainna tungavitsak pisijausimalittuk. Nakummek.

MR. UKÂLATTI: Apitsugiallagumavit ilagiatsigumaven?

MR. DICKER: Nakummek tamatsumunga, Minister. UKautigunnaKamma manna kinakkut illumelâmmangâtâ? Ilingalatut illusaKangitunun? InutuKanut ilingalâtton? AippaKangitunut anânaujunut Kitungalinnon? Mr. UKâlalte, nakummek.

MR. UKÂLATTI: Nakummek, uKâlakKulimmijaga Nittunattuk Kate Mitchell. Aitilangajavut apitsotik AngajukKâmut.

ANGAJUKKÂK LEO: Nakummek, Mr. UKâlalte, ammalu nakummek, AngajukKâk. Asiganik kiggatutuinnavuk manna. Tainna sâksinik illugusilik tujummiuvitsak-, Kaujimatsiangitojusi, tainna sâksinik illugusilik illuk tamaungagasuajavut ilangaulluni SakKijânginnaniatuk Nunalinni SakKititaumajuk sâlagijausimajumut Ukiuttatumi Akiliusiamik aggâni jâriulauttumi. Takugatsauluni anggigasauniattuk. UKautausimammat AngajukKaunet katimajinginnut katimajitsuani, Nunatsiavut suliaKajuk illusanik pannaigiamut. UKagiaKallutik kinakkut tamaunga anggigasongulâmmangâta suliuKautaugialik. Tukisimausikkuli, ilanga uKâlautauluttuk maggok tujummiuvitsâk tamâni âkKitausimajok. Tukisimausikkuli, ilanga uKâlautigilauttavut maggonik atuinnautitsinialluta ilingaluattonik inutuKaujunut. Asingit sitamait tujummiuvet, suliuKautaugialik piusiugialet tamatsumunga.

MR. UKÂLATTI: kingullia ammalu tânnatuangulilluni apitsotigiallak. ApitsutuKagumava sule? UKâlakKulimmijaga Mr. Tyler Edmunds, kiggatuttik, KipukKami.

MR. EDMUNDS: Nakummek, Mr. UKâlalte, tagvainak Jonimi itsivaKatigetugatta apigilauttaga Nittunattuk Minister Ilinnianimmut kenaujanillu

Pivalliagutinik IlinniavitsualiaKattajunut Ilinniagiattujunut
Ikajutsigutik ilingammangât pigiasuutigillugu ilinniatitsigiamut.
Apigilauttaga Minister, Mr. UKâlatte, tamanna isumagijausimajuk
kamagijausimammangât. Nakummek, Mr. UKâlatte.

MR. UKÂLATTI:

Nakummek. UKâlakKulimmijaga Nittunattuk Patricia Kemuksigak,
Minister Ilinnianimmut kenaujatigullu Pivalliagutinik.

MS. KEMUKSIGAK:

Nakummek, Mr. UKâlatte. Pijâgingilanga kiggatuttik Edmundsimut
kiulaunginama tagvainak. Katimaniagatta St. John'simi PSSSP
suliaKatingillu Octoberami uKâlaukKugut ilinniatitsigiamik ammalu
Kanuk tamanna sakKitigajammangâttigu atutsialittilugu.
SakKititsilâttut atuttaugatsanik adjigengitunik pannaigutinik Kanuk
pigajammangâtta, tâvatuak ilitatsivugut pigumajaujut inosuttutitut
inunnut ilinniatitauKattajunut ammalu atuliaKigajanningit
suliaKagiasigiamut unuttualuit inuit suliatsatâttitauKattangimata
inosuttutitut inuit ilinniagetainnasimajut uKâKattamata
ilisimtsiangiluadlatut ilisimagialimminik, tâvatuak iligunnangilatit
suliaKangikuvit. Taimaimmat, Kaujimavusi, inuKutittinik
suliatsatâkKujidlagaluakKugut, piluattumik ilinniasimappata. Suli
atugatsatinnik pannaigutimmik pitaKangilagut, tâvatuak
suliagijavut Kanuk adjigengitunik pusiKagajammangâta, tâvatuak,
ammalu, pijâgingilanga kiulaunginama tagvainak. Nakummek, Mr.
UKâlatte.

MR. UKÂLATTI:

UKâlakKulimmijaga AngajukKâk Makkovimmi, Mr. Herb Jacque.

MR. JACQUE:

Nakummek, Mr. UKâlatte. Apitsotiga ilingajuk Minister
SuliaKapvingani Pinguatuliginet, IlikKuset ammalu
Inositsiagittotitsigasuanimut, Mr. Pamak. Kiggatullugit Torngat,
sunauva, Torngat Pinguatuligijngit nunattine; jâri tamât
suliaKapvinga aittutauKattajuk \$60,000-tut ingiggautitsanik,

inosuttutinnut. Tamanna kajusimaniakKâ, ammalu kamagijaugajattuk pigianingani jârime? Nakummek, Mr. UKâlatte.

MR. UKÂLATTI:

Nakummek, UKâlakKulimmijaga Nittunattuk Richard Pamak, Minister IlikKusiliginimmut, Pinguatuliginimmut ammalu Niuggunimmut.

MR. PAMAK:

Nakummek, Mr. UKâlatte, ammalu nakummek, AngajukKâk Jacque. Iilitatsisiagumavunga aittuisimanittinik sivungani Torngat Pinguatuligijingita katimajinginnut. MâannaKamik tunitjilaukKugut akiledluta 135,000 aggâni. Ammalu uvani jârimi pannaivugut katimaKatiKagiamik kiggatuttimik John Andersen, katimatitsijinga Torngat Pinguatuligijingita katimajinginni, ammalu Todd Winters NunaKakKâsimajut Pinguatuligijingit Newfoundland Labradorimilu maggoni ulloniattoni kamagiamut tallimanut jârinut pannaigutimmik pinguatuligijinginnut ilonnaini Torngani. Ilangaulluni tagvani pannaigutimmi, atuinnguttigumavugut iluani suliaKapvita kenaujanik atuttaugatsanik tallimanut jârinut. UKakKaugama katimaKtiKalâttut maggoni ulloniattune kamagiamut ilingajunik jârimut Kaijumut kenaujatsanik. Tâvatuak aggâgolauttumi ammalu uvani jârimi, kenaujait atuinnausimajut Torngat Pinguatuligijingitigut akiKatillugit 135,000 dâlait. Nakummek, Mr. UKâlatte.

MR. UKÂLATTI:

Apitsotik ilagiallataugumajong, sir? ApitsutuKagiiallagumavâ? UKâlakKulimmijaga kiggatuttik KipukKami, Mr. Tyler Edmunds.

MR. EDMUNDS:

Nakummek, Mr. UKâlatte, uKakKaugama ullâk, Torngat Sananguatuligijingit pigiasilaummata siammatigiamut suliataminik. Taimailiullutik ilijaugiaKavut sananguatet mitsutellu ilonnaini asinginni nunaliujuni. Âhammarik, anginippâk

apomautauKattajut allasimajut iluani sananguatet
sanasonguKattaniammata suligijaminik. Apigivuk Nittunattuk
Minister IlikKusiliginimmut, Pinguatuliginimmut Niuggunimmulu,
Mr. UKâlatte, ilauliaKigajammangâta angiKatigegutimmut Air
Labradorikkunut ammalu Torngat Sananguatuligijinginnut
Mitsutinullu siammatitsigiamik sananguataumajunik sanagatsanillu
akingit sananguatinut iluani Nunatsiavut. Nakummek, Mr.
UKâlatte.

MR. UKÂLATTI:

Nakummek. UKâlakKulimmijaga Nittunattuk Richard Pamak,
Minister IlikKusiliginimmut, Pinguatuliginimmut Niuggunimmulu.

MR. PAMAK:

Nakummek, Mr. UKâlatte. Ammalu, nakummek, kiggatuttik Tyler.
Âhammarik tamanna ilitagijavut sananguatet mitsutellu
sanagatsangit pimmagiummata niuviatsani. UKasimavunga
sivungani katimajitsuat itsivaKatigeniammat kiNigiamik pisigatsanik
Kisijanik ubvalu Kisilijausimajunik siammatiKattaniagattigik Torngat
Sananguatinginnut Mitsutinginnulu. Ammalu mâннаKamik
pisilaukKugut 2,000 paunninik KilânaKittunik Hopedalemit,
siammatilâttavut nunalinnut. Kaujimangitunga Kanuk angitijunik
aittuilâmmangâtta namut, tâvatuak atuinnautiniattavut
sananguatittinut, pigunnausittit,, sanagatsait sanajaullutik
sananguatinut mitsutinullu. UKautillugu Mr. Edmunds
uKausigikKaujanga, suliaKaKatiKagiamut Air Labradorikkunik,
âhammarik tamanna uKâlautigigajattagva suliaKapvini ammalu Air
Labradorikkunut. Nakummek, Mr. UKâlatte.

MR. UKÂLATTI:

Ilatsigiagumavit apitsotinneng? Kajusiligit.

MR. EDMUNDS: Nakummek, Mr. UKâlatte. Pitjutigillugu 2,000 paunnet KillânaKittut, ilingajut, Torngat Sananguatinginnut siammatitaugiameng, ubvalu Atuttaugatsait Inuit IlikKusinginni Suliatsanik? Tukisinatsiagajaguvit tamatsuminga. Ubvalu pisiatsatuinnait âkKitausimajut SuliaKapvingata Niuggunimmut, IlikKusinut ammalu Pinguatuliginimmut siammatigatsautillugit immineng? Nakummek, Mr. UKâlatte.

MR. UKÂLATTI: Nakummek. Nittunattuk Richard Pamak.

MR. PAMAK: Nakummek, Mr. UKâlatte, ammalu nakummek, Mr. Edmunds tukisititsigavit tâtsuminga. Âhailâ, ujugak pisijausimajuk aittotitsautillugu nunalinnut atuttaugatsauluni sananguatet katimaninginni katimalâttut jârimi Kaijumi. UKautjivugut tâna ujugak, tâna ubvalu pisijausimatualippat sananguatet sananguagatsaKalippata aittotigijaulâttut ilinganiattillugu katimajuni jârimiKaijumi. Nakummesuak, Mr. UKâlatte.

MR. UKÂLATTI: Nakummek. UKâlakKulimmijaga Gary Mitchell, katimatitsijik NunaKatiget Inuit Nunalet kuaparesangani.

MR. MITCHELL: Nakummek, Mr. UKâlatte. Kaujimangilanga una apitsotik kiujaugajammangât Ministerimut, tugâttijaga Minister Nunaliginimmut ammalu Nunami Pivianattunik. MânaKamik takulaukKunga Kaujigatsamik alakkasâjami Nalcor Kaujisanninganik avatinik adjigalanga Kaujisattaullauttop Nunatsiavukkunut. Nalcor suliaKaKatiKajuk Nunatsiavut kavamanganik Kaujisannime, ubvalu Kaujisajut nammineng? Tamanna nutâng Nalcor sakKitisimajangâ? Nakummek, Mr. UKâlatte.

MR. UKÂLATTI: Nakummek. UKâlakKulimmijaga Nittunattuk Darryl Shiwak, Minister Nunaliginimmut ammalu Nunami Pivianattunik.

MR. SHIWAK:

Nakummek, Mr. UKâlatte. Kavamaulluta, Kaujimatuinnavugut suliansanik uKautigijannik ammalu, Kaujimausittitulli, Nunatsiavut kavamanga Kanullonet ilauKataungituk. UKakKaugama pigianningani uKausikkani, KaujisalaukKugut namminik niKitsanik ammalu nujangit Kaujisattaullugit. Tamanna kamagilauttavut suna pititsitillugu, kamagijautillugu Nunatsiavut kavamanganut ikajuttaugutilet taimâk pigumalaummata ammalu sulijutsadlutik Kaujigatsanik. Taimaimmat naittumik kiuvagit, auka, ilauKataungilagut niKitsanik Kaujisatillugit Nalcor-ikkut. Nakummek, Mr. UKâlatte.

MR. UKÂLATTI:

UKâlakKulimmijaga Mr. Roy Blake, kiggatuttik, Upper Lake Melville.

MR. BLAKE:

Apitsotiga ilingajuk Minister kenaujaliginimmut, Dan Pottle. Tusagatsaungituk, Mr. UKâlatte, inosingit Nunatsiavut, Labradorimi akitujuvatsuat, allât inuit suliaKagamik Labradorimi nigiuKattajut aittutaulânnigainnik ikajuttaugutininik akiliutitsanik inogasuagiamut. Una tataminattuk, Mr. UKâlatte pitaKangilak pimmagittumik kenaujanut ikajuttaugutimmik nallianillonet kavamamit inutuKattinut. Apigivunga Minister kenaujaliginimmut, Mr. UKâlatte, pigunnapata immaKâ, ikajuttaulutalu federal kavamanganut, aittuigunnagajattugut ikajutsiutininik kenaujanik asiagut Ittusiu? ammalu ikajuttaugutininik inutuKattinon? Nakummek, Mr. UKâlatte.

MR. UKÂLATTI: Nakummek. UKâlakKulimmijaga Nittunattuk Dan Pottle, Minister kenaujaliginimmut, SuliaKattinik, Kagitaujanillu.

MR. POTTLE: Nakummek UKâlatte. Ammalu Nakummek kiggatuttik apigimmat. Tamanna isumatsasiugutausimalittuk Nunatsiavut kavamanganut. Kamagijaugialik federal suliansanginni ikajutsitaunitsangit inuit Ittusiutittigut ammalu akiliusiattigut federal kavamanga kamagiaKavuk federal kavamangani. PannaigutiKangilagut mânnaujuk Kinigiamik ikajuttaugutigiallasanik kenaujanik federal kavamanganit Nunatsiavut kavamangani. Taimâk piniagutta, Mr. UKâlatte, federal kavamanga-, atausiadluta isumatsasiugutigilaugaluattavut tâna apitsotik. Ikajutsiniagutta nallinginnik federal ubvalu prâvinsiup suliansanginnik, aittutausongugajattut Nunatsiavut kavamanganut ammalu taimâk pigutta akilegiaKagajakKugut prâvinsiup kavamanganut. Taimaimmat tamanna tukiKangituk Nunatsiavut kavamanga ikajutsigasuanninga ikajuttaugutinik federal, prâvinsiullu kavamâgik akilettisiniattilugit inosingit uKumaitsaluatuinnagajattut inuit âkKisisimajuKagajappat ikajotitsanik sollu Ittusiutet ammalu asingit prâvinsiup federalliulu kenaujait ikajutsiutigiKattatangit kenaujatigut. Nakummek, UKâlatte.

MR. UKÂLATTI: Ilatsigiagumaven apitsotinnik? Aukâ? ApitsutuKagiallagumavâ? Pijâgingilanga, Minister.

MS. KEMUKSIGAK: Apigigumangilanga. Ilatsigiagumatuinnavunga kiugusigikKaujaganik, tamanna Kanuingipat.

MR. UKÂLATTI: Pijâgingilanga. Atâni Tilitsigutet tamanna taimâk pigunnatitsingituk. UKâlakKulimmijaga Mr. Joe Dicker, AngajukKâk, Nain.

MR. DICKER: Nakummek, UKâlatte. Apitsotiungituk. Tukisititsigiagutituinnak Minister kenaujaligijimmik. Kanuk tukilimmik uKajuk uKagami akilegiaKagajattong? Tukisingitaga uKausinga. Nakummek, Mr. UKâlatte.

MR. UKÂLATTI: Nakummek. UKâlakKulimmijaga Nittunattuk Dan Pottle, Minister kenaujaliginimmut, SuliaKattinik, Kagitaujanillu.

MR. POTTLE: Nakummek UKâlatte, ammalu Nakummek AngajukKâk Nainimi apitsugavit. Ajunnangitumik uKallugu, Mr. Dicker, ikajutsiutinik aittuijuKappat, nallituinnanganit Nunatsiavut kavamanganit, ubvalu a-, uKâlagasuangilanga kiggatullunga federal ubvalu prâvinsiup kavamâginnik, ilâli, aittuijuKaniappat ikajuttaugutinik nallituinnanginni kavamamit kenaujanik ubvalu iakutsiutinik pitâgijauKattajunik federal kavamanganit ubvalu prâvinsiup kavamanganit, taimaimmat federal ubvalu prâvinsiup kavamanga utittisikKujigajattuk kenaujamik ikajutsiutivinimminik nallituinnanganit kavamamit sollu Nunatsiavut kavamangatut. Ottotigillugu, aittuigutta \$500-tut ikajutsiutimmik, ottotigituinnataga akik ammalu uKâlautigillugu, federal ubvalu prâvinsiup kavamanga akikillegajattuk akiliutigiKattajaminik taimâk akitutigijumi akikilligiattautilugu kenaujattâgialik. Nakummek UKâlatte.

MR. UKÂLATTI: ApitsutuKagi allagumavâ? Katimautitsak 7, "Allasimajut Apitsotet." Allasimajunik apitsotiKavâ? katimautitsak 8, "Utipvigillugit Allasimajut Apitsotet." PitaKangilak ullumi. katimautitsak 9, "Nâmmasingiutet." NâmmasingiutiKavâ? katimautitsak 10, "kiuguset Nâmmasingiutinut." kiugusiKaniangilak ullumi. katimautitsak 11, "Kaujitsiutet Tilitsigutinut ammalu Pimmagittumik katimajinit." PitaKakKongilagut ullumi

Kaujitsiutinik. Katimautitsak 12, "Sâmottauningit AllaKutet."
UKâlakKulimmijaga AngajukKâk, Nittunattuk Sarah Leo.

ANGAJUKKÂK LEO:

Nakummek, Mr. UKâlatte. Mânnaujuk sâmotsigumavunga
katimajitsuut ullusanginnik 2015-2016 jâringani.
TunijausimakKotogaluat katimajitsuanut kiggatuttinut.
PannaigiaKavusi jârimut malillugit allasimajut.

MR. UKÂLATTI:

Nakummek, Nittunattuk Sarah Leo. Una allaKutik kititaKaniattuk
sâmottauguni allaKutik 03-4(3). Suli asinginnik pitaKava
sâmottaugatsaneng? UKâlakKulimmijaga AngajukKâ, Nittunattuk
Sarah Leo.

ANGAJUKKÂK LEO:

Nakummegiallak, Mr. UKâlatte. Pigumavunga, manna,
sâmotsilunga allasimajunik tukisinatsiajut, allasimatuinnajut
katimaniusimajumit katimatillugit angnigijaumajut kiggatutte
unnusauluttumi pitjutigidlugit tuktuut taimaimmat allatausimajut
katimaviujumi. Ammalu, tukisinatsiajut, allatausimajut,
uKautausimajunik ammalu KaujikKujituinnavunga
allatatausimajunit allaKutimmit. Angnigijaumajut kiggatuttet
uKâlaKatigelaummata unnusauluttuk tagvangat pisimajunik
sakKititsinialikKugut Kaujigatsanik ammalu katimautausimajunik
ubvalu uKâlatigejunit ikajuttaugutilittinut pitjutigillugit George
River Tuktuut, angiKatigettuKalaukKuk ikajutsinginnaniattugut
UPCART-tikunik pijagettauluninut aulatsigiamut pannaigutik
ullusaKatillugu. Kajusimalluta papvisâllugit prâvins
nukKatitsiKulklugit nukKangattitaujunik NunaKakKâsimajut
niKitsatasongulittilugit George River Tuktunginnit.
NukKangattitaujuk nukKatitaungipat prâvinsimut,
maligatsaliugiaKavuk ilonnainik adjigettumik ilonnasianginnut.
Tamanna tusalauttavut uKattaunginnatillugu.
IkajutsimainnaniakKugut nukKangattisiutimmik ilijausimajuk

prâvinsimut pitjutigillugit George River Tuktungit, tukisimalluta pijagelânninga maggoni jârenni agvamilu ammalu taitsumani kamagigiallaniallugu. SuliaKaKatigilâttavut ilonnatik ilauKatigejut kajusimagiamut ammalu unutsiumitillugit Kaujisannet pitjutigillugit George River Tuktungit. Ammalu, kingullipâmik uKallunga, tamanna tusaluttavut unuttunit nunalinnit, kajusimakKujijut asinginnik niKitsaugajattunik niKituKanik ininganotsilutik tuktuviniup. Pitjutigillugit Torngat Tuktungit, pijuKasimavuk-, pitjutaualauttuk uKâlautaudluni uKâlaKatigigialivut Makivik aulatsijingita maligatsangit ilingajut Torngat KakKasuanginni Tuktunut, isumatsasiugutigillugit piusiugajattut niKitsatagiaKanginingit Torngat KakKasuanginni Tuktunit. Nakummek, Mr. UKâlalte.

MR. UKÂLATTI:

Nakummek, Nittunattuk Sarah Leo. Una allaKutik kititaKaniattuk sâmmotauguni allaKutik 04-4(3). Adjiliulâttavut tuniniallugu katimajitsuanut kiggatuttinut. Katimautitsak 13, "Kaujitsiutik Aulatjaigutimik." "KaujigatsaKava ullume? Katimautitsak 14, "Kautjitsiutet Aulatjaigutunik Sivullipâmik Atuattaunitsangit Maligatsait." KaujigatsaKangilak aulatjaigutunik ullumi. katimautitsak 16, "Sivullipâmik Atuattauningit Maligatsait." PitaKangilak sivullipâmik atuattaugialinnik maligatsanik ullumi. katimautitsak 17, "kingulliani Atuattauningit Maligatsait." PitaKangilak kingulliani atuattaugatsanik maligatsanik ullumi. katimautitsak 18, "Angiutauningit Maligatsait." PitaKangilak angiutitsanik maligatsanik ullumi. katimautitsak 19, "Nâjinik." Mânnaujuk nakummevunga Ministerinik ammalu kiggatuttinik, katimatitsijinik ammalu AngajukKânik ikajutsiKattamata, ammalu pimmagittumik taillugit uKattet/ablasângutitsijet, Rita Andersen, Augusta Erving, Wilson Jararuse, pijet, Tabea Onalik ammalu Colin Hunter, ammalu Ches Evans Kagitaujaligiji. Ammalu, ilitagumajavut OKâlaKatiget suliaKattinik, Sarah Abel ammalu

Joansi Tuglavina, ammalu Ikajuttinga Allatiup, Hilda Hunter.
Pilukattailillusi ingiggasialâkKusi, Kuve Inovia, ammalu Nutâmi
Jârimi. Taimâk uKagegama, katimajitsuat nâjjit, ammalu
kingullimik katimalâmmijut wogingani Januar 19-mit 23-mut, 2015.
Ammalu, Sarah uKakKaumat, ullusasi kamagillugit ammalu
pivitsaKallusi. KaujimajaukKujaga katimajitsuat, Rita Andersen
Inuttitut ilinniatitsiniattuk katimajitsuanik kiggatuttinik ammalu
suliaKattinik katimavimmi suvailiak agvami.

ANGAJUKKÂK LEO: Pijâgingilanga, Kanuk akunettiginiattong?
Kaujigumatuininavunga...

MR. UKÂLATTI: Atautsimi sitondimi.

ANGAJUKKÂK LEO: Ate. UKagiallagunnaKingâ? Ilingajuk NEC-kunut, pijagetuappata
Inuttitut ilinnianingit, pijageniattavut NEC pigiasilauttavut
Montâgimi unnusami, Dienestâgimaunut unnuami,
sunaulauttukiak ullunga, Âhai?

MR. UKÂLATTI: Ammalu katimajuKaniakKuk unnusa pigiasillutik
AngajukKauKatigengit Labradorimi Inuit katutjiKatigenningit.
Katimaniattut katimapvimi sepami unnusa. Nittunattuk Sarah Leo,
ilatsigiagumaven?

ANGAJUKKÂK LEO: Auka, ikKaitigasuatuinnaKauvagit uKautikKulugit katimajitsuat
ilauKatauningit AngajukKauKatigenginnut LIA ammalu nigijugijaujut
tamânekKujauullutik.

MR. UKÂLATTI: Ate. ImmaKâ Sarah uKakKaujuk tamâni. Ammalu asia Kaujigatsak,
tingijok aktasiak aullalâttuk Kauppat ullâkut. Sitonditsanganik
KaujititaulâkKusi taitsumani. ApitsutuKagumagiallava pitjutigillugu
ingigganitsait, apitsugunnatasi Hilda Hunter. Ammalu,

takuniakKasi Inuttitut ilinnialigutta ammalu unnusa ilonnasi
katimapvimi.

ANGAJUKKÂK LEO:

Ammalu nakummevunga, immaKâ, suliaKattinik mâni Hopedalemi
atuttisiKattamata OKâlaKatigekkunik itsivautâggulannik.
Idluggijannagunatuinnait ammalu ikKasutsiamata tamatsuminga.